


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO 1
SAN MARCOS 56
SAN LUCAS 90
SAN JUAN 149
LOS HECHOS 191
ROMANOS 244
1 CORINTIOS 267
2 CORINTIOS 291
GALATAS 306
EFESIOS 314
FILIPENSES 321
COLOSENSES 327
1 TESALONICENSES 332
2 TESALONICENSES 337
1 TIMOTEO 340
2 TIMOTEO 347
TITO 352
FILEMÓN 355
HEBREOS 357
SANTIAGO 374
1 SAN PEDRO 380
2 SAN PEDRO 387
1 SAN JUAN 391
2 SAN JUAN 397
3 SAN JUAN 398
SAN JUDAS 399
APOCALIPSIS 401

MATEO REMBICUACHIA JESUS RECOUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram.

⁴ Aram rahir Aminadab, Aminadab rahir Naasón, Naasón rahir evocoyase Salmón. ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si secoi. Ahe imembri Tüpa Rembiporavo Poropisirosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai seroco agüer pipe Babilonia ve; ahe omomba avei catorce yesu yoapi agüer. Mbiguai ava serocosa sui oyepota araviter Poropisirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiêhi viteseve rumo, Espiritu Santo piratasa pipe imembi. ¹⁹ Evocoyase José, imevi, ahe ava seco catupri vahe, “Tapoiño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opihãñemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda água. Esepia, Espiritu Santo sui ou imembirã. ²¹ María virecose omembri, pemondora sererguã Jesús. Esepia, ahe oipisiora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehugar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(‘Tüpa yande rese ité secoi’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndoyapo vıteı eté rumo mbahe oyese yuvıreco. Yıpındar imembira rane ité, ahesé José omondo Jesús sererguã.

2

Ava yasıtata rese oyembohe vahe ari sêsa cotındar yuvıraso pıtani repia

¹ Herodes mborerecuar guasu recose, Jesús oha Judea ivı rupı tecua Belén ve. Coıye yugüeru ava yasıtata rese oyembohe vahe ari sêsa cotı sui Jerusalén ve. ² Ahe oporandu Herodes upe yuvıreco aıpo ehi:

—¿Que vo aıpo oha judıo rerecuar guasu? Esepia niha, caharu cotı yasıtata orosepia. Sese oroyu ari sêsa cotı sui imboeteı ägua —ehi yuvıreco chupe.

³ Aıpo ihese, mborerecuar Herodes oyembosıquıye têi, ava Jerusalén pendar aveı ägüe ehi pãve yuvıreco. ⁴ İyaveı cürıteımi opa omonuha uca pahı rerecuareta, Moısés porocuaıta rese oporombohe vahe aveı. İpare oporandu chupe:

—¿Que vo aıpo ohara Poropısırosar? —ehi.

⁵ Ahe omboyevı yuvıreco chupe:

—Ahe ohara Judea rupı Belén ve —ehi—. Esepia, Tüpa ñehe mombehusar Mıqueas rembicuachiagüer pıpe aıpo ehi:

⁶ ‘Pe, tecua mıni Belén pıpendar, ndahei ivı cotı têi vahe ambuae tecua Judá pıpendar sui peıco.

Esepia, pe sui osêra mborerecuar che recua iguar İsrail yocuıı ägua’ ehi —ehi

yuvıreco Herodes upe.

⁷ Aıpo hese, Herodes oñehe ñemi ava yasıtata rese oyembohe vahe upe ‘toıcuı eme ava yuvıreco’ oyapave oporandu: “¿Mbahe yası pıpe ité vo pesepı ramo aıpo yasıtata?” ehi. ⁸ Oyeupe mombehu pare, omondopa Belén ve aıpo ehi chupe:

—Peso evocoyase, peseca pıtani. Acoı peyosuse, co rupı aveı peyevı cheu icua uca ägua. Che aveı evocoyase tasomı imboeteı —ehi angahu chupe.

⁹ Aıpo oyeupe he pare, yasıtata rese oyembohe vahe osırıño voi yuvıraso. Ahe pıpeve yasıtata oyemboyecua ıri senonera. Ichui pıtani recosa rese tuprı tecua Belén ve opıta yasıtata. ¹⁰ Sepıase, ovıhareté yuvıreco. ¹¹ İpare yuvıroıque oı pıpe, osepia pıtani ichı María reseve yuvıreco. Ichui oñenopıha sovıı imboeteısa pıpe. İpare opõhe ombahe rıru pıpe yuvıreco oıcuavêhe vaheřã oporerecosa sepırusu vahe oro, itası, ambuae mbahe sıacuı vahe mırra serer vahe aveı. ¹² Yuvıroyevıse güecuave yuvıraso, ndoyuvıroyevı ıri Jerusalén rupı mborerecuar Herodes upe imombehu. Esepia, Tüpa aıpo omombehu ıquerve chupe ambuae perı rupı iyevı ägua.

Jesús pıtani seroñemısa Egipto ve

¹³ Aıpo ava yepepı pare, José upe oyemboyecua Tüpa rembiguai ıquerve, aıpo ehi chupe: “Eñarapuha, eroñemi pıtani ichı reseve eraso Egipto ve. Aheve erepıtara acıı che amombehuse voi nde yevı ägua. Esepia, mborerecuar Herodes oseca pıtani yuca ägua oıco” ehi chupe.

¹⁴ Ahe pıtu pıpeve voi José vıraso pıtani ichı reseve Egipto ve. ¹⁵ Aheve yuvırecoı co mborerecuar Herodes mano řãro. Co rupı imboavıyesa Tüpa ñehe mombehusar remımombehugüer: “Egipto sui anose che Rahır” ehi vahe.

Herodes oyuca uca chıııvahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chñihivahe cuimbahemi yuvireco opacatu ñuvirío araviter ovireco vahe, chñihivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrítei. ¹⁷ Ēgüe ehi yaviye Tūpa ñehe mombehugar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehugar remimombehugüer: “‘Nazaret pendar’ ehira serecosa” ehi vahe.

3

Juan Oporoāpiramo vahe ivi iporupirēhisa rupi secoi

¹ Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuaēhisave ² aipo ehi: “iPemboasi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehugar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave:

‘Pemoingatu yande Yar raperā; pemohivi tupri avei’ ehi” ehi aracahe.

⁴ Juan turucuar ahe camello ragüer apopri, sumbicuasa mbahe pিরer, sembihi evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu ⁶ oangaipagüer mombehu āgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: “iPe mboi mboetasa tēi peico! ¿Ava vo, ‘Pesēra Tūpa ñemoirosa ou vaherā sui’ ehi tupri tēi pēu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia āgua. Ichui yasia pare imondosa tatave. ¹¹ Che i pipe tēi opoāpiramo Tūpa upe pe yevi āgua. Oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui. ¹² Ahe oipehara mbahe rāhii ihigüer sui. Sāhii evocoyase oyapocatura, ihigüer rumo omondora tata apirēhi vahesave” ehi.

Jesús āpiramosa

¹³ Ipare Jesús oso Galilea sui iai Jordán ve Juan recosave ‘tache āpiramo’ oya.

¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

¹⁵—Ëgüe tehiño aipo. Iyacatu yayapora Tũpa porocuita —ehi Juan upe.

Evocoyase Juan, “Aviye” ehi chupe. ¹⁶Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tũpa Espiritu ogüeyise ou iharive apicasu nungar. ¹⁷Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

¹Ipare Tũpa Espiritu viraso Jesús ava yemboerecuaẽhisave ‘tosecoãha Carugar’ ohesa pipe.

²Aheve cuarenta ari, cuarenta pĩtu ndocarui. Sese ndasiepoi eté oico.

³Evocoyase oyemboya Carugar sese secoãha ãgua, aipo ehi chupe:

—Tũpa Rahir ité nde recose, co ita sui eyapo pan cũritei —ehi.

⁴Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñehengagüer reroya pipe ava yuvirecovera yepi’ ehi —ehiño chupe.

⁵Ichui Carugar viraso Jesús Jerusalén maranehi pipendar tũparo torre apiterve. ⁶Aheve aipo ehi chupe:

—Tũpa Rahir ité nde recose, eviapi cohava sui. Esepia niha, icuachiapri pipe:

‘Tũpa oyocuaira güembiguai eta nde rãro ãgua.

Ahe nde mopuhara yuvireco que ñepeí ita nde momara rãgüer sui’ ehi —ehi Carugar chupe.

⁷Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

⁸Ipare Carugar viraso iri ivitri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹aipo ehi:

—Che rovai ereñenopihase che mboetisave, co opacatu mbahe nde rembiepia amondora nde mahera —ehi Carugar chupe.

¹⁰Aipo oyeupe hese:

—Eyepipi che sui cũritei, Carugar —ehi—. Esepia, icuachiapri: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Carugar upe.

¹¹Ahese Carugar oyepepi ichui. Ipare Tũpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹²Jesús oyanduse Juan roquendasa, oso Galilea ivi rese Nazaret ve.

¹³Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei. ¹⁴Na ehi yaviye Tũpa ñehesombehusar Isaías rembicuachiagüer aipo ehi vahe aracahe:

¹⁵“Co ava ivi Zabulón pendar, Neftalí pendar, para guasu ivirindar, iai Jordán rovaingar iyavei Galilea pipendar ndahei vahe judío,

¹⁶ ahe aviye pītumimbisave yuvirecoi vahe, osepia ramo vahe tesapesa yuvireco; iyavei mano rāgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivi i uguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoiyase:

—Pe pira recasar peico. Perio che rupi. Na peye aveira ava reca āgua cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuvirasosupi.

²¹ Coi coti catu aipo Jesús osepia ambuae mbia Santiago tivri Juan reseve, ahe uguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramoseve, opaño oporaviquisa sui opoi yuvireco, oseyaño oyesupa, yuvirasosupi.

Jesús ombohe ava rehi

²³ Jesús evocoiyase uguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. ²⁴ Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, caruguar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

²⁵ Ēgüe ehi ava rehi uguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5

Jesús oporombohe ivitri ve

¹ Ñepe ari pipe, ava rehi repiase, Jesús oyeupi ivitri rese. Aheve uguapi oĩ. Aheve semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicua mbahe ipane vahe Tūpa rese ité güeco tupri āgua. Esepia niha, chupe nara ité Tūpa mborerecuasa.

⁴ “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetasa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catupri Tūpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

¹¹ “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che

recocuer sui tēi yuvireco. ¹² Pe rumo peyembovihañora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri água, ndiporusai chietera; imombopasara ava pirunga água yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi água. ¹⁵ Iyavei ndayamoendú chira tataendi mbahevrive tēi. Iyacatu rumo yasupí ivate sendave opacatu oí pipendar ava resape água. ¹⁶ Pe ēgüe peye aveira pemboyecua ava eta upe pe recocuer aviye vahe. Ipipe sui tomoetei yande Ru Tūpa íva pendar yuvireco” ehi ava rehí upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi água iyavei Moisés porocuita cuachiapri mboyeroyaēhi água avei no’ peye tēi cheu. Ēgüe ehi rumo che ayu imboaviye água. ¹⁸ Supí eté co íva, ivi avei yandeu oime vitemiseve, ndipoi chietera que ñepeí yepe Moisés porocuita, que ambuae Tūpa ñehe mombehusar rembicuachiagüer ocañi tēi vahe; ñepeí-peí porocuita imombehupri imboaviyesaño itera. ¹⁹ Sese acoi ava ndoviroyai vahe que ñepeí mborocuita-mira viña, ombohe avei ava seroyaēhi água, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi. ²⁰ Iyavei amombehu pēu: acoi pe reco ívi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahe ndapeiquei chietera Tūpa mborerecuasave” ehi.

Jesús oporombohe ñemoiroēhi água rese

²¹ “Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi. ²² Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu água mborerecuar ivate catu vahe rovai. Acoi ava rumo oñehe marase seroírosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴ peseya rane pe porerecosa aheve; peyeví rane pe amotarēhimbar upe pēu iñero água rese. Acoi peñerose oyeupe, ahe se voi peyeví, tapeicuavēhe pe porerecosa Tūpa upe.

²⁵ “Iyavei peyeamotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso água. Ichui aviyeteramo ahe pe roquenda ucara. ²⁶ Supí eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi água rese

27 “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe. 28 Che rumo aipo ahe pëu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

29 “Iyavei inungar que pe resa pe acato cotindar oipota rai ucasa mbahe pëu pe mboangaipa ãgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. 30 Iyavei inungar que pe po pe acato cotindar pe mboangaipa ucasa, iya peyasía ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi ãgua rese

31 “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. 32 Che rumo aipo ahe pëu: ava opoise güembireco sui, cuña ndoyaviise mbahe, ahese ombopihañemoñeta tiētera güembireco mboaguasa uca ãgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi ãgua rese

33 “Iyavei peicua acoi aipo ehi vahe pe ramoí upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. 34 Che rumo, ‘Ndapeñehi chira que mbahe rer pipe, iva rer pipe tēi avei’ ahe pëu. Esepia, ahe niha Tūpa renda; 35 ivi rer pipe tēi avei ndapeñehi chira. Esepia, ahe Tūpa pirunga; Jerusalén rer pipe avei ndapeñehi chira. Esepia, ahe niha mborerecuar ivate catu vahe recua. 36 Pe ãca rer pipe avei ndapeñehi chira. Esepia, ndapeicatui chira que ñepeí pe ha momorochi ãgua, imou ãgua avei. 37 Sese niha peñehese, ñepeí reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi ãgua

38 “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sái ichui, sái avei senosesara’ ehi vahe. 39 Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. 40 Porandusave pe rerasose pe camisa rerocua ãgua yuvireco pe sui, pe saco avei pemondoñora chupe. 41 Ñepeí legua rupi evosii co mbahe rese cheu’ ehise que ava pëu, pe rumo perasoñora ñuvirío legua rupi chupe. 42 Iyavei oporanduse que pe mbahe rese yuvireco pëu, pemondoño avei chupe. Aní chira perecatēhi sese” ehi.

Pesaisu pe amotarēhimbar

43 “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe. 44 Che rumo aipo ahe pëu: Pesaisu catu pe amotarēhimbar iyavei peyeroqui pe momara potasar rese. 45 Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. 46 Pe raisupar güeraño pesaisu catu tēise, ndapeipisii chietera porerocosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. 47 Ndaheí yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco

yepi. ⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo āgua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisi chietera pe Ru Tūpa iva pendar porerecosa. ² Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbī omoñehe yuvireco ‘Co ava aviye itē yuvirecoi, tehi angahu yuvireco yandeu’ oya tēi. Supi etē aipo ahe pēu: ěgüe ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar itē viña. ⁴ Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure āgua rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyerogui yuvireco cupiha yacatu avei ‘tayande repia angahu vahe’ ohesa pipe tēi. Supi etē che aipo ahe pēu: ěgüe ehi vahe opa voi etē co ivi pipeve tēi oipisi porerecosa yuvireco. ⁶ Iyacatu rumo pe, peyerogui potase, peiquera pe rēta pipe peyeoquendarā pe ae pe yeroqui āgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyerouise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroa voira’ ohesave yuvireco viña.

⁸ Aní chira inungar tēi peico. Esepia, pe Ru Tūpa oicua pe porandu renondevē mbahe ipane vahe pēu. ⁹ Sese aipo peyera peyerogui: ‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarēhimbar upe.

¹³ Ore mboangaipa ucai rene eve; eipeha mbahe naporai vahe ore sui peyera.

¹⁴ “Esepia, pe amotarēhimbar upe peñerose, pe Ru iva pendar avei iñerora pēu; ¹⁵ ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi etē aipo ahe pēu: ěgüe ehi vahe opa voi oipisi porerecosa ava gūepia pipe tēi yuvireco. ¹⁷ Pe rumo peyecuacuse, peñeaca mondorō tuprira, peyovai tupri aveira. ¹⁸ Evocoiyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepia vahe, gūeraño oicua pe yecuacusa. Ahe evocoiyase iporerecora pe rese curi” ehi.

Mbahe porañeté vahe oime ivave

19 “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tẽi opochi ati-ati oapocatusave, imonda vahe avei evocoiyase imondaño sese pẽu. 20 Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi água. 21 Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

22 “Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape; 23 acoi imarase rumo, opacatu yande retecuer pĩtumimbisave tẽi secoi. Tesapesa oime vahe yande rese, ahe ogũese rumo yande sui, mbahe tẽi eté, pĩtumimbi nungar opacatu yande recocuer upe” ehi.

Guarepochi pota raisa; Tũpa mboyeroyaẽhisa

24 “Iyavei ndipoi chietera que ava ñuvirio güerecuar omboyeroya vahe. Esepia, ñepeí oyamotarẽhira imboyeroya potaẽhisa pipe, ambuae evocoiyase osaisu catura imboyeroya pipe. Ëgũe peye avei, ndapeicatuí Tũpa mboyeroya guarepochi pota raisa pipe” ehi.

Tũpa osãro guahireta

25 “Iyavei ndapeyemomahenduha guasu ai chira mbahe pe remihura rese pe recove água, pe ihu água rese, pe turucuarã rese tẽi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. 26 Pesepia vĩrai eta oveve vahe: nomahetii vahe, nomonuhai avei, ndoyapocatuí avei mbahe yuvireco. Pe Ru Tũpa iva pendar ité niha omoime mbahe itohu. ¡Pe rumo ivate catu vahe ité peico vĩrai sui! 27 Ndipoi que ñepeí pe pãhu pendar oicatu vahe opihañemoñetasa pipe tẽi güecocuer mopucu iri água.

28 “Ndahei chira pe turucuarã rese tẽi peyemomahenduha guasu ai. Pemahecua ru mbahe potri caha pipendar rese: ndoporaviquií eté iyavei ndoipiai oturucuarã. 29 Iyavei yepé mborecuar guasu Salomón víreco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. 30 Tũpa niha omboporañete raimi tẽi mbahe potri caha pipendar, moviro arí tẽi yasepia, ichuí sapisapaño horno pipe. ¡Ahe rumo omondo catura turucuar pẽu, pe ava nimbahe reroya tuprii vahe! 31 Sese, ‘¿Mbahe pĩha yahura, yaihura?’ Iyavei, ¿mbahe pĩha yamondera?’ ndapeyei chira pe yemomahenduha guasu aisa pipe. 32 Ava Tũpa reroyasarehi aipo nungar reseño tẽi ipihañemoñeta yuvireco yepi. Pe Ru Tũpa iva pendar rumo oicua ité pẽu mbahe ipane vahe. 33 Pemahenduha rane Tũpa rese pe recocuer tupri pipe ipovrive mbahe pe yapo água semimbotar rupi, ahese omboura opacatu co mbahe ipane vahe pẽu. 34 Peyemomahenduha guasa ai eme mbahe peyapo vaherã rese. Iyacatu rumo ahe arí oyepotase voi, peyemomahenduhara sese. Esepia, arí yacatu rupi oime mbahe pe-moingatu vaherã yepi.

7

Aní, ‘Oyavi mbahe’ peye voi ambuae upe

1 “Ndiyai, ‘Oyavi ité mbahe’ peye voiño tẽi ambuae ava upe; evocoiyase Tũpa, ‘Oyavi mbahe’ ndehi chira pẽu. 2 Esepia, inungar pe ambuae ava upe peico, egũe ehi aveira niha Tũpa pẽu. 3 ¡Mahera ambuae ava rembiavimi

rese tēi pemahe! ¡Iya rumo peyese rane mbahe tuvichá catu vahe pesepia!⁴ Ndiyai pēu, ‘Che toropítivii mbahe nde rembiavi rese’ peye vaherā chupe. Esepia, ¡pe peyavi guasu catu mbahe ichui!⁵ ¡Pe Tūpa reroyasar angahu tēi peico vahe! Penose aca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndape-mondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peoporandu Tūpa upe pēu mbahe ipane vahe rese

⁷ “Peoporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu.⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyoquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepepe pe pāhu pendar omondo vaherā ita tēi guahir upe pan rese oyeupe poranduse.¹⁰ Que pira rese oyeupe poranduse revo, ndomondoi chiaveira mboi tēi chupe.¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru ¡va pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuaita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso;¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ívira aviye vahe icuasa iha rese

¹⁵ “Coipe yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.¹⁶ Ava recocuer icuasa sembiapo rese. Esepia, ndahiphosai yu sui uva, ndipohosai avei higuera ha ívira sáchi ati vahe sui.¹⁷ Evocoiyase ívira aviye vahe, iha aviye avei; ívira naporai vahe, iha naporai avei no.¹⁸ Esepia, ívira aviye vahe ndovirecoi oha naporai vahe, iyavei ívira naporai vahe ndovirecoi oha aviye vahe.¹⁹ Sese opacatu ívira iha naporai vahe yasiasa yepi. Ichui imondosapa tatave.²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru ¡va pendar remimbotar aposar año tupri rumo yuviroiquera aheve.²² Arí cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu.²³ Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyeputa tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acói ava che ñehengagüer rese ndoyapisacai vahe rumo, ahe inungar ava opihañemoñeta tupriñehisa pipe omopuha vahe ivi cuhi harive tēi güetarã. ²⁷ Ipare rumo oyeputase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuita rupi. Ipīpe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ēgüe ehi tecua Capernaum ve oyeputa oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pipe tēi che remimboacua ocuerara. ⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiaí eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerrecuasave Abraham, Isaac iyavei Jacob piri coíye.

¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuere, oñarapuha ava rese ohañeco água.

Jesús ombogüera setá ava imbaheasi vahe

¹⁶ Ipare pítu ramose setá carugar vireco vahe ogüeru yuvireco chupe. Jesús rumo ñepei reseve oñehe pipe tēi omombopa carugar ava rehii sui, iyavei opacatu imbaheasi vahe ombogüera avei no. ¹⁷ Ēgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbaheasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so água” ehi. ¹⁹ Ahese Moisés porocuaite rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi — ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepia, vīrai vireco guaiti, iyavei aguara vireco oquesa; che rumo, Ava Riquehīr, ndarecoi que che rēta ité che pituhu água yepi — ehi.

²¹ Ipare ñepei ivoya aipo ehi chupe:

—Che Yar, che ru manore voi che nde rupiño ité aicora — ehi.

²² —Aní, cūrīte voi eyu che rupi — ehi—. Ēgüe tehiño ava secocuer omano vahe nungar, ahe ae toñeñeti yuvireco — ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuvirasos carite pipe. ²⁴ Ipa pipe yuvirasos pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayī eté, seni-seni carite oyopi. ²⁵ Evocoyase semimbohe yuvirasos voi imomahe:

—¡Ore Yar, yande rerasora mo co carite ipive! ¡Yande pīsiro eve! — ehi yuvireco chupe.

²⁶ Evocoyase aipo ehi:

—¡Mahera pesiquiye! ¡Ndapeyeroai eté che rese! — ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷ —¿Mara ehi rutei pīha co? — ehi tēi semimbohe yuvireco chupe—. ¿Mara ehi vahe pīha co ava secoi?

Esepia niha, ivitu, para guasu avei omboyeroa yuvireco no — ehi.

Jesús omboyepepīpa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuvirasos. Aheve ñuvirío ava carugar vireco vahe yugüeru sovaīchi. Ahe ava tehögüer ruvīpa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe perī rupi yuvireco yepi.

²⁹ Jesús repia ramoseve rumo, oñehe pīrata yuvireco chupe aipo ehi:

—¡Jesús, Tūpa Rahīr, eyepepi ore sui! Esepia niha, ndoyepota vitei arī nde ore mombaraisu água oreu — ehi tēi yuvireco.

³⁰ Namombriimi cuchi rehi yuvirecoi ichui. ³¹ Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

³² —Aviye, peso —ehi carugareta upe.

Aipo hese, carugar opa yuvinose ava sui, yuviroique cuchi rehi aviterve. Ipare rumo cuchi ndayaracua iri yuvireco; ivi socuer rupi yuvinoña yuviraso, opa ipa pipe ocañi tēi yuvireco.

³³ Yuvinoña evocoyase cuchi rārosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvinose ati Jesús upe, “¡Eso cohave sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve.

² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuse co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tüpa ñehe nungar pipe tēi oñehe!” ehi Moisés porocuaita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie? ⁶ Tapeicua ru che, Ava Riquehir, arco mborererecuasa co ivi pipe ava angaipa upe che ñero ñgua —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rētave —ehi.

⁷ Ahese opñha voi, oso güētave. ⁸ “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opīratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborererecuar guasu upe guarepochi rerochuasa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe ari pipeve Jesús güemimbohe reseve yuviroique che rētave. Ambo-caru setá ambuae ava guarepochi Roma pendar mborererecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pñhube tēi? —ehi seroñrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo osea yuvireco. ¹³ Peyapisaca icuachiapri aracahendar aipo ehi vahe rese: ‘Poroparisuerecosa aipota; ndaipota mbahe cheu serocuavēhepri tēi’ ehi. Esepia, ndayui ava seco catupri vahe reca, ēgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¡Ndiyai eté ichohopri mendasave ndoyembovihalai yuvireco imer oicovese ipāhuve! Oimera rumo ari imer reraso āgua ichui curi. Ahese ramo oye-cuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe piler cuacua vahe pipe. Ēgüe ehise, mbahe piler opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe piler ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar ofienopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opūha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opiha pipe: “Yepe que iturucuar popi resemei tēi apocora, acuerara rumo” ehi. ²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbi vahe iyemoingatu-pase omano vahe tī āgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohave sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵ Ichui opa ava omose, ahese oique oi pipe oipopisi cuñatai. Evocoyase ahe oñarapuha voi. ²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucai yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco. ³³ Ichui omosese carugar, iñhengatu cute. Sepiase opacatu ava,
—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:
—Carugar rerecuar pīratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbahe rasiisa sui avei no. ³⁶ Osepiase ava rehi, oiparaisuereco yuvireco. Esepia, ahe oñemosañño tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepipi āgua iyavei iporombogüera āgua opacatu-catu tēi mbahe rasiisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir; ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu āgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepipi serecosar sui. Esepia niha, peipisi pīratasa ndasepiñ vahe. Sese peyapoño evocoi mbahe guarepochi piñiñhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyendar güerañño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise

avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui 'toipisi Tüpa ñemoirosa yuvireco' pe yapave. ¹⁵ Evocoiyase supi eté ari cañi oyepotase co tecua upe, ivate catura Tüpa ñemoirosa ava Sodoma, Gomorra iguar upendar sui curi" ehi.

Yamotarēhipirira Jesús reroyasar

¹⁶ "¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, ¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerecuar upe yuvireco, '¿Mbahe pīha amombehura chupe?' ndapeyei chira; acoi peñehe potase rumo, Tüpa omondora pe ñehe āgua pēu. ²⁰ Esepia, ndahei chira peyesui tēi peñehe, pe Ru Tüpa Espírítu pemoñehe ucara.

²¹ "¡Pare rumo ava vīvri omondora oamotarēhisar upe 'toyuca yuvireco' oya. ěgüe ehi aveira ava guahir upe; tahir avei oyamotarēhira oyesupa yuca oya āgua yuvireco che recocuer rese. ²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiroproi yuvirecoira curi. ²³ Iyavei acoi pe mañeco tēise ñepi tecuave yuvireco, ahese peyepipiñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

²⁴ "Ñepi yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, 'Aviye ité' ehiñora ombohesar osecoupitise. ěgüe ehi aveira mbiguai güerecuar upe. Acoi oi yar upe: 'Carugar rerecuar Beelzebú' ehise, aipo ehi aveira niha oi pipendar upe yuvireco no" ehi.

¿Uma sui pīha siquiyesara?

²⁶ "Sese ndapesiquiyei chira ava pe amotarēhimbar sui. Esepia, yaposa vahe imombehupirēhi cūrítei, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe pitumimbisave pēu, pemombehu ari pipe coiyé, iyavei acoi amombehu vahe pēuñomi, perosapucai pe rēta harive imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepia, ndoicatu niha ava hā mocañi āgua yuvireco. Tüpa sui rumo pesiquiye catura. Esepia, ahe oicatu yande retocuer, yande hā reseve imocañi āgua tata guasu pipe" ehi.

²⁹ "Yamondo niha ñuvirío vīraimi repirā ñepeimi guarepochi yepi. Yande Ru Tüpa ndoipotaise rumo, ndoviapi chietera que ñepi vīraimi" ehi. ³⁰⁻³¹ "Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tüpa niha oicua opacatu ñepi-peí pe ha retacuer" ehi.

"Che aicua Jesucristo" ehi vahe opacatu ava rovaque

³² "Acoi ava 'che aicua Jesucristo' ehi vahe opacatu ava rovaque, che avei evocoiyase: 'Co ava che rupindar secoi' ahera che Ru íva pendar upe. ³³ Acoi ava 'che ndahei Cristo rese aico' ehi vahe rumo cheu ava rovaque, che avei evocoiyase, 'Ndahei co che rupindar secoi' ahera che Ru íva pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa. ³⁵⁻³⁶ Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaïsu catu vahe che sui, ahe ndiyai eté seci che voyarā; inungar avei osaïsu catu vahe guahir, anise guayri che sui. ³⁸ Iyavei acoi noñemosai vahe mbahe rasiçuer upe, inungar-ra curusu rese ovosi vahe ité viña che rupi uguata pipe, ahe chupe ndiyai eté che voya seco āgua. ³⁹ Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tüpa ñehe mombehúsar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri. ⁴² Iyavei acoi omondo vahe que chíhi i sōhisa vahe que ñepeï seco mbegüemi catu vahe toihu che reroyasar seco rese, ahe oipisi aveira Tüpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca āgua

¹ Opase Jesús oyocuai doce güemimbohe, ahese yuviraso oporombohe Tüpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu āgua: “¿Nde ité vo Tüpa Rembiporavo aipo sãrombri ereico? anise, ¿oime tie ambuae orosãro vaheerã?” ehi yuvireco chupe.

⁴ Ipare omboyei chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoi vahe osareco tupri cūritei yuvireco, ipãri-pãri vahe uguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pisirosa resendar ñehesa’ peyera chupe. ⁶ ¡Oviharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús ombopi imombehu ava upe Juan recocuer: “¿Pesepiase Juan recocuer ava porēhisave capihiaata ivitu ombovambova vahe nungar pīha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo seci mborerecuar guasu rētave yepi. ⁹ Evocoiyase pesepiase, ¿‘Ava’ peye vo pe chupe? ¿Tüpa ñehe mombehúsar ité pīha? Taa, ahe ité. Evocoi niha ivate catu vahe Tüpa ñehe mombehúsar sui. ¹⁰ Ahe chupe ité Tüpa icuachiapri aracahendar pipe aipo ehi:

‘Che amondora nde renondeve che ñehe mombehúsar nde raperã moingatu āgua’ ehi.

¹¹ Supi eté ndipoi que ñepeï ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

12 “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opīratasa pipe imocañi āgua. 13 Opacatu Tūpa ñehe mombehusar rembicuachía pipe, Moisés porocuaíta icuachiapri pipe avei imombehusa Juan yusa rupive co Tūpa mborerecuasa resendar. 14 Yepe yavaira seroya āgua pēu viña, Juan rumo, Tūpa ñehe mombehusar Elías. Ahe imombehupri ou vahe. 15 Acoi ava osendu pota vahe che ñehe, toyapisacaño sese” ehi.

16 “¿Mbahe rese pīha amboyoyara ava recouer cūríteindar? Esepia, co ava inungar acoi chíhivave iguayí tēi vahe ocar rupi. Ipare oñehe pucu-pucu omboripar upe yuvireco aipo ehi: 17 ‘Oromoñehe tēi mimbí pēu, ndapepivoi eté rumo iyavei orosapucaí tēi sapucaisa viharēhisa resendar pēu, pe rumo ndapeyasehoi eté’ ehi. 18 Esepia, ouse Juan Oporoāpiramo vahe, ahe ndohui tembihu sepírusu ai vahe iyavei ndoihui uvá ricuer ipīrata vahe, sese, ‘Co mbia caruguar vireco vahe oyese’ peye tupri tēi chupe. 19 Coiye che ayu, Ava Riqueñir, acarú, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

20 Ahese Jesús oñehe pīrata moviro tecua pendar upe. Esepia, aheve acoi oyapo atí catu mbahe poromondiisa viña. Ahe pendar ava rumo ndosecuñaro potai eté güecocueraí Tūpa upe nara yuvireco. Evocoiyase aipo ehi chupe: 21 “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pāhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. 22 Pe rumo peipsisira ivate catu vahe Tūpa ñemoirosa ava Tiro, Sidón pendar sui arí cañi pipe coiye. 23 Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cūrítei oime vitera ahe tecua viña. 24 Sese, pe peipsisira ivate catu Tūpa ñemoirosa ava Sodoma iguar sui arí cañi pipe coiye” ehi.

Peyu cheu mbituhusa reca

25 Iyavei ahe arí pipe Jesús oyerure: “Che Ru, aviye ndeu. Nde niha íva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. 26 Ēgüe ere niha mbahe nde remimbotar apo, che Ru” ehi.

27 “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira. 28 Peyu cheu opacatu icueraí vahe. Che amondora pe pituhu āgua. 29-30 Peico che povrive, peyembohe avei che sui. Esepia, che ndache reco asií, iyavei che povrive pe recosa ndayavaimi eté. Ahese ramo oimera mbituhusa pēu” ehi.

¹ Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoiyase trigo rāhii oipohohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco — ehi yuvireco chupe.

³ Ahe rumo omboyeve ahe fariseo upe:

—Peicua tēi niha icuachiapri aracahendar mborererecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu āgua ondugüer reseve. Ahe chupe acoi ndipotasai ihu āgua yuvireco viña. Judío pahi yuvirecoi vahe upeño ité niha ipotasa ihu āgua yepi. ⁵ ¿Ndapeyeroquii vo Moisés porocuita resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶ Cūrítei cohava oime ava ivate catu vahe tūparo sui. ⁷ Evocoiyase pe ndapesenducuai eté Tūpa Ñehengagüer aipo ehi vahe: ‘Che aipota peporoparisuereco, aní chira peropovēhepa porerecosa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña. ⁸ Esepia, Ava Riquehir mbituhusa ari rerecuar ité secoi — ehi fariseo eta upe.

Mbia ipo nomii vahe Jesús ombogüera

⁹ Ichui oose Jesús, oique judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pñha mbituhusa ari pipe ava imbogüerava yepi’ — ehi yuvireco chupe.

¹¹ Evocoiyase Jesús aipo ehi imboyeve:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi — ehi.

¹³ Ahese aipo ehi aipo mbia upe:

—Eichoho nde yiva — ehi.

Evocoiyase oichohose oyiva, ocuera tupri voi inungar ambuae iyiva.

¹⁴ Evocoiyase fariseo opa yuvinose yuviraso oyemoingatu Jesús yuca āgua yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo pihañemoñetasa, osē oso, ava rehii avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ēgüe ehi yaviyepa Tūpa ñehe mombehusar Isaias remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihivi vahe opacatu ava ivi pipendar upe.

¹⁹ Noiñehopepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei patavimi oyeapa vahe; nombogüei chiaveira tataendi sātachiñomi tēi vahe.

Ēgüe ehira mbahe ihĩvi vahe pipe opacatu secopipa.

²¹ Evocoyase opacatu tecua pendar ava ndahei vahe judío oyeroyara yuvireco sese' ehi

Isaías aracahe.

“Jesús vireco carugar pīratasa oyese” ehi tēi ava yuvireco

²² Ichui ava ndasesapisoĩ vahe, noñehei vahe carugar rerecosar vīraso Jesús upe yuvireco. Evocoyase Jesús ombogüera. Ahese osareco, oñehe avei.

²³ Evocoyase opacatu ava oyepīhamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pīratasa pipe tēi omboyepēpi carugar ava sui” ehi yuvireco.

²⁵ Oicuaño rumo ipihañemoñetas. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco. ²⁶ Ēgüe ehi avei carugar. Esepia, serecuar omboyepēpise opovri pendar, ovavara oyeupe yuvireco viña. Evocoyase ahe oyemocañi tēira yuvireco. ²⁷ Iyavei pe, ‘Beelzebú pīratasa pipe sui tēi omboyepēpi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepēpi carugar ava sui yuvireco? Tūpa pīratasa pīpese, che avei evocoyase ayapo evocoi nungar ipīratasa pipe. Pe voya ae omboyecuara pe ñehe pe remblavi yuvireco pēu.

²⁸ Che rumo Tūpa Espīritu pīratasa pipe amboyepēpi carugar ava sui. Sese cūrteĩ pesepia ité Tūpa mborerecuasa.

²⁹ “Iyavei no, que ava oi que potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipare voi opara vīrocua imbahe ichui.

³⁰ “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espīritu upe, ahe chupe ndipoi chietera ñeroisa. ³² Iyavei acoi ava oñehe-ñehe tēi vahe che, Ava Riquehīr rese, ahe chupe oimeño ñeroisa; acoi oñehe-ñehe tēi vahe rumo Espīritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviyera; nderemoatiro tupriise ivira, ahe evocoyase vīrecora oha naporai vahe. Esepia, ivira icuasa iha rese.

³⁴ Evocoyase pe, mboi nungar tēi peico vahe, pe recocuer naporaise, ndapēcatu chira mbahe avīye vahe rese pe ñehe āgua! Esepia, pe pīha pipe sui tēi osé pe ñehe āgua. ³⁵ Iyavei acoi ava avīye vahe oñehe tupri opīhañemoñeta catuprisa pipe; acoi ava recocuer naporai vahe rumo, opīhañemoñeta raisa pipe tēi oñehe. ³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe avīye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyeve iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese gūeraño opomomahenduhara. ⁴⁰ Esepia, inungar Jonás secoci mbosapi ari pira guasu aviterve aracahe, ēgūe ehi aveira Ava Riquehir mbosapi ari ivivrive tuiira omano vahe pāhuve. ⁴¹ Evocoyase ari cañi pipe ava tecua Nínive pendar porandusave omombehura ava cūriteindar cañipa āgua. Esepia, Nínive pendar niha omboasise oangaipa, oyeve Tūpa upe yuvireco Jonás omombehuse Tūpa Ñehengagüer chupe. Cūritei rumo oime Jonás sui aviye catu vahe pe pāhuve. ⁴² Iyavei ari cañi pipe cuña mborerecuar guasu irohi coti secua vahe porandusave, omombehura cūriteindar ava cañipa āgua. Esepia, ahe ou amombri sui Salomón mbahecuasa rendu āgua. Cūritei rumo oime ivate catu vahe Salomón sui —ehi fariseo eta upe.

Carugar oyeve iri ava güeco agüerve

⁴³ “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuisse, ipihañemoñeta, ⁴⁴ ‘Ayeve irira che reco agüerve vicho’ ehi. Aheve oyēvise, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ēgūe ehi aveira ava cūriteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinohai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvinohai. Ahe oñehe pota yuvireco ndeu —ehi.

⁴⁸ Ahe rumo,

—¿Ava piha che si; ava piha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, oguapi ipa popive oī. ² Aheve ava oñemonuha atise yuvireco, oha carite pipe oguapi oī, evocoyase opacatu ava opita ipa popi rupi yuvireco. ³ Ahese omboyoya-yoya oporombohesa setā mbahe rese aipo ehi:

“Ñepe i mbia osē omaheti oico. ⁴ Ahe otiaپی-اپیسه mbahe rāhii oso, moviro oiti peri rupi. Vīrai ogüeyise rumo sese, opaño yuvirohu. ⁵ Iyavei moviro oiti ivi nayanaí vahesave ita pāhuve. Sese cūriteimi sorī; ⁶ ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve. Ahe yu rumo sorī poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setā iha imonuhasa; ñepe i ihī sui osē cién

iha, ambuae sui osē sesenta, ambuae sui treinta. ⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pīha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. ¹¹ Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. ¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. ¹⁴ Na ehi yaviye Tūpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndape-sepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera āgua’ ehi

Isaías aracahe.

¹⁶ “Pe rumo perorivete ité sepiacuase, pesenducuae avei no. ¹⁷ Supi eté setá Tūpa ñehe mombehusar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepia eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recouer rese. ¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui. ²⁰ Iyavei acoi mbahe rāhii seitipri ita pāhuve, ahe inungar ava recouer yipiño osendu vahe, oipisi vahe avei vorivetesa pipe Tūpa Ñehengagüer. ²¹ Ipare rumo inungar co mbahe miti ndovirecoi vahe guapo oviracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui.

²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secouer ndaviye iri eté, inungar mbahe miti ndihai vahe. ²³ Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secouer aviye vahe inungar ñepepei-sāhii sui osē que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhii oñoti vahe rese.

²⁵ Opacatu ava queseve rumo oyepota yamotarēhisar, caha tēi rāhii oñoti trigo pāhuve oso. ²⁶ Acoi trigo iha potase, supive avei sorī caha. ²⁷ Evocoiyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhii avīye vahe ereñoti nde ivi pipe? ¿Que sui ru caha sorī ipāhuve?’ ehi yuvireco chupe. ²⁸ Iyar rumo aipo ehi chupe: ‘Oime revo que che amotarēhisar’ ehi. Evocoiyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. ³⁰ ‘Evocoiyase peseya, tocuacuaño oyoya yuvireco. Yavīyese voi mbahe miti, ahese che ayocuirā oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer avīye āgua: “Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niporēhii vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Avīye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya. ³⁷ Evocoiyase omboyevi chupe: “Acoi ava mbahe rāhii avīye vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rāhii avīye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarēhimbar, oñoti vahe caha, ahe niha Carugar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. ⁴⁰ Iyavei inungar acoi caha tēi imonuhapri sapi āgua, ēgüe ehi aveira ari cañi pipe coiye. ⁴¹ Evocoiyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua āgua che povrive yuvirecoi vahe pāhu sui. ⁴² Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. ⁴³ Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoiyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo

aheve avei oñomi. Ipape vorivetesa pipe opacatu ombahe omondopa co ivi rerocua água mbahe sepírusu vahe pota raisa pipe” ehi.

Mbohír sepírusu catu vahe sui yembohesa

⁴⁵ “Iyavei Tüpa mborerecuasa inungar ava mbahe rerocuasar oseca vahe mbohír icatuprí vahe yepi. ⁴⁶ Ahe oyosuse mbohír sepí catu vahe, oso opacatu ombahe mondo co sepí catu vahe rerocua água.

Pira mbohasa sui yembohesa

⁴⁷ “Iyavei Tüpa mborerecuasa inungar pira mbohasa. Imondopri ipive. Ipape omboha opacatu-catu tēi pira. ⁴⁸ Acoi savapípose pira mbohasa, vínose iví átasave yuvireco. Aheve oiporavo pira aviye vahe oññaapa ombahe riruve yuvinoi, naporai vahe rumo opaño omombo yuvireco. ⁴⁹ Égüe ehi aveira ari cañi pipe: ahesa Tüpa rembiguai íva pendar yuvínosera opacatu ava ndaseco pñrai vahe mboyepepi água ava seco catuprí vahe sui. ⁵⁰ Evocoiyase ava ndaseco pñrai vahe imondosara tata guasuve. Aheve oyaseho tēira iyavei ombotere-tere tēira guái yuvireco” ehi.

Mbahe ipíasu vahe iyavei ocuacua vahe sui yembohesa

⁵¹ Evocoiyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoiyase ahe aipo ehi:

—Acoi ava oporombohe vahe porocuaite rese, oyembohe vahe avei che Ru mborerecuasa rese, ahe inungar ava oi yar vínose vahe ombahe ipíasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osē ichui ⁵⁴ oyepota güecuave oso. Aheve ombohe ava judío túparo pipe oico. Evocoiyase ahe pendar ava oyepihamondi tēi:

—¿Que pñha co ava oyembohe catu ombahecua água? iyavei, ¿mara ehi pñha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahír tēi? Ichi niha acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pñhuve. Evocoiyase, ¿que pñha oyembohera viña? —ehi tēi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tüpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nombotei yuvireco —ehi.

⁵⁸ Evocoiyase, ahe ava viroyaēhisa rese, moviro tēi oyapo mbahe poromondiisa ipñhuve.

14

Juan Oporoápiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerācua. ² Evocoiyase aipo ehi opítivisar upe: “Juan Oporoápiramo vahe revo ocuerayevi. Sese oyapo poromondiisa ipñrata vahe” ehi.

³ Esepia niha, yipendar Herodes Juan oipisi, oñapichi carena pipe soquenda água vivri Felipe rembireco Herodías sui tēi, ⁴ “Ndiyai eté nde rembireco nungar ererectora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tüpa ñehe mombehusar secoi” ehi yuvireco chupe. ⁶ Acoi Herodes haragüer

mboeteisa pipe rumo aipo cuña Herodías membri osê opivoi ava rehii rembiepiave. Herodes upe evocoiyase aviye ai eté. ⁷Sese ahe oyemoingatu ñepei reseve que mbahe oyeupe oporanduse imondo água chupe. ⁸Evocoiyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe áca poratu pipe cheu —ehi.

⁹Aipo ñehesa nombovihai eté Herodes; ndiia iri rumo, “Aní” ohe água. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰Ahese oporocuai Juan áca hasia água soquendasave. ¹¹Ipare víraso poratu pipe cuñatai upe yuvireco. Evocoiyase ahe omondo osi upe.

¹²Ahese Juan remimbohe oyepota yugüeru, víraso sete ñoti yuvireco. Ipare yuvirasó Jesús upe imombehu.

Jesús oyopoi cinco mil cuimbahe

¹³Jesús oyanduse Juan manosa, ahese ahe ae oso ava porêhisave carite pipe. Ava rehii rumo oyanduse, yuvínose voi güecua sui, ivi rupi yuvirasó osupiti secosave yuvireco. ¹⁴Evocoiyase osêse carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri. ¹⁵Evocoiyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶—Aní, ndiyai yuvirasó. Pe pemondora mbahe semihura yuvireco —ehiño chupe.

¹⁷—Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

¹⁸—Peruño ave cheu —ehi güemimbohe upe.

¹⁹Ipare aipo ehi ava rehii upe: “Peguapi capihí haríve” ehi. Evocoiyase oipisi poyandepomi vahe pan, ñuviriomi vahe pira. Ichui omahese íva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco.

²⁰Evocoiyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. ²¹Ahe cuimbahe ocaru vahe retacuer cinco mil. Cuña rumo iyavei chíhivahe ndipapasai yuvireco.

Jesús oguata i harí rupi

²²Ipare Jesús, “Peha pe rane carite pipe, pesasa ípa peso che renondeve. ‘Aviye’ tahe rane ava eta upe” ehi güemimbohe upe. ²³“Aviye” ohe pare ava upe, oyeupi oso ahe ae ivitri rese oyoeroqui água. Pítuse chupe, opitaño aheve. ²⁴Aheseve carite oso pucuse ípa popi sui, ivítu ipírata vahe osovaíchi yuvireco. Sese ohítu vahe nambegüe-mbegüei ocua sese. ²⁵Cõhe potase, oguata i harí rupi oso güemimbohe coti. ²⁶Semimbohe i harí rupi iguatase, oyembosiquiye yuvireco ichui. Sese,

—jNdahei vo evocoi hãgüer secoi! —ehi yuvireco chupe.

²⁷Güemimbohe upe rumo aipo ehi:

—jPeyemoviracuaño, che tēi! jPesiquiye eme che sui! —ehi.

²⁸—Che Yar —ehi Pedro—. Nde ité ereicose, taguata i harí rupi vicho nde piri —ehi.

²⁹—Erio ru —ehi chupe.

Evocoiyase Pedro ogüeyi carite pipe sui, oguata i hari rupi. Osora ipiri viña.
³⁰ Iviitu pĩrata repiase rumo, osiquiye ichui. Oso senise rumo ipive,
 —¡Che Yar! ¡Che pĩsiromi eve! —ehi.

³¹ Ahese cūrteimi voi oipisi Pedro po rese, aipo ehi chupe:

—¡Chĩhi tēi ereyeroya che rese! ¡Mahera ndereyeroya tupri che rese! —ehi.

³² Oyuvirohase rumo carite pipe, opituhu voi ivitu. ³³ Evocoiyase carite pipe yuvirecoi vahe ofenopiha sovai,
 —¡Supi eté catu nde Tūpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso. ³⁵ Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imbaheasi vahe chupe, ³⁶ aipo ehi yuvireco: “Topocomi tēi nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramo arachendar aracuasa rupi yuvireco? ¿Mahera vo yande porocuita mboaviyeehisa pipe ndoyepoi ocaru água yuvireco yepi? —ehi.

³ Jesús omboyeve aipo ehi chupe:

—Pe no, ¡mahera ndapemboyeroyai Tūpa porocuita pe ramo arachendar aracuasa rupi tēi pe guata água! ⁴ Esepia, Tūpa aipo ehi: “Pemboyeroyara iyavei peipitivira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo água pēu. Esepia, che opacatu mbahe areco vahe imondopri Tūpa upe’ ehise, ⁶ ahese ndiyai eté ipitivi água chupe” peye. Ēgüe peye pe aracua raisa pipe pemocañi Tūpa porocuita peyesui. ⁷ ¡Pe Tūpa reroysar angahu tēi peico vahe! Supi tupri ité Tūpa ñehe mombehusar Isaías rembicuachía arachendar omombehu pe recocer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuita tēi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehi upe—. Peyapisaca, pesenducua tupri che ñehe:

¹¹ mbahe oi que vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo ofemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ēgüe tehiño yuvireco. Esepia, evocoi inungar

ndasesapisoi vahe viroguata ambuae ava ndasesapisoi vahe yuvireco. Ahe evocoiyase oyoya voira oviapi ivicuar pipe yuviraso —ehi.

¹⁵ Evocoiyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osê setecuer sui? ¹⁸ Ava pihañemoñetasa sui osê vahe rumo iyuru rupi, ahe ava omboangaipa. ¹⁹ Esepia, ava pihañemoñetasa sui osê pihañemoñeta raisa, porapichisa, mendasa sui yemboaguasasa, nomendai vahe yemboaguasa têisa, mondasa, temira iyavei ava rese ñemoñeta têisa. ²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiñehisa nungar —ehi.

Cuña ndahei vahe judía viroya Jesús

²¹ Ichui osê Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paradisuercomi eve! ¡Che membri vireco carugar oyese! —ehi pucu-pucu ou chupe.

²³ Ahe rumo nomboyevi eté chupe. Evocoiyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoiyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che pñiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiñe chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osê oso ipa Galilea ivi. Ipare oyeupi ivitri rese oguapi oi. ³⁰ Aheve setá ava oyepota, güeru atí imbaheasi vahe yuvireco chupe: ndipindugüei vahe, ndasesapisoi vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoi vahe osareco yuvireco. Sepiase ava rehí oyepihamondí aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

³² Evocoiyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porêhi reseve amondo. Aviyeferamo oviroviapi-api tiêtera tieporêhi peri rupi yuvireco viña —ehi.

³³ Evocoiyase semimbohe aipo ehi yuvireco chupe:

—¿Que sui pīha orosecara tembihu ava rehi upe nara cohave ava porēhisave viña? —ehi yuvireco.

³⁴—¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoiyase, “Peguapi ivi harive” ehi ava rehi upe. ³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoiyase omondopa ava rehi upe yuvireco.

³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chíhivahe retacuer rumo ndicuasai. ³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoña agua yuvireco viña. “Emoporēhi Tūpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pīrá iteanga’; ³ iyavei añihivei: ‘Co pipe ari naporai chira. Esepia, iva rese pīra vai anga, pītu guasu-guasú avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cūriteindar ava upe imombehu. ⁴ Co ava ndaseco pōrai vahe oyepēpi vahe Tūpa sui oporandu poromondiisa rese ‘¿Tūpa suindar ité pīha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseyapaño ava rehi oso.

Fariseo iyavei saduceo porombohesa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoiyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¿Ndayarui eté rumo pan! —ehi-ehi tēi oyeupe yuvireco.

Ahe rumo oicua güemimbohe pihañemoñetasa. Sese aipo ehi chupe:

—¿Mahera, “Ndayarui pan” peye! ¡Pe ndapeyeroya tupri che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? — ehi.

¹⁴ Semimbohe evocoiyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elias”; ambuae ava aipo ehi avei yuvireco: “Jeremias”; anise ambuae ava, “Tüpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tüpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tüparoguã. Ñepi yepe manosa ndosecoreroyi chietera opĩratasa pipe. ¹⁹ Evocoiyase che amondo Tüpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Ani” erese que mbahe uve co ivi pipe, ãgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tüpa Rembiporavo Poropisĩrosar’ peye eme ava upe cheu” ehi.

Jesús omombehu omano ãgua

²¹ Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecar, pahi rerecar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. ²² Pedro rumo viraso co cotimi chupe oñehengata ãgua:

—iTüpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tüpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora. ²⁶ Esepia, ¿aviye ai angahu pĩha ava upe opacatu mbahe co ivi pipendar pisi ãgua, ahe ae tēi omocañise güecocuer yuvireco viña? ¿Mbovi pĩha omondora ava güecocuer repirã viña? ²⁷ Esepia che, Ava Riquehir, ayevira che Ru reco pĩratasa pipe che rembiguai iva pendar reseve curi. Che evocoiyase aicuarã ñepi-peí ava rembiapo agüer rupi chupe. ²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoiyase sendi sova inungar ari, iturucuar morochí, sendi avei. ³ Aheveve

voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴Ahese Pedro aipo ehi chupe:

—Che Yar, javiye ai eté cohave yaico! Ereipotase, ayapora mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

⁵Aviyeteramo tēi íva quiha rese osesapé ogüeyi ou oyopipa tupri ité. Ipãhuve oyeendo ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

⁶Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷Ahese oyemboya oso güemimbohe rese, oñatoi aipo ehi chupe:

—Pepũha; pesiquiyei rene —ehi.

⁸Evocoiyase omahe yuvireco sese, ahese ahe güeraño osepia imoha yuvireco.

⁹Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰Evocoiyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹Evocoiyase omboyevi güemimbohe upe aipo ehi:

—Elías rane ité niha oura opacatu mbahe moingatu ñgua curi. ¹²Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

¹³Evocoiyase semimbohe osenducua ramo ñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chñivahe carugar rerecosar

¹⁴Viroyepota Jesús güemimbohe ava rehüsave seraso. Aheve mbia oyemboya oso sese, oñenopiha sovai aipo ehi chupe:

¹⁵—Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, íve avei no. ¹⁶Sese aru tēi nde remimbohe upe. Nombogüera catui rumo yuvireco —ehi.

¹⁷—¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chñivahe cheu —ehi.

¹⁸Ahese oñehe pĩrata carugar upe chñivahe sui imose. Aheseve ocuera tupri voi eté.

¹⁹Ipare semimbohe oporandu co cotimi yuvireco chupe:

—¿Mahera pĩha ndoromose catui eté carugar ichui? —ehi yuvireco.

²⁰—Esepia, ndapeyeroya tuprii Tũpa rese. Supi eté sese pe yeroyasa, yepe ndoyavii chira mostaza rãhií tahimi vahe viña, aipo peyera co ivitri upe: ‘Esiri, eso coi coti’ peyera. Evocoiyase ivitri osiriño itera. Ahese ndapemboavaimi chira mbahe. ²¹Evocoi nungar carugar imosesa yayerurese yande yecuacusa pipe —ehi.

Jesús omombehu iri omano ñgua

²²Jesús oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarēhimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi. Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiqueste Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocuva guarepochi mborerecuar guasu co ivi pipe yepi? ¿Omu sui piha, ambuae ava sui tie? —ehi.

²⁶ Pedro evocoyase omboyevi chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepi chira yuvireco —ehi—. ²⁷ Guarepochi rerocuasar moñemoiroēhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepei guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoyase Jesús: “Erio” ehi ñepei chihivahemi upe, omondo güemimbohe pāhuve imoha, ³ aipo ehi:

—Supi eté, acoi ndapeñecuñarose iyavei ndapeicoise chihivahemi nungar, ahese ndapeiquei chira Tūpa mborerecuasa pipe. ⁴ Acoi oñemomini vahe rumo inungar co chihivahemi, evocoi nungar seco ivate catura Tūpa mborerecuasave. ⁵ Acoi ava oipisi vahe co chihivahemi nungar che rer pipe seroco, che ité che pisi yuvireco —ehi.

Iparaisu itera ava oporomongaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatura evocoi nungar ava ñapichisa ita guasu iyesho rese para guasu pipe imombo āgua. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroātoisa yepi, ¡ahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepia, aviye catu peiquera tecove apirēhisave ñepei pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepei pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Poromohesa ovesa ocañi tēi vahe resendar

10 “Peroĩroi rene que ñepei chĩhivahemi che reroyasar. Esepia, ivave sembuguai che Ru pirindar ité yuvirecoi yepi” ehi. 11 “Che niha, Ava Riquehĩr, ayu ava ocañi tẽi vahe pisĩro ãgua.

12 “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepei ichui viña, evocoyase oseyá ranera noventa y nueve tẽi vahe ovesa ivĩri rese. Oyevirá ocañi vahe reca oso. 13 Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. 14 Ēgüe ehi avei che Ru ivave secoi vahe, ndoipotai eté que ñepei ava che reroyasar chĩhivahemi nungar cañi ãgua” ehi.

Porombohesa yande ñero ãgua rese

15 “Acoi nde mboetasa Tũpa reroyasar oyapose que mbahe tẽi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. 16 Nande reroyase rumo, ahese ereñehera ñepei, anise ñuvirio ava upe nde pĩtĩvii ãgua rese. Ahe avei tosendu pe ñehe. Ahese oimera que ñuvirio, anise mbosapi sendusar. 17 Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tẽi aposar, ěgüe peye sereco” ehi.

18 “Supi eté acoi, ‘Aviye’ peyese que mbahe upe co ivi pipe; ěgüe ehi aveira ivave. Iyavei co ivi pipe, ‘Ani’ peyese que mbahe upe, ěgüe ehi aveira ivave.

19 “Iyavei co amombehu potami avei pẽu: Acoi ñuvirio co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pẽu. 20 Esepia, acoi ava ñuvirio, que mbosapi oñemonuhase che rer pipe yuvireco, aheve che aico ipãhuve” ehi.

21 Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagũer rupi pĩha? —ehi.

22 —¡Aní! —ehi—. ¡Setenta rupi siete oyupagũer! —ehi Pedro upe.

Yembohesa ava ñihero potai vahe resendar

23 “Tũpa mborerecuasa inungar mborerecuar guasu omoingatu pota vahe güembigui revesa chupe. 24 Evocoyase omboipi imoingatu ãgua, ahese ipĩtĩvisar güeru ireve ati catu vahe guarepochi rese chupe. 25 Ahe rumo ndovirecoi imboepi ãgua. Sese co mborecuar oyocuai opĩtĩvisar aipo ehi: ‘Timondopasa co che rembiguai sembireco reseve, tahĩ iyavei opacatu mbahe vireco vahe reseve irevesa mboepipa ãgua cheu’ ehi. 26 Evocoyase sembuguai oñenopiha sovai aipo ehi chupe: ‘¡Too! Che rerecuar, eñemosañomi tẽi cheu. Opara niha amboepi ndeu’ ehi chupe. 27 Ahese oiparaisuereco, opoi irevesa sui.

28 “Aheseve voi rumo sembuguai osẽse, osepia ambuae ondugũer oyeupe ndasetá tupri vahe ireve. Ahe chupe aipo ehi iyeseho pisi: ‘¡Emboepipa acoi nde revesa cheu!’ ehi. 29 ‘¡Aní!’ ehi oñenopiha oso sovai, ‘Eñemosañomi tẽi cheu’ ehi, ‘amboepipara niha acoi che revesa ndeu’ ehi. 30 Niñero potai eté rumo. ‘Tomboepipa rane ité orevesa cheu’ ehi soquenda uca. 31 Osepiase rumo ambuae imboetasa, tasĩ iteanga ipiha pipe. Ahese yuviraso omombehu güerecuar uve opacatu sembiapocuer yuvireco. 32 Evocoyase ah serecuar güeru uca aipo ehi chupe: ‘¡Mbahe tẽi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

33 ¡Ndiyai vo nde avei ereiparaisuereco nde mboetasa viña, inungar che

oropara isuereco!' ehi. ³⁴ Ichui serecuar oñemoirosave oyocuai imombaraisu āgua 'tomboepipa rane ité orevesa cheu' oyapave.

³⁵ "Indó, evocoyase ēgüe ehi aveira che Ru iva pendar pëu ndapeñeroise ité peyeupe" ehi Jesús güemimbohe upe.

19

Jesús oporombohe mendasa sui poiēhi āgua

¹ Ipare Jesús osē Galilea sui, oso Judea ivi rupi ari sēsa coti iai Jordán rovai.

² Ava rehi yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye piha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyeve fariseo upe:

—¿Ndapesenducuai vo ñehesa icuachiapri pipe peyeroquise: 'Yipindar yande Aposar oyapo cuimbahe, cuña avei' ehi? ⁵ Iyavei aipo ehi: 'Sese niha cuimbahe omendase, oyepepira oyesupa sui güembireco rese ité yuvirecoi āgua. Evocoyase ñuvirío yuvirecoira ñepeí ava nungar' ehi. ⁶ Sese ndahe iri ñuvirío, ñepeí vahe ité yuvirecoira. Evocoyase ava Tüpa omomenda vahe oyes, ndiyai ava tēi omboyepepi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vahe rã güembireco upe cuachiar poisa resendar opoi āgua ichui? —ehi.

⁸ —Pe proroyaēhisa pipe niha Moisés ēgüe ehi pëu. Yipisuive ité rumo Tüpa ndoipotai oyesui opoi āgua yuvireco. ⁹ Esepia, acoi opoi vahe güembireco mbahe ndoyavi vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndaheí chira rumo opacatu osenducua che aipo ahe vahe yuvireco. Tüpa ombou vahe sembiaporã, ahe güeraño osenducua yuvireco —ehi güemimbohe upe —. ¹² Esepia, oime pihañemoñetasa ava mendaēhi āgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tüpa mborerecua reseño ité. Acoi oicatu vahe co ñehesa reroya āgua, toviroyaño —ehi.

Jesús osovasa chihivahe

¹³ Ipare ahe pendar güeru moviro chihivahe Jesús upe yuvireco 'tomondo opo iharive; toyerure avei sese no' oyapave; semimbohe rumo, "¿Mahera vo peruño tēi chihivahe?" ehiño serusar upe yuvireco. ¹⁴ Jesús rumo aipo ehi:

—¿Mahera ndapeipotai iyu āgua! Toyugüeraño chihivahe cheu. Esepia, co chihivahe nungar ava yuviroiquera che Ru povrive —ehi.

¹⁵ Ipare omondo opo chihivahe harive osovasa. Ichui osē oso.

Mbia chihivahe imbahe eta vahe omoñeta Jesús

¹⁶ Mbia chihivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirêhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevi chupe:

—‘Ndereporoyucaí chira, nandegasai chira, nandemondai chira, nanderemirai chiaveira ambuae ava rese, ¹⁹ eremboyeroyara nde ru, nde si avei, eresaisura ambuae ava nde yeaisu nungar eico’ ehi ícuachiapri pipe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheṛā? —ehi.

²¹ —Ereipotase mbahe tupri pipe nde reco āgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererocora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharêhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oique vaheṛā che Ru mborerecuasave. ²⁴ Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁵ Aipo iñehesa renduse, semimbohe oyepihamondi aipo ehi:

—¡Ava angahu piha evocoyase oñepisirora yuvireco viña! —ehi yuvireco.

²⁶ Omaha güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata āgua. ¿Mbahe evocoyase oimera oreu? —ehi.

²⁸ —Oime itera niha mbahe pēu. Esepia, acoi ari oyepotase opacatu mbahe recuñaro āgua, ahese che, Ava Riñehir, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

²⁹ Acoi opacatu ava oseya vahe güeta, anise que viñehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirêhi vahe.

³⁰ Seta vai rumo cūrítei yipindar vahe, ipa tēira yuvirecoi; setá aveira cūrítei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave.

² Oyosuse ava, ahese omoingatu oyeupe oporaviqui vaheṛā upe ñepeí ari mboraviqui repi imboepi āgua. Ahese opa omondo ocove imboporaviqui.

³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe. ⁴ aipo ehi chupe: ‘Peso, tapoporaviqui che uva tive. Amboepi tupriṛa niha pēu’ ehi. Ahe evocoyase yuviraso oporaviqui āgua icove. ⁵ Ipare oso iri mbiter ari rupi oyeupe oporaviqui vahe reca, ēgüe ehi tupri avei caharuse, las tres rupi. ⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi:

‘¿Mahera peyembohi tēi ari momba cohave pehā?’ ⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoiyase, ‘Peso, pe avei peporaviqui tive’ ehi. ⁸ “Pítu ramose, cove yar aipo ehi oporaviqui vahe rese yangarecuar upe: ‘Eñehēpa ava oporaviqui vahe upe. Emboepi ipa yugūeru vahe upe ranē iporaviqui yuvireco chupe. Ipare tenonendar uve’ ehi. ⁹ Evocoiyase las cinco pipe yuviroique vahe oporaviqui, ahe rane tenonde yugūeru. Oyacatu ñepei-peí ñepei ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepei ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugūeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañō tēi oroporaviqui ari momba sacucuer upe oroico’ ehi. ¹³ Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepei ari resendar ndeu acoi, Aviye, peye vahecuer rese cheu’ ehi. ¹⁴ ‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ěgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaheṛā yuvireco curi” ehi güemimbohe upe.

Jesús omombehu iri omano āgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi cha rerecuar iyavei Moisés porocuaíta rese oporombohe vahe povrive yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe maramara tēi che rereco āgua che roeroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirio omembri reseve, oyemboya Jesús rese yuvireco. Ahese oñenopiha sovai oporandu āgua mbahe rese. ²¹ Evocoiyase, —¿Mbahe vo ereipotami? —aipo ehi ichi upe.

—Che aipota che membri erembogupira ndeyepiri ñepei nde mbahe rese pocosa coti, ambuae nde mbahe rese pocoēhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaheṛā, inungar-ra que igua iro vahe aihu vaheṛā viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opombogupā āgua che mbahe rese pocosa coti, ambuae che mbahe rese pocoēhisa coti avei. Che Ru rumo omoingatu güembiporavo upe nara ogupā vaheṛā che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoiyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pīpe, iyavei acoi ivate catu vahe oyeecoapirasá omborerecuasa pīpe yepi. ²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaherā ava eta repirā Carugar povri sui senose āgua —ehi.

Jesús ombogüera ñuvirío ndasesapiso vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapiso vahe oguapi yuvinoi. Evocoyase osenduse Jesús ocuase supi, osapucui pīrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucui pīrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiskusave opoco sesa rese. Ahe ramosave ndasesapiso vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pīpe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipiimi. Aheve omondo ñuvirío güemimbohe ² aipo ehi chupe:

—Peso co tecuami yande rovaingarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ēgüe ehi chupe aracahendar Tūpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pīpe pēu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuaisa yuvireco.

⁷ Güeru guaricu imembri reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetēi guasusa pīpe. Ambuae evocoyase oyasia pindo omondo peri rupi yuvireco saperā. ⁹ Ava rehii senonde, saquicuei avei oguata vahe osapucui yuvireco aipo ehi:

—¡Co mborerecuar guasu David suindar, imboeteipri tasecoi! —ehi—, ¡Sovasapri secōi ou vahe yande Yar rer pīpe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pīpe, opacatu co tecua pīpendar oyepihamondii yuvireco. Iyavei setá oporandu-randu yuvireco:

—¿Ava pīha co mbia? —ehi tēi yuvireco.

¹¹ Ava rehii uguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipore Jesús oi que judío tūparo guasu pipe. Ipiendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipore aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imondā rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapiso vahe, ipāri-pāri vahe avei. Ahe opa ombogüera. ¹⁵ Osepiase rumo pahi rerecurar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chihivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chihivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe:

‘Chihivahemi, pītanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipore opaño oseya ava oso tecua Betania ve. Aheve ñepe pītu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevis tecua Jerusalén ve, Jesús ndasiepoi oico.

¹⁹ Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pīha co cūríteimi opa voi ipiru! —orohe tēi chupe.

²¹ Ahese omboyevi oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera. ²² Índó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tūparo guasu pipe oporombohe. Ahese pahi eta rerecurar, judío rerecurar avei oyemboya sese, oporandu yuvireco chupe:

—¿Ava nde cauita pipe vo ereyapo co nungar eico? ¿Ava vo ombou nde mborerecurarā ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombhura ava porocuita rupi eté pīha ayapo co mbahe vichico. ²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoiyase che avei, “Ahe iporocuaita pipe co mbahe ayapo” ndahei chietera pëu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuaca catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerëhiil’ ehi voifio. Coiye rumo, ‘¿Mahera ëgüe ahe?’ ehi. Ipare osoño ité, oporaviqui. ³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoiyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoãpiramo vahe ou co tecocuer ihivi vahe mboyecua ãgua pëu pe reco tupri ãgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya ãgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riãvii ãgua; oyapo avei oi ivate vahe ahe sese mahemoha ãgua. Ipare oseya oivi ava oporaviqui vahe upe iporu ãgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembigui oporaviqui vahe upe imboporandu ãgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembigui. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoiyase ahe ava tahir repiase, ‘Co aipo oipisira vu mbahe; yayucaño, evocoiyase co ivi opitara yandeu nara’ ehi oyeupe yuvireco. ³⁹ Evocoiyase oipisi, vinose miti pãhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saisuëhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe? ‘Co ita oi aposar opaño omombo yuvireco. Ahe ita rumo aviye catu vahe oi moviracua tupri ãgua. Ègüe ehi niha Yar yapo yande mohapisi ai eté’

ehi icuachiapri pipe. ⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe vīrasora che Ru mombaheesa chupe. ⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi—ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyēño rumo ava rehi sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta. ³ Ipare oyocuai güembigui ehi ‘ava ichohopri upe toyugüeru cute’ oya. Ichohopri rumo niqerēhi iri yugüeru aheve. ⁴ Ipare oyocuai iri ambuae güembigui ehi aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mīmba iquirā vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembigui upe. ⁵ Ichohopri rumo ndoviroyai eté yuvireco. Evocoiyase ñepe i osoño ocove, ambuae oso ombahe movendesave, ⁶ ambuae rumo oipisi sembigui mara-mara tēi sereco āgua. Ahe ipipe oyuca yuvireco. ⁷ Evocoiyase mborerecuar guasu oñemoiro etepri save omondo osundao ehi co ava oporapichi vahe yuca ucapa āgua, iyavei secua rapipa āgua. ⁸ Ipare aipo ehi ambuae güembigui ehi upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vahe rā cohave. ⁹ Sese peso opacatu ava guata catusa rupi, peñehe mendasave yugüeru vahe rā opacatu pe rovaichisar upe’ ehi. ¹⁰ Evocoiyase sembigui ehi yuvirosepa yuviraso ocar rupi. Ahe osovāchi vahe setā omonuha yuvireco que seco tupri vahe, seco rai vahe avei; ēgüe ehi ava savapipo tupri oi guasu mendasave yuvireco.

¹¹ “Evocoiyase acoi mborerecuar oique ava ichohopri repia. Ipare omahecua tupri ñepe ava ipāhu pendar rese. Ahe rumo ndomondei turucuar mendasa resendar. ¹² Evocoiyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñeheño ité chupe. ¹³ Evocoiyase, ‘Peipisi co mbia, peñapichi ipi, ipo avei, pemose ocarve pitumimbisave. Aheve oyaseho tēira, sāitere-tere tēira mbaherasicuer rereco’ ehi ichohopri rese hañecosar upe. ¹⁴ Esepia, setā tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecōaha iri tēi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua. ¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pihañemoñeta rupi ndereicoi vahe; nde pihañemoñeta rumo ñepe reseve erereco. ¹⁷ ¿Mara ehi nde

pihañemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye! ¹⁹ Pemboyecua ru ñepe guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoyase yuvinose yuviraso ichui.

Saduceo oporandu Jesús upe cuerayevisa rese secoñhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiēhiseve, ahesē tivri omendara sembirecocuer rese ahe viquehir omano vahecuer upe nara tahirā oico’ ehi —ehi yuvireco chupe—.

²⁵ Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. Evocoyase tivri omenda sembirecocuer rese. ²⁶ Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayevisi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co coti tēi eté. Esepia, ndapeicuai eté Tūpa ñehe icuachiapri aracadendar, ndapeicuai avei Tūpa pīratasa —ehi—. ³⁰ Esepia, acoi omano vahe ocuerayevisi, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—. ³¹ Co cuerayevisa resendar rumo amombehura pēu. Aviye ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipare fariseo oyanduse yuvireco Jesús omonguiriripañose saduceo oye-sui, ahesē oñemonuha yuvireco. ³⁵ Ñepe ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío

porocuaita rupi oguata opacatu Moisés porocuaita icuachiapri, opacatu Tüpa ñehe mombehusar rembicuachía avei —ehi.

¿Ava suindar pñha Poropñsirosar?

⁴¹ Fariseo ñemonuha vitesese, ⁴² Jesús oporandu chupe:

—¿Mara ehi pepñhañemoñeta acoi Tüpa Rembiporavo ou vaherã ava pñsiro ãgua rese? ¿Ava suindar-ra pñha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pñha evocoiyase David oñehese Espiritu pñratasa pipe aracahe, “Che Yar” ehi chupe? Esepia, ahe aipo ehi:

⁴⁴ Yar aipo ehi che Yar upe:

Eguapi che acato coti acoi che amondose voi eté nde amotarëhimbar nde povrive yuvireco’

ehi David aracahe. ⁴⁵ Evocoiyase, ¿mahera ru: “Poropñsirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoiyase ndoicatu iri imboyevi ãgua yuvireco cute. Ahe arí pipe sui ndipo iri que ñepe iquerëhi vahe ñehe avi uca ãgua oñehe pipe yuvireco.

23

Jesús oicua uca fariseo iyavei Moisés porocuaita rese oporombohe vahe recocueraí

¹ Ipare Jesús aipo ehi ava eta upe, oreu avei no: ² “Co Moisés porocuaita rese oporombohe vahe iyavei fariseo eta, ahe icuaita Moisés porocuaita mombehu tupri ãgua yuvireco. ³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tñi mbahe viña, ipare rumo co coti tñi mbahe oyapo yuvireco. ⁴ Iyavei omondo porocuaita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuaita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tñi. Osiva rese, oyiva rese avei ipe guasu vahe vireco-reco tñi oturucuar rese Tüpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otüparo pipe yuvireco no. ⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar.

⁹ Iyavei, ‘Che ru’ ndapeyei chira que ava co ivi pipendar tñi upe. Esepia, ñepeño ité pe Ru pereco, ahe niha íva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepia, Poropñsirosar güeraño ité pe rerecuar secoi. ¹¹ Acoi ava seco ivate catu vahe, ahe toporopñivii güeco mbegüesa pipe.

¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tñi vahe peico! Pemombitaño ava Tüpa povrive seique rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

14 “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocuarocuaño tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipirata catu vahe curi.

15 “¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar caruguar ratave nara tēi pereco uca.

16 “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yandē ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. 17 ¡Pe ndapembahecua vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. 18 Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yandē ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda harī pendar rer pipe yandē ñehe mboaviye āgua, ahese iya ité yamboaviyera yandē ñehe yepi’ aipo peye tēi. 19 ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. 20 Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, 21 iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secoi. 22 Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoi.

23 “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeipei diez pe remitī menta, anis, comino pereco vahe sui ñepeipei Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihivi vahe, peporoparaisuerecora iyavei pemboaviye tupri ra pe cuita yepi. Iyacatu rumo ahe pemboaviye aveira viña. 24 ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuita upe.

25 “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquīha opitaño ité. Ēgüe ehi tēi pe recocuer pe monda raisave, mbahe pota-pota tēisave avei. 26 ¡Pe fariseo peico vahe, ndapepīhañemoñetai vahe mbahe pe rembiapo ai rese, pemoatiro rane pe pīha pipe mbahe yavaeté vahe sui! Ahese ramo pe rembiapo icatupri cute.

27 “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvīpa imomorochimbri tēi. Ihari ve tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco

oyese. ²⁸ Ēgüe peye: ava rembiepiave avīye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaīsu catu itera pe Moisés porocuaita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehuser ruvipagüer peico sese pe yemomahenduha āgua iyavei pemoporañete ai tēi ava seco ihīvi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoī recose, ndayaipitīvī chietera Tūpa ñehe mombehuser yuca āgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehuserer yucasar suindar pe yesusa. ³² ¡Pemboyepi iriño evocoyase pe ramoī rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehuser ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava avīye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahī Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehuser, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. ³⁸ Sese seyapirā tēi peicora. ³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipare Jesús osē judío tūparo pipe sui oso. Aheve ore semimbohe oroyemboya sese aipo orohe chupe: “¡Ore Yar, esepia co tūparo!” orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepeī ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherā ari cañi renonde

³ Ipare Jesús oso ivitri Olivo ve oguapi oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei ari cañi āgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tūpa remimbou ava pīsiro āgua’ ehi tēira ava eta mbopa yuvireco. ⁶ Iyavei pesendura ñehesa vavasa resendar cohave iyavei que rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo ari cañisa. ⁷ Esepia, ñepeī ivi piendar ovavara ambuae ivi piendar rese oyeupe yuvireco. Aheve oimera tiavor, ivi riri

opacatu-catu tēi tecua rupi. ⁸ Opacatu evocoi mbahe rumo omboipi ramomi vahe mbahe tēi porarasa.

⁹ “Ahe se pe pisira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe ari rupi evocoyase setá ava ndache roeroa iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo ari ipa vahe rupi, ipĩsirpropi yuvirecoira. ¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca āgua. Ahe se ramo oimera cañisa co ivi pipe” ehi oreu.

¹⁵ “Tūpa ñehe mombehusar Daniel oicuachía mbahe-mbahe tēi aposa resendar oime vahe rā tūparo guasu maranehi vahe pipe aracahe. Ahe pesepiase oi maranehi pipe —acoi oyeroqui vahe, ahe tosenducua tupri yuvireco—, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güeta harive yuvirecoi vahe ogüeyise, toiquei iri eme güetave ombahe reca; ¹⁸ iyavei acoi que rupi tēi yuvirecoi vahe, toyevi iri eme güetave que oyeaosa renose āgua yuvireco. ¹⁹ Iparaisu itera cuña ipuruha vahe, imembi pītani vahe avei yuvireco! ²⁰ Peporandu Tūpa upe pe recua pipe sui pe sēehi āgua irohi pipe, mbituhusa ari pipe avei. ²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chiera evocoi nungar. ²² Iyavei nomombituhise Tūpa co ari naporai vahe, ndipo chiera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropĩsirosar secoi’; anise, ‘Peve secoi’ ehise yuvireco pēu, aní chira peroya aipo ehi vahe. ²⁴ Esepia, yugüerura ava ‘che Poropĩsirosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pĩratasa mboyecua āgua yuvireco. Ipipe osecoāhara Tūpa rembiporavo imbopa āgua yuvireco. ²⁵ Opa aipo co senondeve amombehu pēu. ²⁶ Sese que ava pēu: ‘Pesepia pe ivi iporupirēhisave secoi’ ehise, pesoi rene aheve seroyasave, aní chiveira peroya acoi ‘pesepia co secoi oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ēgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi āgua resendar

²⁹ “Ahe ari pipe mbahe-mbahe tēi pare cūriteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe orirĩira yuvireco. ³⁰ Ahe se oimera iva rese iporēhi vahe che, Ava Riquehir, yu āgua resendar. Evocoyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise iva quihā rese che pĩratasa rendigüer porañetesa pipe. ³¹ Iyavei amboura che rembiguai eta iva pendar. Ahe evocoyase güemimbi omoñehe pĩratara opacatu che rembiporavo co ivi rupindar que amombi rupi yuvirecoi vahe monuha āgua” ehi.

³² “Peyembohera ivira higuera recocuer sui: Co ivira soqui ramose, yaicua cōimi ari sacu vahe yepota āgua yandeu yepi. ³³ Na ehi aveira pēu che ñehe rupi tupri mbahe pesepiase, sese peicuaa cōimi eté che yevi āgua. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñehengagüer rumo imboaviyesa rane itera.

³⁶ “Ndipoi eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ēgüe ehi tupri aveira che, Ava Riquehir, yevi āgua renonde. ³⁸ Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pipe seiquese, ēgüe ehi vite yuvireco. ³⁹ Nomohai eté rumo amarusu viapi āgua yuvireco oyeupe viña, ēgüe ehi rumo aviyeteramo tēi amar oviapi imocañipa. ēgüe ahe aveira che, Ava Riquehir, ayevi aviyeteramo tēi. ⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara. ⁴¹ ēgüe ehi aveira ñuvirío cuña ohicho vahe upe: ñepe serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. ⁴³ Iyavei peyapisaca tupri co rese: inungar acoi oi yar oicuaese revo que hora pītu pipe imonda vahe yepota āgua, ahese imahemohara sese güeta pipe seiqueēhi āgua viña. ⁴⁴ ēgüe peye aveira peyemoingatu che yevi āgua rese. Esepia niha, che, Ava Riquehir, aporoesapiha tēira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güeta pipendar rese hañeco āgua ‘tembihu tomondo che rēta pipendar upe che porocuaita rupi’ ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaire opacatu ombahe rese hañeco āgua. ⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya, ⁴⁹ omboetaso omboipi mara-mara tēi sereco iyavei oyemboya caguar tēi rese ipiri ocaru iyavei oihu tēi āgua. ⁵⁰ Ipare rumo serecuar oyepotara imahemohaēhiseve. ⁵¹ Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tūpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco. ² Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesi tēi yuvireco. Coiye opaño yuviroque yuvireco ichui. ⁶ Pītu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi āgua cute!’ ehi. ⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi

ambuae imahemoha vahe upe yuvireco: ‘Pemboumi tēi chīhi pe yandi oreu. Esepia, ogüe pota ité ore rataendi’ ehi tēi yuvireco. ⁹ ‘Aní, ndiyai chira revo oromondo vahe rā pēu. Iyacatu revo peso imboepisave serocua peyeupe nara’ ehi. ¹⁰ Imboepi yuviraso viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevirā” ehi Jesús oreu.

Ñehesa guarepochi mondosa resendar

¹⁴ “Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembiguai oguarepochi rāro āgua viña. ¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepe upe seco etegüer rupi-rupi. Ipare voi oso cute. ¹⁶ Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiyē oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiyē oyevisē serecuar, ahese oñehe güembiguai upe oguarepochi retacuer cua āgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepiper tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe. ²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuar aipisi mbahe nañotii vahe sui. ²⁷ Ereyapocatumira che guarepochi guarepochi apocatasave cuese rahe viña che yevise voi senose āgua cheu imboyevi catumi āgua viña’ ehi. ²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomí ichui. ³⁰ Sese pemose co mbiguai ēgüe ehi tēi vahe ocarve pītumimisave. Aheve toyaseho, tasāitere tēi oī’ ehira serecuar chupe” ehi Jesús oreu.

Jesús oura opacatu ava recocuar rese porandu āgua

³¹ “Che, Ava Riquehir, ayevisé, opacatu che Ru rembiguai ìva pendar reseve che reco ìvategüer pipe, ahese aguapira che renda porañete vahesave ava recocuer rese porandu ãgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoẽhisa coti. ³⁴ Ahese che mborerecuar ìvate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ìvi apo ramo suive imoingatupri pẽu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tẽise pe recua rupi vichico, pe avei oi pembou che que ãgua. ³⁶ Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no’ ehi. ³⁷ Evocoiyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?’ ehira yuvireco cheu. ⁴⁰ Evocoiyase che, mborerecuar ìvate vahe, amboyvira yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo egüe peye’ ahera.

⁴¹ “Ahese aipo ahera cute che mbahe rese pocoẽhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara serecuar reseve. ⁴² Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapembou cheu, chembaheasise vichico, iyavei che roquendasave, Yasomi tẽi sepia, ndapeyei eté cheu’ ahera. ⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pĩtiviisai?’ ehi tẽira yuvireco cheu. ⁴⁵ ‘Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté’ ahera. ⁴⁶ Ahe ava yuvirasora Tũpa ñemoirosa apirẽhi vahesave. Seco ìvi vahe rumo teco ori opaẽhisave yuvirasora” ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

² —Pe peicua ñuvirio ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ìvate catu vahe Caifás rõtave.

⁴ Aheve oñemoñeta: ‘Yambopa ipisi yuca ãgua’ ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehi yemondii guasuēhi āgua yandeu —ehi.

Cuña oipiyere Jesús āca rese mbahe siacuá vahe

⁶ Jesús tecua Betania ve secói, Simón lepra vireco vahecuer rētave. ⁷ Aheve mesave chiniseve, cuña vireco vahe mbahe siacuá vahe siru rese viroyepota chupe. Ahe oipiyere Jesús āca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi tēi! ⁹ Omondo vahe ité tie co setá guarepochi rupi ava iparaisu vahe pítivi āgua viña —orohe tēi chupe.

¹⁰ Jesús rumo oicua ore pīhañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu. ¹¹ Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve. ¹² Esepia, co cuña oipiyere mbahe siacuá vahe che rese che tī āgua renondeve. ¹³ Supi eté aipo ahe pēu: co ñehesa pīsirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas Iscariote oyemoingatu Jesús mondo āgua yamotarēhimbar povrive

¹⁴ Ipare ñepeí ore pāhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi:

—¿Mboví rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo āgua yamotarēhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahesa ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pītu ramomise, opacatu oroguapi mesave Jesús piri ore caru āgua. ²¹ Ore carusave aipo ehi oreu:

—Supi eté aipo ahe pēu: ñepeí pe pāhu pendar che mondora che amotarēhisar upe —ehi.

²² —Che Yar, ¿che pīha? —orohe-rohe tēi ñepeí-peí ore yacatu ore viharēhisar pipe chupe.

²³ —Omondo vahe opo che caro pipe, ahe che mondora che amotarēhisar upe —ehi—. ²⁴ Imboaviyesa itera che, Ava Riquehir, rese ñehesa icuachiapri. ¡iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahesa Judas imondosavi oporandu:

—Ore Mbohesar, ¿che tie? —ehi.

—Taa, jnde ité niha ēgüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehi angaipa rese ñero ãgua. ²⁹ Ndaihu iri chira uva ricuer cheu arí oyepotase voi che Ru mborerecuasave ahura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve. ³¹ Evocoyase Jesús aipo ehi oreu:

—Opara pemocañi che rese yeroyasa peyesui co pïtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tëira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepepi chietera nde sui —ehi chupe.

³⁴ —Che rumo supi eté aipo ahe ndeu: co pïtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe päve tupri tēi chupe.

Jesús oyerogui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohave; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirio Zebedeo rahir. Ahese oyandu oviharëhisa oico. ³⁸ Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohave iyavei pemahemohara pe yeroqui pipe che rese —ehi.

³⁹ Evocoyase oso tenonde catumi. Aheve oñenopiha ovapiivi rese oyerogui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—iNdapeñemosai eté vo pe ropesii upe che rãro ãgua que ñepeí hora che mondugüe ãgua peye! ⁴¹ Pemahemoha, peyerogui mbahe tēi pipe pe viapiëhi ãgua. Supi eté pequerëhi ité viña, pe retecuer tēi niha nipiratai pëu —ehi.

⁴² Ichui imoñuvirioso rupi oso iri oyerogui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ Ipare oyevis, osesapiha iri iqueseve ou. Esepia, sopesii nomboyeroyai eté yuvireco. ⁴⁴ Evocoyase oseyapa iri oso oyerogui ãgua imombosapisa rupi. Aipo ehi tupriño avei oyerogui Vu upe. ⁴⁵ Ipare oyevi iri güemimbohe upe aipo ehi chupe no:

—iPequeño vité vo peyu! Osupiti che, Ava Riquehir, mondo ãgua ava yangaipa vahe povrive. ⁴⁶ Pepüha, yaso. Esepia, cõimi eté che amotarëhisar upe che mondo vahrã secoi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepeí semimbohe ore pähu pendar, iyavei setá iteanga ava yugüeru quise pucu, ivira reseve-seve

supi. Ahe pahi eta rerecuar yuvirecoi vahe judío rerecuareta porocuita rupi oyapo yuvireco. ⁴⁸ Yipindar rumo imondosar Judas aipo ehi: “Aso-vaupitese, ahese peicuara; ahe peipisira” ehi. ⁴⁹ Ipare oyemboya voi oso sese. —¡Avirave, Porombohesar! —ehi sovaupite.

⁵⁰—Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe seci vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi āgua viña? ⁵⁴ Ēgüe ehise rumo Tūpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi āgua imonda rai vahe nungar che rereco peye. Che arí yacatu rupi aguapise pe pāhuve pe mbohe āgua tūparo pipe, ndapeyapoi eté co nungar cheu. ⁵⁶ Co rumo opacatu Ēgüe peye Tūpa ñehe mombehúsar rembicuachiagüer mboaviye āgua cute —ehi ava rehii upe.

Ahese voi opacatu oroñemosai, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rētake yuvireco, ahe pahi rerecuar ivate catu vahe seci. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no. ⁵⁸ Pedro rumo amombrí rupive tēi osaquicue moña oso. Ēgüe ehi oyepota pahi rerecuar ivate catu vahe rēta rocar āchisave. Aheve oi que ipipe, iyavei uguapi oī sundao pāhuve ‘¿mara ehi etera pīha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca āgua yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopambopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapi arí rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté ñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropīsiosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Avá Riquehir, aguapise Tūpa mbahe mboavaisarēhi acato coti, ayevise avei i va quiña rese curi —ehi.

⁶⁵ Evocoyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropísirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapí sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapí oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoiyase oso voi tēi tūparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeví ãgua aipo ehi:

⁴ —Che ayamboangaipa tiēte vichico. Esepia, amonduño tēi mbia seco catupri vahe pēu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoiyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pīpe. Esepia, ava yucapirã repri tēi —ehi yuvireco.

⁷ Ipape oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehögüer tĩ ãgua’ oyapave yuvireco. ⁸ Sese cūrítei co ivi upe, “Ava ruvi repri tēi” ehi yuvireco yepi. ⁹ Ēgüe ehi co imboaviye ité Tüpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. ¹⁰ Ipape virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tüpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoiyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco. Nomboyevii eté rumo iñehe chupe oyeepi ãgua. ¹³ Evocoiyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevii eté rumo que ñepeñ angara ñehesa chupe viña. “¡Too, mara ehi rutei vo col!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepeñ ava soquendapri renose ãgua Pascua pieta pīpe ava rehiñ remimbotar rupi yepi. ¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoiyase ava rehiñ oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pñha, anise Jesús “Poropisirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pīpe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepiã mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehiñ omonguerēhi, “Barrabás tosē; Jesús evocoiyase tomano” he ãgua yuvireco.

²¹ Evocoiyase Pilato oporandu iri ava rehiñ upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

²² —¿Mbahe vo evocoiyase che ayapora Jesús rese chupe acoi ava, “Poropisirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehiñ upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoiyase Pilato: “Ndaicatu mbahe moingatu sepi ãgua” ehi tēi oyeupe. Sese ava yaivu guasu catu-catu irise, ogüeru uca i. Ipape oyepoi opacatu ava rehiñ rovaque aipo ehi:

—Ndaheche remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atĩño ité yuvireco.

²⁶ Ahese Pilato omore uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica água.

²⁷ Evocoyase mborecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omonde turucuar pĩra vahe yuvireco rese ²⁹ iyavei omonde ñaca rese yu piapri, omondo avei ñepeitacuar mi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboetepri judío rerecuar tasecoi! —ehi angahu sese oguayi tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuar mi pipe ñaca rese yuvireco. ³¹ Ēgüe ehi yoyai catu-catu yuvireco. Ipare virocua turucuar pĩra vahe ichui, ahese omonde iturucuar ité yuvireco sese. Ichui viraso curusu rese yatica água yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voĩño tēi yuvireco.

³³ Oyepotase yuviraso Gólgota serer vahesave, ahe ‘ava ācagüer’ oya aipo ehi chupe, ³⁴ aheve uva ricuer imboyeshapri mbahe pihaupiar rese omondo tēi yuvireco Jesús toihu. Osāha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayĩño oyeupe iturucuar mboyaho-yaho água rese. ³⁶ Ipare aheve oguapi yuvinoi sáro. ³⁷ Iyavei omombehu ivate curusu rese ñaca harive mbahe sui oyua yuvireco: “Co Jesús judío rerecuar guasu” ehi icuachiapri oĩ.

³⁸ Ñuvirio imonda rai vahe yaticasa avei curusu rese supive yuvireco, ñepeitacuar mbahe rese ipocosa coti, ambuae evocoyase mbahe rese ipocoēhisa coti yuvireco. ³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tũpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahĩ eta rerecuar, Moisés porocuaite rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipisiro ambuae, ahe ae rumo ndoicatui oñepisiro. Israel rerecuar guasu secoise, ¡togüeyi curusu sui cūrítei, ahese voi seroyasara! ⁴³ Ahe oyeroya Tũpa rese, Tũpa evocoyase oipotase, toipisiro cūrítei. Esepia, ahe, “Che Tũpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pĩtu ivi rupi. Ēgüe ehi las tres rupi.

⁴⁶ Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ēgüe tehiño rane, ¿oura pñha Elías ipñsiro ñgua? —ehi yuvireco.

⁵⁰ Ahese Jesús sãse pñrata iri, omano. ⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi orirñi iyavei ita guasu-guasú oyeca. ⁵² Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco. ⁵³ Ēgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoyase co sundao rerecuar iyavei Jesús rãrosareta, ahe oyanduse ivi rirñi yuvireco iyavei ambuae mbahe Ēgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipñtivñi yuvireco yepi. ⁵⁶ Ahe ipñhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

⁵⁷ Pñtu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoyase ahe oso Pilato upe oporandu Jesús tehögüer rese. Evocoyase Pilato aipo ehi: “Aviye, timondosaño chupe” ehi. ⁵⁹ José evocoyase viraso sehögüer. Ipare oimama tupri turucuar secose vahe ndiquñhai vahe pipe. ⁶⁰ Ichui omoingue ombahe tuvipa ipñasu vahe, ita oyoho uca vahe pipe. Ipare osovapi ita guasu yapayere vahe pipe oso. ⁶¹ Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶² Ahere ayihive mbñtuhusa arñ pipe, yuviraso pahi eta rerecuar iyavei fariseo Pilato upe mbahe rese oporandu ñgua ⁶³ aipo ehi yuvireco:

—Ore rerecuar, ore royemomahenduha acoi iporombopa serai vahe ñehe agüer rese: “Acuerayevira mbosapi arñ pare omano vahe pñhu sui” ehi acoi cuese oicove vitese —ehi yuvireco—. ⁶⁴ Sese emondo sundao sehögüer ruvipa rãro tupri ñgua mbosapi arñ rupi semimbohe ñomiñhi ñgua pñtu pipe yuvireco. Aviyeteramo, “Ocuerayevi omano vahe pñhu sui” aipo ehi tupri tēi tiētera ava upe yuvireco. Aipo ehise yuvireco, yipñdar semira tēi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pñu. Peraso, pemoviracua tupri ité sãro ñgua —ehi.

⁶⁶ Evocoyase yuviraso tehögüer ruvipa rãro tupri ñgua yuvireco. Ahese omondo tehögüer rovapisa ita guasu rese mbahe imomiisa cua ñgua yuvireco. Ipare oseya aheve sundao sãro ñgua yuvireco cute.

1 Cõhe ramomise, domingu pipe, María Magdalena iyavei ambuae María yuviraso tehõgüer ruvüpa repia yuvireco. 2 Aviyeteramo tõi orirüi pĩratá ivi Tüpa rembiguai iva sui igüeyise. Ëgüe ehi oyepota tehõgüer ruvüpave ou, ahe virocua itape guasu sovapisa ichui. Ipare iharive oguapi oĩ. 3 Ëgüe ehi sendí iteanga aviye acoi overa vahe. Iturucuar evocoyase morochí eté. 4 Osepiase sundao, orirüi eteanga osiquiyepave yuvireco ichui, opa oyuca pucu-pucu tõi yuvireco. 5 Tüpa rembiguai rumo aipo ehi voi eté cuña upe:

—Pesiquirei rene. Esepia, che aicua pe peseca Jesús yaticapirer. 6 Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

7 —Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pëu —ehi Tüpa rembiguai cuña upe.

8 Evocoyase cuña yuviraso poyava voi suvüpa sui, osiquiye pãhuve rumo ovihãño yuvireco; Ëgüe ehi yuvinoñá iteanga imombehu yugüeru oreu. 9 Ahese Jesús oyemboyeca cuña upe cute omboavirave. Ahe cuña evocoyase oyemboya sese oñenopiha ipicuhaguã imboetisave yuvireco.

10 Evocoyase ahe aipo ehi chupe:

—Pesiquirei rene che sui. Pesoño, tapemombehu che reroysareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

11 Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepiã vahecuer yuvireco. 12 Evocoyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco, 13 aipo ehiño yuvireco chupe:

—Aipo peyera ava uve: “Oroque viteseve pĩtu pipe, ahese revo Jesús remimbohe yugüeru sehõgüer ñomi ãgua ore sui” peyera —ehi mborerecuar yuvireco chupe—. 14 Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

15 Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cüritei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

16 Evocoyase Ëgüe orohe oroso semimbohe once oroico vahe Jesús remimombehu ivi Galilea pendar ivitriive. 17 Acoi osepiase rumo Jesús, ahese oromboetei oroico, yepi moviro tõi ore pãhu pendar ndoviroya tupri vitei yuvireco viña. 18 Evocoyase ahe oyemboya ore rese aipo ehi oreu:

—Tüpa che mbou mborerecuar ivate catu vahe che reco ãgua ivave, ivive nara avei no —ehi—. 19 Peso ava upe opacatu ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espiritu Santo rer pipe avei no. 20 Iyavei pembohe che opacatu pe mbohe agüer reroya ãgua rese —ehi—. Peicuãñora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tûpa Rahir, recocuer resendar amombehu potami pëu. ² Yipiindar Tûpa aipo ehi imombehu oñehe mombehusar Isaias rembicuachia pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipirata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Êgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tûpa upe, ahese opoãpiramora Tûpa pëu ñero ãgua pe angaipa rese” ehi ava upe. ⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pirata catu vahe che sui, sese cheu ndiyai chira ayeaivi ipitaquisã yora ãgua. ⁸ Che supi eté opoãpiramo i pipe têi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osê tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osê ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pâhuve. Aheve avei Carugar osecoãha; Tûpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tûpa mborerecusa yandeu. Sese, pemboasi pe angaipa, peyevi Tûpa upe, iyavei peroya co ñehesa aviye vahe Tûpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe i ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chñi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pipe ipitivisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbıtuhusa ari pipe, Jesús oi que oporombohe tūparove. ²² Evocoiyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pıratasa pipe, ndahei Moisés porocuaita rese oporombohe vahe nungar. ²³ Aheve mbia ahe tecua pendar vireco vahe carugar oyese, oñehe pırata chupe aipo ehi:

²⁴ —¿Mahera vo ereyuño tēi cohava oreu, Jesús Nazaret pendar? ¿Ereyu vo ore mocañi āgua tēi? Che orocua ité, nde Tūpa suindar ndaseco marai vahe ereico —ehi chupe.

²⁵ Oñehe pırata rumo carugar upe aipo ehi: —¡Quiriri, esē co mbia sui! —ehi chupe.

²⁶ Evocoiyase carugar mbia rese secoi vahe omoehoha seiti ivive, sãse, osē oso ichui. ²⁷ Opacatu ava ombosiquıye, ichui oporandu-randu oyeupe yuvireco aipo ehi:

—¿Mbahe pıha co? ¡Iporombohesa ipiasu vahe ité! ¡Co mbia vireco ité omborecuaa! ¡Carugar avei eté omboyeroya oyeupe iñehese! —ehi tēi ava yuvireco.

²⁸ Cūrteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rētave. ³⁰ Aheve Simón rembireco si sohi iteanga vupave ou. Evocoiyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohi opituhu ichui. Ipare voi ahe cuña iñañeco semihura rese.

Jesús setá ombogüera ava imbaheasi vahe

³² Pıtu ramose opacatu imbaheasi vahe iyavei carugar vireco vahe vıraso yuvireco chupe ombogüera āgua. ³³ Opacatu ava ahe tecua pendar oñemonuha oquendıpıve yuvireco. ³⁴ Evocoiyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoiya seco yuvireco.

Jesús Vu Tūpa Ñehengagüer omombehu judıo tūparo rupi

³⁵ Ayihiteve Jesús oñarapuha oso ava porēhisave oyerogui āgua. ³⁶ Evocoiyase Simón ondugüer reseve yuviraso seca. ³⁷ Osepiase, —Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

³⁹ Ēgüe ehi oguata opacatu Galilea ivi rupi, omombehu Vu Tūpa Ñehengagüer judıo tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepeı mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaısuerecosave opoco sese.

—Āipota. ¡Erecuerara cūrteı! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

44 —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resender Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

45 Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secóiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

1 Ñepeí ari pipe Jesús oyeví ou tecua Capernaum ve, ahese opacatu oyandu ñepeí oive secoise yuvireco. 2 Cūriteimi voi eté setá ava oñemonuha yuvireco secosave. Sese ndipoi eté ava reique iri água oi pipe oquendipi rupi. Ahe rumo omombehuño ité Vu Ñehengagüer. 3 Aheseve irungatu mbia viroyepota ndoguatai vahe yuvireco chupe. 4 Ahe rumo ndiyai seroique água Jesús uve ava rehīsave yuvireco. Sese viroyeupi oi harive seraso yuvireco. Aheve teca virocua oi sui yuvireco; supí viroyi supa reseve imondo Jesús rovai tupri yuvireco. 5 Ahe oicuae co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

6 Moisés porocuita rese oporombohe vahe rumo ipihañemoñeta aheve yuvinoi: 7 “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi água” ehi. 8 Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? 9 ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie? 10 Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

11 —Eñarapuha, esupi nde rupa, eso nde rētave —ehi.

12 Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rēmbiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiaí vahe ité co nungar mbahe —ehi tēi yuvireco.

Jesús oñehe mbia Leví serer vahe upe

13 Ipare Jesús oso iri ipa ivii. Aheve oporombohe oyese ava rehi yemboyase. 14 Ichui oguata vitese, osepia Leví, Alfeo rahir, guarepochi rerochasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

15 Ipare ocaru Leví rētave güemimbohe reseve yuvireco, ava sui guarepochi rerochasar iyavei ava yangaipa vahe pāhuve. Esepia, setá ava osaquicue moñaño ité yuvireco. 16 Evocoyase Jesús ocaruse ipāhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerochasar iyavei yangaipa guasu vahe pāhuve tēi? —ehi.

17 Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava secó tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyeveí ahe ava upe:

—iNdiyai eté ichohopri mendasave iyecuacu ãgua imer oicove vitese ipãhuve! ²⁰ Oimera rumo ari imer reraso ãgua ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité. ²² Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe osose mbahe pিরer cuacua vahe pipe, ombopuñora, uva ricuer evocoyase ocañpa tẽira, iyavei mbahe pিরer ocañi tẽi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhii yuvireco. ²⁴ Evocoyase fariseo aipo ehi:

—iMahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri arachendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tüpa rêta pipe pan imboeteipri Tüpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. ²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tũparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pĩha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tẽi. ³ Evocoyase Jesús aipo ehi co mbia ipo nomii vahe upe:

—Epũha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe p̄iha, mbahe naporai vahe tie? ¿Yaip̄isiro p̄iha ava recocuer, yamocañi uca t̄ei tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese voriehisave iyavei ndovihai ava ndosenducua catuise yuvireco. Sese aipo ehi ipo nom̄i vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahe se fariseo opa yuvinose yuviraso oyemoingatu Herodes rupindar rese Jesús yuca āgua yuvireco.

Ava rehi ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehi avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia āgua. ⁹ Sese oyocuai güemimbohe vireco voi vaheṛā ñepei carite yuvireco ava omboti etepriēhi āgua yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco āgua.

¹¹ Iyavei ava carugar vireco vahe sepiase, oñenopiha sovai, oñehe pucucu yuvireco:

—¡Nde Tüpa Rahir ereico! —ehi.

¹² Jesús rumo oñehe p̄irata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherā

¹³ Ipare Jesús oyepi ivitri rese oso. Aheve ava viroyasar upe oñehe iporavo āgua güemimbotar rupi. Ichui oyugüeru yuvireco chupe. ¹⁴ Ahe ipāhu pendar osenoi doce tupri güemimboherā ‘toguataño che rupi, tomombehui Tüpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa carugar ava sui imboyepepi āgua yuvireco’ oyapave. ¹⁶ Evocoi doce yuvirecoi vahe, ahe: Simón (sererguā acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguā Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; ¹⁹ iyavei Judas Iscariote, ahe omondo vaheṛā Jesús yamotarēhisar upe.

“Jesús carugar p̄irata vireco oyese” ehi t̄ei ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco. ²¹ Oyanduse imu secocuer yuvireco, oyugüeru seraso āgua ‘ndayaracua iri revo’ oya.

²² Iyavei oporombohe vahe Moisés porocuaite rese oyugüeru vahe Jerusalén sui aipo ehi: “Co mb̄ia carugar rerecar Beelzebú oyocuai vahe, ip̄irata pipe t̄ei omboyepepi carugar ava sui” ehi yuvireco.

²³ Evocoyase Jesús omombehui carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecar guasu povri pendar, ahe ovava-vavase oyeupe; evocoi nungar mborerecar p̄irata ocañi t̄eira. ²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava āgua oyeupe ae yuvireco, ndipocopi chiaveira yuvireco, ahe evocoyase secocuer ocañi t̄ei vaheṛā ité yuvireco.

²⁷ “Ndipoi eté niha ava oi que vahe que ava ipĩrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaherā ité” ehi.

³⁰ Aipo ehi Jesús imboyeví ava upe. Esepia, “Carugar tēi erereco” ehiño ava yuvireco chupe.

Jesús sí, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua. ³² Yivivi yuvinoi vahe oñehe yuvireco chupe:

—Nde sí, nde rivireta, nde reindri reseve ocarve nde reca tēi yuvireco — ehi.

³³ Ahe rumo,

—¿Ava pĩha che sí; ava pĩha che rivireta yuvirecoi? — ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che sí eta; co che rivireta. ³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che sí avei yuvirecoi — ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapí oñehe. Ava rumo opacatu ivi ātasa rupi opitaño yuvireco. ² Evocoyase ava mbohe āgua omboyoya tecocuer mbahe tisa rese aipo ehi:

³ “Pesendu co ñehesa: Ñepe mbia osē omaheti. ⁴ Ahe otiapi-apiise mbahe rāhii oso, moviro oviapi peri rupi. Vĩrai yugüeruse rumo, opaño yuvirohu. ⁵ Iyavei moviro oiti ivi nayanai vahesave, ita pāhuve. Sese cūriteimi sori.

⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve; ahe yu rumo sori poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pĩha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pēu niha Tūpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa upe oyeví potaēhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuaime vo aipo porombohesa? ¿Mara peyera ru opacatu ambuae che porombohesa cua tupri āgua? ¹⁴ Evocoi mbahe rāhii

oñoti vahe, Tūpa Ñehengagüer mombehusar nungar. ¹⁵ Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Carugar ovirocuapaño oi que vahe ipiha pipe ichui. ¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesa pipe; ¹⁷ ndovirecoi rumo guapo oyese opīrata āgua. Evocoyase yuvirecoise mbahe mbahe tēi pipe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saiusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvri nara tēi iyavei yande rupavri nara tēi no? Aní, tataendi imondosa ivate poroesape āgua.

²² Ndipoí chietera mbahe ñomipri ndayasepia vahe rā curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducia ucara che ñehe pēu. Iharive amondo iri catura pēu. ²⁵ Vireco tupri vahe upe, imondosa catura. Acoi ndovireco tupri vahe sui, serocuasāora” ehi.

Yembohesa mbahe rāhii rorisa resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. ²⁷ Omaheti pare, oso oque. Ipare coiye catu oñarapuha. Ahe oñocua pītu, ari avei, evocoyase mbahe rāhii sorí poyava yuvireco. Itisar rumo ndoicuai mara ehi vori. ²⁸ Ivi rese niha oyesu miti: yipendar sorí, ipare iha, ipare sāhii yuvinose sese. ²⁹ Evocoyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Ñoti pare rumo, sorí, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepeí mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaēhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe: —Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pĩrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secói? Esepia niha, ivitu ai, ipa avei omboyeroya —ehi tēi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso.

² Yuvinosé pare carite pipe sui, ahese mbia carugar rerecosar tuvipa pãhu rupi secói vahe oso Jesús upe. ³ Co mbia tuvipa pãhu rupi secói vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi oguata, osapucaí oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepepi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuēhi āgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

¹⁰ Oporanduño chupe omondopaēhi āgua co ivi sui. ¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoiyase Jesús omondo carugar sē āgua ahe mbia sui. Ahe opa yuviroigüe cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoiyase cuchi rãrosar yuvinoña osiquiyepave yuviraso imombehu āgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiyē tēi yuvireco. ¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoiyase ava Jesús upe: “Esē cohava sui” ehi yuvireco.

18 Oha irise Jesús carite pipe, co mbia carugar rerecosarer oporandu chupe supi oso água. 19 Ahe rumo,

—Esoño nde rêtave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

20 Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

21 Oyeveise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. 22 Evocoyase oyepota mbia mborerecuar tūparo pendar, ahe serer Jairo. Jesús repiase, oñenopiha sovai, 23 aipo ehi chupe:

—Che rayri omano pota. Yaso, teremondomi tēi nde po iharive imbogüera água —ehi.

24 Evocoyase oso supi. Ava rehii avei yuviraso supi. 25 Ipãhuve avei oime cuña doce araviter rupi suvi yepiyere-yere vahe. 26 Iparaisú iteanga, setá oporoposano vahe ndoicatu imbogüera yuvireco omomandaivete catu ipanososa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. 27 Co cuña osenduse Jesús rese ñehesa, uguata saquicuei oso ava rehii pãhuve, iturucuar rese opoco. 28 Aipo ehi oyeupe oico: “Iturucuar rese apocose rumo, acuerara” ehi. 29 Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui. 30 Jesús rumo oyandu osēse opíratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

31 Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

32 Ahe rumo omaheño vite ité ava oiviendar rese ‘¿uma ité pñha opoco che turucuar rese?’ oya. 33 Evocoyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. 34 Evocoyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

35 Ñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

36 Ahe rumo Jairo upe aipo ehi:

—Aní eresiquiye. Eyeroya catuño —ehi.

37 Ndoipotai rumo ambuae ava oyeupi icho água; Pedro, Santiago, Juan güeraño oipota. 38 Oyepotase Jairo rêtave, osepia ava yemondi oyaseho vahe.

39 Ichui oiquese oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

40 Ava rumo opucaeete-eteño seroyaēhisave yuvireco. Evocoyase omose opacatu ava. Ipare omoingue iyepusa, ichi, oyeupindar reseve cuñatai rehögüersave. 41 Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuēhi āgua ambuae ava upe. Ipape,
—Pembocaru co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi.
² Oyepotase mbituhusa ari, ahese oporombohe tūparo pipe. Setá ava iñehe rendusar oyepihamondiisave oporandu-randu yuvireco:

—¿Que sui vo co ava oicuapá opacatu mbahe? ¿Que sui pñha vñnose co mbahecuasa co poromondiisa apo āgua? —ehi yuvireco oyeupe—. ³ Co niha carpintero, María membri; Santiago, José, Judas iyavei Simón riquehir, seindri avei yuvirecove yande pñhuvē —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, inu sēta pipendar ae rumo nombotei yuvireco —ehi.

⁵ Ndoicatu mbahe oporomondi vahe apo āgua ava viroyaēhisa pipe, sese moviro tēi imbaheasi vahe harive omondo opo imbogüera āgua.

⁶ Ndoyembovihai ava viroyaēhisa rese.

Jesús oyocuai güemimbohe Tūpa mborerecuasa mombehu āgua

Ipape Jesús oso, oguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipape oyocuai ñuvirío-río, iyavei omondo güeco pñratasa caruguar mboyepepi āgua chupe.

⁸ —Ndaperaso chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.

⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesēra pecua. ¹¹ Acoi ambuae tecua pendar ndape pñsi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rñtachigüer sui. Ēgüe pe hesa omboyecuar cañisa apñrēhi yuvireco chupe —ehi.

¹² Evocoyase semimbohe eta yuviraso, “Pemboasi pe angaipa, peyevi Tūpa upe” ohe āgua yuvireco. ¹³ Iyavei setá omboyepepi caruguar ava sui, setá avei omondo mbahe quira ava imbaheasi vahe rese imbogüera āgua yuvireco.

Juan Oporoāpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipñrata vahe —ehi.

¹⁵ Ambuae rumo,

—Tūpa ñehe mombehusar Elías mo evocoi —ehi yuvireco.

Ambuae evocoyase,

—Tūpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cñritei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoiyase oyuca pota Juan yamotarēhisave; ndoicatu rumo yuca. ²⁰ Esepia, Herodes osiquiyeño ichui oicuae co mba reco tupri aisa iyavei seco maranehise. Sese osepí ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoiyase amondora ndeu —ehi.

²³ Ipape aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osé oso, osí upe oporandu:

—¿Mbahe rese piha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe āca rese —ehi chupe.

²⁵ Ipape cuñatai oña, oi que oso mborerecuar guapísave, aipo ehi chupe:

—Che aipota co pipeve voi eremboura Juan Oporoãpiramo vahe āca poratu pipe cheu —ehi.

²⁶ Mborerecuar rumo ndoyembovihal tēi. Esepia, ava ichohopri rovaque ité yipindar oñehe. Sese ndoicatu, “Aní” ohe āgua. ²⁷ Evocoiyase ipape voi mborerecuar oyocuai sonda Juan āca reru āgua. ²⁸ Sundaoso soquendasave, oyasia Juan āca, seru poratu pipe. Mborerecuar omondo co cuñatai upe, evocoiyase cuñatai omondo osí upe.

²⁹ Oyanduse Juan remimbohe, yuviraso setecuer reca. Ipape viraso yuvireco tuvípave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipape omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi apóstol upe:

—Perio chohave, yaso, yapituhumi rane co coti —ehi.

Esepia, oyepindecaño ité ava yugüeru chupe, sese ndiyai icaru āgua yuvireco. ³² Evocoiyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui.

³⁴ Ogüeyise rumo carite pipe sui, osepia ava rehi, ahese iparaisu ava eta chupe, inungar ovesa ndovirecoi vahe guārosar. Ipape ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru āgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pïha oreu dosciento denario pan repirã ava mbocaru ãgua? —ehi.

³⁸ Jesús aipo ehi:

—¿Mboví vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapí capihi hari rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipísi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehí upe imondo ãgua yuvireco. Pira ñuvirío vahe avei omboyaho-yaho opacatu ava upe. ⁴² Evocoyase opacatu ava ocaru vahe ihitaropa tēi yuvireco. ⁴³ Ipare semimbohe omboapipopa doce tuprí iruova pañ iyavei pira rumbírer yuvireco. ⁴⁴ Cuimbahe ocaru vahe retacuer cinco mil tuprí.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ípa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupí oso ívitrí rese oyeróqui ãgua. ⁴⁷ Pítuse carite ípa mbiterve ité secoí. Jesús rumo ahe ae opítaño ívive. ⁴⁸ Ahese omahe güemimbohe rese íyeapícuí catuēhise. Esepia, ívitu ípirata vahe osovaíchi yuvireco. Cōhe potase, oguata i hari rupi güemimbohe coti oso. Aviye ité acói oñocuaño vahe rã oso. ⁴⁹ Sepiase rumo ‘hãgüer tēi revo’ oya, sãse pucu-pucu i hari rupi íguatase semimbohe yuvireco. ⁵⁰ Esepia, opacatu osepiase osiquiye yuvireco íchui. Ahe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi güemimbohe upe.

⁵¹ Ahe ohase carite pipe, opítuhu voi ívitu. Evocoyase, “¡Mara ehi rutei!” ehi tēi yuvireco. ⁵² Esepia, ndoicua vitei eté pan apo atí agüer yuvireco, yavai vite seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ípa, oyepota Genesaret ívı rese yuviraso, ahe imbehive oñapíchiño carite yuvireco. ⁵⁴ Yuvinosepa ramomiseve, ava oicua voi Jesús yuvireco. ⁵⁵ Ichui opacatu ahe ívı pípendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oimí rupi, ahe supí imbaheasi vahe ocar rupi vinosepa voi yuvireco. “Topocomí tēi nde turucuar popí rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omongüiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iyepoiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe reroacasa sui oyevise, ndocarui oyepoiēhi viteseve yuvireco. Iyavei tecocuer aracahendar tēi oyapo vite yuvireco inungar ígua riru písa, mbahe riru guarepochi apopri iyavei vupa moatiro tuprisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahua tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuaita tēi’ ehi.

⁸ Ēgüe peye pepoipa Tūpa porocuaita sui ava recocuer aracahendar rupi tēi pe guata āgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuaita. ¹⁰ Esepia, Moisés aipo ehi: ‘Pembroyera iyavei peipitiviira pe ru, pe si avei no. Acoi ñehe mara vahe oyesupa upe ahe, Tomanño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe arco vahe Tūpa upe imondopri, ahe Corbán, ehi’ peye; ¹² pe evocoiyase,

aipo ehi vahe upe, ‘Ndiyai eté oyesupa pītiviī āgua’ peye. ¹³ Co nungar apo pipe Tūpa porocuaita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehi upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oi que oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangaipai eté? ¹⁹ Esepia niha, ndahei ipihave osó, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatui rumo ava sui oñemi. ²⁵ Oime cuña viresco vahe omembri cuñatai, ahe viresco carugar oyese; ahe cuña oicuase Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osẽ nde membri sui —ehi chupe.

³⁰ Co cuña oyepotase güetave, osepia omembri supave; yipive rumo osẽ carugar ichui.

Jesús ombogüera mbia ndayapisai, ñehe ipiti-piti vahe

³¹ Jesús oyevi oso Tiro ivi sui. Ipape osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, ñehe ipiti-piti vahe rerasosar: “Emondomi tẽi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipape omondo güendi ñapecu rese. ³⁴ Ipape omahe iva rese, ipitue pucu aipo ehi: “¡Efata!” ehi (‘timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, ñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. ³ Amondopase sètave sieporẽhi reseve, viroviapi-api tiẽtera tieporẽhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porẽhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tüpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tüpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihitaro yuvireco. Ipape rumo semimbohe omboapipo iri rane sumbirer siete iruova yuvireco. ⁹ Ava rehii ocaru vahe retacuer cuatro mil tupri. Ipape Jesús, “Aviye, peso tupri” ehi ava upe. ¹⁰ Ipape voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipape fariseo eta oyepota Jesús ñehe poepi-epi água yuvireco. Jesús recoãha água, oporandu iva pendar poromondiisa rese ‘¿Tüpa sui eté pïha ou?’ oya yuvireco chupe. ¹² Sese Jesús ipitue pucu, aipo ehi:

—¡Mahera vo co ava oipota iva pendar poromondiisa che recocuer cua água yuvireco! Namboyecuai chietera rumo que ñepeí evocoi nungar mbahe pẽu —ehi.

¹³ Ipare oseypaña ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan viraso güemihura yuvireco. ¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruise revo aipo ehi yandeu” ehi-ehi tēi oyeupe yuvireco.

¹⁷ Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ñgua pēu? ¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapiso vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapiso vahe yuvireco chupe ‘epocomi tēi sese’ oya yuvireco. ²³ Evocoyase oipopisi ndasesapiso vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. ²⁴ Ndasesapiso vahe omahese, aipo ehi:

—Asepia ava inungar ivira uguata vahe yuvireco —ehi.

²⁵ Evocoyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sētave aipo ehi chupe:

—Ereyevi iri eme tecuave —ehi.

Pedro oicua uca Jesús Tüpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava ñeñe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tüpa ñeñe mombehular mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tüpa Rembiporavo Poropisrosar ereico —ehi.

³⁰ Jesús rumo, “Pemombehui rene que ñepeí ava upe” ehi.

Jesús omombehu omano ñgua

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aciora. Ahe

avei che yuca ucara yuvireco. Acuerayevira rumo mbosapí arí rupí” ehi. ³² Ahe omboyecua tuprí ité chupe. Evocoiyase Pedro víraso co cotimi chupe oñehengata água. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esirí che sui, Caruguar! Esepia, nde nandepihañemoñetai mbahe Tüpa upenda rese; ava nungar tēi nde pihañemoñeta eico —ehi.

³⁴ Evocoiyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupí, topoi mbahe güemimbotar tēi aposa sui, iyavei inungar-ra curusu rese ovosíra viña, toyemoingatu voi che recocuer rese oparaisu água iyavei toguata tuprí che rupí. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisírosa sui avei, ahe oñepisírosa. ³⁶ ¿Avíye ai angahu píha ava upe opacatu mbahe iví pípendar písi água tēi, ahe ae tēi omocañi güecocuer yuvireco viña? ³⁷ ¿Mbovi píha omondora ava güecocuer repirā viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaípa viyar ndaseco tuprí vahe rovai, che avei, Ava Riquehír, égüe ahera acoi ayevíse che Ru reco pírata porañetesa pípe, sembiguai rehí íva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano víte chivaherā, osepia rane itera ouse Tüpa mborerecuasa ipíratasa pípe yuvireco curi —ehi.

Jesús ñecuñaro agüer

² Seis arí pare, Jesús víraso Pedro, Santiago, Juan reseve ivítri ivate vahe save oyeupi. Aheve avíyeteramo tēi oñecuñaro güemimbohe rovai. ³ Iturucuar sendí, morochí eteanga. Ndipoi eté que ava co nungar co iví pípe turucuar oyosei vahe. ⁴ Iyavei avíyeteramo tēi oyemboyecua Elías, Moisés reseve Jesús rese oñemoñeta yuvinocha. ⁵ Ipare Pedro aipo ehi chupe:

—Ore mbohesar, ¡avíye ai eté cohava yaico! Toroyapo mbosapí teyupami: ñepi ndeu nara, ambuae Moisés upe, ambuae evocoiyase Elías upe nara —ehi.

⁶ Osiquíye tēi semimbohe yuvireco. Sese Pedro ndoicuaise oñehe água, aipo ehiño tēi. ⁷ Ahe ramoseve avei ogüeyi íva quíha íharíve, oyopípa tuprí yuvireco. Ahe ipāhuve oyeendu ñehesa aipo ehi vahe: “Co che Rahír, che rembaísu; peyapísaca catu ñehe rese” ehi vahe. ⁸ Ahe ramoseve avei omahese oívií yuvireco, ndosepiaí eté que ambuae ava, Jesús güeraño tuprí ité osepia opāhuve yuvireco.

⁹ Ipare ogüeyi ivítri sui yuvireco, aipo ehi güemimbohe upe ou: “Ndapembehui chietera que ñepi ava upe co mbahe pesepia vahe, pemombehura rumo acoi che, Ava Riquehír, acuerayevise voi” ehi. ¹⁰ Oyeupeñomi tēi víreco aipo ñehesa yuvireco, ahe rumo oporandu-randu oyeupe: “¿Mara oya píha aipo, ‘Acuerayevira’ ehise?” ehi tēi yuvireco. ¹¹ Evocoiyase semimbohe oporandu chupe:

—¿Mahera ru Moisés porocuaíta rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moingatu água. ¿Mahera arachendar icuachiapri pipe aipo ehi: “Ava Riquehir oiporarara mbahe, yamotarêhimbri avei secoira” ehi? ¹³ Che niha aipo ahe pêu: Elías rumo ou ité, ava evocoiyase opacatu güemimbotar tēi oyapo yuvireco sese. Êgüe ehi opacatu yaviye arachendar icuachiapirer sese —ehi.

Jesús ombogüera chîhivahe carugar rerecosar

¹⁴ Ipare oyevi yuvireco güemimbohe recosave. Aheve osepia ava rehi oyere guasuse yuvireco sese, iyavei oime aheve Moisés porocuita rese oporombohe vahe oiñehepoepepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepe ipāhu pendar omboyevi chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi. ¹⁸ Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuyusu, sãitere-tere avei; sese cūrítei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatu eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pāhuve che ñemosasa pipe? Peru evocoi chîhivahe cheu —ehi.

²⁰ Evocoiyase ogüeru yuvireco chupe. Osepiase carugar Jesús, oiti uca iri chîhivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichîhivahemi suive ité. ²² Amove co carugar oiti uca tatave, ive avei yuca pota uca água yepi. Sese ereicatuse, ore pítiviñfomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pítivi ru eve nde reroya catu água! —ehi pírata chupe.

²⁵ Osepiase Jesús ava rehi, oyemboyase sese, oñehe pírata carugar upe aipo ehi:

—Carugar noñehi vahe, ndayapisai vahe, che orocuai, epei co chîhivahe sui, ereique iri eme secocuer rese —ehi.

²⁶ Carugar sãse pucu chîhivahe yuca tupri oso. “Omano ité co chîhivahe” ehi ambuae ava yuvireco. ²⁷ Jesús rumo oipopisi imopuha; evocoiyase chîhivahe opûha tupri voi eté.

²⁸ Ichui oiique oi pipe. Aheve semimbohe ahe aemi oporandu yuvireco chupe:

—¿Mahera pîha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano água

³⁰ Ichui yuvínosepase, yuviraso ivi Galilea rupi. Jesús rumo ndoyemboye-cua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehír, imondopri aicora che amotarêhimbar povrîve, che yuca aveira yuvireco, mbosapí ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu água yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe, —¿Mbahe rese vo acoi peyeaca-aca peico perî rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, perî rupi, “¿Ava pîha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oímese pe pâhu pendar oyemboivate ai vahe, ahe rumo seco ivi coti catura opacatu sui ava eta pîtvii água —ehi.

³⁶ Ipare oipisi chîhivahe güemimbohe pâhuvé senoha aipo ehi:

³⁷ —Acoi ava oipisi vahe co chîhivahemi nungar che rer pipe sereco, che ité che písi yuvireco; iyavei acoi ava che písi vahe, ndahei che güeraño che písi, oipisi aveira che mbousar —ehi.

Acoi ndahei vahe yande amotarêhimbar; ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe carugar. Ahe rumo ndoguatai cûritei ore rupi; ore ité ndoroipotai chupe —ehi.

³⁹ Jesús rumo,

—Aní êgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheerã oñehé rai che rese. ⁴⁰ Sese ndayande amotarêhi vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pëu, evocoi nungar oipisi itera porrecosa oyeupe nara —ehi.

Yaicua catura mbahe têi apoêhi água

⁴² “Acoi que ava omboangaipa uca vahe co chîhivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo água. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirêhisave ñepeí pe po rese, peso rãgüer sui que ñuvirío pe po rese tata guasu apirêhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pí pe mboangaipa ucase, peyasia avei peyesui. Esepia, aviye catu ndape pîndugüei peique tecovesave, que ñuvirío pe pí rese peique rãgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepeí pe resa rese Tûpa mborerecuasave que ñuvirío pe resa rese tata guasu apirêhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucrí aviye ai eté. Nasehe irise rumo, ndayaicatui chira imoehé iri água. Peico catu yucrí nungar mbahe tupri pipe peyeupe nara” ehi.

¹ Ipare Jesús osê tecua Capernaum sui, oso Judea ivi rupi iai Jordán rovai arí sêsa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri. ² Evocoyase fariseo oyemboya seco râha âgua têi yuvireco sese, “¿Aviye pîha cuimbahe omenda vahe opoi güembireco sui?” ehi yuvireco chupe. ³ Ahe rumo omboyeví chupe:

—¿Mara ehí vo acoi Moisés porocuita pîpe? —ehi.

⁴ Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi âgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaêhisa pîpe sui pëu. ⁶ Yipisuive ité niha, ‘Tûpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepépîra oyesupa sui güembireco rese ité yuvirecoi âgua. ⁸ Evocoyase ñuvirío yuvirecoira ñepeí ava nungar.’ Sese ndahe iri ñuvirío, ñepeí nungar ité yuvirecoira. ⁹ Evocoyase ava Tûpa omomenda vahe oyese, ndiyai ava têi omboyepeví yuvireco oyesui —ehi.

¹⁰ Oíve yuvirecoi vitese, semimbohe oporandu iri co mbahe rese yuvireco chupe. ¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa têi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa têi vahe avei —ehi güemimbohe upe.

Jesús osovasa chîhivahe

¹³ Ipare ogüeru chîhivahe Jesús upe yuvireco sese ipoco âgua. Semimbohe rumo, “¿Mahera vo peruño têi chîhivahe?” ehi opîha víracuasa pîpe serusar upe yuvireco. ¹⁴ Evocoyase Jesús osepiase, ndasorií güemimbohe upe aipo ehi:

—¡Mahera ndapeipotai iyu âgua! Toyugüeruño chîhivahe cheu. Esepia, co chîhivahe nungar ava yuviroiquera che Ru Tûpa mborerecuasave. ¹⁵ Supi eté, acoi ndoipisíí vahe che Ru Tûpa mborerecuasa chîhivahe nungar yuvireco, ahe evocoyase ndoyuviroiquei chietera ipîpe —ehi.

¹⁶ Evocoyase oipisí, omondo opo iharíve osovasa.

Ñepeí mbia chîhivahe imbahe eta vahe oñehe Jesús upe

¹⁷ Oguata vitese Jesús yuvireco, aheseve mbia chîhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirêhi vahe rereco âgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí vahe ité, ahe Tûpa secói. ¹⁹ Ereicua niha Tûpa porocuita: ‘Ndereporoyucaí chira, nandaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde sí avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chîhivahe suive —ehi.

²¹ Evocoyase omahe saísusave sese, aipo ehi chupe:

—Ñepeí mbahe rumo ipane vite ndeu: eso, emondopa rane nde mbahe; ahe sepi evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

²³ Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique água che Ru Tüpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tüpa mborerecuasave imbahe eta vahe reique água ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique água, ava imbahe eta vahe upe rumo yavai catu che Ru mborerecuasave seique água —ehi.

²⁶ Aipo nungar renduse oyepihamondi guasu yuvireco. Oporandu-randu tēi oyeupe yuvireco: “¿Ava angahu pīha oñepisirota yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo água; Tüpa upe rumo ndayavaimi eté. Esepia, Tüpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata água —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirota raisusa pipe oseypa vahe güeta, viquehir, vívri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vívri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano água

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovīhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime água cheupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povriye yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroiporta ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vahe rā pēu? —ehi chupe.

³⁷ —Ore oroiporta nde mborerecuara porañetesave ore mboguapira ndeyepiri eve, ñepeí nde mbahe rese pocosa coti, ambuae nde mbahe rese pocoñehisa coti —ehi yuvireco chupe.

³⁸ Evocoyase omboyeve:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaheṛā, inungar-ra que igua iro vahe aihu vaheṛā viña? Iyavei, ¿peicatura pīha che āpiramosa aipisi vaheṛā pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vaheṛā nungar. ⁴⁰ Co rumo ndiyai cheu che piri pe guapi āgua, che mbahe rese pocosa coti, ambuae che mbahe rese pocoēhisa coti. Che Ru Tūpa omoingatu güembiporavo upe nara oguapi vaheṛā che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoapirasá iteanga omborecuasa pipe yepi. ⁴³ Pe rumo ēgüe ndapeyei chira pe yeereco. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ⁴⁴ Iyavei acoi pe pāhu pendar oipota vahe tenondé catu güeco āgua, ihañeco tupri ranera opacatu pe pāhu pendar rese. ⁴⁵ Aherā niha che, Ava Riquehir, ayu ndahei ava che rese ihañeco āgua; che rumo ayu ava rese che hañeco āgua, iyavei amondo vaheṛā che recocuer manosave ava eta repirā Carugar povri sui senose āgua —ehi.

Jesús ombogüera Bartimeo sesapisoēhisa sui

⁴⁶ Ipare oyeputa tecua Jericó ve yuvireco. Ahe tecua sui yuvinosese güemimbohe reseve, ava rehií avei, aheve peri popive mbia ndasesapisoí vahe Bartimeo serer vahe, Timoteo rahir, oguapi oñ. ⁴⁷ Osenduse, “Jesús Nazaret pendar” hesa, osapucaí pīrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo, —¡David suindar, che paraisuerecomi tēi eve! —ehi pīrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epūha. Esepia, oñehe aipo ndeu —ehi.

⁵⁰ Aipo oyeupe he ramosave, omomboño oturucuar guasu, opūha yesapiha oso chupe. ⁵¹ Evocoyase oporandu ndasesapisoí vahe upe:

—¿Mbahe vo ereipota ayapo vaheṛā ndeu? —ehi.

Ahe evocoyase,

—Porombohesar, che mbosarecomi tēira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramosave ndasesapisoí vahe osareco tupri ité. Ipare osoño ité Jesús raquicuei peri rupi.

11

Jesús oi que Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ñipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo êgüe peye?” ehise pëu, “Ore Yar oiporu pota, ipare niha omboyevi voiñora” peyera chupe —ehi.

⁴ Evocoiyase ahe yuviraso perî rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohessa rupi tupri ité omboyevi yuvireco chupe. Evocoiyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Aheve Jesús oyeupi iharive.

⁸ Setá ava oipipira oturucuar perî rupi, ambuae ava evocoiyase oyasia pindo omondo perî rupi saperã yuvireco. ⁹ Ava senonendar, saquicuerindar avei, —¡Imboeteipri, sovasapri tasecoi ou vahe yande Yar rer pipe! —ehi pirata yuvireco chupe—. ¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

¹¹ Êgüe ehi Jesús oiqueste Jerusalén ve. Ipare oi que tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico.

¹³ Osepia se amombri ivira higuera so ati vahe, oso chupe ‘¿iha pïha?’ oyapave. Ahe rumo osepia so pãve tēi sese. Esepia, ahe ivira upe ndosupiti vitei iha ãgua. ¹⁴ Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaheerã! —ehi. Semimbohe osendu ñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiqueste judío tũparo guasu pipe, omboipi ava mbahe mondosar, mbahe reroquasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroiquepirã tũparo pipe. ¹⁷ Ipare oporombohe aipo ehi:

—Icuachiapri arachendar pipe aipo ehi: ‘Cò che rēta yeruresa rētarã opacatu ava ivi pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuaita rese osenduse, “¿Mara yahera pïha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovihai iporombohesa rese yuvireco. ¹⁹ Pïtu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoiyase Pedro oyemomahenduha voi ñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tũpa rese —ehi—. ²³ Supi eté aipo ahe pëu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo

hesa rese, ěgüe ehi etera chupe. ²⁴ Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vaheřã rese pëu, ahese peipisi itera. ²⁵ Acoi peyerouquise, yipindar peñero rane que pe amotarëhimbar upe, ahese ěgüe ehi aveira pe Ru ìva pendar iñero pe angaipa rese pëu. ²⁶ ěgüe ndapeyese, pe Ru ìva pendar avei niñeroi chira pe angaipa rese pëu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborecuarã ndeu co nungar apo ãgua? —ehi yuvireco chupe.

²⁹⁻³⁰ Evocoyase omboyevi chupe:

—Che avei aporandura mbahe rese pëu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyevise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. ³² ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoyase omboyevi chupe yuvireco:

—Nodoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oi ivate vahe opacatu mbahe moha ãgua. Ipare oseya oivi ava oporaviqui vahe upe iporu ãgua. Ichui osẽ, oso amombri vahesa rupi. ² Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri che-undar cheu cute’ oyapave viña. ³ Ahe rumo oipisiño, inupa-nupa imboyevi tupri tẽi yuvireco. ⁴ Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tẽiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocaño yuvireco, oyucaño avei ambuae yuvireco.

⁶ “Iyavei ñepeï opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco. ⁸ Ichui oipisi, oyucaño yuvireco. Ipare ovinose sehõgüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

¹¹ Ëgüe ehi niha yande Yar yapo.

¡Mara ehi rutei revol' ehi icuachiapri pipe" ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecõha iri tõi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe 'toyavi angahu õñehe' oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tõi. Esepia, "Ëgüe ehi co mbia" nderei eté ava upe iyavei ereporombohe mbahe supi tupri vahe Tüpa remimbotar apo ãgua rese. ¿Aviyera piha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihãñehisa, sese aipo ehi voi chupe:

—¿Mahera che moingue pota mbahe tõi pipe peye? Peru evocoyase ñepeí guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoyase pemondora Tüpa upe —ehi.

Evocoyase oyepihamondii tõi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoyase saduceo "ndipoi eté cuerayevisa" ehi vahe yugüeru Jesús upe. Oporandu tõi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi:

"Que cuimbahe omenda vahe omanose guahiñehiseve, tivri evocoyase omen-dara sembirecocuer rese ahe viquehir omano vahecuer upe nara tahira oico." ²⁰ Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahii eté rumo. ²¹ Ipare tivri omenda viquehir

rembirecocuer rese. Ahe rumo omanoño, ndatahii avei rumo. Ëgüe ehi tupri avei tivri imombosapisa. ²² Ëgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera piha? Esepia niha, siete

tupri ité omenda tõi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe pihãñemoñeta pipe peyavi. Esepia, ndapeicuai eté Tüpa ñehe icuachiapri aracahendar, ndapeicuai avei Tüpa piratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tüpa rembiguai

iva pendar nungar yuvirecoira ivave. ²⁶ Co cuerayevisa resendar rumo amombehura pëu: aviye ndapeyeroquii anga vahe Moisés rembicuachi-

agüer pipe, acoi caha rese sendi guasu vahe aviterve Tüpa aipo ehise chupe: 'Che Abraham, Isaac, iyavei Jacob Tüpa aico' ehi vahe. ²⁷ ¡Tüpa ndahei omano

vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepeí Moisés porocuita rese oporombohe vahe osendu ñehe pĩratase oyeupe yuvireco, oicua avei Jesús omboyeveí tuprise ñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyeveí chupe:

—Yipĩndar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepeí yande Yar secoi. ³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pĩratasa pipe’ ehi. ³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepeí Tūpa iyavei ndipoi eté ambuae. ³³ Iyavei yasaísura Tūpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaísura ava yande yeaisu nungar. Ahe ité aviye catu mbahe seropovēhepi sui iyavei opacatu porerecosa sapipri tēi sui —ehi.

³⁴ Evocoyase Jesús icuase co ava pihañemoñeta tuprisa, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaherā mbahe rese yuvireco chupe.

¿Ava suindar pĩha Poropĩsirosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropĩsirosar David suindar ité” ehi yuvireco? ³⁶ Esepia, David ité aipo ehi Espĩritu Santo pĩratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’

ehi David aracahe. ³⁷ ¿Mahera ru, “Poropĩsirosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pōta rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave oguapi yuvireco yepi no. ⁴⁰ Iyavei cuña imer mano vahecuer rēta virocuarocua tēi ichui. Oarondaguā tēi avei oyerōqui pucu-pucu yuvireco. Ahe rumo oipisira Tūpa ñemoirosa ipĩrata catu vahe yuvireco curi” ehi.

Cuña imer mano vahecuer porerecosa

⁴¹ Ñepeí arí Jesús oguapi oĩ porerecosa riru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer

iparaisu vahe. Ahe avei omondo ñuviriomi guarepochi oporerecosa ipipe. ⁴³Evocoiyase Jesús oñehe güemimbohe upe aipo ehi:

—Supi eté che aipo ahe pëu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe. ⁴⁴Ambuae ava eta rumo oguarepochi rumbirermi tēi omondo oporereco āgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

13

“Imondurusara tūparo guasu” ehi Jesús

¹Jesús osēse tūparo guasu pipe sui, ahehe ñepei semimbohe aipo ehi chupe:

—Ore mbohesar, jesepia oī ita imopuhapri, icatupri ai! —ehi.

²Jesús rumo omboyevi chupe:

—¿Pesepia co oī tuvichá vahe ité? Ndipoi chietera rumo que ñepei ita oyeha vite vahe; opacatu ité imondurusara curi —ehi.

Cañi renonde mbahe oime vaheṛā

³Evocoiyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús oguapise oī, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴“¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵Jesús rumo omboyevi chupe: “Peicua catu, peyembopa ucai rene ambuae ava upe. ⁶Esepia, setá ava yugüerura, ‘Che niha Poropisrosar aico’ ehi tēira ava eta mbopa yuvireco.

⁷“Pesenduse rumo ñehesa vavasa resendar cohava, iyavei que rupi, ndapeyembosiquyei chietera. Esepia niha, ěgüe ehi rane itera; ndehi vitei chira rumo ari cañi. ⁸Esepia, ñepei ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catú tēi tecua rupi, tiavor avei. Co rumo omboipi ramomira mbahe tēi porarasa.

⁹“Peñearo catu. Esepia, pe rerasora mborecuar rovai yuvireco, iyavei pe nupara tūparove yuvireco. Pe reraso aveira mborecuar eta rovai, iyavei mborecuar ivate catu vahe rovai che recocuer sui tēi yuvireco. ěgüe peyera peñehe che recocuer rese chupe. ¹⁰Cañi renonde rumo co ñehesa pīsirosa resendar opacatu rane ité ava upe icua ucasara ivi rupi. ¹¹Iyavei, ‘¿Mbahe pīha amombehura chupe?’ ndapeyi chira pe mondose mborecuar rovai yuvireco. Aheve voi eté omboyecuara Tūpa pe ñehe āgua pëu. Esepia, ndahei chira peyesui tēi peñehe, Espiritu Santo ité oñehera. ¹²Ipare rumo ava omondoñora vivri yamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhiñora oyesupa yuca uca āgua yuvireco che recocuer rese. ¹³Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipisiropi yuvirecoira.

¹⁴“Tūparo guasu maranehi pipe pesepiase mbahe-mbahe tēi aposa —acoi oyoeroqui vahe, ahe tosenducua tupri yuvireco—, evocoiyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵Acoi güēta harive secoi vahe, ahe ari toique ari eme güētave mbahe renose āgua. ¹⁶Acoi que rupi tēi secoi vahe, toyevi eme avei güētave oyeaosa renose āgua. ¹⁷¡Iparaisu itera cuña ipuruha vahe ahe ari pipe, imembi pitani vahe avei! ¹⁸Peoporandu Tūpa upe, toime eme co nungar mbahe sōhisa vahe pipe pëu. ¹⁹Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui;

ipare ndipo iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropisirosar secoi’ ehi, anise, ‘Peve secoi’ ehise yuvireco pëu, aní chira peroya aipo ehi vahe. ²² Esepia, yugüerura ava, ‘Che Poropisirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe pomondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pëu” ehi.

Mara ehira Tūpa Rahir oyevisē

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi i va sui, iyavei i va resendar mbahe oririira yuvireco. ²⁶ Ahese che, Ava Riquehir, i va quha rese ayecua itera vitu che pīratasa pipe che rendigüer porañetesa pipe avei. ²⁷ Ipare amboura che rembiguai eta i va pendar. Ahe evocoiyase omonuhara opacatu i vi rupindar che rembiporavo yuvireco, que amombri rupi yuvirecoi vahe, que i va rese yuvirecoi vahe avei.

²⁸ “Peyembohera i vira higuera recocuer sui: co i vira soqui ramosē, yaicua cōimi ari sacu vahe yepota āgua yandeu yepi. ²⁹ Na ehi aveira niha pëu che ñehē rupi tupri mbahe pesepiase. Sese peicuara che, Ava Riquehir, cōimi etē che yevi āgua. ³⁰ Supi etē yuvirecove vitera ava osepia vahe, co mbahe opase yaviye. ³¹ I va, i vi opara ocañi; che ñehengagüer rumo imboaviyesa rane itera.

³² “Ndipoi etē rumo ava oicua vahe ari iyavei hora che yevi āgua yuvireco, che Ru rembiguai i va pendar avei ndoicuai yuvireco, che avei ndaicuai etē. Che Ru güeraño itē rumo oicua.

³³ “Sese niha pemahemohara yepi, che rārora peye. Esepia niha, ndicuasai che yevi āgua. ³⁴ Inungar que mbia amombri oso pota āgua renonde, güembiguai oseyapa güēta rāro āgua, omondo avei ñepe-i-pei upe iporaviqui āgua, iyavei omondo güēta roquendipi rāro āgua. ³⁵ Pe evocoiyase pemahemohara. Esepia, ndapeicuai marase che oi yar ayevira pëu, aviyeteramo pītu ramosē, pītu mbiter, tacura ñehese, anise añihivei. ³⁶ Ndaipotai pemahemohaēhiseve tēi ayevira. ³⁷ Che aipo ahe pëu, opacatu upe avei: ¡Pemahemohaño itē yepi!” ehi güemimbohe eta upe.

14

Oyemomborandu Jesús yuca āgua rese yuvireco

¹ Ipare ñuvirio ari judío Pascua pieta āgua ipare, ahe pieta pipe yuvirohu pan ndayapepoi vahe yepi, pahí rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. ² Ambuae rumo aipo ehi yuvireco:

—Ndiyai pieta pipe itē yaipisi ava rehii yemondiēhi āgua yandeu —ehi.

Cuñā Jesús rese mbahe siacua vahe oipiyere

³ Ahese Jesús secoi Betania ve Simón lepra vireco vahecuer rētave. Aheve mesave chiniseve, cuñā güeru mbahe siacua vahe siru reseve sepí iteanga vahe. Ahe osovapisa rerocua, ipare oipiyere Jesús āca rese. ⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sīacua vahe? ⁵ Omondo vahe ité tie co tresciento ari rupindar mboraviqui repri rupi ava iparaisu vahe pītivii āgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoiño itera pe pāhuve, iyavei peyapoño itera mbahe aviye vahe peyapo potase chupe; chē rumo ēgüe ndahe viteñoi chira vichico pe pāhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoēhi viteseve. ⁹ Supi eté aipo ahe pēu: ñehesa pīsirosa resendar mombehuve opacatu tecua rupi, imombehusa aveira co cuña rembiapo sese mahenduha āgua —ehi.

Judas oyemoingatu Jesús mondo āgua yamotarēhimbar upe

¹⁰ Evocoyase Judas Iscariote, semimbohe doce vahe pāhu pendar, oso pahi eta rerecar upe imoñeta Jesús mondo āgua. ¹¹ Senduse, oyemboviharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo āgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahesa avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohurā che remimbohe reseve? ehi’ peyera. ¹⁵ Evocoyase ahe omboyecuara oi guasu ivatendar imoingatupri pēu. Aheve pemoingatu mbahe yahu vaherā —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepiā mbahe yuvireco. Ichui omoingatu carusa Pascua pieta resendar yuvireco.

¹⁷ Pītu ramomise, Jesús doce güemimbohe rese aheve oyepota yuviraso.

¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepepe pe pāhu pendar yande piri ocaru vahe che mondona che amotarēhimbar upe —ehi.

¹⁹ Evocoyase semimbohe ndoyembovihai tēi yuvireco, iyavei oporandurandu tēi ñepepepe chupe yuvireco:

—¿Che pīha? —ehi yuvireco.

²⁰ Omboyevi rumo güemimbohe upe:

—Ñepepe eté pe pāhu pendar ahe co omoaqui pan che caro pipe. ²¹ Supi eté che, Ava Riquēhīr, amboaviyera icuachiapri; iparaisu catura rumo acoi mbia che mondosar! Aviye catura ahe mbia ndoyesuisse viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohī-mbohī imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Ahesa aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara. ²⁵ Supi eté aipo ahe pēu: ndaihu iri chietera

uva ricuer cheu ari oyepotase voi che Ru Tūpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi. ²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ēgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pītu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

³¹ Ahe rumo,

—Yepe che amano tēira nde rupi viña, che rumo, “Ndaicuai vahe evocoi mbia” ndahei chietera —ehi—ehi catuño ité chupe.

Ambuae opacatu aipo ehi tupri tēi avei yuvireco chupe.

Jesús oyerogui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohava, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambovihai eté oico ³⁴ aipo ehi:

—Che cūritei ndavihai eté. Esepia, che hã oyandu ité manosa. Pepita rane cohava, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoyase oso tenonde catumi. Aheve oyaivi ivi rese oso, oporandu Tūpa upe mbahe tasi vahe reimeñhi āgua oyeupe. ³⁶ Oyerogui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeí hora nde ropesii upe?

³⁸ Pemahemoha, peyerogui mbahe tēi pipe pe viapiñhi āgua. Pe niha pequerēhi ité viña, pe retecuer tēi rumo nipiratai pēu —ehi.

³⁹ Ichui oso iri oyerogui, aipo ehi tupri avei oñehe. ⁴⁰ Ipare oyevise, osesapiha iri iquesave tēi avei. Esepia, sopesii nomboyeroyai eté yuvireco, ahese ndoicatuñi eté ñehe mboyevi yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo āgua ava yangaipa vahe povrive. ⁴² Pepūha, yaso. Esepia, cōimi eté che amotarēhisar upe che mondo vaherā secoi —ehi.

Jesús ipisisa

⁴³ Jesús oñehe viteseve ohã, Judas oyepota oso chupe, ahe doce pāhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío

rerecuareta porocuaita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe: —¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secói vahe supí ovinose oquise pucu. Ipípe oyasia pahí rerecuar ivate catu vahe rembiguai nambi. ⁴⁸ Ahese Jesús aipo ehi ava upe: —Pe quise pucu, ivira reseve-seve rutei co peyu che ropeña che písi água. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo êgüe peye icuachiapri mboaviye água cute —ehi.

⁵⁰ Ahese semimbohe oñemosaipe oseya Jesús ahe ae tupri imoha yuvireco.

⁵¹ Mbia chihivahe rumo turucuar pipe güerañomi oñemama vahe supive secói viña; ⁵² ahe avei oipisi yuvireco. Oipoequiñiño rumo oturucuar reya oso nani tupri.

Jesús serasosa pahí rerecuar ivate catu vahe rovai

⁵³ Evocoiyase Jesús viraso pahí rerecuar ivate catu vahe rovai yuvireco. Aheve oñemonuha pahí eta rerecuar, judío rerecuar, Moisés porocuaita rese oporombohe vahe avei no. ⁵⁴ Pedro avei amombri rupive tẽi oigue ité oso pahí rerecuar ivate catu vahe rêta achisa pipe. Aheve oguapiñiño mbia sundao pãhuve tata ipive oyepehe oĩ.

⁵⁵ Pahí eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vaherã Jesús rese yamotarẽhisave yuca uca água yuvireco; ndoicatui eté rumo yuvireco. ⁵⁶ Iyavei setã iteanga tẽi semira yuvireco sese; oyeecopi-copi tẽi rumo güemira pipe. ⁵⁷ Amove aipo ehi tẽi yuvireco seco momara água:

⁵⁸ —Ore orosendu iñehe aipo ehise: ‘Che opara amonduru co tũparo ava tẽi rembiapo. Ipare rumo mbosapi ari rupi opara amopuha. Ndahe iri chira evocoiyase ava tẽi rembiapo’ ehi —ehi tẽi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahí rerecuar ivate catu vahe opũha oporandu Jesús upe:

—¿Nderemboyevei chira vo iñehe yuvireco chupe? ¿Mbahe vo aipo nde amotarẽhinbar oñehe nde rese? —ehi chupe.

⁶¹ Noñehiño ité rumo chupe. Pahí rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tũpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarẽhi acato coti; ayevise avei va quiha rese curi —ehi chupe.

⁶³ Evocoiyase pahí rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico? ⁶⁴ Yasendupa niha aipo Tũpa upe iñehe-ñehe tẽisa, ¿mara ehi aipo evocoiyase pe pihave? —ehi.

Ipare opacatu guasu ava, “¡Tomanõño ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocuarocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovape-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe. ⁶⁷ Osepiase Pedro iyephehese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osêse oquendipive ohã, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehes yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cōhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco.

² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe. ⁴ Evocoyase Pilato oporandu iri chupe aipo ehi:

—¿Mahera vo ndereñehēi eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pñha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepei ava soquendapri renose ñgua Pascua pieta pipe ava rehii porandusa rupi yepi. ⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

⁹ Pilato rumo aipo ehi:

—¿Peipotā amose vaherā judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-ati uca ava yuvireco. ¹² Evocoyase Pilato oporandu ahe ava upe:

—¿Mbahe vo peipotā ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevii Pilato upe:

—¡Tayaticasa curusu rese! —ehi ati-atiño yuvireco.

14 Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Yaticasa ité curusu rese! —ehi ati-ati iriño yuvireco.

15 Evocoyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

16 Ahese sundao víraso mborerecuar rēta sui ambuae oi pipe, aheve opacatu omboetasa omonuha yuvireco. 17 Aheve omboyemonde turucuar pīraumbi vahe pipe yuvireco, ipare yu piapri omonde ñaca rese. 18 Sāse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

19 Iyavei yuvirecua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu. 20 Marara tēi serecō pare, ovirecua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

21 Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Ério, terevosii curusu co Jesús víreco vahe rese” ehi voiño tēi yuvireco chupe.

22 Jesús oviraso Gólgota serer vahesave yuvireco (‘Ava Áca Cangüer’ oyapave aipo ehi). 23 Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. 24 Evocoyase oyatica yuvireco. Ipare sundao iguayíño Jesús turucuar rese ‘¿uma piha vírasora oyeupe’ oyapave yuvireco.

25 Ahe oyatica añihivei la nueve rupi yuvireco. 26 Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oí. 27 Supive avei yaticasa ñuvirío imonda rai vahe ñepeí mbahe rese ipocosa coti, ambuae mbahe rese ipocohisa coti. 28 Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

29 Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. 30 ¡Eñepisiro ru nde ae cute; egüeyi curusu sui! —ehi yuvireco chupe.

31 Ēgüe ehi avei pahi eta rerecuar, oporombohe vahe avei Moisés porocuaíta rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. 32 ¡Poropisirosar Israel rerecuar guasu, toyeeroyi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

33 Osupitise rumo mbiter ari, opa tupri pītu ivi rupi. Ēgüe ehi las tres rupi. 34 Ahese tupri avei Jesús oñehe pīrata aipo ehi: “Eloi, Eloi, ¿lema sabactani?”

ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehúsar Elías upe oñehe —ehi yuvireco chupe.

³⁶ Evocoyase ñepeí imboetasa oña oso mbahe saviyu vahe reca. Ahe omoaqui vínagre pípe imondo ivíra apri rese chupe ‘toihu’ oya:

—Ēgüe tehiño rane, ¿oura pñha Elías seroyi água curusu sui? —ehi.

³⁷ Ahese Jesús sãse pírata. Ipare omano. ³⁸ Aheseve tūparo asiasa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tūpa Rahír ité —ehi.

⁴⁰ Iyavei cuña aheve amombrive osepia catu yuvinoha; ahe yuvireco María Magdalena, José si María, ahe avei Santiago chíhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipitívii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvípa pípe

⁴² Pítu ramose, ahe arí pípe oyemoingatu ava yuvireco arí mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acói Tūpa mborerecuasa osãro vahe oico, oqueréhisa pípe ité oiique oso Pilato upe oporandu água Jesús rehögüer rese. ⁴⁴ Pilato rumo oyepihamondii tēi, “Omano” hese. Oñehe sundao rerecuar upe oporandu água ‘¿marase vo ěgüe ehi?’ ⁴⁵ Sundao rerecuar omombehuse chupe, ahese omondo sehögüer José upe. ⁴⁶ Evocoyase José víroca turucuar secose vahe. Curusu sui seroyi pare, oimama voi eté ipípe. Ipare omoingue tuvípa ita yohopri pípe. Ichui ita yapayere vahe pípe osovapi. ⁴⁷ María Magdalena iyavei María, José si, osepiáno yapocatuse yuvireco.

16

Jesús ocuerayevi

¹ Mbituhusa arí pare, María Magdalena, María, Santiago si, Salomé avei, ahe víroca mbahe síacua vahe Jesús rehögüer rese nara yuvireco. ² Iyavei añihiveive, yipíndar arí semana pípe, oyepota Jesús ruvípave icatu ramose yuviraso. ³ Aheve aipo ehi oyeupe yuvireco:

—¿Ava pñha co tehögüer rovapísa vírocuara yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã, ⁵ yuviroíquese tehögüer ruvípave yuvireco, aheve osepia ombahe rese pocosa coti mbia chíhivahe, iturucuar pucu morochi vahe oguapise oí. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquíye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohove. Pesepia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri peyera —ehi.

⁸ Evocoyase ahe cuña yuvinosese tuvípa sui, yuvinoña yuviraso, orirí avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharēhisave yuvireco. ¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pīsirosa resendar peico. ¹⁶ Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondiisa omboyecua che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondosé opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tüpa acato coti oĩ. ²⁰ Semimbohe evocoyase opa yuviraso opacatu ivi rupi ñehesa pīsirosa resendar mombehu. Yande Yar avei oipitivi, iyavei mbahe poromondiisa pipe omboyecua uca ité ñehesa pīsirosa resendar supi eté vahe. Aipo rupive.

LUCAS REMBICUACHIA JESUS RECOUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombepupri mboaviyesa cūrítei yande pāhuvé co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri āgua, Teófilo. Ichui che amoiangatu tupri pota icuachiapri sesendar ndeu nara avei sereco. ⁴ Evocoiyase nde ereicua tupri ra co porombohesa supi eté vahe acoi nde mbohe agüer.

Tūpa rembiguai omombehu Juan Oporoāpiramo vahe ha āgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Tūpa upe; viroya tupri opacatu Yar porocuaita yuvireco. Evocoiyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepeí ari aipo osupiti icuaita tūparo pipe imboetasa reseve iporaviqui āgua Tūpa rovaque yuvireco. ⁹ Pahi recosa ité ěgüe ehi aracahe suive, ahese iporavosa Zacarías yipindar yasiapri tūparo maranehi pipe oi que vahe rā itaisi rapí āgua. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tūpa rembiguai repiase aipo, oyembosiquiyé iteanga. ¹³ Tūpa rembiguai rumo aipo ehiño chupe:

—Zacarías —ehi—, eresiquiye eme. Tūpa osendu nde yeruresa. Sese nde rebireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tūpa rovaque. Ndoiñhui chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohaēhi viteseve. ¹⁶ ěgüe ehira omonguerēhi setá ava judío Yar Tūpa reroya iri āgua oico. ¹⁷ Ahe virecora espíritu pīratasa oyese oyoyara Tūpa ñehe mombehúsar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya āgua rese’ oyapave. ěgüe ehira ava mbohe imoiangatu yande Yar pisi āgua sereco —ehi chupe.

¹⁸ Evocoiyase,

—¿Mara ahera pīha aipo reroya? Che rumo acuacuami eté vichico, iyavei che rebireco ocuacuami avei no —ehi Tūpa rembiguai upe.

¹⁹ —Aní —ehi chupe—. Che aico Tūpa rembiguai Gabriel, Tūpa rovaingar. Ahe niha che mbou ndeu che ñehe āgua iyavei co ñehesa aviye vahe mombehu āgua. ²⁰ Nde rumo ndereroyai acoi amombehu vahe ndeu. Sese co pipe suive ité nandēhengatui chira eico. Osupitise voi che remimombegüer,

acoi ohasa nde rahir, ahese ramo ndeñehengatura —ehi aipo Tūpa rembiguai chupe.

²¹ Osāro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pipe sui?” ehi tēi yuvireco chupe. ²² Osēse aipo tūparo pipe sui, niñehengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

²³ Ipare omboaviyese ocuaita tūparo pipe, oyeví oso güētave. ²⁴ Coiye aipo sembireco Isabel ipuruha oico. Judío porocuaíta mboyeroyasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tūpa ité ēgüe ehi cheu ava che rese ñeheñhi iri āgua yuvireco” ehi vorivetesasa pipe aracahe.

Tūpa rembiguai Jesús yesu āgua omombehu

²⁶ Coiye seis yasi pipe Tūpa omondo güembigui Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tūpa rembiguai oi que co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pītivīsa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco. ³⁰ Evocoiyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua. ³¹ Cūrītei voira rumo ndemembira: ererectora nde membri; ahe serer-ra Jesús. ³² Ahe niha secouvicha catu vaherā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe. ³³ Mborerecuar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

³⁴ Evocoiyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harīve iva quiha nungar; Tūpa güeco pīratasa pipe nde momembira. Sese acoi ohasa nde membri seco maranehi vahe, “Tūpa Rahir” hesara chupe. ³⁶ Cūrītei nde mu Isabel avei ocuacuami pipe imembī oico; ahe niha ndimembī vahe yipindar viña, cūrītei rumo vireco seis yasi omembri vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoiyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rēta pipe oi queuse oso, oyapo “avirave” omu Isabel upe. ⁴¹ Evocoiyase Isabel rie pipe omī imembri iñehe renduse. Ahese Espíritu Santo oi que Isabel aviterve. ⁴² Ipare osapucaí pīrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membri!
 43 Noromohai eté che piri ereyu vaheṛā viña, che Yar si. 44 Esepia, cheu “avirave” ereyapose, che membri omi voi vorivetesave che rie pipe.
 45 ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

46 Evocoiyase aipo ihese,
 “Che niha amboetei che Yar vichico;

47 cheroriveté Tūpa che Pisirosar rese.

48 Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

49 Esepia niha, Tūpa mbahe mboavaisarēhi, oyapo mbahe tuvichá vahe cheu. ¡Tūpa imboeteipri catu tasecoi yepi!

50 Ahe oiparaisuereco opacatu omboeteisar yepi.

51 Nomboavai eté mbahe yapo.

Osecoreroyi ava oyemboivate ai tēi vahe.

52 Viroyi mborerecuar seco pīrata vahe pīratasa sui; ava seco mbegüemi vahe rumo osecomboivate.

53 Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

54 Oipitiviñi niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mundo ñgua
 55 güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesave pipe omu

Isabel upe.

56 Ipape María opita Isabel piri mbosapi yasi rupi. Ichui oyevi oso güetave.

Juan Oporoñpiramo vahe haragüer

57 Osupitise ari Isabel upe, imembira. Ahe imembri cuimbahemi. 58 Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco. 59 Ocho ari pipe aipo, ahe pītani ombocircuncida yuvireco judío porocuaita mboyeroyasa pipe. Ipape aipo omondo pota iyesupa Zacarías rer yuvireco sese viña, 60 ichi rumo,

—Aní —ehiño—. Juan itera rumo serer —ehi.

61 —¿Mahera vo? Ndipoi eté rumo nde mu rer aipo nungar —ehi yuvireco chupe.

62 Evocoiyase aipo omahe pītani yesupa rese yuvireco ‘¿mbahe pīha ahe omondo pota sererguā viña?’ oyapave yuvireco. 63 Evocoiyase aipo iyesupa oporandu ivirapemi rese sese serer oicuachía vaheṛā. Ahe serer oicuachía: ‘Juan sererguā’ ehi imoi. Ahesa aipo opacatu ava: “¿Mara ehi rutei pīha co?” ehi tēi oyeupe yuvireco. 64 Ahesa ramo Zacarías ñnehengatu, omboipi Tūpa upe osapucai oico. 65 Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. 66 Mbahe osendu vahecuer rese avei aipo oporandurandu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

Zacarías sapucai agüer

67 Zacarías, Espiritu Santo pīratasa pipe, oñehe Tūpa oyeupe ñehesa pipe aipo ehi:

68 “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe pĩsiro ãgua!

⁶⁹ Ombou niha Poropĩsrosar güembiguai David suindar yandeu.

⁷⁰ Ëgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pĩsirora yande amotarẽhimbar sui.

⁷² Ëgüe ehi Tũpa imbou oporoparaisuerecosa yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarẽhimbar povri sui ‘tache mboetei osiquiyeehisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tũpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pĩsi ãgua senondeve eico.

⁷⁷ Supi eté nde niha eremboyecuara opacatu ava Tũpa upendar yuvirecoi vahe upe angaipa sui ñeroisa pĩsi ãgua ññepĩsro ãgua.

⁷⁸ Esepia, yande Ru Tũpa, oporoparaisuerecosa pipe ombou oporoepesa ìva pendar yandeu yande reco mbopiasu ãgua

⁷⁹ iyavei ava Tũpa cuaparẽhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pĩtumimbisave yuvirecoi vahe, ocañi tẽi vaherã yuvireco”

ehi Zacarías.

⁸⁰ Ichui pĩtani ocuacua iyavei vireco pĩratasa Espĩritu suindar oyese. Ipare rumo oso oyemboerecua ìvi iporupirẽhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rẽise. ³ Opacatu ava yuviraso güecua yacatu rupi oyecuachía ãgua yuvireco.

⁴ Sese José avei osẽ Nazaret, Galilea ìvi rupi sui oso ìvi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Ëgüe ehi oyoya yuviraso güembirecovi María rese oyecuachía ãgua. María rumo imembira pota ité oico.

⁶ Aheve oyepota ramose, osupiti ari imembira ãgua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ãgüe ehi imoñeno imondo mbahe mimba rembihi riru pipe. Esepia niha, ndoyosui eté oque ãgua aheve yuvireco.

Tũpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco. ⁹ Aviyeteramo tẽi oyemboyecua Tũpa rembiguai ìva pendar chupe. Tũpa porañetesa avei sendi yivivi chupe yuvireco. Ahe sepiase, oyembosiquiyé iteanga tẽi yuvireco ichui. ¹⁰ Ahe rumo aipo ehi chupe:

“Pesiquireme. Esepia, che ayu mbahe icatupri vahe mombehu āgua pēu pe mbovīharete āgua iyavei opacatu ava mbovīharete āgua avei no. ¹¹ Co pipe oha David recua Belén ve Poropīsīrosar pēu nara. Ahe niha Tūpa Rembiporavo, pe Yarguā secōi. ¹² Icuā āgua peyosura pītani yaopri tuprimī vahe tui mbahe mīm̄ba rembiḥu rīru pipe” ehi.

¹³ Avīyeteramo tēi oyemboyecua ambuae setā Tūpa rembiguai iva pendar yivī yuvireco. Tūpa upe osapucaī yuvireco aipo ehi:

¹⁴ “¡Imboeteipri tasecōi Tūpa ivave!

¡ivive ava Tūpa rembiaisu toyuvirecōi tupri oyeaisusa pipe!” ehi osapucaī yuvireco.

¹⁵ Opase oyevī Tūpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acōi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ip̄are osepiā Marīa, Josē, Jesūs pītani avei yuvireco cutē. Ahe pītani omoñenomi mbahe mīm̄ba rembiḥu rīru pipe ino. ¹⁷ Ip̄are yuvinose omombehu-mbehu ambuae ava upe Tūpa rembiguai remimombegüer pītani resendar ñehesa yuvireco. ¹⁸ Evocoyase opacatu ava oyepīhamondī co ñehesa renduse yuvireco. ¹⁹ Marīa rumo opacatu co mbahe rese oyapīsaçaño; ahe ehiño itē ipīhañemoñetasa. ²⁰ Oyevisē ovesa rārosar yuviraso, omboetei iyavei osapucaī Tūpa upe yuvireco. Esepia niha, opacatu mbahe osendu vahe, osepiā vahecuer yuvireco imombehupri rupi tupri itē.

Jesūs pītani seropovēhesa Tūpa upe tūparo pipe

²¹ Ocho arī pipe ahe pītani ombocircuncida yuvireco; omondo sererguā Jesūs yuvireco, ahe terer tupri avei acōi Tūpa rembiguai omombehu Marīa upe imembīēhi vīteseve.

²² Ip̄are omboaviyese ohari güētave oñemoatiro āgua, ahe aipo ēgüe ehi Moisés porocuaita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe āgua Yar upe yuvireco. ²³ Ēgüe ehi yuvireco. Esepia, Yar porocuaita aipo ehi icuachiapri pipe aracahe: “Opacatu yipīndar pītani cuimbahe minī yuviroha vahe ipēhasara Tūpa upe nara yepi” ehi. ²⁴ Yuviraso oporerecosa reropovēhe āgua yuvireco yande Yar porocuaita rupi: “Ñepeī oyovaichor reseve picuḥi, anise ñuvirío apīcasu peropovēhera” ehi vahe.

²⁵ Ahe pipe mbīa Jerusalén ve secōi Simeón serer vahe. Ahe mbīa avīye etepri vahē. Oyerure vahe Tūpa upe, osāro vahe avei Israel recua pendar Pīsīrosar imombehupri. Ahe secōi vahe itē Espiritu Santo rese. ²⁶ Ahe chupe Espiritu Santo opa uca oicua “eresepia rane itera Poropīsīrosar Tūpa remimbou nde mano renondeve” ehi vahe. ²⁷ Ahe arī pipe Espiritu Santo viroguata tūparove. Oyepotase Josē, Marīa reseve yuvireco tūparove Jesūs pītani reropovēhe āgua Tūpa porocuaita rupi tupri, ²⁸ ahese Simeón oyemboya oso sese, osupi ichi sui, vīroyeroqui Tūpa upe señoḥa aipo ehi:

²⁹ “Che Yar, cūrīte che, nde rembiguai, amano tupriño itera.

Esepia niha, nde remimombegüer eremboaviye itē cheu.

³⁰ Asepia itē niha Poropīsīrosar vīchico cute.

³¹ Nde niha erembou opacatu ava rembiepiave.

³² Ahe niha poroesapesa itē secōi.

Esepia, omboyecuara mbahe supi eté vahe ava ndahei vahe judío yuvirecoi vahe upe,
iyavei omondara poromboeteisa nde recua Israel pendar judío yuvirecoi vahe upe”
ehi oyerogui.

³³ José iyavei María ndoyembovihal tēi yuvireco pītani rese Simeón yeroqui renduse. ³⁴ Evocoyase Simeón osovasa ahe pītani iyepusa reseve. Ipape aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuara mbahe ava upe. Amove rumo viroñoñora yuvireco. ³⁵ Ipipe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fañuel rayri, Aser suindar. Ocuñatamiseve rumo omenda, iyavei secoi raimi tēi omer rese siete araviter rupive. ³⁷ Cūrítei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipape oñehe secocuer rese opacatu ava Jerusalén pendar osāro vahe güecua pīsiro āgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuaíta mboaviyere, opa oyevi Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

Jesús chñivahe tūparo pipe secoi

⁴¹ Iyepusa yuvirasu araviter yacatu Jerusalén ve Pascua pieta repia yepi. ⁴² Jesús doce araviter virecose, ahese virasu iyepusa Jerusalén ve oyeupi pieta repia yuvireco. Esepia, ēgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepeí ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyevi iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuaíta rese oporombohe vahe pāhuve oī; oyapisaca iñehe rese iyavei oporandu-randu ahe ava upe Tūpa Ñehengagüer rese oī. ⁴⁷ Evocoyase opacatu ava ndoyembovihal tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyepusa, oyepihamondii yuvireco. Ahese ichi aipo ehi chupe:

—Che membri, ¿mahera vo ēgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaheñā? —ehi osi upe.

⁵⁰ Iyepusa rumo ndosenducuai eté aipo oyeupe hesa yuvireco.

⁵¹ Evocoyase oyeve Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacia iri, iyetei catu avei imbahecua catu iri avei oico no. Secoi tupri ai eté Tüpa upe iyavei ava eta upe avei no.

3

Juan Oporoãpiramo vahe secoi ivi iporupirêhisa rupi

¹ Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Tracónite ve, Lisánias avei mborerecuar secoi Abilinia ve. ² Anás iyavei Caifás ahe pahí rerecuar ivate catu vahe yuvirecoi. Ahese Tüpa, “Emombehu che ñehe ava upe cute” ehi Zacarías rahír Juan upe oico ivi iporupirêhisave.

³ Juan evocoyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tüpa upe, ahese opoãpiramora Tüpa pëu ñero ãgua pe angaipa rese” ehi. ⁴ Co yaviye ité Tüpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirêhisave ava sapucaisa aipo ehi vahe:
‘Pemoingatu yandé Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perí ipãri vahe, ahe imohivisapara; perí ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pãsirosa resendar Tüpa remimbou yuvireco cute’ ehi vahe” ehi.

⁷ Ava rehíi yuvínosepa chupe ‘tayande ãpiramo’ oyapave yuvireco viña. Ahe rumo aipo ehi: “¡Pe mboi mboetasa tã peico! ¿Ava vo, ‘Pesëra Tüpa ñemoirosa ou vaheã sui’ ehi tupri tã pëu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tã peñepisiro ãgua. Esepia, Tüpa oicatuño ité co ita sui Abraham suindar nungar tupri apo ãgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia ãgua yepi. Yasiapri evocoyase imondosapara tatave” ehi.

¹⁰ —¿Mbahe pãha evocoyase oroyapora ore recocuer recuñaro ãgua oroico? —ehi ava rehíi oporandu yuvireco chupe.

¹¹ —Pe pereco vahe ñuvirio pe camisa, ñepi pemondo ava ndovirecoi vahe upe; iyavei pe pereco vahe tembihu, pemboyahomi tã ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi rerocuar ‘tayande ãpiramo’ oyapave yuvireco. Ipape oporandu Juan upe mbahe rese yuvireco:

—Porombohesar, ¿mbahe vo ore oroyapora Tüpa rupi ore guata ãgua oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Aní perocua catu iri guarepochi pëu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Öre no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tã chira ava upe sembiapoẽhi rese, iyavei peyemboviahñora pe poraviqui repri rese —ehi sundao upe.

¹⁵ Ava rumo, “¿Ndahe pãha co Poropisirosar sãrombri secoi?” ehi tã Juan upe yuvireco. ¹⁶ Juan rumo aipo ehi opacatu ava upe: “Che opoãpiramo i pipe

tēi; oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui” ehi. ¹⁷ “Ahe güeru trigo mbovevesa ihigüer sui ipeha āgua. Sāhi evocoiyase yapocatusa, ihigüer rumo imondosa tata apirēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi güecouer recuñaro āgua yuvireco’ oya. ¹⁹ Ipare rumo Juan oñehe pīrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipīndar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva. ²² Ipare Espiritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, ²⁴ Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir, ²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, ²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir, ²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, ²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, ²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, ³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José Jonam rahir, Jonam evocoiyase Eliaquim rahir, ³¹ Eliaquim Melea rahir, ahe Melea Mena rahir, Mena evocoiyase Matata rahir, ahe Matata evocoiyase Natán rahir, ³² Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir, ³³ Naasón Aminadab rahir, ahe Aminadab evocoiyase Admin rahir, Admin evocoiyase Arni rahir, Arni evocoiyase Esrom rahir, ahe Esrom evocoiyase Fares rahir, Fares evocoiyase Judá rahir, ³⁴ ahe Judá Jacob rahir, Jacob evocoiyase Isaac rahir, ahe Isaac Abraham rahir, Abraham evocoiyase Taré rahir, Taré evocoiyase Nacor rahir, ³⁵ ahe Nacor Serug rahir, Serug evocoiyase Ragau rahir, ahe Ragau evocoiyase Peleg rahir, Peleg Heber rahir, ahe Heber evocoiyase Sala rahir, ³⁶ Sala Cainán rahir, ahe Cainán evocoiyase Arfaxad rahir, Arfaxad evocoiyase Sem rahir, ahe Sem evocoiyase Noé rahir, Noé evocoiyase Lamec rahir, ³⁷ ahe Lamec Matusalén rahir, Matusalén evocoiyase Enoc rahir, Enoc evocoiyase Jared rahir, ahe Jared Mahalaleel rahir, Mahalaleel evocoiyase Cainán rahir, ³⁸ ahe Cainán evocoiyase Enós

rahir, Enós evocoyase Set rahir, ahe Set Adán rahir, Adán evocoyase Tūpa rahir.

4

Jesús recoãhasa

¹ Jesús Espiritu Santo rese ité secói. Ahe osê iai Jordán sui oso. Ipare Espiritu viroguata ivi iporupirêhisa rupi. ² Aheve cuarenta arí secoise Carugar oseoãha. Ndocarui avei oico. Sese ndasiepoi eté. ³ Carugar evocoyase aipo ehi chupe:

—Tūpa Rahir ité nde recose, co ita sui eyapo pan cūrítei —ehi.

⁴ Evocoyase Jesús omboyeví chupe:

—Che Ru ñehe rumo icuachiapri pīpe aipo ehi: ‘Ndahehi chira pan suiño ava yuvirecovera’ ehi —ehi Carugar upe.

⁵ Ipare Carugar viraso ivate vahesave. Aheve ñepei reseve opacatu avava tēi mborerecuasa ivi pīpendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrīve. Esepia niha, co opacatu cheu imboupri; iya ité amondo vaheṛā ava upe che remimbotar rupi. ⁷ Acoi ereñenopihase cheu che mboetei āgua, ahese opacatu co mbahe erepīsīra nde mahera —ehi tēi Carugar chupe.

⁸ —Icuachiapri pīpe rumo: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

⁹ Ipare Carugar viraso oyeupi tecua guasu Jerusalén ve. Aheve oviroyeupi tūparo apīterve. Aheve Carugar aipo ehi chupe:

—Tūpa Rahir ité nde recose, eviapi cohava sui. ¹⁰ Esepia niha, icuachiapri pīpe:

Tūpa oyocuaira güembiguai eta nde rāro āgua.

¹¹ Ahe nde mopuhara yuvireco que ñepei ita nde momara rāgüer sui’ ehi —ehi Carugar chupe.

¹² Evocoyase omboyeví Carugar upe:

—¡Aní! Icuachiapri pīpe niha aipo ehi avei: ‘Ndereseoãhai chira nde Yar Tūpa’ ehi —ehi chupe.

¹³ Ahese Carugar ndoicatu iri eté Jesús recoãha āgua oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espiritu Santo reco pīratasa pīpe, oyeví oso Galilea ve. Ipare serācua oguata opacatu tecua-tecuami rupi. ¹⁵ Esepia, ahe oporombohe judío tūparo pīpe oico. Ahese opacatu ava omboetei yuvireco.

Jesús oyeví Nazaret ve

¹⁶ Ichui Jesús oyeví Nazaret ve ocuacua agüerve. Aheve judío mbītuhusa ari pīpe oique tūparove inungar oyapo yepi. Ahese opūha ‘tayeroqui icuachiapri maranehi pīpe’ oya. ¹⁷ Evocoyase tūparo rese ñangarecuar pītivīsār omondo Tūpa ñehe mombehúsar Isaías rembicuachía chupe. Oyorase ahe cuachiar, oyerorqui icuachiapri aipo ehi vahe pīpe ohā:

¹⁸ —“Yar Espiritu secói che rese.

Esepia niha, ahe ombou che cuaitarā cheu co ñehesa aviye vahe mombehu āgua ava iparaisu vahe upe.

Che cuaita avei ava mbahe-mbahe tēivīve yuvirecoi vahe senose āgua ichui, iyavei ava ndasesapīsoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose āgua,

19 iyavei ‘cūritei Yar oyemoingatu oporovasasa mondo āgua pēu’ he āgua” ehi icuachiapri pipe —ehi oyerogui.

20 Sese oyerogui pare, oyapoapipa cuachiar imondo tūparo rese ñangarecuar pītiviisar upe. Ipape uguapi oī ava rembiepiave. Ahese opacatu tūparo pipendar omahe ati yuvireco sese. 21 Evocoyase ahe oñehe aipo ehi:

—Cūritei yaviye co icuachiapri pipendar opacatu pe rovaque —ehi.

22 Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

23 Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipape aipo peyera cheu: ‘Acoi orosendu vahe nde rembiapogüer Capernaum pipe, ēgüe ere avei eyapo cohava nde recua pipe ité’ peyera cheu —ehi.

24 —Supi eté, ndipoi eté niha que ñepepe yepe Tūpa ñehe mombehusar oipisi tupri vahe güecua pipe yuvireco yepi. 25 Supi tupri ité Tūpa ñehe mombehusar Elías recose, iñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, 26 Tūpa rumo nomondoi Elías cuña imer mano vahecuer Israel pendar upe ipītiviī āgua. Ēgüe ehi rumo omondo cuña ndahei vahe Israel pendar ipītiviī āgua. Ahe cuña tecua Sarepta pendar, ahe Sarepta Sidón ipīmindar. 27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepepe ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

28 Ahese opacatu ava judío tūparo pipendar oñemoiró iteanga yuvireco sese aipo mbahe renduse. 29 Sese opa voi eté opūha Jesús reraso āgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. 30 Jesús rumo ipāhu sui osē tupriño oso.

Jesús ombogüera mbia carugar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. 32 Ipape opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

33 Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

34 —¡Ore mañeco tēi eme eve! ¡Mahera ereyuño tēi cohava oreu, nde, Jesús Nazaret pendar! ¿Ereyu vo ore mocañi āgua tēi? Che orocua ité. Nde niha seco maranehi vahe erico Tūpa suindar —ehi chupe.

35 Evocoyase,

—¡Quiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osē ocua ichui; nomomarai eté rumo. 36 Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose āgua! —ehi yuvireco.

37 Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osê judío tũparo pĩpe sui oso, oi que Simón Pedro rêtave. Simón rembireco si sohĩ iteanga ou. Evocoyase oñehe ahe pendar sese Jesús upe ‘tombogüerami tẽi’ oyapave yuvireco. ³⁹ Evocoyase Jesús oyeaivi oso chupe sohi sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tẽi vahe güeru Jesús upe yuvireco. Ahe evocoyase opo omondo iyacatu iharive ñepeĩ-peĩ imbogüera. ⁴¹ Iyavei setá ava sui opa omose carugar. Evocoyase carugar osapucaĩ tẽi aipo ehi yuvireco:

—¡Nde acoi Tũpa Rahĩr ité ereico! —ehi.

Ahe rumo oñehe pĩrata carugar upe, nomoñehe iri. Esepia niha, carugar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osê tecua pĩpe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha atĩ agüer

¹ Ñepeĩ ari Jesús secoi ipa Genesaret popĩ rupi. Aheve ava rehĩ oyepota yuvireco chupe, oyere atĩ yuvireco sese. Esepia niha, ahe osendu pota ité Tũpa Ñehengagüer yuvireco. ² Aheve oime ñuvirio carite imbehi popĩve. Ahe ava pira mbohasar opa yuvinose evocoi carite pĩpe sui yuvireco. Ipare opira mbohasa oyosei yuvinoi. ³ Evocoyase Jesús osepiase, oha Simón carite pĩpe iyavei aipo ehi chupe: “Tosirĩ catumi tẽi chĩhi coi coti iai popĩ sui” ehi. Ipare oguapĩ oĩ carite pĩpe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipĩ catu vahesave. Aheve erembohara pira —ehi.

⁵ Simón rumo omboveyĩ chupe:

—Porombohesar, orosãha tẽi niha pĩtu momba pira mboha oroico. Nde porocuaita pĩpe rumo amondo irira pira mbohasa ive —ehi.

⁶ Ëgüe ehise, pira rehĩ omondoromi ombohasa yuvireco. ⁷ Ahese oyaiti yuvireco omboetasave evocoi ambuae carite pĩpe yuvirecoi vahe upe ‘toyugüerumi yande pĩtivĩ’ oyapave yuvireco chupe. Ahe yugüeru chupe. Ipare opa ñuvirio carite omboapipo tuprĩ yuvireco; seni iri rumo omondo ipĩve. ⁸ Co mbahe repiase, Simón Pedro oñenopiha oso sovai aipo ehi chupe: —¡Eyepẽpĩmi tẽi che sui, che Yar! ¡Esepia, che yangaipa vahe tẽi aico! —ehi.

⁹ Esepia, Simón iyavei opacatu ava yuvirecoi vahe supĩ osiquiyé iteanga co pira rehĩ repiase yuvireco. ¹⁰ Iyavei Simón mboetasave ambuae carite pĩpendar ahe Santiago, Juan Zebedeo rahĩr yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ěgüe ere aveira ava reca cheu nara —ehi.

¹¹ Evocoiyase opa vinose carite ivi ātasave yuvireco, oseyapaño opacatu mbahe. Ipape yuviraso supi.

Jesús ombogüera ava lepra rerecosar

¹² Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipape oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūríte! —ehi chupe.

Aipo ihe ramoseve voi eté ocuera. ¹⁴ Ipape oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipape eicuavêhe nde porerecoa nde cuerasa resendar Moisés porocuaíta rupi. Ipape sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoiyase setá ava oyemboya yuvireco sese ñehe rendu āgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehí sui rumo amove Jesús oyepepiño ahe aemi oyerure āgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tüpa pĩratasa vireco oyese ava mbogüera āgua. Aheve avei oguapí yuvinoi fariseo, Moisés porocuaíta rese oporombohe vahe avei ipirí yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyí āgua yuvireco viña; ¹⁹ ndoicatui eté rumo seroique yuvireco ava rehí pāhu rupi. Evocoiyase viroyeupi yeupisa rupi ahe oi ipe vahe haríve yuvireco. Aheve virocua teca ichuí. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuaase co mbia yuvirecoi vahe oyese yeroyasa, ahese aipo ehi imbaheasi vahe upe: —Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuaíta rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tüpa ñehe nungar pipe tēi; Tüpaño ité niha oicatu ava angaipa upe oñero āgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catú: ‘Nde angaipa rese che ñero ndeu’ hesa pĩha, anise: ‘Epũha, eguata’ hesa tie? ²⁴ Tapeicua ru che, Ava Riquehír, areco ité mborerecuasa co ivi pipe ava angaipa upe che ñero āgua —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opũha voi ava rovaque, osupi vupagüer. Ipape osapucái oso güetave Tüpa upe. ²⁶ Ahese opacatu tupri ité ava, “¡Too! ¿Mara ehi rutei pĩha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiaí vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rero cuasar Levi serer vahe, ahe guarepochi rero cuasave chini. Sepiase,
—Erio che rupi —ehi chupe.

²⁸ Evocoyase Levi opūha. Oseyapa oporaviquisa, oso supi.

²⁹ Ipare Levi oyapo pieta guasu chupe nara güetave. Aheve iyemborisave setá imboetasa ava guarepochi rero cuasar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera rü pecaru iyavei pecahu guarepochi rero cuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevei āgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyeve chupe aipo ehi:

—Ndiyai eté ichohopri mboyeucu mendasave imer oicove viteseve ipāhuve. ³⁵ Oimera rumo ari imer reraso āgua ichui, ahe se rumo oyecuacura yuvireco cute —ehi.

³⁶ Iyavei ambuae mbahe rese oporombohe imboyeve āgua:

—Ndiyai eté ava upe vircua vaherā turucuar ipiasu vahe sui ambuae turucuar cuacuami vahe apete āgua. Esepia niha, ēgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pির cuacua pipe no. Esepia niha, ēgüe ehise, uva ricuer piasu evocoyase opara ombopu mbahe pির cuacua viña, ēgüe ehira oyepiyerepa, mbahe pির avei evocoyase ocañi tēira viña. ³⁸ Uva ricuer piasu rumo yamondora mbahe pির piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepeí mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuvirasó trigo rāhií. Ipare oyequii opo pipe sāhií yuvireco igua. ² Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

³ Jesús rumo omboyeve chupe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha oique ité Tūpa rēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secói —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oi que judío tũparo pipe oporombohe oico. Aheve mbia yasu coti ipo nomii vahe secói. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pĩha co mbia mbituhusa ari pipe?’ oya; ‘yainehengapo angahu’ oyapave tẽi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epũha cohava terehã ava pãhuve —ehi.

Ahe mbia evocoyase opũha, opĩta aheve ohã ⁹ Ahese Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri pĩha, anise mbahe naporai vahe tie? ¿Yaipĩsiro pĩha ava recocuer; yamocañi uca tẽi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité.

¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pĩha imomara ãgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitri, oyerure pĩtu momba tupri Vu upe oico.

¹³ Cõhese, “Periõ” ehi güemimbohe eta upe. Ipãhu sui oiporavo doce tupri, ahe chupe, “Apõstol” ehi. ¹⁴ Co ahe yuvirecoi: Simõn, ahe acoi Pedro avei serer; Andrés Simõn rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simõn, ava güecua rese secatẽhi vahe pãhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarẽhimbar uve.

Jesús ombohe ava rehi

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opĩta ivi yoya tuprisave. Aheve ambuae semimbohe eta oyemboya ati yuvireco sese iyavei setã ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidõn cotindar, ahe oyemboya avei yuvireco sese. Ahe ava ãgũe ehi iñehe rendu potasave yuvireco ‘tayande mbogüerami tẽi yande mbaherasisa sui’ oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pĩratasa pipe oico.

Ava sorivete vahe iyavei ava ndoyembovĩhai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tũpa mborerecuasa pẽu nara ité secói.

²¹ “Perorivete catu cõriteindar ndasiepoi vahe. Esepia niha, pehĩtarora peico curi.

“Perorivete catu pe acoi ava cõritei oyaseho vahe. Esepia niha, peviharetera coipe peico.

²² “Perorivete catu pe acoi ava pe amotarẽhise, pe mboyepepiñose avei oyesui yuvireco, iñehe-ñehe tẽise yuvireco pẽu pe amotarẽhisave, iyavei acoi

viroĩrose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovihaño iyavei perorivete catuñora ahe ari pipe peico. Esepia niha, ipare peipsisira porerecosa tuvichá vahe ivave. Ēgüe ehi tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

²⁴ “¡Peparaisu catu rumo cūrítei mbahe yar peico vahe! ¡Esepia niha, pemboavíye pe rorivetesa peico!

²⁵ “¡Peparaisu catu acoi pe ihitaro vahe cūrítei! ¡Esepia niha, ndaperiepoi chira peico coíye!

“¡Peparaisu catu acoi peviha vahe pe pietase cūrítei! ¡Esepia, peyasehora pe viharéhisa pipe peico coíye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, ěgüe ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarēhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe avíye vahe ava nape ambotai vahe upe. ²⁸ Peoporandu Tūpa porovasasa rese ava pēu iñehe-ñehe tēi vahe upe nara; peyerrure Tūpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeasoa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyeví ãgua rese. ³¹ Acoi mbahe peipota vahe ambuae ava oyapo vaheerã pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe avíye vahe ipipe. Esepia niha, ava naporai vahe ěgüe ehi yuvireco yepi.

³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime avíye vahe ipipe? Esepia niha, ava angaipa viyar avei ěgüe ehi yuvireco yepi. ³⁴ Acoi pemondoño tēise mbahe ava upe ‘tomboyeví mbahe cheu’ pe hesave, ¿mbahe vo evocoiyase oime avíye vahe ipipe? Esepia niha, ava angaipa viyar ěgüe ehi avei yuvireco.

³⁵ Pe rumo pesaisu catura ava pe amotarēhisar, peyapoñora mbahe avíye vahe chupe. Iyavei pemondoño itera mbahe chupe, ‘Tasãroño rane mbahe cheu imboyeví ãgua vichico’ ndapeyei chietera. Ahese oimera porerecosa avíye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe avíye etepri vahe ava ‘avíye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tūpa oporoparaisuereco yepi” ehi.

Ndiyai ambuae ava seroĩrosa

³⁷ “Ndiyai, ‘Oyavi ité mbahe’ peye voĩño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoiyase Tūpa pemondoño itera mbahe avíye vahe pēu inungar-ra omondo pe mbahe riru pipe pēu sãhambri tupri avíye vahe viña. Ēgüe chira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pĩha ñepeí ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi ovíapira que ivicuar pipe yuvireco viña. ⁴⁰ Ñepeí yepe niha ava

oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropitivi mbahe nde rembiavi rese’ peye vaheṛā chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sāchi ati vahe sui higuera ha, iyavei ndahipohosai uva, yu pāhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe piha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapo eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upé oyepota tēi ivitu ai, amarusu reseve oinupa pīrata tēi, nomboyeroquai eté rumo. Esepia niha, vireco ité ovīracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chihivahe sundao rereciar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rereciar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerāca anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rereciar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe tieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rereciar omondo ambuae omboripar chupe. Imboripar evocoyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua. ⁷ Sese niha che tieté ndasoi nde reca. Nde ñehe pipe tēi rumo che remimboacua erembogüerara. ⁸ Esepia, che avei niha areco che cauita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:
—Supi eté ndasepiai vahe ité co mbia che reroya tupri vahe nungar judío eta pãhuve —ehi.

¹⁰ Yuviroyevipase sundao rerecuar mboripar sêtave yuvireco, aheve ospia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no. ¹² Virovise tecua oso, osepia tehögüer ava virocuase yuvireco ñoti ãgua. Ahe cuña imer mano vahecuer membri ñepeí vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chíhivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oí iyavei oñehe no. Ichui Jesús omondo ichi upe. ¹⁶ Opacatu tupri ité ava oyembosiquiye sepiase yuvireco:

—Cüritei oyemboyecua Tüpa ñehe mombehúsar seco ivate vahe yande pãhuve cute —ehi yuvireco.

Iyavei,

—Tüpa niha ou güecua pítivii ãgua oico —ehi avei yuvireco.

¹⁷ Ipare co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca ãgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu ãgua ‘¿nde ité vo Tüpa Rembiporavo aipo sãrombri ereico, anise oime tie ambuae orosãro vaheerã?’ oyapave.

²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tüpa Rembiporavo ereico imombehupri ereyu vaheerã, anise ambuae pïha orosãro oroico? —ehi yuvireco chupe.

²¹ Ahe ari pipeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapisoí vahe setá ombogüera. ²² Ahe se ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoí vahe osareco tupri cüritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirosa resendar ñehesa” peyera chupe. ²³ ¡Oviharetera acoi ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porêhisave, capihiaata ivitu ombova-mbova vahe nungar pïha? ²⁵ Anise, ¿pesepia tie iturucuar porañete ai vahe iyemboeteise? Ègüe ehi vahe rumo secoi mborerecuar guasu guapisave yepi.

²⁶ ¿‘Mara ehi secocuer’ peye vo chupe? ¿Tüpa ñehe mombehúsar ité pïha? Ahe ité, iyavei evocoi niha ivate catu vahe Tüpa ñehe mombehúsar sui. ²⁷ Ahe chupe ité Tüpa icuachiapri aracahendar pipe aipo ehi:

‘Amondora che ñehe mombehúsar nde renondeve nde raperã moingatu ãgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborecuasave rumo ava seco mbegüemi catu vahe ivate catu ichui.

²⁹ “Co iñehe renduse opacatu ava, opacatu guarepochi rero cuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute. ³⁰ Fariseo eta rumo iyavei Moisés porocuaita rese oporombohe vahe ahe noñeapiramo uca potai vahe Juan upe yuvireco, ahe viroiroño Tūpa remimbotar oyeupendar yuvireco.

³¹ “¿Mbahe rese pñha amboyoyara ava recocuer cūrteindar? ¿Mara ehi pñha secocuer? ³² Ahe inungar chñhivahe iguayí tēi vahe ocar rupi. Ipape oñehe pucu-pucu omboripar upe yuvireco aipo ehi: ‘Oromoñehe tēi mimbí pēu, ndapepivoi eté rumo; iyavei orosapucái tēi sapucaisa viharēhisa resendar pēu, ndapeyasehoi avei’ ehi. ³³ Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbia caruguar vireco vahe’ peye tupri tēi chupe no. ³⁴ Coiye che ayu, Ava Riquehñ, acarú iyavei aihu tupri avei. Ipape, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipá viyar mboripar tēi iyavei ava guarepochi rero cuasar mboripar tēi’ peye avei cheu. ³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: “Terecarumi che pirí” ehi. Jesús evocoiyase oso sētave oguapí oñ mesave. ³⁷ Ahese cuña angaipá viyar evocoi tecua pendar secoi vahe oyandu ichose Simón rētave icaru āgua. Sese viroyepota aheve mbahe siacua vahe siru pipe seraso sepirusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipape opaño omombiru oha aprí pipe ichui, iyavei oipirupite, oipiyere avei mbahe siacua vahe ipi rese. ³⁹ Sepiase fariseo, ipihañemoñeta tēi: “Co mbia Tūpa ñehe mombehusar itese, oicuāño itera co cuña opoco vahe oyese ndipñhai vahe viña” ehi tēi fariseo chupe. ⁴⁰ Evocoiyase aipo ehi fariseo upe:

- Simón, amombehu potami mbahe ndeu —ehi.
- Aviye Porombohesar, emombehu ru cheu —ehi.

⁴¹ Evocoiyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepeí virocua guarepochi quiniento tupri mboraviqui repirā ichui. Ambuae evocoiyase cincuenta rupive virocua. ⁴² Ipape ndoicatu irise ité imboyeví āgua yuvireco chupe, evocoi mbia guarepochi mondosar iñeroño chupe yuvireco —ehi—. Esāha, emombehu cheu, ¿uma evocoiyase osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoiyase omahe cuña rese aipo ehi Simón upe:

—¡Emahe co cuña rese! Aiquese acoi nde rēta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipape omombiru oha aprí pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondoi mbahe siacua vahe che āca rese; co cuña rumo opa tupri voi oipichi mbahe siacua vahe che pi rese. ⁴⁷ Sese co cuña opa oipisi

ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoiyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe erepisi písirosa. Sese eso tupriño eico —ehi.

8

Cuña oipitivi vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tüpa mborerecuasa resendar oico. Doce vahe apóstol supive yuvirecoi.

² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María secoi, Magdalena serer yoapisa vahe, ahe ichui osë vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitivi mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia ñgua yuvireco. Ipare oñemonuha guasuse yuvireco, ahese Jesús setá mbahe rese omboyoyoyoya oporombohe aipo ehi: ⁵ “Ñepe mbia osë omaheti oico. Ahe otiapi-apiise mbahe rãhii oso, moviro oiti peri rupi. Ahe opa tēi oicambe yuvireco, iyavei vñrai opa tēi yuvirohu. ⁶ Iyavei moviro tēi oiti ivi nayanai vahesave ita pãhuve. Sese cūrítei sori; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pãhuve. Ipare oyoya tupri sori yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepe-pe mbahe miti sui osë” ehi.

Aipo ohe pare, Jesús oñehe pñratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pñha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoiyase omboyevi chupe: “Pëu Tüpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tisa resendar

¹¹ “Co yembohesa resendar aipo oyapave aipo ehi: Mbahe rãhii ahe inungar Tüpa Ñehengagüer; ¹² iyavei mbahe rãhii peri rupi seitipri, ahe inungar acoi ava osendu tēi vahe Tüpa Ñehengagüer yuvireco oyapave. Ipare rumo ou vñrai chupe, ahe inungar carugar ou vahe chupe opaño oyaracua mocañi Tüpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rãhii seitipri ita mahugüer rupi, ahe inungar acoi ava osendu tēi vahe Tüpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe

guapo ovĩracua ãgua; viroya raimi tẽi yuvireco. Oyepotase rumo mbahe tẽi chupe, oyepepi voĩño yuvireco ichui. ¹⁴ Acoi mbahe rãhi seitipri yu pãhu rupi, ahe inungar acoi osendu tẽi vahe. Ipare rumo oyemboyepepi uca mbegũeño ambuae mbahe rese opihãñemoñetã iteangasa pipe tẽi, ombahe eta rese iyavei gãemimbotarai mbahe tẽi potasa pipe avei. Ēgũe ehi ahe ava inungar mbahe miti ndihai vahe itẽ. ¹⁵ Acoi mbahe rãhi seitipri rumo ivi aviye vahesave, ahe inungar ava vireco vahe opihãñemoñetasa aviye vahe iyavei oyemoingatu voi Tũpa Ñehengagũer rese oyapisaca ãgua yepi; viroya tupri itẽ no; yuvirecoiño itẽ sese. Ēgũe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai etẽ ava upe guataendi omoendise omoha vahe que mbahe pipe, ‘Tamondo che rupavrive’ ndehi etẽ chupe; osupiño ivate imoi opacatu oi pipe yuviroique vahe resape ãgua. ¹⁷ Esepia, ndipoi etẽ mbahe ñomipri, ndayasepaii vahe rã curi. Iyavei yaposa vahe imombehupirẽhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imõndosa catura; acoi nomombitai vahe rumo mbahe gãembieroya oyese, ichui serocusaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai etẽ rumo chupe yuviraso vahe rã yuvireco ava rehii sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tẽi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagũer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepe i ari Jesús oha carite pipe gãemimbohe eta reseve. Ipare aipo ehi:

—Yaso peve ipa rovai —ehi.

Evocoiyase ahe yuviraso. ²³ Yuviroguata viteseve, oqueño Jesús ou. Ahese ipa pipe avieteramo tẽi ivitu ai ombõha guasu-guasú carite pipe i, omondo pota itẽ ipive viña. ²⁴ Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare õñehe pĩrata ivitu ai upe iyavei i ohitu vahe upe: “¡pepituhu!” ehi. Aheseve voi opituhu tupri. ²⁵ Evocoiyase aipo ehi gãemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tẽi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroia —ehi tẽi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷⁻²⁹ Aheve mbia tecua iguar carugar vireco vahe secoi. Aracahe suive nani tupri itẽ secoi iyavei ndopitai vahe itẽ oi pipe yepi; Ēgũe

ehi rumo ahe tehōgüer ruvīpa rupindar tēi secōi. Setá rupi carugar ombohe ité sereco yepi. Yepe ava oipocuhacua-acua carena pīpe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoyase Jesús osēse carite pīpe sui, osovaichi ahe mbia. Sepiase rumo, ahe mbia oñenopiha voi oso sovai oñehe pīrata chupe:

—¡Eyepipi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

³⁰—¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pīpe’ oyapave viña. “Peiqueño sese” ehi carugar upe. ³³ Ahese opa yuvinosē mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pīpe. Aheve ipive opa tēi eté ocañi yuvireco.

³⁴ Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pīpe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia carugar rerecosarer oguapi oī ñipiimi, oyemonde tupri, yaracua tupri avei oico. Ahese oyembosiquiyē tēi yuvireco.

³⁶ Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohava sui” ehi yuvireco. Esepia niha, osiquiyé iteanga yuvireco ichui. Evocoyase oha carite pīpe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹—Eyevi nde rētave, emombehupa opacatu mbahe Tūpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetesa pīpe oipisi tupri yuvireco. Esepia niha, ava opacatu ité osāro yuvireco. ⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar secōi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave. ⁴² Esepia niha, vireco guayri ñepeiimi vahe ité, doce araviter vireco vahe. Ahe omano potami eté ou.

Osose Jairo rētave, aheve peri rupi ava rehii yuvirasoño supi; oyemboti tupri ité yuvireco. ⁴³ Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omōndo ombahe ocuera āgua repirā yepi; ndocueraí eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pīpeve voi opituhu suvi ichui. ⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehi mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

⁴⁷ Ahe cuña ndoicatuī oñemi. Sese oririī oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Ani eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomougue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua.

⁵² Aheseve opacatu ava oyaseho ati, ndoyembovihal tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocarú” ehi iyepa upe. ⁵⁶ Iyepa evocoyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombelui chietera que ñepeí ava upe” ehi.

9

Jesús doce güemimbohe omondo Vu Tūpa mborerecuasa resendar mombehu āgua

¹ Jesús opa omonuha güemimbohe doce vahe oyeupe. Ipare omondo opīratasa opacatu upe carugar ambuae-ae tēi vahe imboyepepi āgua ava sui iyavei ava mbogüera āgua imbaherasisa sui. ² Opa omondo Vu Tūpa mborerecuasa resendar mombehu āgua, ava imbaheasi vahe mbogüera āgua avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso. ⁴ Pepitami ranera ñepeí oi pipe güeraño tecua yacatu peico. ⁵ Acoi ava ndape mougue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer pīsiroso resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pīha?” ehi tēi. Esepia niha, aipo, “Juan ocuerayevi”

ehi yuvireco chupe. ⁸ Ambuae aipo ehi: “Tūpa ñehe mombehúsar Elías, ahe tēi oñemoporeñi iri” ehi yuvireco. Ambuae aipo ehi: “Que ñepeí Tūpa ñehe mombehúsar aracahendar revo, ahe tēi ocuerayevi” ehi yuvireco viña.

⁹ Herodes rumo aipo ehi:

—Che niha ayasia uca Juan áca —ehi—. ¿Uma rerācua pīha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuase rese ava upe iyavei ombogüerapa ava imba-herasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohawe ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco. ¹⁶ Evocoyase oipisi poyandepo pan iyavei ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo água yuvireco. ¹⁷ Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropīsīrosar secoi” ehi

¹⁸ Ñepeí ari pīpe Jesús oyoeroqui ahe ae güemimbohe pāhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoāpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehúsar aracahendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropīsīrosar ereico —ehi Pedro imboyeve chupe.

Jesús omombehu omano água

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehír, che paraísu itera, iyavei opacatu judío rerecuareta, pahí rerecar ivate catu vahe iyavei Moisés porocuaite rese oporombohe vahe remiamotarēhi acora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosiira viña, toyemoingatu voi che recocuer rese oparaisu āgua ari yacatu rupi iyavei toguata tupri che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora. ²⁵ Esepia, çaviye ai angahu pñha ava upe opacatu mbahe co ivi pipendar pisi āgua tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pñratasa pipe, che Ru reco pñrata porañetesa pipe avei sembiguai rehii iva pendar maranehi reseve curi. ²⁷ Supi eté, oimera amove cohava ava nomano vitei chivaherā, osepia rane itera ouse Tüpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi. ²⁹ Oyerure viteseve, oñecuñaro sepiaca. Iturucuar evocoyase sendi, morochí eteanga. ³⁰ Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano āgua rese yuvireco chupe: “Nde niha ereyemomborarara nde mano āgua Jerusalén pipe eico” ehi yuvireco chupe. ³² Yepe Pedro, ondugüer reseve sopesiñ eteanga yuvireco viña. Aviyeteramo tēi opa sopesiñ yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeñi ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco. ³⁵ Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chñhivahe carugar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. ³⁸ Ahese mbia ava pāhuve aipo ehi pñrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ carugar rumo opoco sese, omoase pucupucu uca yepi iyavei omoeñha-ñha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepimi tēi carugar ichui’ che yapave viña; nomboyepiñi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pñhañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohava cheu —ehi ahe mbia upe.

⁴² Chihivahe oyemboyase rumo sese, carugar omboviapi voi imondo ivive, imoeoha iri. Jesús rumo oñehe pīrata carugar upe imose āgua chihivahe sui. Ahese chihivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano āgua

Opacatu ava ndoyembovīhai viteseva yuvireco, ahese aipo ehi güemimbohe upe:

⁴⁴ —Pesendu tupri che ñehe; peresari eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipota eté senducua āgua chupe; osiquiye chupe oporandu āgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pīha ivate catu vahe rā curi?’ oyapave. ⁴⁷ Jesús rumo oicuaño ipihañemoñetasa yuvireco. Evocoyase oipisi chihivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar, ahe ndahei yande amotarēhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoiya seco āgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñhengata Santiago upe, Juan upe avei

⁵¹ Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrītei” ehi. ⁵² Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña; ⁵³ Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi āgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güētara, vīrai avei vireco guaiti; che rumo, Ava Riquehir, ndarecoi que che rēta che pituhu āgua —ehi chupe.

⁵⁹ Ipare ambuae upe aipo ehi:

—Ério che rupi —ehi.

—Che Yar, che ru manose voi, ñoti pare aguatará nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tûpa mborerecuasa resendar ava upe —ehi.

⁶¹ Evocoiyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rêtave mbahe moingatu che so âgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresa imohivi tupri âgua, omahese rumo guaquicuei coti, evocoi nungar naporai Tûpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipape yande Yar oiporavo setenta y dos ava ñepeipei tecua rupi ñuviríorío güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha âgua” ehi. ³ “Peso, opomondo ovesami nungar ava mbahe mimba oñora vahe nungar pãhuve. ⁴ Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe, yipindar rumo peyapo ranera: ‘Avirave. Tûpa tape rovasa’ peyera. ⁶ Acoi aheve oimese ava aviye vahe, ahe oipisira Tûpa porovasasa; anise evocoiyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepeipei oi pipe güeraño pepitañora. ⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoiyase pembogüerara, iyavei aipo peyera chupe: ‘Tûpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroi pipete oreyesui, peicua catu, ore hesa pipe. Peicua tupri rumo Tûpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tûpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazin pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tûpa ñemoirosa ava Tiro, Sidón pendar sui ari cañi pipe coiyē. ¹⁵ Pe avei no tecua Capernaum pendar, ¡pemoha co ivave pe reco âgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoiyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoiyase che mbousar avei mboyepipiño oyesui” ehi güemimbohe upe.

Oyevipase iri ava setenta y dos vahe

¹⁷ Oyevipase ava setenta y dos vahe, oviharetessave aipo ehi yuvireco chupe:

—¿Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha carugar rerecur oviapise iva sui overa vahe nungar. ¹⁹ Che niha amondo pīratasa pēu peguata vaheṛā mboi iyavei mbahe rumbiquiāpe hari rupi opacatu pe amotarēhisar pīratasa reroyi āgua, que mbahe pe momaraēhi āgua avei. ²⁰ Peyemboviharetei rene cariguareta pe mboyero yase. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetesá pipe aipo ehi: “Che Ru, che oromboetel. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecuá vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoyase omahē güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setá etepri ava Tūpa ñehe mombehusar yuvirecoi vahe iyavei mborerecur guasu eta arachendar osepiá pota tēi mbahe pe rembiepia; ndosepiái eté rumo yuvireco. Osendu pota tēi co pe remiendu yuvireco; ahe rumo ndosendi avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuaíta rese oporombohe vahe oso Jesús upe secoāha āgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

²⁶ Ahe omboyevi:

—¿Mara ehi vo Moisés porocuaíta icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaíta —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecóvesa apirēhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinosé ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocuá-rocuá yuvireco sese. Ipare

oyuca seni seya peri rupi yuviraso. ³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. ³² Ēgüe ehi tupri avei ambuae mbia pahi pītivisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucaru pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esāro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güeta pipe. ³⁹ Icupihir evocoiyase María serer. Ahe oguapi Jesús pive ñehe rendu oī. ⁴⁰ Marta rumo oyembopi haviracua opacatu mbahe rese oico. Ipare oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pītivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo āgua eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherā ichui —ehi Jesús Marta upe.

11

Jesús ombohe güemimbohe eta yerure āgua rese

¹ Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure āgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi. Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbiter rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu. ⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaherā chupe’ peyera chupe.

7 Ipape ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. 8 Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipape omondoño itera opacatu mbahe pe porandusa pēu. 9 Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ěgüe peyerá peyeroquisa pipe Tūpa upe, ahese imboisara mbahe mbou āgua pēu. 10 Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pipe omota vahe oquenda Tūpa upe, chupe imboisara.

11 “Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? 12 anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? 13 ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru íva pendar omondo catura Espíritu Santo acoi ava oyeupe porandusar upe!” ehi güemimbohe eta upe.

“Jesús vireco carugar pīratasa oyese” ehi tupri tēi ava yuvireco

14 Ambuae ari pipe, Jesús osepiá mbia carugar nomoñehengatui vahe. Evocoiyase omose carugar ichui. Aheseve voi iñehengatu. Ipape ava rehí sepiaše, ndoyembovīhai tēi yuvireco. 15 Amove rumo ava aipo ehi tēi yuvireco: “Beelzebú, carugar rerecar pīratasa pipe revo omboyepepi carugar oico” ehi tēi yuvireco chupe.

16 Ambuae ava secoñhasa pipe oporandu yuvireco chupe: “Eyapo ru mbahe nde rembiapo íva pendar nde recocuer cua āgua” ehi tēi. 17 Ahe rumo oicuaño ipihañemoñetas. Evocoiyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. 18 ěgüe ehi avei niha carugar. Esepia, serecar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñhesa aipo ahe pēu. Esepia pe, ‘Beelzebú pīratasa pipe tēi opa omose carugar ava sui oico’ peye tēi cheu. 19 ěgüe ahese rumo viña, ¿ava pīratasa pipe ru evocoiyase pe voya omboyepepi carugar ava sui? Pe voya ae omboyecuar pe ñhe pe rembiavi yuvireco pēu. 20 Che rumo Tūpa pīratasa pipe carugar amboyepepi ava sui. Sese cūritei Tūpa mborerecuasa oyepota ité pēu.

21 “Inungar oime ava ipīrata etepri vahe, iyavei vireco oyeroyasa. Ipape osāro güeta opacatu mbahe ipipendar avei icañiñēhi āgua. 22 Acoi ouse rumo ambuae ipīrata catu vahe chupe, ahe osecoreroyise, opa vīrocua iyeroyasa ichui. Evocoiyase güembierocua ahe opa vīraso oyeupe.

23 “Acoi ava ndache mboyyoi vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Carugar oyevi iri güeco agüerve

24 “Acoi osēse carugar ava sui, oguata tēi ívi ipiru vahe rupi opituhu āgua reca. Ipape rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. 25 Aheve oyevise, osepiá iri secocuer inungar oi sahuvapri tupri. 26 Sepiaše, oso siete carugar naporai catu vahe reca. Ichui güeruse, oyoya guasu yuviroique co mbia pīha pipe. Sese mbahe tēi catu ité secocuer yipindar güeco agüer sui” ehi Jesús ava rehí upe.

Tūpa Ñehengagüer viroya vahe sovasapri secoira

²⁷ Oñehe viteseve aipo mbahe rese, cuña ava rehi pāhu pendar oñehe pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasapri secoira che Ru Tūpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehi oyere ati vitese Jesús rese yuvireco, ahe aipo ehi: “Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. ³¹ Acoi ari cañi pipe cuña mborecuar guasu irohi coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrteite rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasisa oangaipa, oyevi Tūpa upe yuvireco Jonás omombehuse Tūpa Ñehengagüer chupe; cūrteite rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoí chiaveira que mbahevive. Iyacatu rumo yamondora ivate tataendi rendave ‘tosape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osape. Acoi imarase rumo, pe retecuer pītumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pītumimbi vahe nungar. ³⁶ Co supi eté vahe osape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osape vahe opacatu pe recocuer pipe. Ahese ndipoi que pītu vahe pēu” ehi.

Jesús omombehu fariseo iyavei Moisés porocuita rese oporombohe vahe recueraí

³⁷ Opase oñehe Jesús, fariseo viraso güētave imbocarú. Oiquese sētave oso, oguapi mesave oí. ³⁸ Ocaru renondeve ndoyepoise rumo, ahese fariseo ndoyembovihai tēi nomboaviyese judío porocuita. ³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquih opitaño ité, ēgüe ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe pemiti sui pemondo peyacatu ñepi-peí diez vahe sui Tūpa upe viña, pe rumo ndaperoyai teco ivisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapí ãgua tũparo pipe, iyavei peipota pẽu opacatu ‘avirave’ oyapora ava pe mboetisave ocar rupi yuvireco.

⁴⁴ “¡Peparaisu! Esepia, pe recocuera inungar tehõgũer ruvípa icuaẽhise ava oguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe, —Porombohesar —ehi—, aipo eremombehu vahe pipe niha ava ore amotarẽhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipitĩvĩmi eté ahe ava imboaviye ãgua rese yuvireco.

⁴⁷ “¡Peparaisu! Esepia, pemoingatu Tũpa ñehe mombehusar ruvípagũer peico Tũpa mboeteisa angahu pipe tẽi. Pe ramoi teieté rumo oyuca yuvireco.

⁴⁸ Evocoyase pemboyecua co pe ramoi eta pihañemoñeta agũer secocuer moña pipe peico. Esepia, ahe oyuca Tũpa ñehe mombehusar yuvireco. Pe evocoyase cũritei pemoingatu vite suvípagũer peico.

⁴⁹ “Sese Tũpa ombahecuaa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipãhu pendar oyucara yuvireco. Iyavei ambuae mara-mara tẽi virecora yuvireco’ ehi. ⁵⁰ Esepia, ava ndiporeroyai vahe cũriteindar upe ité omondora oñemoĩrosa opacatu oñehe mombehusar yucagũer rese aracahe suive, cũriteindar avei oyucase yuvireco.

⁵¹ Abel yuca agũer suive oyepotara Zacarías yuca agũerve oso. Ahe oyuca tũparo maranehi rocar mbahe reropovẽhesa rovai. Supi eté aipo ahe pẽu: Tũpa opara omondo oñemoĩrosa ahe yuca agũer rese ava ndiporeroyai vahe cũriteindar upe curi.

⁵² “¡Peparaisu pe Moisés porocuita rese oporombohe tẽi vahe! Esepia, pe mbahecuaa avĩye soquendapri pereco ava sui. Pe niha ndaperoyai, iyavei ambuae ava upe ndapeipotaĩ seroya ãgua” ehi chupe.

⁵³ Ipare Jesús osẽ oso ichui. Ahese Moisés porocuita rese oporombohe vahe iyavei fariseo eta oñemoĩró iteanga yuvireco sese. Ahe omañeco tẽi, oporandu-randu mbahe rese yuvireco chupe, ⁵⁴ osecõãha-ãha tẽi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atĩ iteanga oyemboti tupri oyemombo guasu-guas yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. ² Esepia, yaposa vahe imombehupirẽhi cũritei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pĩtumimbisave, ahe sendusa tuprĩra ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harĩve opacatu ava rovaque” ehi.

¿Uma sui pĩha siquiyesara?

⁴ “Iyavei aipo ahe pẽu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pẽu. ⁵ Che rumo amombehura pẽu uma sui pesiquiyera: acoi oicatu vahe

omborerecuasa pīpe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo v̄irai ñuvirío guarepochi rupivemi t̄ei yepi. T̄upa rumo ndasesarai eté que ñepēi sui. ⁷ T̄upa niha oicua ñepēi-pēi yande ha retacuer. Sese, pesiquiye eme; pe niha ivate catu vahe ité peico opacatu v̄irai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque.

⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoiyase, ‘Co ndahei che reroyasar secoi’ ahe aveira che Ru T̄upa upe sembiguai rovaque” ehi.

¹⁰ “Iyavei opacatu oñehe-ñehe t̄ei vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe t̄ei vahe rumo Espiritu Santo amotar̄ehisave, ahe chupe ndipoi chietera ñeroisa” ehi.

¹¹ “Acoi pe amotar̄ehisar che recocuer sui t̄ei pe rerasose porandusave pe recoãha ãgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe p̄iha amombehura?’ ndapeyei chira. ¹² Esepia niha, ahe pīpeve voi Espiritu Santo pe mbohera aviyeteramo t̄ei mbahe mombehu ãgua rese” ehi güemimbohe etá upe.

Ñearosa mbahe pota raisa sui

¹³ Ñepēi mb̄ia ava rehii p̄ahu pendar aipo ehi Jesús upe:

—Porombohesar, emombehumi che riquehir upe, tomboyahomi t̄ei mbahe che mombaesa cheu —ehi.

¹⁴ Ahe rumo omboyevī chupe:

—Che mborip̄ar, che ndachecuai tai mbahe moingatu ãgua, mbahe mboyaho-yaho ãgua avei —ehi ahe mb̄ia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati ãgua pe recocuer —ehi.

¹⁶ Ipare omboyoya ambuae mbahe rese imbohe: “Oime mb̄ia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera p̄iha che rembipoho rereco?’ ehi t̄ei. ‘Ndareco iri eté yapocatu ãgua’ ehi. ¹⁸ Ipare ipihañemoñeta cute: ‘Aicua mbahe che rembiaporã.

Opara aroyī tembihu r̄eta. Ichui ayapo irira ambuae tuvichá catu vahe. Aheve ayapocatura che remiti r̄ahii opacatu mbahe arco vahe avei no.

¹⁹ Evocoiyase aipo ahera cheyeupe: Che mborip̄ar, oime setá mbahe cheu aravite momba-momba ãgua; sese c̄uritei apituhura vichico, acarura, ac-

ahura iyavei ayemboviharera no, ahera’ ehi. ²⁰ T̄upa rumo aipo ehira chupe: ‘Mb̄ia, nandearacuai eté eico, co p̄itu pīpeve voi eté eremanora.

Co mbahe nde rembiapocatu, ¿ava mahera p̄iha evocoiyase?’ ehira chupe.

²¹ Ëḡüe ehi eté niha que ava oyeupeñomi t̄ei mbahe omonuha ati vahe, iparaisu rumo T̄upa rovaque” ehi ahe mb̄ia upe.

T̄upa osãro opacatu guahir

²² Ipare aipo ehi Jesús güemimbohe upe: “Co amombehura p̄eu: Ndapeyemomahenduha guasu ai chira pe remihura rese pe recove ãgua, pe turucuarã

rese t̄ei avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia v̄irai: nomahetii vahe,

nomonuhai vahe avei, ndovirecoi vahe avei mbahe r̄ahii r̄eta yuvireco. T̄upa

rumo omoime mbahe itohu. ¡Pe rumo ivate catu vahe ité peico vírai sui!
²⁵ Ndipoi eté que ñepei pe pāhu pendar oicatu vahe opíhañemoñetá iteangasa
 pípe tēi güecocuer mbosasaviño āgua. ²⁶ Supi eté ndapeicatuise yapo, ndiyai
 peyemomahenduha guasu ai mbahe rese.

²⁷ “Pemahecuá ru mbahe potri caha pipendar rese: ndoporaviqui eté
 iyavei ndoipiai oturucuarā. Iyavei no yepe mborerecuar guasu Salomón
 víreco setá mbahe iporañete vahe aracahe viña, iturucuar catuprigüer rumo
 ndahoyoyai mbahe potri catuprigüer rese. ²⁸ Tūpa niha omboporañete
 raimi tēi mbahe potri caha pipendar. Ichui sapisapaño horno pípe. ¡Ahe
 rumo omondo catura turucuar pēu, pe ava nimbahe reroya tupri vahe!
²⁹ Sese, ‘¿Mbahe pīha yahura, mbahe pīha yamondera?’ ndapeyei chira pe
 yemomahenduha guasu aisa pípe. ³⁰ Esepia, ava Tūpa reroyasarēhi co ivi
 pipendar aipo nungar mbahe reseño tēi ipíhañemoñeta yuvireco yepi. Pe Ru
 Tūpa rumo oicua ité pēu mbahe ipane vahe. ³¹ Aviye catu rumo pesecara pe
 Yar Tūpa povrive pe reco āgua, ahese omboura que mbahe ipane vahe pēu”
 ehi.

Ívave mbahe eta oime vahe yandeu

³² “Aní pesiquiye, che ovesa nungar, yepe pe moviromi tēi peico viña, pe
 Ru rumo oporoaisua pípe oipota opovrive pe rereco āgua. ³³ Pemondopa
 mbahe pereco vahe ava oipota vahe upe. Ipare pemondo sepri avei iparaísu
 vahe upe. Ahe yapocatusa ívave mbahe riru ndituyui vahe nungar pípe.
 Aheve ava imonda rai vahe ndoiquei chira ñomi āgua pe sui iyavei mbahe
 rasoí nomomaraí chiaveira. ³⁴ Esepia, pe mbahe pe rembiereco setá catu
 vahesa rupi-rupi pe píhañemoñeta yepi” ehi.

Peyemoingatu Tūpa Rahír yevi āgua

³⁵ “Peyemoingatu tupri che yevi āgua. Inungar tataendi ndogüei vahe,
 pemboyecua tupriño ité che recocuer pe recocuer pípe ava upe. ³⁶ Peico im-
 boacuapri güerecuar osāro vahe nungar mendasa sui iyevise, oquenda imo-
 tase, omboi voi vahe yuvireco chupe. ³⁷ Aviye itera serecuar upe osepiase
 iyemoingatu voi; evocoyase serecuar ae niha íhañecora sese, omboguapira
 mesave imbocarú. ³⁸ Yepe serecuar oyepotara pītu mbiter ou viña, anise
 añihiveive, ahe rumo osāroño itera chupe imboi āgua yuvireco. Evocoyase
 serecuar aviye ai etera chupe. ³⁹ Peyapisaca tupri co rese: acoi oi yar oicua
 mbahe hora imonda vahe yepota āgua, ahese opitara imonda vahe rāro güeta
 pípe sui mbahe renoseēhi āgua. ⁴⁰ Ēgüe peye aveira peyemoingatu che yevi
 āgua. Esepia niha, che, Ava Riquehír, aporoasapiha tēira vítu curi” ehi Jesús
 víroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:
 —Che Yar, ¿oreuñomi pīha eremombēhu co porombohesa eremboyoya
 vahe ambuae mbahe rese, opacatu upe tie? —ehi.

⁴² Evocoyase omboyevi Pedro upe aipo ehi: “Acoi ava mbahe rese
 ñangarecuar omboaviye tupri vahe ocuaita, yaracua vahe avei, ahe chupe
 serecuar oseya icuaitarā güeta pipendar rese hañeco āgua ‘tembihu tomondo
 che rēta pipendar upe che porocuita rupi’ ohesave. ⁴³ Acoi omboaviyese
 ocuaita, ahese oviharetera güerecuar yevise. ⁴⁴ Supi eté niha, serecuar oy-
 ocuaira opacatu ombahe rese hañeco āgua. ⁴⁵ Ahe mbiguai rumo ‘ndoyepota
 víteí chira revo che rerecuar’ oya omboetasa cuimbahe iyavei cuña omboipi
 mara-mara tēi sereco iyavei ocaru, oihu tēi osavaipo-ipoño avei oico. ⁴⁶ Ipare

rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

⁴⁹ “Che ayu tata nungar yavai vahe reru āgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe tēi che recoāhasa pipe, jēgüe ahera che paradisú itera imboaviye āgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi āgua. ⁵² Esepia niha, co pipe suive ité que poyandepo tupri revo oñemu yuvirecoi vahē amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco. ⁵³ Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pítu ari sosa coti sui opūhase, ahese, ‘Oquirā’ peye. Ēgüe ehi eté oqui. ⁵⁵ Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ēgüe ehi eté. ⁵⁶ ¡Pe Tūpa reroyasar angahu tēi peico vahe! Pe niha peicua mbahe iya rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūrítei oime vaherā mombehu peico!” ehi.

Peñero pe amotarēhimbar upe

⁵⁷ “¿Mahera napesāha ranei pe ae ité co mbahe supi eté vahe? ⁵⁸ Acoi que ava nde amotarēhisar nde soho ucase nde mondo āgua mborerecuar rovai, emoingatu tupri voi mbahe eico chupe tenondeve nde rerasoēhi āgua sovai; anise, mborerecuar nde mondora ava naporai vahe rarōsar upe. Ahe evocoyase nde roquendara. ⁵⁹ Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña. ³ ¡Aní rumo! Acoi ndapemboasiise pe angaipa Tūpa upe pe yevi āgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tūpa upe peyevi āgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. ⁷ Ahese aipo ehi mbia oco rārosar upe: ‘Esendu, che ayu pīhi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihāi tupri tēi cohave’ ehi. ⁸ Ico rarōsar rumo omboyevi chupe aipo ehi: ‘Che rerecuar, ēgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, caruguar tēi omboyepami uca sereco. Sese ndoicatui opūha tupri uguata.

¹² Osepiase rumo Jesús, “Erio” ehi chupe.

—Cuña, cūrítei nanembaheasi iri eico cute —ehi.

¹³ Evocoyase omondose opo sese, aheseve voi cuña oyemohivi. Ipare omboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui āgua; ahe ari pipe peyura peposano āgua, ndahei chira mbituhusa ari pipe —ehi.

¹⁵ Evocoyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tivi iyavei guaricu mbituhusa ari pipe yuvireco yepi no?

¹⁶ Co rumo cuña, Abraham suindar Caruguar omombaheasi vahe dieciocho araviter suive sereco, ¿ndiyai eté pīha evocoyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovīhaño opacatu Jesús rembiapo osepiase yuvireco.

Yembohesa mostaza rāhii suindar

¹⁸ Evocoyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

²⁰ Evocoyase Jesús aipo ehi iri: “¿Mbahe rese pīha amboyoyara Tūpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi sáhambri trigo cuhi rese opacatu imboapepo āgua yepi” ehi oporombohe.

Jesús peri icāhimi vahe nungar

²² Ipare Jesús osoño Jerusalén ve, opīta-pīta tecua yacatu rupi oporombohe oico. ²³ Ahe supi ichose, ñepe mbia oporandu chupe aipo ehi:

—Che Yar, ¿supi eté pīha moviromi tēi ava oñepisirora yuvireco? —ehi.

Ahe evocoyase omboyevi chupe:

²⁴ —Peyemoviracua tupri catu peique āgua oquendipi cāhimi rupi. Esepia niha, supi eté setá ava osāha tēira yuviroique vahe rā ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoyase ocarve

yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. ²⁷ Ahe rumo aipo ehira: ‘Ñepeí reseve niha acoi, Ndococuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe. ²⁸ Pe rumo imomboprira pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrive ivave. ²⁹ Iyavei ava yuguerura añihivei coti sui, caharu coti sui, norte coti sui iyavei irohi coti sui, ahe evocoiyase yuviroguapira ocaru Tūpa mborerecuasave ipiri yuvireco. ³⁰ Supi eté amove ava ndoyavi ipa tēi vahe seique água ivave Tūpa piri viña, ahé ranengatu rumo yuviroiqueño itera ipipe iyavei amove ava tenonde catu vahe ndoyavi ahe rane oiqve vaherá ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvireco: —Eyepiño ave sui. Esepia, Herodes niha nde yuca pōta oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepiñora ava sui carugareta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrí opopovrive, êgüe ahe pota tēi pe rereco viña, pe rumo ndapeipotaí eté! ³⁵ Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secoi. ³ Evocoiyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera água; aní tie? —ehi.

⁴ Ahe rumo noñehiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoiyase aipo ehi:

—¿Ava pñha pe pñhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

⁶ Ahese nombojeví catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸—Acoi que yande soho ucase mendasa pietasave yuvireco, ndayaguapi chira ava imboeteipri catu vahe renda harive. Esepia, avieteramo que ambuae ava ichohopri oyepotara yande sui imboeteipri catu vahe yuvireco.

⁹ Ipare yande soho ucasar aipo ehira yandeu: ‘Epüha evocoi sui, co mbia toguapi eipeve’ ehira yandeu. Evocoiyase yande yachî tēira yaso ipami tēi yaguapi. ¹⁰ Yande soho ucase rumo yuvireco, yaguapira evocoiyase ipa; yande soho ucasar ouse, aipo ehira yandeu: ‘Mbori, erio cohava tenda

imboeteipri catu vahesave ore piri’ ehira. Ēgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroysa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichocho ucai chira nde mboripar, que nde rivri, que nde mu iyavei que nde rêta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; Ēgüe ehira evocoiyase mbahe imboyevipa yuvireco ndeu. ¹³ Ereyapose rumo pieta, ereichocho ucara ava iparaisu vahe, ava ipo ichutu vahe, anise ipi chutu vahe, ipäri-päri vahe, ndasesapisoi vahe avei. ¹⁴ Esepia niha, ahe ndoicatui mbahe mboyevi yuvireco ndeu. Opase rumo ocuerayevi ava seco catupri vahe yuvireco, ahese ereviharetera eico. Esepia, erepisira mbahe aviye vahe Tüpa suindar —ehi.

Jesús oporombohe carusa rese

¹⁵ Iñehe renduse rumo, ñepe mbia yuviroguapi vahe mesave, ahe aipo ehi Jesús upe:

—¡Sovasapri catu ava Tüpa piri ocaru vahe imborerecuasave! —ehi.

¹⁶ Evocoiyase aipo ehi ahe mbia upe:

—Oime mbia oyapo vahe carusa guasu, oichocho uca ava setá oyepiri.

¹⁷ Ipare oyepotase arî caru āgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi.

¹⁸ Opacatu rumo ava, ‘Eñemosañomi tēi cheu’ ehi päve yuvireco. Yipindar mbia aipo ehi: ‘Che rumo arocuva ivi; iya ité aso sepi. Sese eñemosañomi cheu’ ehi chupe. ¹⁹ Ambuae mbia aipo ehi: ‘Che arocuva ramo diez tupri tivî, ahe asāha ranera. Sese eñemosañomi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi. ²¹ Oyevisse mbiguai, opa tupri omombehu mbahe güerecuar upe. Ahese serecuar aipo ehi oñemoirosa pîpe güembiguai upe: ‘Eso voi evocoiyase opacatu ocar rupi. Supi sui eru

ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipäri-päri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoiyase aipo ehi güembiguai upe: ‘Eguata iri ambuae perî tecua ivirindar rupi avei toyugüerumi che rêtave yuvireco che piri, tomboapipopa ité che rêta yuvireco’ ehi. ²⁴ ‘Esepia niha, acoi yipindar ava aichocho uca vahe ndipoi chietera que ñepe ocaru vahe

chepiri’ ehi güembiguai upe —ehi Jesús ahe mbia mbohe.

Yavai Cristo rupi guata āgua

²⁵ Ava rehî Jesús raquicuei uguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi uguata āgua, tache raisu catu que ambuae ava sui, que oyesupa, osî, güembireco, guahireta,

vivireta iyavei güeindireta sui, oyesui avei. Ēgüe ndehise, evocoyase ndiyai chupe che remimbohe seco água. ²⁷ Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata água, ahe chupe ndiyai che remimbohe seco água” ehi. ²⁸ “Que ava pe pāhu pendar omopuha potase oi, ¿ndoyapisaca ranei chira ‘¿amomba angara pīha?’ oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroirora ³⁰ aipo ehira yuvireco: ‘Aye evocoi mbia omopuha pota tēi oi viña, ndoicatu eté rumo imboaviye’ ehira yuvireco chupe. ³¹ Iyavei que mborerecar guasu diez mil sundao vireco vahe oyeepi potase ambuae mborerecar veinte mil ava vireco vahe sui, oyapisaca ranera yipindar icua tupri água ‘¿yaicatura pīha setá catu vahe rese yavava?’ ohesave. ³² Esepia, ndoicatuise, evocoyase ambuae mborerecar guasu amombri vite secoise, omondora mbahe mombehúsar mbahe tupri rese porandu água chupe. ³³ Ēgüe ehi avei pe recocuer ndapeseya potaise pe mbahe opacatu, Ēgüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí aviye vahe ité yandeu; nasehe irise rumo, ndayaicatu chietera imoehe iri água. ³⁵ Naporai eté ivi upe nara; ndiyai avei ivi mbahe repochi resender rese oyeseha vaheñā. Evocoyase ahe imombopri tēi vaheñā. Sese aipo ahe acoi ava oyapisaca pota vahe, toyapisacañ” ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese ñeñe rendu água yuvireco. ² Sese fariseo yuvirecoi vahe iyavei Moisés porocuaita rese oporombohe vahe yuvireco, ahe oviroiro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no—ehi.

³ Evocoyase Jesús omombehu ovesa resendar yembohesa: ⁴ “Que ñepei pe pāhuve virecose cien ovesa güeimba, ipare co ocañira ñepei ichui viña, oseya ranera evocoyase evocoi noventa y nueve tēi aviye vahesave seco água. Ipare oyevíra ocañi vahe reca oso, oyosu rane itera viña. ⁵ Oyosuse, osupira oachihive vorivetesá pipe. ⁶ Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté Ēgüe ehi aveira oime torivetesá guasu catu ivave acoi ñepei ava yangaipa guasu vahe oñecuñarose güecocuera sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté Ēgüe ehi aveira oime torivetesá Tüpa rembiguai íva pendar rehi upe que ñepei ava yangaipa guasu vahe oñecuñarose güecocuera sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chihivahe catu vahe aipo ehi oyesupa upe: ‘Che ru, embou mbahe che mombaheesa cheu’ ehi. Iyesupa evocoyase omboyaho ombahe imondo chupe. ¹³ Ipare coye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro ãgua. ¹⁶ Aheve oyemohitaro pota tēi cuchi rembihu pipe oico viña. Ndipoi eté rumo omondo vahe chupe. ¹⁷ Evocoyase oyemomahenduha tēi güeta pendar oporaviqui vahe rese: ‘¡Che ru rētave oporaviqui vahe rumo co omombire guasu-guasú tēi güembihu yuvireco! ¡Che rumo che yuca pota tēi che ieporēhi che rereco cohave! ¹⁸ Sese ayevira che ru rētave. Aipo ahera chupe: Ayemboangaipa Tüpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revó ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹ Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco ãgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucur pemboyemonde, pemonde avei cuã penda sese, pitaqui avei. ²³ Iyavei guaca iquira catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secó viña, cūrítei rumo oyevi iri cheu’ ehi. Ëgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secó. Oyevisé ou güeta rerovicave, osendu voi ipieta guasu vahe yuvireco. ²⁶ Evocoyase oporandu mbiguai upe mbahe oime vahe rese. ²⁷ ‘Nde rivri mo co oyevi tupri iri ou. Sese nde ru oyuca uca guaca iquira vahe iyevisa resendar’ ehiño. ²⁸ Evocoyase tiquehir ofemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe. ²⁹ Evocoyase tahir omboyevi chupe aipo ehi: ‘Che niha setá araviter rupi oropitivi vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta ãgua’ ehi vu upe. ³⁰ ‘Indó, cūrítei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoyase tu: ‘Eyapisacaño, che rahir, nde niha nderesiri vahe che sui. Opacatu che areco vahe rumo nde mbahe ité yepi. ³² Cūrítei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoyase serecur angarecuar ñepe opitiviisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerãcua? Emoingatupa tupri voño nde poraviquisa resendar cheu’ ehi, ‘Nandehañeco iri chira cohave mbahe rese cheu’ ehi, ‘Nandehañeco iri chira cohave mbahe

rese cheu' ehi chupe. ³ Evocoiyase mbahe rese ñangarecuar: '¿Mara ahera pīha co evocoiyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui āgua. Achī eteanga aveira rumo mbahe rese che porandu āgua' ehi tēi. ⁴ 'Aicua rumo cute mara ahera vichico: che poraviquisa sui opa che momboise, oimera che pisi tupri vaherā oyepiri' ehi. ⁵ Evocoiyase oñehe ñepepe-güerecuar sui mbahe vinose tēi vahe rese chupe. Yipindar vahe upe oporandu: '¿Mbovi mbahe erenose tēi yande rerecuar sui?' ehi. ⁶ 'Cien tupri chereve aceite siru tuvichagüe vahe rese' ehi. Evocoiyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe. ⁷ Ichui ambuae mbahe vinose tēi vahe upe oporandu no: '¿Mbovi mbahe vo erenose tēi yande rerecuar sui?' 'Cuatro ciento quintar rupindar' ehi. Evocoiyase, 'Co oime cuachiar sesendar. Yaicuachiara rumo tresciento veinte quintar rupindar' ehi. ⁸ Evocoiyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu āgua. Supi eté ava ndoicuai vahe Tūpa oicua catu mbahe moingatu āgua oyeupe Tūpa reroyasar sui.

⁹ "Sese che aipo ahe pēu: peiporu pe guarepochi pereco vahe co ivi pipe pe mboripar reime āgua. Ichui opa tēise pe guarepochi, oimera pe pisi vaherā teco apirēhisave.

¹⁰ "Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chīhi vahe rese, ēgüe ndehi chivaveira mbahe tuvichá vahe rese. ¹¹ Evocoiyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco āgua. ¹² Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

¹³ "Iyavei ndipoi chietera ñepepe mbiguai omboyeroya vahe ñuvirio güerecuar. Esepia, ñepepe osaisu catura imboyeroya pipe, ambuae evocoiyase ndoyambotai chira imboyeroya potaēhisa pipe. Égüe peye avei ndapeicatu Tūpa mboyeroya guarepochi pota raisa pipe" ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco. ¹⁵ Evocoiyase aipo ehi fariseo eta upe: "Pe co ava rembiepiave pe recocer aviye angahu pe reco viña. Tūpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recocer viña, Tūpa uve rumo mbahe tēi eté" ehi.

Mborocuaita iyavei Tūpa mborerecuasa rese ñehesa

¹⁶ "Yipisuive Moisés porocuaita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vaherā.

¹⁷ "Yavai catura que ñepepe Tūpa porocuaita mboaviyeēhi āgua co iva, ivi opa vaherā sui" ehi.

Jesús oporombohe mendasa sui poiēhi āgua

¹⁸ "Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei" ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahese Tüpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ “Aheso oso Tüpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoiyase osapucaí pirata: ‘¡Che ramoi Abraham, che paraisuerecomi tēi eve! Emboumi tēi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu’ ehi. ²⁵ Evocoiyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cũritei rumo Lázaro oviharete oico cohava, nde evocoiyase nde paraisu eipeve eico.

²⁶ Iyavei oime co ivicuar ipicucu vahe rasaēhi ãgua oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro ²⁸ che rivri poyandepo vahe upe, chupe ñehe ãgua. Ahe tosecuñaro güecocuer yugüeruēhi ãgua co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuita iyavei Tüpa ñehe mombehusar rembicuachigüer yuvireco. ¡Ahe toviroya yuvireco!’ ehiño chupe. ³⁰ Evocoiyase, ‘Taa, che ramoi Abraham, que omano vahecuer pãhu pendar rumo yuvirasose chupe, ahe evocoiyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tüpa ñehe mombehusar remimombehu rese no, ndoviroyai chivaveira que ava omano vahecuer ocuerayevise yuvireco’ ehi Abraham ava mbahe yar upe’ ehi.

17

Iparaisu itera ava oporomongaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo ãgua chĩhivahemi nungar mboangaipa uca rãgüer sui. ³ ¡Sese peñero tupri!

“Acoi nde mboetasa Tüpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarēhi vitese rumo sieteyupagüer ñepeí ari pipe, acoi ouse pēu sieteyupagüer avei, ‘Ēgüe ndahe iri chira’ ehise, peñero chupe’ ehi Jesús güemimbohe upe.

Yayeroyase Tüpa rese oime pĩratasa

⁵ Co doce tupri apóstol aipo ehi chupe:

—Emboumi oreu Tüpa rese ore yeroya catu ãgua —ehi yuvireco chupe.

⁶ Evocoiyase yande Yar omboyevi chupe:

—Supi eté, Tüpa rese pe yeroyasa, yepe ndoyavii chira mostaza rãhii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tüpa rese pe yeroyasa pipe, ahe evocoiyase pe mboyeroya itera —ehi.

Ambuae ava rese hañecosar cuaita

7 “Inungar que pe pāhu pendar virecora güembiguaí oporaviquí vahe iví mboyere cove, anise que guaca rāro yuvi rupi vña; ichui iyevisé, ¿‘Eique, eguapí terecaru’ ehira pīha serecaru chupe? 8 Aní eté, ahe rumo aipo ehiñora chupe: ‘Emoingatu voi mbahe che tohu, che toihurá avei. Ipäre nde ererarura, ereihura’ ehira chupe. 9 ‘Aviye ndeu’ ndehi chietera icuai pare chupe. 10 Ēgüe peye avei mbiguaí nungar pe opacatu Tūpa pe cuaitarā ombou vahe mboaviyere, ‘Yande niha mbiguaí tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasi vahe

11 Osose Jesús Jerusalén ve, oguata iví Samaria iyavei iví Galilea rupi. 12 Oyepotase tecuamive oso, ahese yuvínose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. 13 Osapucaí yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

14 Sepiase aipo ehi lepra vireco vahe upe:

—Peyevi, peso, tapeyemboyecua pahí eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco.

15-16 Evocoiyase ñepi ipāhu pendar, Samaria pendar, osepiase ocuerasa, oyeví chupe osapucaí pírata Tūpa upe imboetisave. Oñenopiha oso soval, oyaivi, “Aviye ndeu” ehi Jesús upe. 17 Evocoiyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? 18 ¡Co mbia ambuae iví pendar güeraño rumo oyeví ‘aviye ndeu’ ohesave Tūpa uve! —ehi.

19 Evocoiyase aipo ehi ahe mbia upe:

—Eñarapuha, esó tupriño. Nde poreroyasa pipe niha erecuera eico —ehi Jesús chupe.

Tūpa mborerecuasa yande pāhuve secoi

20 Ñepi ari pipe fariseo eta, “¿Marase vo aipo oura Tūpa omborerecuasa pipe mbahe moingatu āgua?” ehi Jesús upe yuvireco. Ahe omboyevi chupe:

—Tūpa mborerecuasa ndahei acoi yasepia vahe. 21 ‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

22 Ipäre aipo ehi güemimbohe eta upe:

—Oímera ari pe peipota tēira aico vahe rā pe píri que ñepi ari rupi che, Ava Riquehír, che recosa pipe; ndache repiai chira rumo peye. 23 Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. 24 Esepia, inungar acoi overa vahe osesape guasu iva rese ocua yepi, ēgüe ahera che, Ava Riquehír, vitu ari osupitise che yevi āgua curi. 25 Yipindar rumo co iví pipe che paraisu ranera ava cūrteindar mara-mara tēi che rerecose yuvireco che repia potaēhisave. 26 Inungar ava Noé recose yuvirecoi aracahe, ēgüe ehi tupri aveira che, Ava Riquehír, yevi āgua renonde. 27 Esepia, ocaru, oihu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pipe. Ambuae ava rumo opa ocañi tēi yuvireco. 28 Ēgüe ehi avei aracahe Lot recose, ava ocaru tēi, oihu tēi, vircua tēi mbahe omahera yuvireco iyavei mbahe mondosar tēi, mbahe tísar tēi, oi aposar tēi avei yuvirecoi oyapisacaēhisá pipe. 29 Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehi aracahe. 30 Ēgüe ahe aveira aviyeteramo tēi che, Ava Riquehír, ayemboyecua curi.

³¹ “Ahe ari pipe acoi ava güëta harive seci vahe, ahe toi que iri eme güëta pipe ombahe renose. Iyavei ava que rupi tēi seci vahe, toyeve iri eme güëtave. ³² Sese peyemomahenduha co arachendar Lot rembireco rese. ³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

³⁴ “Ahe pītu pipe oimera que ñuvirío ava vupave yuviroque vahe yugüeru: ñepe i acoi che reroyasar serasosara, ambuae rumo opītara. ³⁵ Ahese avei ñuvirío cuña ohichora yuvireco: ñepe serasosara, indugüer rumo opītara. ³⁶ Ēgüe ehi aveira ñuvirío ava amombri güecua sui yuvirecoi vahe: ñepe serasosara, indugüer rumo opītara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo Ēgüe ehira mbahe curi? —ehi.

Ahe evocoyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño āgua ari yacatu rupi ² aipo ehi: “Ñepe tecuave oime mbia mborerecuar mbahe moingatusar ndosiquiyei vahe Tūpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivi potai. Coiye catu rumo cuña ombopihaviracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihīēhi āgua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehese rese. ⁷ Tūpa avei niha omoingatura mbahe güembiporavo oyeupe yeruresar ari, pītu rupindar upe yepi. Nosaro tēi chiranera opitivi āgua yuvireco. ⁸ Supi eté Tūpa omoingatu vōira mbahe aviye vahe yande porandusa pipe yandeu. Co rumo che, Ava Riquehir, ayevice co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu seci oyeupe viña, iharive rumo viroiro ambuae ava. ¹⁰ “Ñuvirío ava yuviraso tūparove oyerocu. Ñepe ava fariseo, ambuae evocoyase ava sui guarepochi rerocuar. ¹¹ Evocoyase fariseo oso tenonde ava rembiepiave oyerocu aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuar nungar tēi aico no. ¹² Iyavei ñuvirío yupagüer ñepe semana pipe ayecuacu ité nde recocuer rese, iyavei ñepepei cien guarepochi che poraviqui reprimi aipisi vahe sui amboyaho diez che porerocosa ndeu’ ehi. ¹³ Ava sui guarepochi rerocuar rumo opitaño amombri ichui. Aheve nomahei iva rese oyerocu āgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyerocu” ehi. ¹⁴ “Sese aipo ahe pēu: co mbia ava sui

guarepochi rerocuasar opa oipisi ñerosa Tūpa suindar güētave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chñivahe eta

¹⁵ Iyavei chñivahe güeru Jesús uve yuvireco sovasapirã. Evocoiyase semimbohe osepiase yuvireco, “¿Mahera vo peruño tēi chñivahe?” ehi oñihaviracuasa pipe serusar upe yuvireco. ¹⁶ Jesús rumo aipo ehi:

—¡Mahera ndapeipotai iyu ägua! Toyugüeruño chñivahe cheu. Esepia, co chñivahe nungar ava yuviroiquera che Ru Tūpa povrive. ¹⁷ Supi eté acoi ndoipisii vahe che Ru Tūpa mborerecuasa chñivahe nungar yuvireco, ahe evocoiyase ndoyuviroiquei chietera ipipe —ehi.

Ñepe mbia mborerecuar imbahe eta vahe omoñeta Jesús

¹⁸ Ñepe mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco ägua? —ehi.

¹⁹ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepe aviye vahe ité, ahe Tūpa secoi. ²⁰ Ereicua niha co porocuaíta aipo ehi vahe: ‘Nandeaguasai chira, ndereporoyucaí chira, nandemondaí chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chñivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoiyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihai tēi. Esepia niha, mbahe yar ité secoi. ²⁴ Sese omahe aipo ehi:

—¡Yavai eté rumo ava mbahe yar reique ägua che Ru Tūpa mborerecuasave! —ehi—. ²⁵ Yavai rai camello upe yucuar rupi seique ägua; ava imbahe eta vahe upe rumo yavai catu che Ru mborerecuasave seique ägua —ehi.

²⁶ —¿Ava angahu pñha evocoiyase oñepisirora yuvireco viña? —ehi sendusar chupe.

²⁷ Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata ägua —ehi chupe.

²⁹ Evocoiyase aipo ehi güemimbohe upe:

—Supi eté acoi oseya vahe que güēta, güembireco, viquehír, vivri, oyesupa, que guahír Tūpa mborerecuasa rese, ³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano ägua

³¹ Evocoiyase yande Yar opa viraso co cotimi doce güemimbohe. Aheve aipo ehi: “Cūrítei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riquehír, resendar

ñehesa. ³² Che imondopri aicora ndahei vahe yande mu upe mara-mara tēi che rereco āgua. Che reroïro-ïrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipate che yucara yuvireco. Imombosapisa ari pipe rumo acuerayevira omano vahe pãhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai eté senducua āgua yuvireco chupe.

Jesús ombogüera ñepe mbia ndasesapiso vahe

³⁵ Evocoyase Jesús ovirovise tecua Jericó oso, aheve mbia ndasesapiso vahe oguapi oï peri popive porerecosa oyeupe mondo āgua rese. ³⁶ Osenduse ahe ndasesapiso vahe ava rehii piambu, aheve, “¿Mbahe vo pëu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe güendapeve ñehe pïrata:

—¡Jesús, David suindar, che paraisuerecomi tēi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pïrataño ité chupe.

⁴⁰ Evocoyase Jesús opitase aheve, oyocuai ava seru āgua. Ovirovise seru yuvireco, aipo ehi ndasesapiso vahe upe:

⁴¹ —¿Mbahe vo ereipota ayapo vaheerã ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapiso vahe, osareco tupri ité; osoño ité Jesús rupi imboetisave. Opacatu ava osepia vahe avei omboetei Tüpa yuvireco.

19

Zaqueo osepia pota Jesús

¹ Ichui Jesús oique tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rerocuasar rerecuar.

³ Osepia pota tēi Jesús ‘taicua ité’ oya viña. Ndoicatu rumo opucuehise ava rehii pãhuve sepia āgua. ⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oï senonera. ⁵ Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesa pipe oipisi.

⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe. ⁸ Evocoyase Zaqueo opüha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevi āgua —ehi chupe.

⁹ —Co pipe Tüpa oipisiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehix, ayu co ivi pipe ava ocañi tēi vahe pisiro āgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer re-sendar rese. Esepia, vïrovï Jerusalén, “Oyepota voi etera revo Tüpa mbor-ecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaheerã amombri oivi pendareta rerecuarã oyevise. ¹³ Oso āgua renonde oichohopa uca diez tupri güembigua. Aheve opa omondo

ñepi-pei upe guarepochi sepirusu vahe, aipo ehi chupe: ‘Peporaviqui co guarepochi rese imboeta āgua che yevise nara’ ehi. Ipare oso. ¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā secoi āgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya. ¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chīhimi vahe eremboaviye ité. Sese ericora diez tecua guasu pendar rese hañeco āgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ericora cinco tecua pendar rese hañeco āgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase ēgüe che hesa viña, ²³ evocoyase, ¿mahera ru ndereyapocatu che guarepochi guarepochi apocatusave che yevise voi senose āgua cheu imboyevi catumi āgua viña?’ ehi. ²⁴ Evocoyase, ‘Percua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache potai vahe mborerecuarā yuvireco, ahe opara peru cohava che rovai yucapa āgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoyase coye catu tecua Betfagé iyavei Betania rerovicave, ivitri Olivo ñpiimi, aheve omondo ñvirio güemimbohe ³⁰ aipo ehi chupe:

—Peso co tecuamive, yande rovaingarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi, ‘¿Mahera vo peyora?’ ehise que ava pēu, ‘Yar oiporu pota’ peyora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepia mbahe yuvireco. ³³ Evocoyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso āgua. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco.

³⁷ Ovirovise ivitri Olivo sui ogüeyi āgua oso, opacatu ava seroyasar supi oguata vahe omboipi osapucal yuvireco vorivetesave mbahe poromondiisa sembiapogüer rese Tūpa upe ³⁸ aipo ehi yuvireco:

—¿Sovasapri secoi mboretecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

³⁹ Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi uguata vahe upe imonguiriri āgua —ehi tēi yuvireco.

⁴⁰ Evocoyase aipo ehi:

—Supi eté amombehu pēu: co ava iquiririse yuvireco, ita rumo evocoyase osapucāi pīratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuarā tarahu co co ari pipe teco tupri amondo pota vahe pēu viña, cūrītei rumo ocañi tupriño pe sui, ndapeicatu eté sepia!” ehi oyaseho. ⁴³ “Oimera rumo ari imombehupri naporai vahe pēu curi. Pe amotarēhimbar oñachi irira pe recua. Ipare oyere tupri yuvireco pe rese pēu ovava āgua. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepe i oya vahe ambuae rese. Esepia, ndapeicuai eté Tūpa ouse pēu pe pīsīro āgua” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oi que judío tūparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahī eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvireco chupe. ⁴⁸ Ndoicatu rumo yuvireco. Esepia, ava rehī oyapīsa iporombohesa rese yuvireco.

20

Jesús mboretecuasa

¹ Ñepe ari Jesús judío tūparo guasu pipe güecose, ombohe ava eta, omombehu ñehesa pīsīrosa resendar oico. Ahese yugüeru pahī eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mboretecuarā? —ehi ahe ava yuvireco chupe.

³ Ahe omboyeve chupe:

—Che avei aporandura mbahe rese pēu. Pemboyeve cheu —ehi—. ⁴ ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

⁵ Ahese, ‘¿Mara yahera pīha?’ ehi-ehi tēi oyeupe yuvireco. “ ‘Tūpa’ yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. ⁷ Evocoyase ahe ava, “Ndoicuai rumo Juan mbousar, que sui oporoāpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu —ehi mboretecuar guasu upe.

Ava mbahe tēi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe upe iporu ãgua. Ichui oso pucu que amombri vahesa rupi. ¹⁰ Evocoiyase oyepotase ari uva pohosa, ahese omondo ñepe güembiguai oporaviqui vahe upe imboprandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeví tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyeví imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

¹³ “Coiye miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoiyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co ivi’ ehi oyeupe yuvireco. ¹⁵ Evocoiyase ovinose miti pāhu sui, oyuca ité yuvireco.

“¿Mbahe vo evocoiyase oyapora ivi yar ahe ava naporai vahe upe? ¹⁶ Oura evocoiyase ahe ava mocañipa ãgua, omondora ambuae ava upe oivi rese oporaviqui vaherā” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuar eta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēño rumo ava rehii sui yuvireco.

Judío rerecuar osecoña iri tēi Jesús guarepochi rese yuvireco

²⁰ Ahe judío rerecuar evocoiyase omondo ava ndaseco asiimi angahu vahe iviro, chupe iñehe ãgua ‘toyavi angahu oñehe’ oya viraso vaherā mborerecuar Pilato rovai. ²¹ Ahe evocoiyase,

—Porombohesar, ore orocua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pīha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoiyavi uca catui eté iñehe ava rovaque ipisi ãgua yuvireco. Ahe rumo oyeupe imboyevisé, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseyá güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evocoyase omendara sembirecuer rese. Ahe viquehír omano vahecuer upe nara tahira oico’ ehi. ²⁹ Evocoyase oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivri omenda sese. Ahe omanoño avei guahiēhiseve. ³¹ Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar ēgüe ehi tupri avei omanopa yuvireco guahiēhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pīha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherā, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tūpa rahír, Tūpa rembiguai eta iva pendar nungar yuvireco. ³⁷ Moisés rembicuachía agüer pipe niha caha pāhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi. ³⁸ ¡Tūpa ndahei omano vahe Tūpa! ¡Ahe rumo oicove vahe ité Tūpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu āgua yuvireco chupe.

¿Ava suindar pīha Poropīsiosar?

⁴¹ Evocoyase Jesús aipo ehi ahe ava upe:

—¿Mahera ru, “Poropīsiosar David suindar ité” ehi yuvireco? ⁴² David teieté niha aipo ehi güembicuachía pipe: ‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopiha āgua nde povrive yuvireco’ ehi David aracahe.

⁴⁴ ¿Mahera ru, “Poropīsiosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. Oseca avei tenda porañete catu vahe güenara otūparo pipe, carusave avei oseca tenda avīye catu vahe yuvireco. ⁴⁷ Iyavei virocua-rocuano tēi cuña imer mano vahecuer rēta ichui. Oarondaguā tēi avei oyerocu pucu-pucu yuvireco. Ahe rumo oipisira Tūpa ñemoirosa ipírata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riru pipe yuvireco. ² Aheve avei cuña imer mano vahecuer iparaisu

vahe, omondo ñuviriomi guarepochi oporerecosa. ³ Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. ⁴ Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporerecosa āgua Tūpa upe —ehi.

Jesús omombehu tūparo guasu monduru āgua

⁵ Evocoiyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cūritei pesepia vahe pipe ndipoi chiera que ñepe i ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa íva rese

⁷ Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoiyase aipo ehi güemimbohe eta upe: “Peicua catu, peyembopa ucái rene catu. Esepia, setá ava yugüerura, ‘Che niha Poropísirosar aico, cūritei osupiti ari imombeupri yandeu’ ehi tēira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepe i ivi pipendar ovavara ambuae ivi pipendar rese oyeupe yuvireco.

¹¹ Ahese avei oimera ivi ririñi tuvichá vahe, tiavor, mbaherasisa opacatu-catu tēi tecua rupi. Iyavei pesepiara íva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe rerašo aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ívate catu vahe rovai avei yuvireco che recocuer sui tēi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyi chira pepihañemoñeta rereco pe yeepi āgua. ¹⁵ Esepia, che amondora che mbahecuasa pe ñehe āgua. Ndoicatu chiera evocoiyase pe amotarēhimbar imboyeve yuvireco pēu. ¹⁶ Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco. ¹⁷ Opacatu ava ndape ambotai chira che recocuer sui tēi yuvireco. ¹⁸ Nocañi chiera rumo que ñepe pe ha pe āca sui. ¹⁹ ¡Peyemoviracua evocoi nungar mbahe upe pe ñepisiro āgua!

²⁰ “Iyavei pesepiase ava Jerusalén rese sundao oyere tuprise, peicua evo-coiyase mbahe-mbahe tēi reime āgua yuvireco chupe. ²¹ Evocoiyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe ari oimera Tūpa ñemoirosa. Ahe omboaviyera icuachiapri arachendar pipe imombeupri. ²³ ¡Iparaisu itera ahe ari pipe cuña ipuruha vahe, imembí pītani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei

ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Iva rese iporêhira poromondiisa, ari rese, yasi rese, yasitata rese; iyavei ivi pipe, opacatu tecua rupi ava ndayaracua iri chira yuvireco. Oyembosiquiye guasu-guasu têi aveira yuvireco para guasu riapugüer renduse.

²⁶ Ahese ava setá yaracua cañi têira osiquiyepave yuvireco opihañemoñeta guasu aise co ivi pipe mbahe oime vaherá sui. Ahese avei iva resendar opacatu mbahe oririira. ²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pîratasa rendigüer porañetesa pipe. ²⁸ Omoipise evocoi nungar mbahe, peyemongerêhi catura, peyemopoase pe querêhisa pipe. Esepia, pe renosesa pihavira mbahe têi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramosa, yaicua cõimi ari sacu vahe yepota âgua yandeu yepi. ³¹ Na ehi aveira pëu che ñehe rupi tupri mbahe pesepiase. Sese peicuara Tûpa mborerecuasa cõimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya âgua mbahe têi aposa pipe, pe caguar têisa pipe, co ivi pipendar tecocuer rese pe pihañemoñeta têisa pipe avei. Evocoiyase topoesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe têi sui pe yepipi âgua, pe yemboyecua tupri âgua che, Ava Riquehir, rovai” ehi güemimbohe eta upe.

³⁷ Êgüe ehi Jesús oporombohe ari rupi tûparo guasu pipe. Pîtu pipe evocoiyase opita ivitri Olivo rese. ³⁸ Iyavei opacatu ava yuviraso añihiveive tûparo guasu pipe ñehe rendu âgua yepi.

22

Yemborandusa Jesús yuca âgua

¹ Ovirovise Pascua pieta pan ndayapepoi vahe hu âgua, ² ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca têi Jesús yuca âgua yuvireco.

³ Evocoiyase Carugar oi que Judas piha pipe, ahe acoi doce tupri semimbohe pâhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tûparo rârósar yuvirecoi vahe upe avei imoñeta âgua, “Tamondo Jesús pe povrive” ehi. ⁵ Ahe evocoiyase oyemboviharete yuvireco. “Yamondo guarepochi chupe” ehi voi eté yuvireco. ⁶ Judas evocoiyase, “Aviye” ehi. Oseca voi ava porêhiseve Jesús mondo âgua yamotarêhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu âgua. Ahe pipeve avei ovesa Pascua pieta resendar yucapri seropovêhesa yepi. ⁸ Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru âgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sêtave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoyase ahe omboyecuara oi guasu, ivatendar pëu. Aheve pemoingatura yande caru ãgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru ãgua apóstol reseve yuviroguapi mesave. ¹⁵ Evocoyase aipo ehi:

—¡Cueseve tēi eté niha aipota acaru vaheṛā pe piri Pascua pieta resendar rese che mano ãgua renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi:

—Co amondora pëu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ëgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pëu nara, ahe che ruvi ipiyerepirā pe recocuer rese nara. ²¹ Cūrítei rumo oime mbia mesave yande piri che mondo vaheṛā che amotarēhimbar upe. ²² Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tēi oyeupe: “¿Ava pīha ãgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. ²⁵ Evocoyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo ãgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pëu pe mborerecuasa inungar che Ru ombou cheu che mborerecu ãgua. ³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha ãgua rese. ³² Che rumo ayeroqui nde rese nde yeroyasa paneñhi ãgua. Ereyevise cheu, emonguerēhi catu ambuae nde rivireta imoviracua uca ãgua yuvireco oyese —ehi Pedro upe.

33 —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

34 —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoña ãgua

35 Evocoiyase Jesús oporandu güemimbohe eta upe:

—Opomondose acoi mbahe riru porêhi, guarepochi riru porêhi, ambuae pe pitaqui ndugüer rerasoêhise, çipane vo acoi mbahe ahese pëu? —ehi.

—Aní eté —ehi yuvireco chupe.

36 Evocoiyase,

—Cûritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã. 37 Supi eté amombehu pëu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

38 Evocoiyase semimbohe aipo ehi yuvireco:

—Ore Yar, cohave oime ñuvirio quise pucu —ehi.

—Ahe güeraño ité aviye —ehi güemimbohe eta upe.

Jesús oyerogui Getsemaní ve

39 Ipare Jesús osê oso ivitri Olivo ve. Ahe ivitri ve oso yepi, aheve semimbohe yuviraso yuvireco supi. 40 Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoêhi ãgua —ehi.

41 Ipare oyepepi güemimbohe sui, inungar ita imombosa vahe amombrimi, aheve oñenopiha, oyerogui 42 aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

43 Evocoiyase oyemboyecua Tūpa rembiguai chupe, seco momirata ãgua.

44 Mbahe-mbahe tēi porarasa pipe oyerogui catu. Ahese sacuvor inungar tuví osê ichui otiqui ivive.

45 Oñarapuhase oyeroguisa sui, oyevi oso güemimbohe uve. Ahe rumo opaño yuviroque yuvirocua oviharêhisa pipe. 46 Evocoiyase,

—¡Mahera opaño peque! Peñarapuha, peyeroqui catu pe viapiêhi ãgua mbahe tēi pipe —ehi güemimbohe upe.

Jesús oipisi yuvireco

47 Jesús ñehe viteseve, oyepota ati ava yuvireco chupe. Judas doce semimbohe pãhu pendar tenonde secoi. Ahe oyemboya oso sese sovaupite ãgua.

48 Evocoiyase aipo ehi Judas upe:

—Judas, çimahera vo che, Ava Riquehir, rovaupitesa pipe che mondo eve che amotarêhimbar upe? —ehi.

49 Semimbohe eta rumo, mbahe-mbahe tēi repiase, oporandu yuvireco:

—Ore Yar, çyavavara yande quise pucu pipe? —ehi yuvireco chupe.

50 Ñepeí rumo supindar, pahi rerecuar ivate catu vahe rembiguai nambi yasa cotindar oyasia. 51 Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. 52 Ichui aipo ehi güecasar opacatu pahi eta rerecuar upe, tūparo rãrosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tũparo pipe pe pãhuve ari yacatu rupi, na ndapeyapoi eté co nungar cheu. Aviyeyño rumo, oyeputa ité niha pëu imombehupri Caruguar pĩratasa pipe mbahe-mbahe tẽi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoiyase Jesús oipisi yuvireco, oviraso pahĩ eta rerecuar ivate catu vahe rõtave yuvireco. Pedro rumo amombri rupive tẽi osaquicue moñaño oso. ⁵⁵ Aheve ñachimbri pipe oyatapi yuvireco, oyere tupri tata rese oyephe yuvinoi. Aheve avei Pedro ipãhuve chini. ⁵⁶ Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tẽi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tẽi, ndahei eté rumo che supindar aico —ehi.

⁵⁹ Ñepeĩ hora paremi tẽi, ambuae aipo ehi chupe:

—Supi eté rumo co ité supi seci vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoiyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagũer rupi cheu” ihe agũer rese. ⁶² Ahese osẽ, oyasehõ iteanga oso.

Sãrosar mara-mara tẽi Jesús vireco yuvireco

⁶³ Evocoiyase ava Jesús rãrosar iguayĩ tẽi yuvirocua-rocua yuvireco sese.

⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setã mbahe rese oñehe-ñehe tẽi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cõhese, oñemonuha ava judío rerecuar, pahĩ eta rerecuar iyavei opacatu Moisés porocuaita rese oporombohe vahe yuvireco Jesús reraso uca ãgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pëu, ndache reroyai chietera peye —ehi judío rerecuar upe—. ⁶⁸ Inungar che aporanduse mbahe rese pëu, pe avei ndapemboyevĩ chietera cheu viña no. ⁶⁹ Co pipe suive rumo che, Ava Riquehir, agupaira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoiyase ahe aipo ehi yuvireco:

—¡Indó! ¿Ava iri vo evocoiyase mbahe omombehura yandeu? Yasendu niha ñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoiyase opacatu ava opūha yuvireco Jesús reraso āgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihanemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropīsiosar mborerecuar ivate catu vahe aico” ehi oico —ehi yuvireco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboveyi Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaheṛā —ehi

⁵ Ahe ava eta rumo,

—Supi eté opacatu ava oipihanemoñeta mboyeavirati uca opacatu tecua rupindar. Yipindar omboipi Galilea rupi oico. Cūrítei co Judea ve ēgüe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pīha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá ari osepia pota tēi serāca anduse yepi. Evocoiyase oipota ité poromondiisa oyapo vaheṛā oyeovaque viña. ⁹ Sese oporandu ati mbahe rese chupe. Nomboveyi eté rumo Herodes upe. ¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroīrosave oñemoñeta-ñeta tēi sese Herodes rovaque yuvireco. ¹¹ Evocoiyase Herodes osundao eta reseve iñehe mara-mara tēi Jesús upe sese oguayi tēisa pipe yuvireco. Omboyemonde avei turucuar iporañete vahe pipe yuvireco. Ēgüe ehi imboveyi Herodes Pilato upe. ¹² Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbia cohave cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano āgua’ ehi. Sese omboveyiño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepeí soquendapri mose āgua.

¹⁸ Opacatú guasu rumo ava oñehe pīrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei opopichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose āgua. ²¹ Ahe rumo osapucai pīrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndi poi eté niha que mbahe sembiapo yuca água, ainupa uca tẽira rumo. Ipape amoseñora —ehi.

²³⁻²⁴ Ava rehi rumo osapucaí piratá catu yuvireco, “Tayaticasa ité” ehi ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. ²⁵ Ëgüe ehi imose co mbia Barrabás, acoi soquendapri mbahe-mbahe tẽi mopuhasa sui, iporapichisa sui avei ava remimbotar rupi. Ipape omondo Jesús sãrosar upe ava remimbotar apo água sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica águave, ahe mbia upe, “Nde terevosii curusu rese Jesús raquicuei” ehi voiño tẽi yuvireco.

²⁷ Ava rehi yuviraso saquicuei. Cuña avei setá oyaseho oviharẽhisave yuvireco sese. ²⁸ Omahaese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrí rese avei. ²⁹ Esepia, oura arí naporai vahe. Ahese aipo peye tẽira: ‘Aviye catu acoi cuña nímembii vahe iyavei ndoicuai vahe imocambu omembrí’ peye tẽira. ³⁰ Ahese avei ava ivitri uve aipo ehira yuvireco: ‘¡Toviapi ore harivel!’ ehira osiquiyepave. Iyavei ivivate vahe upe: ‘¡Tore mi!’ ehi tẽira yuvireco. ³¹ Esepia, ãgüe ehise ivira yivive vitesese, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco põrai vahe supive yaticapirã yuvireco. ³³ Oyepotase Ava Áca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepeí mbahe rese ipocosa coti, ambuae evocoyase mbahe rese ipocoẽhisa coti. ³⁴ Ahese Jesús aipo ehi: —Che Ru, ndeñero co ava upe sembiapo rai rese. Esepia, ndoicuai co mbahe güembiaipo yuvireco —ehi.

Sundao evocoyase iguayíño Jesús turucuar rese oyeupe imboyahoyahó água yuvireco. ³⁵ Ava rehi osepia yuvireco; mborerecuareta avei seroĩrosave aipo ehi yuvireco chupe:

—Oipisiro ambuae ava, toñepisiro ru ahe ae ité cute Tũpa Rembiporavo Poropisirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco põrai vahe yaticapri ñeñe mara tẽi chupe aipo ehi:

—¡Nde Poropisirosar ereicose, eñepisiro ru nde ae, ore avei ru ore pisiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyemi rutei vo Tũpa sui? Nde avei niha ocañi tẽi vaheřã.

⁴¹ Yande rumo co yande rembiapo sui tẽi mara-mara tẽi yande rereco yuvireco; co mbia rumo mbahe sembiapoẽhi pipe sui tẽi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tẽi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pïtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tûparo asiasa avei mbiter rupi tupri ovo. ⁴⁶ Evocoiyase Jesús oñehe pïrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoiyase Roma iguar sundao rerecur osepiase co mbahe poromondiisa Tûpa mboetisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiãño tēi amombrive co nungar mbahe yuvireco.

Jesús apocata agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecurar ñemonuhasa ivate catu vahe pendar seci. Ahe mbia viroya vahe ité Tûpa ombou vaheã omborerecuasa pipe mbahe moingatu ãgua. Sese ndahei ipihañemoñeta rupi co mborerecurar oyapo vahe mbahe Jesús upe yuvireco. ⁵² Evocoiyase ahe oso Pilato rêtave oporandu ãgua Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoingatu mbahe mbítuhusa ari upe nara, ahe mbítuhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatause yuvireco. ⁵⁶ Oyevise güetave yuvireco omoingatu mbahe śacua vahe tehögüer resendar ipichi ãgua.

24

Jesús ocuera yevi

Ahe cuña opituhu mbítuhusa ari pipe judío porocuita reroyasave yuvireco. ¹ Cōhe ramomise domingu pipe, oyevi yuviraso tuvipave mbahe śacua vahe reseve. ² Oyepotase yuvireco tuvipave, osepia soquendasa ita guasu ndipo irise güendagüerve. ³ Evocoiyase yuviroique voi tuvipa pipe. Ndoyosui rumo yande Yar rehögüer yuvireco. ⁴ Ndoyembovihal tēi; ndoicatu iri. Ahese aviyeteramo tēi osepia ñuvirio mbia iturucuar sendi vahe oipive yuvireco. ⁵ Opañño ñaca iviso ivi coti yuvireco osiquiyepave. Evocoiyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! ⁶ Ndipoi mo cohave; ocuera yevi mo ahe. Peyemomahenduha ñehengagüer ivi Galilea rupi omombehu vahecuer rese, ⁷ “Che, Ava Riquehir, imondopriira ava angaipa viyar povrive, iyavei che aticara curusu rese yuvireco. Mbosapi ari pare rumo acuera yevi” ehi acoi —ehi cuña upe yuvireco.

⁸ Evocoiyase cuña oyemomahenduha voi Jesús ñehengagüer rese yuvireco. ⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si

María iyavei ambuae cuña eta no. ¹¹ Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osē, oña oso tuvipave. Omahaese tuvipa pipe, turucuar güeraño osepia co cotimi tuise. Evocoiyase oyepihamondī tēi ‘¿mara ehi rutei pīha?’ oya oyevi oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuvirasos tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuvirasos opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoiyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. ¹⁸ Ipāhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehuse seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande pīsirora yande amotarēhimbar sui” orohe chupe viña. Cūrītei rumo opa mbosapi ari yucare. ²² Ore pāhu pendar cuña ndore mbovihai eté oyevisu yuvira sui yuvireco. Esepia, yipindar yuvirasose añihiveive tuvipave, ²³ ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrītei” ehi. Ahe evocoiyase yugüeru imombehu ore. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepia eté rumo Jesús yuvireco —ehi Cleofas chupe tupri ité.

²⁵ Evocoiyase aipo ehi ahe ñuvirío mbia upe:

—¡Ndapeicuai eté rumo pe pīha pipe seroya tupri āgua opacatu Tūpa ñehe mombehuse remimombehugüer! ²⁶ ¿Ndapeicuai vo Poropīsīrosar iparaisu rane itera mbahe-mbahe tēi virecosa pipe güecua porañetesave güeique āgua renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehuse cuachiar pipendar oyese ñehe agüer.

²⁸ Oyepotase ahe tecuave yuvirasos, Jesús rumo aviye oguataño vite vaherā senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pītura moco ndeu —ehi yuvireco chupe.

Evocoiyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohī co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cūrīteimi ndoyemboyecua iri sovai chupe. ³² Evocoiyase aipo ehi oyeupe yuvireco:

—Yande mbopihañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

³³ Ipore ndopita pucu iri; oyeveño voi yuviraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Ore avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe viteseve omboyecuapa opo, opí avei chupe, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hägüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe!

³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo arco ité —ehi güemimbohe eta upe.

⁴⁰ Aipo ohe viteseve omboyecuapa opo, opí avei chupe. ⁴¹ Ahe rumo vorivetesapa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru água? —ehi güemimbohe upe.

⁴² Evocoyase omondo pira apiremi oyí vahe yuvireco chupe. ⁴³ Ipore oipisi, ohu opacatu güemimbohe rovaque. ⁴⁴ Ipore aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tüpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ègüe ehi evocoyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropĩsrosar iparaisura omano água. Ipore mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tüpa upe pëu ñeroi água” hesara. ⁴⁸ Pe niha peico opacatu co nungar mbahe repiasar imombehu água.

⁴⁹ Che amboura che Ru remimombehu pe harive. Pepitañora rumo cohave tecua Jerusalén ve acoi peipisise voi pĩratasa iva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime água chupe. ⁵¹ Ipore oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucái imboetisave. Ipore oyevi Jerusalén ve vorivetesapa pipe yuvireco. ⁵³ Iyavei ahe ari yacatu rupi yuviraso tüparo guasu pipe osapucái Tüpa mboetisave yuvireco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secoi. Ahe oicove mbahe apoēhi viteseve Tūpa rese. Esepia, ahe niha Tūpa secoi. ³ Ipípe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar secoi opacatu ava upe. ⁵ Ahe tesapesa omboyecua tecocuere supi eté vahe pītumimbi nungar mbahe naporai vahe aposar pāhuvé. Ahe mbahe tēi aposar rumo ndoicatu eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehusar tēi rumo secoi. ⁹ Co tesapesa supi eté vahe osesape opacatu ava. Ahe ou ité co ivi pīpe.

¹⁰ Yepe tie ipīpe yapopri opacatu ava viña, sembiapo rumo ndoicuai co ivi pīpe secoise yuvireco. ¹¹ Supi eté ouse güecuave, secua pendar ae rumo ndoipisi yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pīpendar rahir nungar que oha vahe ambuae ava remimbotar pīpe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuvé co ivi pīpe oporoaisave mbahe supi eté vahe aposa pīpe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pīpe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaherã che raquicuei, ahe ivate catu vahe che sui. Esepia, yipive ité secoi che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, secoi vahe ité ipiri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipitiviisareta imondo Juan uve ‘¿Ava vo nde? tehi yuvireco chupe’ oyapave icua āgua. ²⁰ Ahe rumo oyemombehu ité aipo ehi:

—Che ndahei eté Poropisrosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaherã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaherã ore mbousar uve! ¿Mbahe ité vo eromombehura ndeyesuindar oreu? —ehi yuvireco chupe.

23 —Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

24 Ahe yuviraso vahe chupe, fariseo remimondo yuvirecoi, 25 oporandu yuvireco chupe:

—Evocoyase ndahei niha aipo nde Poropĩsrosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

26 Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. 27 Ahe co ivi pipe ou vaherã che raquicuei. Che rumo ndahei eté seco catupri vahe aico ipitaquisã yora ãgua —ehi.

28 Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tūpa remimbou Ovesa nungar opacatu ava angaipa repirã

29 Ahere ayihive Juan osepia Jesús oyemboyase oyese aipo ehi: “¡Pesepia, co Tūpa remimbou Ovesa nungar seropovēhepirã opacatu ava angaipa mocañi ãgua! 30 Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. 31 Che rumo yipindar ndaicuai ahe yande remiaro ou vaherã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

32 “Che asepia Espíritu Santo ogüeyise iba sui inungar apicasu, opita tupri iharive” ehi. 33 “Yipindar rumo ndaicuai eté. Tūpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espíritu Santo ogüeyise, opitase mbia harive, ahe mbia oporoãpiramora Espíritu Santo pipe’ ehi. 34 Che niha asepia ité. Sese, ‘Co Tūpa Rahir ité secoi’ ahe pēu” ehi.

Yipindar vahe Jesús remimbohe

35 Ahere ayihive Juan secoi aheve avei ore ñuvirío mbia oroico vahe reseve. 36 Jesús ore cuãse, Juan aipo ehi oreu:

—¡Pesepia, ndo co mbia Tūpa remimbou Ovesa nungar seropovēhepirã! —ehi oreu.

37 Aipo ihe ramoseve, oroguata voi eté supi. 38 Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

39 —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

40 Simón Pedro rivri, Andrés, ahe che ndugüer aheve. 41 Ahe rane aipo oseca viquehir Simón aipo ehi chupe:

—Orosepia ité Poropĩsrosar —ehi (‘Cristo’ oyapave).

42 Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñehe Felipe upe, Natanael upe avei oyeupi iguata ãgua

43 Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

44 “Aviye” ehi Felipe, ahe Pedro iyavei Andrés recua Betsaida pendar secoi.
45 Ipare oso Natanael reca, aipo ehi chupe:

—Orosepia Poropisirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

46 Natanael rumo aipo ehi:

—¿Oime pīha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

47 Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

48 —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higuerravrive erecose —ehi Natanael upe.

49 —Porombohesar, inde niha Tūpa Rahir ereico, Israel iguar rereciar guasu! —ehi Natanael chupe.

50 —¡Che reroya voi eté acoi, “Oroepia iviravrive” che he sui tēi eve! Eresepia rumo co mbahe sui aviye catu vahe —ehi.

51 Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

1 Ipare imombosapisa arí pipe, oime mendasa tecua Caná ve, Galilea ivi rupi. Jesús si avei secoi aheve, 2 iyavei Jesús ore semimbohe oroico vahe reseve ore soho avei yuvireco aheve. 3 Ēgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

4 —Cuña, ¿mahera vo aipo ere cheu? Che remindotar rumo arí ndoyepota vitei cheu —ehi osi upe.

5 Ichí rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

6 Aheve oime seis cambuchi guasu ita cuhi apopri, ñepeí-peí cambuchi pipe oique cincuenta litro, amove oi que setenta litro i ipipe. Ahe judío oiporu pietase oyepoi água yuvireco Tūpa porocuita mboaviye água yepi.

7 Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. 8 Evocoyase aipo ehi ava ihañeco vahe upe:

—Penosemí chíhi, peraso pieta rese hañecosar uve —ehi.

Ēgüe ehi eté yuvireco. 9 Ihañeco vahe pieta rese osáha i oyeapo vahe uva ricuer. Ndoicuai eté que sui osé ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe 10 aipo ehi chupe:

—Opacatu ava omondo úva ricuer aviye catu vahe yipindar. Ipare acoi ava hītaropase yuvireco, omondo ndasepií vahe. Nde rumo ereyapocatupaño aviye catu vahe, ahe cūrítei ramo erenose —ehi.

11 Co yipindar vahe poromondiisa Jesús oyapo vahe aheve. Ipipe omboye-cua güeco piratasa. Sese semimbohe viroya ité yuvireco.

12 Ipare oso tecua Capernaum ve, ichi avei, tivri reseve supive, iyavei ore semimbohe eta oroso supí. Aheve oroico moviro arí tēi.

Jesús omombopa ava mbahe rerecosar tũparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepia tũparo guasu pipe corero ivipi rupi guarepochi rese mbahe mĩmba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tũparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cũritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cũritei? —ehi yuvireco chupe.

¹⁹ Evocoyase,

—Pemondurupa co tũparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tũparo rumo imopuhasa cuarenta y seis araviter rupi, ¿ereicatura pĩha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tũparo rese, güete upe tēi rumo aipo ehi. ²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recouer

²³ Jesús secoi vitese Jerusalén ve Pascua pieta pipe, setá ité ava viroya osepia se poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recouer oicua. ²⁵ Ndipoi eté que ambuae ava pihañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pãhuve secoi vahe. ² Ahe oso Jesús piri pĩtu pipe, aipo ehi chupe:

—Porombohesar, oroicua ité Tũpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoñhise —ehi.

³ Evocoyase,

—Supi eté aipo ahe ndeu: acoi ava ndoyesu piasu iri vahe, ndoiquei chiera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pĩha osi aviterve oi que oyesu iri āgua? —ehi Jesús upe.

⁵ Jesús omboyeve chupe:

—Supi eté aipo ahe ndeu: acoi ava i pipe iyavei Espĩritu pipe ndoyesu vahe, evocoi nungar ndoyuviroiquei chira Tũpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espĩritu pipe oyesu vahe rumo, ahe espĩritu. ⁷ Ereyepihamondi rene, ‘Peyesu piasu irira’ ahes

nde. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ēgüe ehi avei ava oyesu vahe Espiritu pipe —ehi Jesús chupe.

⁹ —¿Mara ehi pīha aipo evocoyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehe tēi niha mbahe co ivi pipendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pēu. ¹⁴ Inungar Moisés osupi ivate mboi rahanga ivi iporupirēhisa rupi aracahe. Ēgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

Tüpa poroaisusa ava upe nara

¹⁶ “Supi eté Tüpa osaisú iteanga opacatu ava. Sese ombou Guahir ñepeí vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nomboui Tüpa Guahir co ivi pipe ava mocañi tēi āgua; ahe rumo ombou ava písiro āgua.

¹⁸ “Ava viroya vahe Tüpa Rahir, ndahei eté ocañi tēi vaherā; acoi ava ndoviroyai vahe rumo, oipisi itera cañisa yuvireco Tüpa Rahir ñepeí vahe reroyaēhisa pipe. ¹⁹ Ēgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pītumimbi vahesave güeco āgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tüpa remimbotar oyapō vahe cua uca āgua opacatu ambuae ava upe —ehi.

Juan Oporoāpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo. ²³ Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua. ²⁴ Co rumo mbahe yaposa Juan roquendaēhi viteseve.

²⁵ Evocoyase Juan remimbohe omboipi ambuae omu judío rese oyeecopicoi vaherā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūritei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatuí mbahe apo Tüpa nombouise chupe. ²⁸ Pesendu tupri ité che ñehe cuese: “Che ndahei Poropisirosar aico, che rumo senonde imbouprí tēi aico” ahesé pēu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohā, oyemboviharete sese. Ēgüe ehi avei che cūritei, ayemboviharete Jesús rese. ³⁰ Ahe niha secó ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoí eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

4*Jesús oñehe Samaria pendar cuña upe*

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui ² (ndahei eté rumo Jesús oporoãpiramo; semimbohe tēi rumo ěgüe ehi yuvireco). ³⁻⁴ Jesús oicuaase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oí. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheveve cuña, Samaria pendar, oyepota iguave i renose. Aheve Jesús aipo ehi chupe:

—Emboumi chíhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoiyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoiyase ereporandura sese chupe. Ahe evocoiyase omondora i ndopai vahe ndeu viña —ehi cuña upe.

¹¹ —Ndererecoi rumo i renose água. Esepia, co igua ipicucú ité. ¿Que sui vo aipo evocoiyase eremboura i ndopai vahe cheu viña? —ehi cuña chupe —. ¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pīha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe —.

¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriñhi água, tanose iri eme i cohove sui —ehi.

¹⁶ —Eso rane nde mer reca, seseve peyu cohove —ehi cuña upe.

¹⁷ —Ndererecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūrítei erereco vahe nde resendar tēi. Supi eté aipo ere: “Ndererecoi che mer” ere cheu —ehi cuña upe.

19 —Nde ava aviye moco Tūpa ñehe mombehusar ereico cheu —ehi—. 20 Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

21 —Che reroya eve cuña, virovi ari pēu peso iriēhi āgua Tūpa mboetei co ivitri rese iyavei Jerusalén ve. 22 Pe Samaria pendar peico vahe pambotei tēi pe rembiguaēhi. Ore rumo oroicua oromboetei vahe. Esepia, ñepisirosa ou judío sui. 23 Oyepota rumo ari cute, ahe ité co cūrtei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, “Ēgüe tehi che mboetei yuvireco” ehi. 24 Esepia, Tūpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

25 Cuña evocoyase aipo ehi chupe:

—Che aicua Poropisrosar yu āgua (ahe ‘Cristo’). Acoi ahe ouse, omombehu tupri opacatu mbahe yandeu —ehi cuña chupe.

26 —Che niha ahe aico añehe vahe ndeu —ehi cuña upe.

27 Aheseve semimbohe eta oyevi yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe.

28 Ahese cuña oseya tupriño ocambuchi, oso güecuave aipo ehi ava eta upe:

29 —Perio, tapesepia pe ava ombehupa tupri vahe che recocer cheu. ¿Ndahei pīha ahe Poropisrosar? —ehi omu eta upe.

30 Evocoyase ava rehi yuvinose tecua sui, yuvirasos Jesús recosave sepia.

31 Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

32 —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

33 Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

34 Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. 35 Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opīha omoingatu yuvireco, ahe inungar mbahe miti ha yaviye vahe. 36 Acoi oporaviqui vahe Tūpa upe ava hā pisi āgua rese, ahe oipisira sepi yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco. 37 Supi eté co ñehesa aipo ehi vahe: ‘Ñepe eté omaheti vahe; imonuhar rumo ambuae ité’ ehi. 38 Che opocui ava hā pisi āgua ambuae ava poraviquisave; yipindar rumo ambuae oporaviqui ité yuvireco sese. Pe evocoyase peique iporaviqui agüer rupi —ehi güemimbohe eta upe.

39 Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. 40 Evocoyase ava rehi Samaria pendar yuvirasos chupe ‘epitami ore piri’ oya. Evocoyase opita ipiri ñuvirio ari rupi. 41 Setá catu iri ava viroya yuvireco iñehe ité renduse. 42 Evocoyase ava eta aipo ehi cuña upe yuvireco:

—Cūrtei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, oroicua avei ahe supi eté opacatu ava pisrosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osë ivi Samaria sui, osoño ivi Galilea ve. ⁴⁴ Ahe ae ité aipo ehi: “Tüpa ñehe mombehusar ndasaisusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüeram che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteñhiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombri seco vitease, yuvinoña voi sovaichi sembiguai imombehu:

—iNde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ñgua ivi Judea sui oyevise Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tēi Tüpa rembiguai ogüeyi ahe ivicuarve i momi ñgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ñgua? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epüha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ñgüe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii āgua
—ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu
—ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi āgua.
Esepia, Jesús aviyeteramo tēi ndoyecua iri ava rehii pāhuve. ¹⁴ Coiye rumo
Jesús osepia iri tūparove ahe mbia, aipo ehi chupe:

—Ereicua co nde cuerasa cūritei, aní ereyemboangaipa iri mbahe tēi catu
reime iri āgua ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che
mbogüera’ oya. ¹⁶ Sese judío osaquicue moña iyavei oyuca pota yuvireco
mbituhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei
—ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño
nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu
tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir
ndoicatui eté mbahe apo oyesui tēi, Vu rembiapo mbahe oicua; aheño tupri
avei oyapo yepi. ²⁰ Esepia, Tu Guahir raisupave omboyecua opacatu mbahe
güembiaipo chupe iyavei omboyecuaño vite itera mbahe poromondisa tu-
vicha catu vahe sembiaporā, ‘¡Mara ehi rutei col!’ pehe tēi āgua chupe.

²¹ Esepia, che Ru ombogüerayevi omano vahe iyavei omondo tecovesa chupe.
Ēgüe ehi avei Tahir omondo tecovesa ava upe güemimbotar rupi. ²² Iyavei Tu
nomondo iri ava upe sembiapo repri. Esepia, ombou Guahir upe opacatu
piratasa ava upe sembiapo repri mondo āgua. ²³ Ēgüe ehi Guahir upe opacatu
ava imboetei āgua yuvireco inungar Tu imboeteipri. Acoi ava Tahir nom-
boetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe
avei che mbousar, ahe virecora tecovesa apirēhi vahe; ndahei chietera
imocañipri. Esepia, osē manosa sui oipisi tecovesa. ²⁵ Supi eté aicua uca pēu:
oura ari imombeupri, cūritei eté co ari oyepota, ava eta omano vahecuer
osendura Tūpa Rahir ñehe. Acoi osendu vahe, oicoveño itera. ²⁶ Esepia, Tu
vireco tecovesa oyes. Ēgüe ehi avei Guahir upe imondo tecovesa rereco
āgua. ²⁷ Ombou avei imborerecuasa āgua chupe ava recocuer rese iporandu
āgua. Esepia, ahe Ava Riquehir secui. ²⁸ Peyepihamondii rene aipo che hesa
sui. Esepia, oyepotara ari imombeupri, ahese opacatu ava omano vahecuer
osendura iñehe. ²⁹ Ahese yuvinosera vuvipa sui. Oyapo vahe mbahe tupri,
ocuerayevira yuvireco tecovesa apirēhi rereco āgua; acoi oyapo vahe rumo
mbahe naporai vahe, ocuerayevira yuvireco Tūpa ñemoirosa pisi āgua” ehi
Jesús judío rerecuar upe.

Jesús omboyecua tupri omborerecuasa

³⁰ “Che ndaicaicui mbahe apo cheyesui tēi. Che, ‘Pe peyavi vahe mbahe,
peipisira che Ru ñemoirosa’ ahe ava ndaseco pōrai vahe upe che cuaita
rupi iyavei che amombehu vahe supi tupri ité. Esepia, che ndaipotai che
remimbotar tēi mbahe apo āgua. Che Ru, che mbousar remimbotar rumo

ayapo. ³¹ Que cheyese ae tēi añehese, ahese ndache reroyai chira peye viña. ³² Oime rumo ambuae che mombehusar. Ahe supi eté che mombehu pe seroya āgua; ahe Juan. ³³ Pe niha, pemondo ava chupe imboporandu mbahe rese. Ahe semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pēu. ³⁵ Juan niha inungar tataendi, ēgūe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirēhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che seroya āgua peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa. ⁴⁵ Ndapepihañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu āgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoiyase ndapeicatui chietera che remimombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoiyase oyeupi ivitri rese. Aheve oguapi opacatu güemimbohe eta reseve yuvinoi. ⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoiyase Felipe omboyevi chupe:

—Dosciento denario pan ndosupitii chietera que chñhi-chñhimi ava retacuer viña —ehi.

⁸ Aipo hese, ñepe semimbohe pāhu pendar, Simón Pedro rivri, Andrés aipo ehi chupe:

⁹ —Co chñhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. ¹¹ Evocoyase oipisi cinco vahe pan, “Aviye ndeu” ohe pare Vu Tūpa upe, opa ombohimbóhi imondo ava rehii upe. Ēgüe ehi avei pira upe, imondopa semimbotar rupi-rupi yuvireco. ¹² Opase ava ihitaro,

—Pemonuhapa sumbirer iyemombucaēhi āgua —ehi güemimbohe upe.

¹³ Evocoyase omonuha doce iruova sumbirer yuvireco pan cincomi vahe sui. ¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tūpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuae ava opiratasa pipe tēi güeraso pota āgua mborerecuar guasu vireco āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

Jesús oguata i hari rupi

¹⁶ Pitu ramose ogüeyi yuviraso Jesús remimbohe ipave, ¹⁷ yuviroha carite pipe sasa āgua yuvireco tecua Capernaum ve yuviraso. Ahese pitu ité. Jesús rumo ndoyevi vitei eté. ¹⁸ Ahese oipeyu pīrata ivitu, i avei ohitu pīrata. ¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepi vahe carite pipe. Jesús rumo ndosoi eté güemimbohe rupi” ehi tēi yuvireco. ²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehii oicuae Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

Jesús, pan nungar, tecovesa apirēhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi, ndahei co che poromondiisa reroyasave ité peico pota che rupi.

²⁷ Pepraviqui eme catu tembihu ndasceseí vahe rese; iyacatu rumo pepraviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaheñā nde reroya tupri catu āgua? ³¹ Esepia, aracahe ore ramoí eta yuvirohu ivi

iporupirēhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūrítei che Ru ombou pēu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pīpendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo āgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiveira.

³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui.

³⁸ Esepia, ndayui iva sui mbahe che remimbotar apo āgua tēi; ayu rumo che mbousar porocuita apo āgua. ³⁹ Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipotai avei opacatu ava oyeroya vaheñā che, Tūpa Rahir; che recosa rese. Ipípe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che roerōrosa sui. ⁴⁴ Ndipoi chietera que oicatu vahe ou cheu, nomonguerēhise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohē vahe avei sese, evocoi nungar yugüerura cheu.

⁴⁶ “Ndipoi eté que ñepeí ava osepia vahe che Ru; acoi ichui ou vaheño ité, ahe güeraño tupri ité osepia. ⁴⁷ Supi eté aipo ahe pēu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa.

⁴⁹ Aracahe pe ramoí eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco. ⁵⁰ Che rumo añehe pan iva sui ogüeyi vahe rese, acoi ava ohu vahe, nomanoi chietera.

⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirēhi vaheñā ité. Co pan amondo vaheñā, ahe che rete ité. Ahe amondora ava recocer rese” ehi judío eta upe.

⁵² Aipo hese, judío rerecuar oyecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pēu: ndapehise Ava Riquehir rete, ndapehise avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüerayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secói che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ēgüe ehi aveira che husar che sui yuvirecovera. ⁵⁸ Añehe pan iva sui ogüeyi

vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirēhi vaheṛā ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya āgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pīha che repiase peye che, Ava Riquehir, ayeupise che reco agüerve vicho viña? ⁶³ Espiritu ité niha omondo tecovesa; yande retecuer rumo ēgüe ehi tēi vahe. Co amombehu vahe pēu ahe espíritu iyavei tecovesa. ⁶⁴ Oime vite rumo amove pe pāhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pēu: “Ndipoi chietera que ava ou vaheṛā cheu che Ru nomonguerēhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyeví chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepeí rumo pe pāhu pendar carguar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotarēhimbar upe.

7

Jesús ndoviroyai tivri yuvireco

¹ Ipape Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo āgua yuvireco, ahesē tivri aipo ehi yuvireco chupe:

—Erepita eme cohava. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaēhisave tēi avei tivri aipo ehi yuvireco chupe. ⁶ Evocoyase vivri upe aipo ehi:

—Ndehi vitei rumo ari che so āgua. Pe guata āgua rumo opacatu ariño tēi aviye. ⁷ Esepia, pe ndape amotarēhi eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupití vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe. ¹¹ Judío eta osea tēi yuvireco pietasave aipo ehi:

—¿Que pīha acoi mbia? —ehi tēi yuvireco.

¹² Ava rehii pāhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oi que ava pāhuve tūparo pipe ava mbohe. ¹⁵ Judío eta rerecuar evocoyase,

—¡Too, mara ehi rute! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepe pe pāhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité.

¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pēu. Que ñepe pe pāhu pendar rumo ndipoi eté omboyeroya vahe. ¿Mahera ru che yuca pota peye?” ehi.

²⁰ —¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chihivahe mbocircuncida āgua mbituhusa ari pipe tupri pēu, peyapoño rane ité mborocuita mboaviye āgua. ¿Mahera ru cheuño pemboasi ñepe mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñehe güecocuer Tūpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co osea tēi yuca āgua yuvireco? —ehi—. ²⁶ Ahe ité co niha co ava pāhuve oñehe oico, ndipoi eté que mara ehi vahe yuvireco chupe. ¿Omoha pīha mborerecuar co mbia Poropisirosar seco āgua yuvireco?

²⁷ Yande rumo yaicua que sui turi. Acoi ouse rumo Poropisirosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe viteseve tūparove, oñehe pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheul Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda ãgua viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropisirosar, ¿oyapo catura pîha mbahe poromondiisa co mbia sui? —ehi yuvireco.

Fariseo oyocuai sundao tûparo rãrosareta Jesús pisi ãgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tûparo rãrosar Jesús pisi ãgua yuvireco.

³³ Jesús rumo aipo ehi:

—Aicove vitemira pe rese chîhi rupive. Ipape voi ayevira che mbousar piri vicho —ehi—. ³⁴ Che reca tẽira peye, ndapeicatu chietera rumo che reca. Esepia, ndapeicatu chiaveira peso vaherã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pîha aipo osora yande sui seca iriẽhi ãgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe ãgua? ³⁶ ¿Mara oya pîha evocoyase aipo, ‘Che reca tẽira peye, ndapeicatu chietera rumo che reca. Esepia, ndapeicatu chiaveira peso vaherã che recosave’ ehi yandeu? —ehi-ehi tẽi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. ³⁸ Esepia, inungar aipo ehi vahe icuachiapri pipe, che reroiyasar pîha sui osẽra iai ndopai vahe nungar —ehi.

³⁹ ‘Che reroiyasar oipisira Espiritu curi’ ohesave aipo ehi. Espiritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tûpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropisirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropisirosar viña? —ehi—.

⁴² Icuachiapri pipe rumo aipo ehi Poropisirosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tẽi.

⁴⁴ Amove ava viraso pota tẽi yuvireco soquenda; ndipoi eté rumo ãgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tûparo rãrosar oyevi yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tûparo rãrosar evocoyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii

tēi ēgūe ehi yuvireco. Ahe rumo ndoicuai vahe Tūpa porocuita yuvireco, sese iñemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoyase Nicodemo, acoi oso vahe pītu pipe Jesús piri, ahe avei eté fariseo pāhuve secoi, ahe aipo ehi:

⁵¹—Yandeundar porocuita mboaviye āgua ndiyai, “Ereyavi mbahe” yahe voñño tēi que ava mbahe sembiapocuaēhi vitesese —ehi.

⁵² Evocoyase omboyevi yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepei ou vahe Galilea sui Tūpa ñehe mombehusar —ehi mborerecuaretā Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepei-peí güēta rupi.

8

¹ Jesús rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoyase oguapí oí oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehí rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepei ava. ⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuachía ocuā pipe ivi rese. ⁷ Evocoyase oporandu vitesese ava yuvireco, opūha aipo ehi:

—Que ñepei pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaivi iri, ombahecuachía ivi rese. ⁹ Osenduse rumo judío rerecuareta, omboipi ñepei-peí yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco.

¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi āgua? —ehi

¹¹—Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴—Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri āgua, ahe supi tupri

vahe ité. Esepia, ndahei che ae tēi ēgüe ahe, che Ru, che mbousar rumo secoi che rese. ¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tūparo pipe, guarepochi monuhapri riru ipive oporombohe ohā. Ndipoi eté rumo ahese osoquenda vaherā. Esepia, ndoyepota vitei eté ahese ihari chupe.

Jesús, “Che sosave pe ndapeicatuí chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemanu pe angaipa reseve. Che sosave ndapeicatuí chietera peso vaherā —ehi.

²² Aipo ihese, judío eta aipo ehi yuvireco:

—¿Oyeyucara pñha ahe ae; ayeve pñha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañoira —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setá iteanga areco che ñehe āgua pēu mbahe pe rembiaví rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe:

—Pesupise rumo Ava Riquehír ivira rese, ahese voi peicuara che recocuer, ahese avei peicuara cheyesei tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahír ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. ³⁵ Mbiguai tēi ndahei

güerecuar rēta pipe nara ité; tahir rumo opitaño itera güēta pipe nara. ³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu — ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tüpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tüpa! —ehiño yuvireco.

⁴² Evocoyase aipo ehi co judío eta upe:

—Tüpa ité pe yesupase rumo, che raisura peye viña. Esepia, che ayu Tüpa sui. Sese cūrítei cohava aico. Ndahei cheyesu tēi ayu, Tüpa rumo che mbou.

⁴³ ¡Mahera pīha ndapesenducua catui eté mbahe che remimombehu? Esepia, ndapeyapísaca potai eté che ñehe rese. ⁴⁴ Peyesupa niha Carugar ité, sese niha pe ahe tupri avei peico. Peyapo pota mbahe semimbotar tēi. Esepia, Carugar yipisuive ité oporoyuca serai vahe. Ndoypoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye.

⁴⁶ ¡Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tüpa suindar, ahe osendu pota rai iñehe; pe rumo ndahei eté Tüpa suindar peico. Sese ndapesendu potai eté iñehe —ehi Jesús judío eta upe.

Poropisirosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

⁴⁹ —Che ndarecoi eté carugar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepeí oipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyevi yuvireco chupe aipo ehi:

—Cūrítei oroicua ité cute nde ererecose carugar ndeyese. Esepia, Abraham iyavei opacatu Tüpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoí Abraham sui? Esepia, ahe omano ité iyavei ambuae Tüpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tüpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua.

Sese niha amboyeroya iñehe. ⁵⁶ Esepia, pe ramoi Abraham oyembovîha ‘asepiara ihari oyepotase’ oya cheu. Osepia ité niha. Sese ovîharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi vîteise cincuenta araviter? —ehiño yuvîreco chupe.

⁵⁸ —Supi eté aipo ahe pëu: che aicove vahe Abraham yesuêhi vîteseve —ehi.

⁵⁹ Aipo ihese, oipisipa ita yuvîreco yapi âgua. Ahe rumo ahe ramoseve oñemi ava eta pâhuve, osêño ité oso tûparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe.

² Ore semimbohe oroico vahe, oroporandu chupe:

—Ore mbohesar, ¿mahera pîha co mbia ndasesapisoi eté oha? ¿Oyesupa angaipa sui pîha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo êgüe ehi Tûpa mbahe sese mboyecua âgua. ⁴ Sese oime vîtese ari yandeu che mbousar poravîquisa apo âgua, iya ité ahe yayapo. Esepia, pîtura, ahese ndayaicatui chietera mbahe apo. ⁵ Co ivi pipe che recove vîtese rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité.

⁸ Evocoyase sêta ivîrindar iyavei ava oicua vahe sesapisoêhise oporanduse guarepochi rese aipo ehi yuvîreco:

—¿Ndahei vo acoi co oguapi oî guarepochi rese oporandu yepi? —ehi yuvîreco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvîreco:

—Ndahei ahe. Avîye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvîreco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvîreco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvîreco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera âgua. Sese viraso ndasesapisoi vahecuer fariseo eta rovai yuvîreco. ¹⁵ Fariseo oporandu iri yuvîreco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pıpe omoaqui vahe che resa rese. Ichui ayovai. İpare voi asareco —ehi.

¹⁶ Evocoiyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbıtuhusa ari —ehi yuvireco.

Ambuae evocoiyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapısoi vahecuer upe yuvireco aipo ehi:

—Nde no, ¿mara ehi nde pıhañemoñeta co mbia rese? —ehi.

Ahe evocoiyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndovıroyai eté icuerasa yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahır ité vo co? ¿Ndasesapısoi oha? ¿Mara ehi vo co cūrıteı osareco no? —ehi iyesupa upe yuvireco.

²⁰ —Ore rahır ité niha co, ndasesapısoi oha. ²¹ ¿Mara ehi vo catu co cūrıteı osareco? iyaveı ¿ava vo catu ombogüera? ¡Ndoroıcuai eté! Peporandu chupe. Ocuacia niha; ahe ae oıcuca uca pēu —ehiño iyesupa yuvireco fariseo upe.

²² Iyesupa rumo osıquıyepave tēi aipo ehiño yuvireco. Esepia, fariseo opa ité oyemoıngatu yuvireco ava “Jesús Poropısirosar secoı” ehi vahe oñemonuhasa sui ñepeı reseve imombo āgua. ²³ Sese niha iyesupa aipo ehiño yuvireco: “Peporandu chupe. Ocuacia niha” ehiño.

²⁴ Evocoiyase fariseo güeru uca iri acoi mbia imbogüeraprı yuvireco, aipo ehi yuvireco chupe:

—Emombehuño oreu Tüpa rovaque mbahe supı tuprı vahe. Esepia, ore oroıcuca ité evocoi mbia angaipa viyar seco rese —ehi.

²⁵ Ahe evocoiyase omboıyevı chupe:

—Che ndacıcuai eté angaipa viyar tie revo. Co güeraño catu che aıcuca: che ndacheresapısoi vahecuer aıco; cūrıteı rumo asareco —ehi.

²⁶ Evocoiyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pēu. Pe rumo ndache reroyai eté peıye. ¿Mahera vo peıpota amombehu vıte vaherā pēu? ¿Pe aveı tie peguata pota supı? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupındar tēi ereıco. Ore rumo yande ramoı aracahendar Moısés rupı oroguata vahe. ²⁹ Esepia, oroıcuca ité Tüpa oñehese Moısés upe. Aipo mbia rumo ndoroıcuai eté que sui osē —ehi yuvireco chupe.

³⁰ —¿Mara peıye ruteı pe ndapeıcuai que suındar ahe! Che rumo che mbosareco. ³¹ Supı eté, yaıcuca Tüpa ndosendıı eté ava angaipa viyar ñehe; ava omboteısar iyaveı vıroyasar ñehe güeraño ité niha osendu. ³² Esepia, ndıpoi eté que avaño tēi ava oıyesu sui ndasesapısoi vahe ombogüera vahe.

³³ Ahe rumo ndaheıse Tüpa suındar ou vahe viña, ndoıcatuı chıetera revo mbahe apo viña —ehi fariseo eta upe.

³⁴ Evocoiyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

İpare omose ñepeı reseve oñemonuhasa sui yuvireco.

Jesús reroyasarēhi ndasesapiso vahe nungar tēi

³⁵ Jesús oicua ndasesapiso vahecuer mombosa. Vupitise aipo ehi chupe:
—¿Ereyeroya nde Ava Riquehir rese? —ehi.

³⁶ Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapiso vahecuer upe.

³⁸ Evocoyase mbia oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo ãgua; ava ndasesapiso vahe nungar upe mbahe supi eté vahe che Ru suindar mboyecua ãgua iyavei ava oicua tēi vahe mbahe Tūpa suindar mboesapisoēhi iri ãgua —ehi.

⁴⁰ Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapiso vahe nungar oroico? —ehi.

⁴¹ Evocoyase omboyevi ahe fariseo upe:

—Peicose ndasesapiso vahe nungar viña, “Peyavi mbahe” ndehi chietera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesús fariseo eta upe.

10*Jesús ovesa rãrosar nungar*

¹ “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sãrosar ité seci. ³ Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose ãgua sēta sui. Ahe evocoyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco. ⁵ Ndoguatai eté rumo oyarēhi rupi yuvireco; yuvinoñaño ichui. Esepia, ndoicuai eté iñehe” ehi ⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipisipirã yuvirecoi. Iyavei inungar acoi ovesa oique vahe güeta pipe, ichui osē capihí reca ãgua igua yepi, egüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco ava tecovesa ndopai vaherã ité yuvireco’ viya. ¹¹ Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã; ¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseypaña güemiario, oña oso. Esepia niha, ovesa ndahei eté seimba, ndahei avei eté ahe sãrosar ité seci. Evocoyase mahembiar oñaro ai vahe omondi-mondi eté ipisi ãgua. ¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiario ovesa.

14-15 “Che rumo ava rãrosar aviye vahe ité aico; che Ru che cua ité. Che evoicoiyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. 16 Areco avei ambuae ité che reimba ovesa. Ahe avei aru pota che mboyeroya vaheřã yuvireco. Aheše ñepeí reseve guasu che remiario yuvirecoira.

17 “Che Ru niha che raisu ité. Esepia, amondo itera che recocuer manosave. Ipare rumo acuerayevira. 18 Ndoicatui chira ava ahe ae tēi che yuca āgua; che teieté rumo amondora che récocuer che remimbotar rupi eté. Che areco ité pĩratasa imondo āgua, che cuerayeví iri āgua avei. Sese ité niha che Ru che cuai” ehi güemimbohe eta upe.

19 Osenduse judío eta aipo nungar ñehesa, opa ipihañemoñeta yoavirati yuvireco. 20 Setã iteanga ipãhu pendar aipo ehi:

—¿Mahera vo co mboyeroya? Vireco ité carugar oyese, ndayaracuai eté —ehi yuvireco chupe.

21 Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

22 Ari sōhisa vahe pipe tecua Jerusalén ve tũparo rovasagüer pieta oyepota.

23 Aheše Jesús oguata oico tũparo Salomón oyapo vahecuer rocupe ivíi rupi. 24 Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsirosar nde recosa oreu? Emombehu tupri catu ñepeí reseve oreu —ehi yuvireco chupe.

25 —Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa; 26 pe rumo ndache reroyai eté peye. Esepia, pe ndahei eté che remiario ovesa peico. 27 Che remiario ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. 28 Amondo avei tecovesa apirēhi yuvireco chupe icañiñhi āgua; ndipoi chietera que ava virocua iri vaheřã che sui. 29 Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepeí ava oicatu vahe serocua che Ru sui. 30 Che Ru iyavei che oroico ñepeíño ité —ehi judío rerecuareta upe.

31 Aipo ihese, judío rerecuareta osupipa iri ita yuvireco yapi āgua. 32 Ahe chupe rumo aipo ehi:

—Setã mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

33 Judío rerecuareta omboyeví yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ěgüe orohera ndeu. Esepia, nde ereñehe rai tēi Tũpa rese. Nde moco ava tēi ereico. Nde rumo ereyeapo Tũpa ndeyeupe ae —ehi yuvireco chupe.

34 Evocoyase aipo ehi ahe ava upe:

—Pēundar mborocuaíta icuachiapri pipe niha aipo ehi: ‘Che aipo ahe pēu: pe tũpa pãve ité peico’ ehi. 35 Yaicua niha icuachiapri pipendar ndiyai yayamotarēhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pĩsaris upe. 36 Che niha che Ru Rembiporavo aico. Ahe che mbou co iví pipe. ¿Mahera ru evocoyase, ‘Nde ereñehe rai tēi Tũpa rese’ peye cheu,

‘Che Tūpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepeï reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyeveï iai Jordán rovai. Aheve acoi Juan yipindar oporoāpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoï mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús vïroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoï aheve. ² Ahe María, oipiyere vahe mbahe siacua vahe yande Yar pi rese. Ipare oiçuti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaheasisa rumo ndahei ahe imano āgua ité. Ēgüe ehi rumo Tūpa reco porañetesa mboyecua āgua iyavei Tahir reco porañetesa mboyecua āgua avei —ehi.

⁵ Yepe osaisú iteanga Marta icupihir reseve iyavei iquivrï Lázaro viña, ⁶ oyanduse rumo Lázaro mbaheasisa, opita viteño ité ñuvirio ari güecosave.

⁷ Ipare omombehu ore supi oroico vahe upe:

—Yavevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co ereso pota iri aheve? —orohe chupe.

⁹ Oreu rumo aipo ehi:

—Ñepeï ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pïtu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ēgüe ehise ité aviye catura pēu pe che reroya āgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaheerā supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tïre” ehi vahe. ¹⁹ Setá judío yuviraso Marta iyavei María piri iquivrï mano

agüer sui imboviha ägua. ²⁰ Oicuae Marta Jesús yepota seni, oso voi eté sapeve; María rumo opitaño oi pipe. ²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña.

²² Che rumo aicua Tüpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo. ²⁶ Acoi che reroya vahe gücoveseve, nomanoi chietera. ¿Eroya aipo che hesa? —ehi Marta upe.

²⁷ —Oroviroya ité, che Yar. Nde niha Poropisrosar ereico Tüpa Rahir, ore remiaro ereyu vahehä co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoepiasave viteño ité secoi. ³¹ Osepiase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyeptase chupe, oñenopiha sovai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharēhisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatu chira piha Lázaro manoēhi ägua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave oviharēhisa pipe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tüpa pīratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

44 Omano vahe evocoiyase osē voi opacatu turucuar omamasa reseve. Jesús evocoiyase aipo ehi ava upe:
—Peyorapa imamasa ichui, toguata —ehi.

Judío rerecuareta oyemomborandu Jesús pisi āgua yuvireco

45 Osepiase co poromondiisa, judío eta yuviraso vahe María rupi setá ité Jesús viroya yuvireco. 46 Ipāhu pendar rumo moviro yuviraso voi ava fariseo rerecuareta uve sembiapo mombehu āgua. 47 Evocoiyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. 48 Ndayayapoise mbahe chupe, opacatu tiēte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tūparo mondurupa iyavei omocañi tēi uca aveira yande recua yande sui —ehi oyeupe yuvireco.

49 Ñepeí rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, 50 ndapesenducuai avei co tecocuer; aviye catura ñepeí mbia omanose yande recocuer rese, ndahei que opacatu yande mocañi tēi āgua —ehi omboetasa eta upe.

51 Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. 52 Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepeí reseve imonuha āgua. 53 Ēgüe ehi ahe ari pipeve judío eta rerecuar oyemoingatupa voi yuca āgua yuvireco.

54 Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

55 Virovise judío Pascua pieta apo āgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei āgua renondeve. 56 Oseca tēi Jesús yuvireco. Ipare tūparove yuviroiquese, oporandu-randu oyeupe yuvireco:

—¿Mara peye pe, oura pñha pieta repia, aní chira tie? —ehi-ehi oyeupe yuvireco.

57 Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

12

Ñepeí cuña omondo Jesús rese mbahe siacua vahe

1 Seis ari ipane vitese Pascua pieta āgua, Jesús oso tecua Betania ve, aheve acoi Lázaro ombogüerayevi. 2 Eipeve ocaru yuvireco Jesús mboeteisave. Marta ihañeco sese; Lázaro evocoiyase ocaru yuvinoi mesave ipiri. 3 Evocoiyase María güeru medio litro mbahe siacua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Siacua iteanga evocoiyase opacatu oi pipe. 4 Evocoiyase ore mboetasa Judas Iscariote, ahe acoi omondo vaheñā avā yamotarēhimbar uve, aipo ehi:

5 —¿Mahera vo ndimondosai co mbahe siacua vahe tresciento denario rupi ava iparaisu vahe pñtivii āgua? —ehi.

6 Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporugā tēi.

7 Evocoiyase Jesús aipo ehi:

—Toyapoño cheu. Esepia, ahe che mano āgua renonde ēgüe ehi cheu. ⁸Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

Pahi rerecuar oyamotarēhi Lázaro yuvireco

⁹Setá iteanga ava judío oyandu yuvireco Jesús rerācua Betania ve secoise. Sese yuviraso aheve; ndahei Jesús repia güeraño yuviraso, ēgüe ehi rumo imbogüerayevipri Lázaro repia avei. ¹⁰Evocoyase pahi rerecuar, “Yayuca avei Lázaro” ehi yuvireco oyeupe. ¹¹Esepia, ahe ichui tēi niha setá iteanga judío oyepepi pahi rerecuar sui Jesús reroya āgua yuvireco.

Jesús oique Jerusalén pipe

¹²Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota āgua ahe tecuave yuvireco. ¹³Ahese oyasia pindo yuvireco. Oyacatu viraso Jesús rovaichi āgua, osapucai yuvireco chupe: —¡Imboeteipri, sovasapri secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

¹⁴Yipindar rumo opa Jesús oseca uca guaricumí. Ipare oyeupi sese icuachiapri arachendar rupi tupri ité aipo ehi vahe:

¹⁵“Pesiquirei rene, Sión pendar; pesepia, pe rerecuar guasu guaricumí hārive ou pēu” ehi.

¹⁶Yipindar, ore semimbohe eta, ndorosenducuai eté co arachendar imombehupri. Ipare rumo oyeveise güecosa porañetesave, ahese oremahenduha arachendar sesendar icuachiapri rese, “Supi eté omombehu” orohe tēi sepiase.

¹⁷Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸Sese ava eta yuvinoso voi sovaichi ipisi āgua. Esepia, oicua ité ahe mbahe promondiisa guasu yapose yuvireco. ¹⁹Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cūrítei yuvireco supi! —ehi yuvireco.

Oime griego oseca vahe Jesús yuvireco

²⁰Griego oime ava rehii pāhuve yuviraso vahe pieta repia Tūpa mboetei āgua tecua Jerusalén ve. ²¹Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²²Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³Evocoyase chupe aipo ehi:

—Oyepota ari cheundar che, Ava Riquehir, che yevi iri āgua che recua porañetesave. ²⁴Supi eté aipo ahe pēu: inungar acoi trigo rāhii nañotísaise, ahese ndihai chietera; ñotise rumo, ahese iha vaira. ²⁵Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi. ²⁶Acoi ava che mboyeroya pota vahe, toguata che rupi yuvireco. Esepia, acoi che mboyeroyas yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe seroco —ehi chupe.

Jesús omombehu omano āgua

²⁷“¡Cūrítei ayandu ité mbahe-mbahe tēi oime vaheerā cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsiro eve cūrítei cheu oime vaheerā

mbahe tēi sui' ahera viña? ¡Che rumo aicua evocoi nungarā ité ayu! ²⁸ Che Ru, emboyecua nde pīratasa nde rer porañetesa mboetei āgua” ehi oyerogui.

Ichui oyeendu i va sui ñehesa aipo ehi vahe: “Ēgüe ahe niha amboyecua che pīratasa vichico, Ēgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava, —Tūpa rembiguai revo oñehe Jesús upe —ehi yuvireco.

³⁰ Evocoiyase aipo ehi ava eta upe:

—Ndahei cheundar ñehesa pesendu, ahe rumo pēundar. ³¹ Cūrítei oimera ñemoirosa co ivi pīpendar ndache reroyai vahe upe, cūrítei avei imombosara Carugar co ivi pīpendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pīpe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuaita icuachiapri pīpe aipo ehi vahe: “Poropisīrosar apirēhi vaherā ité” ehi. ¿Mahera ru aipo nde: “Ava Riquehīr osupira ivate yuvireco” ere no? ¿Uma ru aipo Ava Riquehīr, ambuae tie? —ehi ava eta yuvireco chupe.

³⁵ Evocoiyase aipo ehi ava upe:

—Pe pereco vitemira chíhi rupive tesapesa pe pāhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi oguata vahe pītumimbisa rupi, ndoicuai que güecosa. ³⁶ Peroya co tesapesa cūrítei pereco viteseve, ipipe ité pe reco āgua —ehi.

Aipo ohe pare, Jesús osē ava rehī pāhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboavīyesa rane itera Tūpa ñehe mombehusar Isaías rembicuachiagüer aipo ehi vahe: “Che Yar, ava ndoviroyai yande ñehe yuvireco iyavei ndoviroyai nde pīratasa eremboyecuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tūpa nombosapisoi ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera āgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoiyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya.

⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitese ava rehī upe, oñehe pīrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pīpe ava che reroyasar pītumimbisave yuvirecoiēhi āgua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pīpendar

mocañi ãgua, che rumo ayu ipĩsiro ãgua. ⁴⁸ Acoi ava che reroĩro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaẽhisa pipe oyemocañi ucara ari ipa vahe pipe. ⁴⁹ Esepia, che nañehi eté cheyesui tẽi; che Ru, che mbousar rumo che cuai che ñehe ãgua, che porombohe ãgua avei. ⁵⁰ Che aicua co cheundar porocuita güeru tecovesa apirẽhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya ãgua oso vaheřá Vu piri. Ahe osaisu vahe ité ava oyeupendar co ivi pipe yepi. Ēgüe ehi saisu ari ipa vahe ruti.

²⁻⁴ Carugar oique ité Simón rahir, Judas Iscariote, piha pipe imondo ãgua yamotarẽhimbar uve. Jesús rumo oicua ité Vu Tũpa sui ousa, oicua avei oyevi iri ãgua Vu Tũpa piri iyavei Tu omondo opacatu omborecuasa chupe. Sese ocaruse güemimbohe eta reseve, mesa sui opũha, osequi oturucuar yohasa. Ipare omonde ambuae turucuar vumbicuasa rese. ⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cũritei. Ipare rumo eresenducua —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ěgüe peye —ehi.

¹¹ Ahe aipo ehi: “Ndaopacatui rumo ěgüe peye” ehi. Esepia, oicua ité uma omondora yamotarẽhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pẽu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeipei peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ěgüe ahe pẽu. ¹⁶ Supi eté aipo ahe pẽu: ava mbiguai tẽi, ahe ndahei ivate catu güerecuar sui; ěgüe ehi avei imboupi ndahei ivate catu secoi ombousar sui. ¹⁷ Pesenducua se nungar mbahe, peyapo tuprise, ahese peviharete catura peico —ehi.

¹⁸ “Che nañehi opacatu pe rese, che rumo aicua una yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarẽhi’ ehi vahe. ¹⁹ Senondeve amombehu pẽu. Evocoyase ěgüe ehise ité cheu, che reroyara peye che ité niha aipo ahe vahe vichico.

²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepei pe pãhu pendar che mondora che amotarëhimbar upe” ehi

²¹ Aipo ohe pare, Jesús ndoyembovihai eté iyavei mbahe oime vaherã omboyecua tupri ité,

—Supi eté aipo ahe pëu: ñepei pe pãhu pendar che mondora che amotarëhimbar upe —ehi.

²² Evocoyase ore oromahe-mahe tēi oreyses, “¿Ava upe pãha aipo ehi?” orohe tēi oreyeupe. ²³ Che sembiaisu catu yípive acaru vīte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵ Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrītei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaquī pan rahicuer imondo Simón Iscariote rahir, Judas, upe. ²⁷ Judas oipisise pan, uguapī voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepei rumo mesave orocarū vahe, ndorosenducuai eté aipo ihesa.

²⁹ Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuaita ipiasu vahe

³¹ Judas sē pare, Jesús aipo ehi:

—Cūrītei oyecuarā che, Ava Riquehir, reco porañetesa. Che Ru Tūpa reco porañetesa avei oyecuarā che rese. ³² Acoi amboyecua che Ru Tūpa reco porañetesa, ahe avei omboyecuarā che reco porañetesa, ãgüe ehira imboyecua pihavi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecar upe aipo ahe: “Ndiyai chietera peso che sosave” ahe. ³⁴ Sese co amondo porocuaita ipiasu vahe pëu ñepei-peī peyeaisu āgua inungar che opoaisu. ³⁵ Peyeaisuse ñepei-peī, opacatu tupri ité ava oicuarā yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevī Pedro upe:

—Cūrītei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrītei voi ndiyai nde rupi che so āgua? ¡Ayemoingatu ité amano vaherã nde rese! —ehi Pedro chupe.

³⁸ —¿Supi eté pãha ereyemoingatu ité che rese nde mano āgua? Nde rumo cōhe potase tacura ñehe renondeve, mbosapī oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya. ² Esepia, che Ru rêtave setá oime pe reco ãgua; êgüe ndehise rumo, namombehui chira aipo pëu viña. Sese che asora pe recuarã moingatu. ³ Imoingatu pare ayevíra pe reca che recosave pe reraso ãgua cheyepiri. ⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vitei cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recoise, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pëu. Ipípe che amboyecuara che Ru reco píratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espiritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuaíta. ¹⁶ Che aporandura che Ru upe ombou vaheñã Espiritu supi eté vahe pe pítivii ãgua, ahe secoi vaheñã ité pe rese. ¹⁷ Ava Tūpa ndoicuai vahe rumo, ndoicatuí chietera ipísi. Esepia, ndosepiaí, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe piha pipe.

¹⁸ “Ndopoeyai chira pe güeraño tēi; ayevíra niha pe rese aico vaheñã. ¹⁹ Chihí tēi oime vite ari che reroysarēhi che repia vite vaheñã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pípe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuara; mahera ru ndereyemboyecua iri chira ava nde reroysarēhi upe? —ehi chupe.

²³ Evocoyase aipo ehi Judas upe:

—Acoi che raisui vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheñã sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa

pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vitese, opa co mbahe amombehu vichico pēu. ²⁶ Espiritu Santo rumo, Poropitiviisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pēu che ñehe agüer rese.

²⁷ “Aseya teco tupriša pēu, ahe che reco tupriša; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiaveira pesiquiye. ²⁸ Pesendupa niha acoi, ‘Asora, ipare ayevi irira pe rese aico vaheṛā’ che hesa. Supi eté che raisuse peye, peviharetera peicuase che Ru piri che sosa. Esepia, ahe ivate catu vahe ité che sui. ²⁹ Sese amombehupa voi co mbahe tenondeve pēu, ēgüe ehise ité, ahese peroyara.

³⁰ “Namombehu pucu iri chira mbahe pēu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohave sui” ehi güemimbohe eta upe.

15

Jesús uva hi nungar

¹ Ipore Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sãca ndihai vahe ichui yepi; iha vahe rumo omoatiro tupri iha catu āgua. ³ Pe pe recocuer imoatiropri ité che pe mbohese pipe. ⁴ Peicoño ité catu che rese inungar che aicoño ité avei pe rese. Uva rãca oise ohi sui, ndiha iri ahe ae tēi; pe avei ēgüe peyera peyepipse che sui” ehi oreu.

⁵ “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, ēgüe ehira ahe. Supi eté ndapeicatui chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rãca yipi vahe. Ipore imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporandño mbahe pe remimbotar rese, ahese imondosara pēu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pēu ‘tovireco che vihase oyese yuvireco’ viya; ‘toyemboviharete catu yuvireco’ che hesa pipe. ¹² Co che porocuita: Peyeaisu ñepeipei, inungar che opoaisu. ¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pēu. Esepia, mbiguai ndoicuai eté mbahe güerecuar pihañemoñetas. Sese, ‘Che mboripar’ ahe pēu. Esepia, aicua ucapa ñehesa che Ru che opombehu vahe pēu. ¹⁶ Pe niha ndache poravoipe peye. Che rumo cheporavo iyavei opocuai peporaviqui vaheṛā ava reru āgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pēu.

17 Co rese opocuai: Peyeaisu catu ñepepei peyacatu” ehi Jesús güemimbohe upe.

Jesús amotarēhimbar; supindar amotarēhimbar avei

18 “Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar. 19 Pe peico vitesa ava Tūpa ndoicuai vahe pāhuve, evocoiyase pe raisu aira yuvireco viña. Che rumo opoporavo ipāhu sui yuvireco. Sese tēi ndape ambota iri yuvireco. Esepia, pe ndahe iri ipāhu pendar peico. 20 Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbrī aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco. 21 Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

22-24 “Che ndayuisse ahe ava upe mbahe sembiavi mombehu viña, evocoiyase, ‘Peyavi mbahe’ ndehi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipāhuve; ahe rumo yepe osepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité mbahe pe rembiavi peyese’ ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco. 25 Co rumo ēgüe ehi. Esepia, imboaviyasa rane itera ñehesa sesendar icuachiapri pipe aipo ehi vahe: ‘Mbahe apoēhi pipe sui tēi che amotarēhi yuvireco’ ehi vahe.

26 “Acoi ambouse rumo Poropitiviisar, Espiritu supi eté vahe che Ru sui pēu, ahe omombehura che recocuer. 27 Pe avei pemombehura che recocuer. Esepia, yipisuive ité peico che rupi” ehi.

16

1-2 “Pe mocañiehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tūpa uve nara revo na yahe’ ehira yuvireco viña. 3 Evocoi rumo ēgüe ehira yuvireco che Ru cuaēhi pipe iyavei che cuaēhi pipe yuvireco. 4 Amombehu aipo pēu acoi ēgüe ehise, peyemomahenduhara che remimombehugüer rese.

Espiritu Santo rembiapo

“Yipisuive rumo namombehui co mbahe pēu. Esepia, aicoveño ité pe rese. 5 Cūrītei rumo asora che mbousar piri iyavei ndipoi que ñepepei pe pāhu pendar ‘¿que vo aipo eresora?’ ehi vahe cūrītei cheu. 6 Pe rumo ndapeyembovīhaiño aipo mbahe amombehuse pēu. 7 Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropitiviisar. Asose rumo, che amboura pēu. 8 Ouse ahe, oicua ucara ava che cuaēhisar upe yangaipa, oicua uca aveira tecocuer ivisa iyavei cañisa ndaseco pōrai vahe upendar. 9 Oicua ucara yangaipa chupe ndache reroyaise yuvireco; 10 oicua rumo che reco ihīvi tupri vahe yuvireco. Esepia, asora che Ru recosave, ahese pe ndache repia iri chietera peye; 11 iyavei oicua Tūpa poromocañisa. Esepia niha, Carugar, ahe co ivi pipendar rerecuar oipisira che Ru Tūpa ñemoirosa.

12 “Setá iteanga mbahe oime amombehu vāherā pēu. Pe rumo ndapeicatu chira cūrītei senducua. 13 Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo

omombehura mbahe osendu vahe güeraño, oicua uca aveira mbahe coiye oime vaherã. ¹⁴ Ahe che mboeteira. Esepia, oicua ucara opacatu mbahe cheundar pëu. ¹⁵ Opacatu mbahe che Ru vireco vahe, che mbahe. Sese niha, ‘Espíritu oipisira opacatu mbahe cheundar, oicua uca aveira pëu’ ahe.

¹⁶ “Aviyeteramo tēi ndache repia iri chira peye. Ipore rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohe:

—¿Mara oya piha: ‘Aviyeteramo tēi ndache repia iri chira peye’ ehi yandeu; ipore rumo aipo coiye catumi yasepiara iyavei aipo osora Vu piri no? ¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

¹⁹ Ipore rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipore rumo coiye catumi che repia irira peye’ che he agüer rese co pe porandu vite peyeupe? —ehi—. ²⁰ Supi eté aipo ahe pëu: peyasehora pe viharêhisa piye, ava angaipa viyar rumo ovihareteñora yuvireco. Yepe pe, ndapevihal chira viña, coiye catu rumo peviharetera. ²¹ Inungar acoi que cuña imembira potase, tasi chupe oyepotase ari imembira água; pitani oha pare rumo, nimahenduha iri tasicuer rese; soriveteño omembri rese. ²² Ègüe peye avei; pe cūrítei tasi avei pëu, ayevi irira rumo pe repia água, ahese peviharetera. Ahe viharetesa ndipoi chietera que ava virocua vaheerã pe sui.

²³ “Ahe ari piye, ndapeporandu iri chietera mbahe rese cheu. Supi eté aipo ahe pëu: che Ru omboura opacatu mbahe pëu che rer piye peporanduse.

²⁴ Cūrítei rumo ndapeporandu vitei mbahe rese che rer piye. Peporandu catu sese, ahese peipisira. Ipípe sui perorivete catura.

Jesu Cristo mbahe-mbahe tēi recopisar

²⁵ “Opacatu mbahe rese niha amboyoya tecocuer pëu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pëu che Ru recocuer resendar. ²⁶ Ahe ari piye pe peporandura mbahe rese che rer piye; che rumo, ‘Ayerquirra pe rese che Ru upe’ ndahei pëu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asê che Ru sui co ivi piye vitu; cūrítei rumo asepara co ivi, ayevira che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu água mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co piye ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pëu che rese mbahe tupri piye pe reco água. Peparaisu itera co ivi piye; peyemonguerêhi catura rumo. Esepia, che opa ité asecoi co ivi pipendar mbahe tēi —ehi.

17

Jesús oyerocu güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipípe sui avei che nde Rahir toromboetei. ² Supi eté niha,

nde erembou che mborerecua ãgua opacatu ava ivi pipendar harive iyavei tecovesa apirēhi mondo ãgua opacatu ava nde cheu erembou vahe upe. ³ Co niha tecovesa apirēhi, tande cua nde Tūpa ñepei supi eté vahe nde recose yuvireco, tache cua avei nde che mbouse yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete ãgua, inungar acoi yipindar arco vahe nde rese ivi apoēhiseva.

⁶ “Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarēhi rese. ¹⁰ Opacatu ava cheundar, ndeundar avei; ndeundar evocoiyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohava yuvireco. Che evocoiyase asora nde piri. Che Ru, seco maranehi vahe, esãro nde pīratasa pipe nde remimbou cheu oyese yuvirecoi tupri ãgua inungar yandé yaico. ¹² Aicose co ivi pipe, asãro tupri nde rer pīratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité egüe ehi.

¹³ “Cūritei asora nde recosave. Co ivi pipe che reco vītese rumo, amombehu co mbahe chupe ‘tovireco che viharetesa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahe ipovri pendar aico. ¹⁵ ‘Enose ava Carugar povri pendar pãhu sui’ ndahe ndeu, che rumo aipota eresepira Carugar sui. ¹⁶ Inungar che ndahe Carugar povri pendar aico, egüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pãhuve, egüe ahe avei che imondo ava pãhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vahe rã rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, egüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi ãgua, inungar yande ñepei vahe yaico. ²³ Che aico yuvireco sese, nde evocoiyase ereico che rese ahe yuvirecoi tupri ãgua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vahe rã teco porañetesa cheu erembou vahe yuvireco. Nde niha yipive ité che raisu eve ivi apoēhiseve. ²⁵ Che

Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyerogui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rêta, ipipe Jesús ore reroique ore reraso. ² Iyavei Judas omondo vaheã yamotarêhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tūparo rārosar pahí rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaheã. Sese osē voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secói imondo āgua yamotarêhimbar upe. ⁶ “Che niha ahe aico” ehise ava upe; guaquicuei coti pāve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pēu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye āgua ēgüe ehi: “Acoi che Ru ombou vahe cheu, nocañii eté que ñepeí che sui” ehi. ¹⁰ Evocoyase Simón Pedro vireco vahe quise, vinose, oyasia Malco serer vahe nambí yasu cotindar, ahe pahí rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua. ¹³ Yipindar viraso Anás rētave yuvireco. Esepia, ahe Caifás rovayar. Ahe araviter pipe aipo Caifás pahí eta rerecuar ivate catu vahe secói. ¹⁴ Caifás ité aipo ehi omboetasa upe: “Yandeu aviye catu itera que ñepeí mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahí eta rerecuar rêta pipendar opa ité che cua yuvireco. Sese aiqueño ité Jesús raquicuei mborerecuar rētave vicho. ¹⁶ Pedro rumo opitaño oquendipive ocarve. Che rumo pahí eta rerecuar che cua ité yuvireco. Evocoyase asē, aporandu oquendipi rārosar uve Pedro reique āgua rese. ¹⁷ Evocoyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

¹⁸ Sõhisá iteanga ahe pítu pipe. Evocoyase mborerecuar rembiguai iyavei sundao eta oyatapi yuvireco oyepehe água. Pedro avei aheve ipãhuve oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añehe vaherã. ²¹ ¿Mahera vo evocoyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Añehese mbahe tẽi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rëta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase vıraso Jesús Caifás rëta sui Roma pendar mborerecuar guasu recosave yuvireco. Cõhe potase ãgüe ehi. Judío rumo ndoyuviroiquei eté mborerecuar recosave oyemboangaipaẽhi água. Esepia, ahe icuaita yuviroiquese, ndiyai chietera Pascua resendar ovesa roho hu água yuvireco chupe viña. ²⁹ Sese Pilato osẽ ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pẽundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca vaherã que ava —ehi.

³² Ëgüe ehi Jesús ñehe imano água resendar yaviye. ³³ Ahese Pilato oique iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherā niha che aha co ivi pipe mbahe supi eté vahe mombehu āgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osē iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepeí ava soquendapri Pascua pieta pipe yepi; ¿peipota amose vaherā judío rerecuar? —ehi.

⁴⁰ Aipo ihese, opacatu osapucai pīratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe seci.

19

¹ Evocoiyase Pilato oporocuai Jesús nupa āgua. ² Sundao eta omonde ñaca rese yu piapri iyavei omboyemonde turucuar pīraumbi vahe pipe yuvireco.

³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoiyase osē iri ava upe aipo ehi:

—Pesepia, anose pēu pe icua āgua che ndayosui eté mbahe sembiavi —ehi.

⁵ Evocoiyase vinose yu piapri oāca rese turucuar pīraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucai:

—¡Tayaticasa! ¡Tayaticasa! —ehi pāve voi yuvireco chupe.

Pilato evocoiyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tēi Tūpa Rahir —ehi yuvireco.

⁸ Aipo ñehesa renduse, Pilato oyembosiquiyé catu. ⁹ Viroi que iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñehe chupe. ¹⁰ Evocoiyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca āgua, mbahe tēi sui nde renose āgua avei? —ehi Pilato chupe.

¹¹ —¡Aní! Nderereco chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osāha iri tēi Jesús renose āgua; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborerrecuar ivate catu vahe mboripar ereico! ¡Opacatu oyemomborecua tēi vahe, ahe evocoiyase mborerrecuar ivate catu vahe amotarēhimbar tēi yuvirecoi! —ehiño yuvireco chupe.

¹³ Evocoiyase Pilato osenduse aipo ihesa, vinose uca Jesús ocarve, oguapi mborerrecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya. ¹⁴ Mbiter ari Pascua pieta āgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaí pīratá aipo ehi yuvireco:

—¡Tomanol ¡Tomanol ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoiyase ayatica ucara pe rerecuar? —ehi.

Pahi eta rerecuar rumo omboyeví yuvireco chupe:

—¡Ore ndorovireco iri ambuae mborerrecuar, Roma pendar mborerrecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca āgua. Ichui viraso yuvireco.

Jesús yaticasa curusu rese

¹⁷ Evocoiyase Jesús vinose curusu seraso “Ava Ācagüer” serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeí-peí yique ivií. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyeroquí co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyeví:

—Co aicuachía vahe, ēgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho āgua yuvireco. Oipisi avei iturucuar ivri pendar nimbovívísai vahe, ñepeí reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pīha oipisira? —ehi yuvireco.

Ēgüe ehi icuachiapirer imboaviye yuvireco aipo ehi vahe: “Omboyahoyaho ava che turucuar iyavei iguayí yuvireco sese” ehi vahe. Supi tupri ité ēgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepia se osi iyavei che repia se yípive, che güembiaistu, aipo ehi osi upe:

—Che sí, evocoi nde membirā ererectora —ehi chupe.

²⁷ Ipare voi aipo ehi cheu:

—Evocoi nde sí —ehi.

Ichuive tupri amoingue ichi che rētave asāro vaherā.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye água aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepei ari Pascua pieta uve ipane vahe pipe aipo égüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rëtima mope água ‘tomanó’ oyapave curusu sui setecuer reroypa água yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sëtima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sëtima yuvireco.

³⁴ Ñepei sundao rumo oicutu yiqueve lanza pipe. Ahe ramoseve voi osë suvi, i reseve. ³⁵ Che asepia vahe ité; supi eté aipo ahe. Evocoyase amombehu pëu pe seroya água. ³⁶ Esepia, co mbahe égüe ehi icuachiapirer mboaviye água aipo ehi vahe: “Ndimopesai chietera que ñepei icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso água rese. José aipo Jesús rupindar. Ndoyecua ucái rumo omboetasa judío eta upe pahí rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipitívii, acói oso vahe Jesús upe pítuse. Ahe güeru mbahe síacua vahe mirra, áloe rese oyeseha vahe, treinta kilo, sehögüer rese nara. ⁴⁰ Égüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Égüe ehi judío oyapo ava omano vahe tí água yuvireco yepi. ⁴¹ Namombrii Jesús aticasa sui oime mbia remiti rëta. Aheve ité oime tuvipa ita hopri, ipiasu vahe iporupirëhi. ⁴² Ipipe omoingue Jesús rehögüer yuvireco. Esepia, ahe tuvipa cõimi eté ichui iyavei virovi ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pítu vitemiseve. Ahe osepia ita tuvipa rovapisa ndahe irise güendave ihãi. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndroicuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tõi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tõi.

⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia êgüe ehi vahe. Ahese aroya voi eté. ⁹ Ore rumo ndorosenducua vitei eté icuachiapri: “Ocueraevira omano vahe pâhu sui” ehi vahe. ¹⁰ Ipare oroyevipa oroso ore rêtave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirio Tûpa rembiguai iturucuar morochí vahe uguapi yuvinoi sehögüer rupagüerve. Ñepei uguapi oĩ ñaca rupagüer coti, ambuae ipi rupagüer coti. ¹³ Ahe Tûpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresea? —ehi chupe.

Ahe omoha ‘co mbahe miti rêta rãrosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo.

Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tûpa recosave” erera chupe. Che Ru, pe Ru avei; che Tûpa, pe Tûpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe arí pipeve, domingo pipe, pītuse, ore ore ñemonuhasave oroyeo-quenda tupri judío rerecuareta sui ore siquiyepave. Ahese Jesús oi que ore pâhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, êgüe ahe aveira co che pëu —ehi oreu.

²² Ichui ore peyu:

—Peipisi Espiritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevisé

²⁴ Ñepei ore mboetasa rumo Tomás icōi vahe, ndipoi eté ore pâhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás seci ore pãhuve. Yepe oroyeouenda tupri ité viña, Jesús rumo oiqueño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerêhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tũpa! —ehi chupe.

²⁹ Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiaêhi pipe che reroya vahe! —ehi chupe.

Co icuachiapri Jesús reroya ãgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropisirosar, Tũpa Rahir secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pĩtu pipe rumo ndorombohai eté pira.

⁴ Cõhe potase rumo, Jesús oyemboyecua imbehi ivi. Ore rumo ndoroicuai eté Jesús secose. ⁵ Evocoyase aipo ehi oreu:

—Mbia chĩhivahe, ¿ndapembohaimi eté pira? —ehi.

—Ani eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani seci; opo ive oso chupe. ⁸ Ore evocoyase orovroyepota ité carite ndatipimisave, oroichoho pira rehi imbohassa pipe seraso, cien metro tēi oroico imbehi sui. ⁹ Orovinosese ivi átasave, orosepia tãtapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoyase Simón Pedro oha carite pipe, oichoho ndatipisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroí eté. ¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepei ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecoaña Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihal eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chihivahe catu vite, ereyemonde vite nde ae, ereguata vite avei nde remimbotar rupi; nde cuacua catuse rumo, ereyevivamoatara, ambuae evocoyase nde moyemondera, nde reraso aveira nde so potaehisave —ehi.

¹⁹ Jesús rumo omboyecua aipo ohe pipe mara ehira Pedro omano Tũpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yipive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tẽi aipo che namanoi chiva-herã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei icuachia iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatũ icuachi- asase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tüpa omboura Espíritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipíndar sembiapocuer amombehu ndeu iyavei yipísui iporombohe agüer. ² Ocuera yevire, ivave oso renondeve, Jesús omombehu oporocuaíta Espíritu Santo pírata sa pipe güembiporavo apóstol upe sembiaporã. ³ Oyemboyecua güembiporavo upe omanore. Setã rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tüpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesëi rene Jerusalén sui. Tomboaviye rane che Ru Tüpa güemimombehu, ahe acoi amombehu pëu. Juan niha pe äpiramo i pipe tëi; Tüpa rumo Espíritu Santo pipe pe äpiramora. Movíromi tëi ari ipane vite imondo ägua pëu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, çerembou iríra vo cürítei Israel iguar upe pírata sa iyeyecuai ägua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua ägua pëu. Esepia, Tüpa año ité vireco omborerecuasa ahe mbahe apo ägua. ⁸ Peipísira rumo Tüpa pírata sa oiçuese Espíritu Santo pe piha pipe. Ahese pemombehu tupríra che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tüpa víraso ivave. Ichui Jesús oiçue iva quiha páhuve. Evocoiyase ndosepia iri eté yuvireco cute. ¹⁰ Omahe vitesseve yuvínoha ivave ichosa rese, aviyeteramo tëi ñuvirío mbia, iturucuar morochí vahe, oyemboyecua apóstol ipive yuvínoha ¹¹ aipo ehi yuvireco chupe:

—Galilea iguar, çmahera vo pemahe vite iva rese pehá? Evocoi Jesús, inungar Tüpa víraso ivave pe sui, ègüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoiyase apóstol oyevi yuvíraso Jerusalén ve ivitri Olivo sui, ahe ihamombrígüer ñepeí kilómetro tëi. Supivemi imombehusa judío guata ägua mbíthusa ari pipe yepi. ¹³ Yuvíroiçuese Jerusalén ve, oyeupipa oçuesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahír, Simón ahe Zelote iyavei Judas, Santiago rahír yuvirecoi. ¹⁴ Co opacatu ari yacatu rupi oñemonuha oyoya guasu oyeroqui ägua yuvireco yepi Jesús rivri, ichi, ambuae cuña reseve avei.

¹⁵ Evocoiyase ñepeí ari pipe oñemonuha guasu ciento veinte ava yuvireco. Ipáhuve Pedro opüha aipo ehi ava upe: ¹⁶ “Che mu eta Jesucristo reroyasar, iya ité co imboaviyasa Tüpa Ñehengagüer Judas recocuer resendar. Ahe imombehupri David upe Espíritu Santo pipe aracahe. Evocoi Judas víraso

vahe Jesús amotarēhimbar ipisi uca āgua. ¹⁷ Ahe acoi secoi yande pāhuve co mboraviquisa rese yande pītivii āgua avei viña. ¹⁸ Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvi resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pisi āgua’ ehi vahe.

²¹ “Evocoiyase cohava oime ava yande Yar Jesús secoi vitesse yande pāhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepe ipāhu pendar yande rupi icuerayevi agüer mombehu āgua” ehi omboetasa upe.

²³ Evocoiyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipare oyeroci yuvireco aipo ehi: “Nde, ore Yar, opacatu ava piha ereicua. Emboycua cohava nde rembiporavo oreu; çuma vo ereipota ²⁵ eremondo vaherã icuaitarã apóstol seco āgua Judas recuñara? Ahe oangaipa pipe oyemocañi uca tēi vahe oico” ehi Tūpa upe yuvireco.

²⁶ Evocoiyase osāha iporavo yuvireco. Matías ité vinose iporavopri sui yuvireco. Ichui tupri ité oicue once apóstol pāhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco. ² Aheve oi pipe aviyeteramo tēi ivitu ipirata vahe nungar siapu guasu ou iva sui. Ahe siapugüer oyendupa tupri oi pipe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tūpa omoingue evocoi ava piha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ivi rupindar yuvireco.

⁶ Mbahe siapu guasu vahe renduse, oñemonuha ati tēi yuvireco oyese. Ndoymboaracuai tēi yuvireco ambuae ava oñehe pipe ñehese. ⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera piha co ñepepei oñehe yande ñehe pipe yuvireco? —ehi tēi oyeupe yuvireco—.

⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cōquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tūpa rembiapo icatupri vahe! —ehi.

¹² Opacatu oyepihamondi, ndoicuai opihañemoñeta āgua yuvireco.

—¿Mara ehi piha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroñrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opũha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheerã pẽu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vite cũritei? ¹⁶ Co niha Tũpa ñehe mombehusar Joel oicuachía vahe aracahe:

¹⁷ Tũpa aipo ehi:

Coiye, ari cañi renonde, amondora che Espĩritu Santo opacatu ava upe. Ipĩratasa pipe pe rahĩr, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supĩ eté vahe cuacua vahe upe.

¹⁸ Supĩ eté ahe ari pipe amondora che Espĩritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipĩratasa pipe.

¹⁹ Amboyecuaa poromondiisa iva rese.

Ēgũe ahe aveira poromondiisa mboyecuaa ivĩ pipe:

tuvĩ, tata iyavei tãtachi.

²⁰ Yande Yar ari tuvichá vahe imboeteipri renonde ohara pĩtu, yasi oyeapora tuvĩ nungar.

²¹ Opacatu ava, che Yar che pĩtivĩ eve, ehi vahe, ahe oñepisĩrora yuvireco' ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tũpa pĩratasa pipe pe pãhuve güeco maranehi mboyecuaa ãgua. Ahe niha peicua opacatu. ²³ Ipape rumo evocoi Jesús imondosa pẽu yuca ãgua. Ahe rumo Tũpa remimbotar rupi. Esepia, yĩpive ité Tũpa oicua pe peipisira yuca uca ãgua curusu rese ava naporai vahe upe. ²⁴ Tũpa rumo ombogũerayevi manosa sui. Esepia, manosa ndoicatuĩ sereco ãgua. ²⁵ Supĩ eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tẽi pipe che viapiẽhi ãgua yepi.

²⁶ Sese avĩhaño ité vichico, asapucái avei che rorivetesá pipe.

Iyavei che yeroya tuprisave asãrora mbahe aviyẽ vahe che recove iri ãgua.

²⁷ Esepia, nde ndereseyai chira che hã omano vahe pãhuve, nderemonduyuyucái chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose' ehi David aracahe.

²⁹ “Che mu eta, supĩ eté yande ramoĩ David omano, ñotisa ita hopri pipe aracahe. Ahe suvĩpa ouve vite cohava yande pãhuve. ³⁰ David rumo Tũpa ñehe mombehusar, oicua Tũpa oyeupe aipo ehi vahe: ‘Supĩ eté aipo ahe ndeu: nde suindar oimera mborerecuar guasu nde recuñara' ehi vahe.

³¹ Ahe ndoyavĩ osepia vahe ité Poropĩsĩrosar cuerayevisa. Evocoyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira' ehi aracahe. ³² Evocoi Jesús, Tũpa remimbogũerayevi secoi.

Ahe imombehusar opacatu ore oroico. ³³ Ipape Tũpa viraso oacato coti imboguapi. Ahe oipisi imombepri Espĩritu Santo Vu sui. Evocoyase ahe opa omondo co avã yuvirecoi vahe upe. Ahe pesepia, pesendu avei cũritei peico. ³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapĩ cohava che acato coti che piri.

³⁵ Asecopipa uca ranera nde amotarēhimbar ndeu, ehi Yar che Yar upe' ehi David aracahe.

³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarā iyavei yande písiro āgua” ehi Pedro ava rehii upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyeví Tūpa upe. Iyavei peñeapiramo opacatu Jesucristo rer pipe. Evocoiyase Tūpa ñerora pe angaipa rese. Iyavei omondora Espírítu Santo pēu. ³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepé co ava secocuer co coti tēi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho āgua yuvireco yepi.

Yipindar vahe Jesús reroyasar recocuer

⁴³ Opacatu oyemboisiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyemboviihasa pipe, opihañemoñeta tuprisa pipe avei. ⁴⁷ Osapucaí yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava ñepisiro āgua Jesucristo viroya vahe pāhuve.

3

Ndoguatai vahe cuerasa

¹ Ñepeí ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyerogui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei oviracua. ⁸ Evocoiyase opūha, opo, oguata; oi que oso

tūparove supī. Opo-opo vorivetesave iyavei osapucaī Tūpa upe. ⁹ Opacatu ava osepia yuvireco iguatase iyavei Tūpa upe isapucaise. ¹⁰ Omahecuase sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepia, evocoi ava oicuapa tūparo roquendiḡi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tūparo Corero Salomón serer vahevriḡe

¹¹ Ndoguatai vahecier ndoyepeḡi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise.

¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavi co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña.

¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoī eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborereciar Pilato povriḡe. Acoi omose potase, pe evocoiyase ndapeipotaiño imose āgua chupe.

¹⁴ Ahe seco maranehi vahe, seco iḡi vahe renose rāgüer pipe, peporandu: ‘Tosē oporapichi vahe’ peye. ¹⁵ Ēgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu. ¹⁶ Co Jesús rer rese yeroya pipe ité niha oipisi pīratasa co mbia ndoguatai vahecier opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipitiviḡi vahe pe rereciar Jesús yuca uca āgua pe icua tupriēhi pipe cuese. ¹⁸ Ēgüe ehi Tūpa imboaviḡe aracahendar opacatu oñehe mombehusar upe güemimombegüer: ‘Che Rembiporavo Poropisirosar oiporarara mbahe-mbahe tēi rasiḡuer omano’ ehi vahe. ¹⁹ Sese pemboasi pe angaipa; peyevi Tūpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa āgua,

²⁰ ombou aveira Jesús, ahe yipisuiḡe iporavopri pe pisiro āgua. ²¹ Cūritei rumo Jesucristo ivave vite secoi acoi Tūpa opase voi omoingatu opacatu mbahe iyevi āgua. Aipo ehi acoi imoñehe uca aracahendar oñehe mombehusar ndaseco marai vahe. ²² Moisés yande ramoī yuvirecoi vahe upe aipo ehi imombehu aracahe: ‘Yande Yar Tūpa omopuhara ñepeī oñehe mombehusar pe pāhve che nungar. Ahe iñehe pesendura, pemboyeroḡa catu aveira.

²³ Opacatu ndoviroyai vahe iñehe Tūpa omocañira güembiporavo pāhu sui’ ehi.

²⁴ “Ēgüe ehi opacatu Tūpa ñehe mombehusar Samuel suive aracahe omombehu avei co ari cūritei yasepia vahe yuvireco. ²⁵ Pēu nara niha Tūpa ñehe mombehusar remimombegüer aracahendar. Pēu nara avei acoi Tūpa omombehu vahe güemimbotar yande ramoī eta upe. Esepia, aipo ehi Abraham upe aracahe: ‘Opacatu ava co iḡi pipendar ahe sovasapri yuvirecoira nde suindar sui’ ehi. ²⁶ Acoi Tūpa Guahir ombogüerayevise, pēu rane ombou pe rovasa āgua ‘toseyapa ñepeī-peī güecocueraī yuvireco’ oya” ehi Pedro ava rehii upe.

4

Pedro, Juan serasosa mborereciar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahī eta, tūparo rārosar sundao rereciar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuereyevi; sese oime cuerayeviḡa omano vahe pāhu sui” ehi. ³ Ichui oipisi

seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tēi osoquenda yuvireco. ⁴Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, ⁶pahi rerecuar ivate catu vahe Anás, Caifás, Juan, Alejandro, opacatu omu reseve. ⁷Evocoyase güeru ucasa Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸Evocoyase Pedro, Espíritu Santo piratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tüpa rumo ombogüerayevi iri omano vahe pãhu sui. ¹¹Co Jesús pe remieroïro, ahe rumo yande vïracuasa. Pe evocoyase inungar oi mopuhasar omomboño vahe ita aviye catu vahe oi moviracuasa rãgüer yepi. ¹²Ndipoi que ambuae ava sui poropisirosa, Jesús güeraño ité oicatu oporopisiro. Esepia, Tüpa nomboui ambuae ava tēi co ivi pipe yande pisiro ãgua —ehi.

¹³Mborerecuar osepiase iyembosiquiyeehisa yuvireco, “¿Mara ehi pãha co mbia? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. ¹⁴Iyavei acoi ava semimbogüeragüer supive ité secoise, sese ndoicatu chupe oñehe mara ãgua yuvireco. ¹⁵Ipare, “Pesē ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese ¹⁶aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgüe ndehi” yahe chupe. ¹⁷Yambosiquiye ava upe Jesús rer rese iñehe iriñehi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹Omboyeviño rumo oñehe yuvireco chupe:

—¿Mara ehí pe pihave? ¿Uma pãha aviye catu Tüpa rovai? ¡Pe porocuita tie oroviroya catura Tüpa ore cuaisa sui! ²⁰Ndiyai rumo mbahe ore rembiepia, mbahe orendu vahe avei mombehuēhi ãgua oreu —ehi.

²¹Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tüpa yuvireco co imbaheasi vahe mbogüera repiase. Sese ndoicatu eté mbahe apo yuvireco chupe. ²²Evocoi ava oipisi vahe Tüpa poromondiisa ocuera ãgua, ahe oñaro catu cuarenta araviter vireco vahe sui.

Jesús reroyasar oporandu Tüpa upe siquiyeēhisa rese yuvireco

²³Yuvinosese Pedro, Juan avei, oyeve yuviraso omboetasa piri. Aheve oñemonuhasave opa ombobehu pahi rerecuar oyeupe ñehe mara-mara tēisa yuvireco. ²⁴Aipo rendu pare, oyoya guasu oyoeroqui yuvireco Tüpa upe aipo ehi: “Ore Yar, nde niha Tüpa opacatu iva, ivi, para guasu, opacatu ipor reseve aposar ereico. ²⁵Nde Espíritu Santo pipe aipo eremombehu uca nde rembiguai mborerecuar David upe aracahe:

¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi āgua' ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropisiosar Jesús, seco maranehi vahe, amotarēhi āgua. ²⁸ Ēgüe ehi yapo opacatu nde pihañemoñeta aracahendar rupi tupri ité yuvireco. ²⁹ Iyavei cūritei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyēhisa pipe nde ñehengagüer mombehu vite āgua. ³⁰ Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyoeroqui.

³¹ Iyeroqui pare, Tūpa omboriri opacatu mbahe iñemonuhaseve yuvireco chupe. Ahese Espiritu Santo opa oi que yuvireco sese. Sese osiquiyēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osovasa catu vite opacatu yuvireco. ³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ēgüe ehi ava judío ramoi Leví suindar; Chipre pendar; José serer vahe, apóstol osero, “Bernabé” ehi yuvireco chupe (“porombovihasar” oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho sepri, ñepeiyahocuer vireco oyeupe nara, ambuae yahocuer vīraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa āgua, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipare mbia chihivahe yugüeru, osupi sehögüer, oipoque seraso yuvireco ñoti āgua.

⁷ Mbosapi hora pare, sembireco Safira serer vahe oi que oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoiyase aipo ehi ahe cuña upe:

—¡Mahera peyemboyoya pe pihañemoñetasase rese pe secoãha ãgua yande Yar Espiritu! Coi yugüeru nde mer tísarer. Nde avei nde reraso ãgua yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chíhivahe yuviroique, oipoque voíño ité sehögüer seraso imer iviñi ñoti ãgua yuvireco.

¹¹ Opacatu Jesús reroyasar, ambuae avei oyembosiquíye guasu yuvireco yanduse.

Setá poromondiisa yaposa

¹² Evocoiyase apóstol pipe Tüpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tũparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquíyepave. Ava rehii rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihãgüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

Apóstol yamotarëhipri yuvirecoi

¹⁷ Ichui tēi pahí rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatëhisave. ¹⁸ Sese oipisi osoquendapa uca yuvireco. ¹⁹ Ipare rumo, pítu pipe, Tüpa rembiguai íva pendar om omboi oquenda, vinose ichui, aipo ehi chupe: ²⁰ “Peso tũparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cõhe ramoseve yuviraso judío tũparo guasuve ava mbohe ãgua.

Aheseve pahí rerecuar ivate catu vahe, supindar avei osenoi opacatu tecua pipendar mborecuar ñemonuha ãgua ivate catu vahesave; omondo yuvireco güembiguai apóstol reru ãgua soquendasa sui aheve nara viña.

²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahí rerecuar ivate catu vahe, tũparo rãrosar rerecuar, pahí rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepeí mbia oyepota imombehu:

—Evocoi pesoquenda vahecuer, ahe mbia cūrítei oporombohe tũparove yuvireco —ehi chupe.

²⁶ Evocoiyase tũparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiëtera ava yuvireco yaru raise” ehi yuvireco. ²⁷ Viroyepotase yuvireco ñemonuha ivate catu vahesave, ahese evocoi pahí rerecuar ivate catu vahe aipo ehi chupe:

²⁸ —Ore mborecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer

rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahí rerecuar chupe.

²⁹ Pedro, omboetasa reseve, omboyeveí pahí rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroyara —ehi yuvireco chupe—. ³⁰ Yepe peyatica, peyuca uca Jesús curusu rese viña, yandé Ru Tūpa rumo acoi yandé ramoí eta viroya vahe, ahe ité ombogüerayevi. ³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropísirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe.

³² Ore Tūpa rembiapo repiasarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyuca pota opacatu apóstol yuvireco viña. ³⁴ Mborerecuar pāhu pendar rumo oime mbia fariseo, Gamaliel serer vahe, ahe Moisés porocuaita rese oporombohe vahe iyavei imboeteipri catu vahe. Ahe opūha oporocuai, “Toyuvínose raimi ocarve apóstol” ehi. ³⁵ Ipare aipo ehi ambuae mborerecuaeta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸ Sese cūrítei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii chira oyapose opíratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güeru iri apóstol inupa uca āgua ñehe iriñehi āgua Jesucristo rese yuvireco. Inupa pare opa omose yuvireco. ⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. ⁴² Ipare ndopoi eté ari yacatu Poropísirosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītivii āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropītiviisa imondosase chupe” ehi oñehe yuvireco. ² Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītiviisa mondo āgua rese tēi —ehi yuvireco—. ³ Sese ore rivireta, peiporavo siete mbia seco avíye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa

rese yuvireco. ⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espíritu Santo opíha pípe. Ichui oiporavo Felípe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyerogui yuvireco sese.

⁷ Ahese Tūpa Ñehengagüer oyemosai catu tecua pípe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya ñehengagüer yuvireco.

Esteban písisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco. ¹⁰ Ndoicatu rumo ñehe recopi āgua yuvireco. Esepia, ahe oñehe mbahecuaasa Espíritu Santo omondo vahe pípe. ¹¹ Evocoyase yamotarēhimbar omboepi ambuae ava upe semira tēi āgua sese yuvireco. “‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe. ¹² Evocoyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipísi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaheṛā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuita amotarēhisave avei. ¹⁴ Ore orosendu ñehe: “Jesús Nazaret pendar omocañira tūparo guasu iyavei Moisés yande mbohesa avei aipo osecañarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omaha aipo yuvireco sese, ndoyavii sepiaca Tūpa rembiguai íva pendar rova.

7

Esteban oñehe oyeepisa pípe

¹ Evocoyase pahi rereciar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyevi chupe: “Che mu eta, peyapísaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve secoi vites, icho renondeve Harán ve seco āgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuarā ndeu’ ehi Tūpa chupe. ⁴ Evocoyase osē Caldea ivi sui oso tecua Harán ve güeco āgua. Omano pare tu Harán ve, Tūpa ombou cohava yande recosave. ⁵ Yepe oyepota tēi cohava aracahe, Tūpa rumo nomondoimi eté que chīhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vītei ahesa). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguaiṛā semimombaraisuguā tēi avei yuvirecoira cuatrociento aravīter rupi’ ehi. ⁷ Tūpa rumo aipo ehi avei

Abraham upe: ‘Che rumo, aicua ra evocoi ava nde suindar mombaraisusar upe yuvireco. Ipare yuvinosera ipovri sui che mboetei iri água cohave yuvireco’ ehi Tüpa chupe aracahe. ⁸Tüpa oyocuai güemimbotar pipe Abraham guahir mbocircuncida água rese. Sese Abraham ombocircuncida guahir Isaac iha pare ocho ari pipe. Isaac égüe ehi avei guahir Jacob upe. Jacob égüe ehi avei guahireta upe, ahe doce vahe Israel suindar” ehi.

⁹“Ipare yuvirecoi vahe yande ramoi Jacob rahir omondo vivri guarepochi repirã yamotarëhisa pipe yuvireco. Ahe tivri rer José omondo vahe Egipto pendar upe yuvireco. Tüpa rumo secoiño ité sese. ¹⁰Ichui vinose opacatu iparaisusa sui. Omondo ombahecuasa chupe iyavei seco aviye tupri água Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco água opacatu ava ivi Egipto pendar cuii água iyavei güeta pipendar cuii água avei.

¹¹“Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹²Oyanduse rumo Jacob Egipto ve oime vitese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³Ichui yuviraso yupagüe irise Egipto ve, ahese José oyecua uca viquehir upe. Egüe ehi faraón upe oicua uca uma sui oyesu. ¹⁴Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵Egüe ehi Jacob yuviraso Egipto ve yuvirecoi água opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecuar upe.

¹⁷“Ipare, virovise ari ipapapri Tüpa Ñehengagüer Abraham upendar, ahese yande ramoi setã catu-catu iri oyesu Egipto ve yuvireco aracahe. ¹⁸Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyesusupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. ²⁰Aheseve avei aipo Moisés oha. Ahe pītani aviye ité Tüpa uve. Ihare, iyesusupa mbosapi yasimi rupive vireco oyese güetave yuvireco. ²¹Oseyase rumo iyesusupa ive yuvireco, ahese faraón rayri oseca ahe i rupi sui. Ichui vinose seraso güetave, omboacua omembri nungar ité sereco. ²²Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipirata ité oñehese iyavei oyapose mbahe.

²³“Virecose rumo Moisés cuarenta araviter, ipihañemoñeta: ‘Tasepia rane che mu israelita cohave yuvirecoi vahe’ ehi. ²⁴Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. ²⁵Ahe rumo, ‘Oicua revo che mu Tüpa vinose uca água Egipto sui yuvireco cheu’ ehi viña. Imu rumo nomohai eté Moisés vinose água yuvireco evocoi ava po sui. ²⁶Ahere ayihive oso omu pãhuve. Aheve osepia ñuvirio mbia ovavase oyeupe yuvireco. Ahe rumo oipota tēi iñero água oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. ²⁷Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu água?’ ehi chupe. ²⁸‘¿Che yuca pota avei tie eve inungar ereyuca evocoi Egipto pendar irapipe!’ ehi chupe. ²⁹Osenduse rumo co

iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ “Omboaviyese cuarenta araviter Madián ve, Tüpa rembiguai oyemboye-cua ivitri Sináí rerovicave ivi iporupirêhisave caha rese tata rendigüer pâhuve chupe. ³¹ Osepiase mbahe sendi vahe oyepihamondai, oyemboya catu sese sepia tupri âgua viña. Ahese osendu Yar ñehe aipo ehi vahe: ³² ‘Che nde ramoi Tüpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés orirí osiquiyesa pipe nomaha pota iri sese. ³³ Evocoyase Yar aipo ehi chupe: ‘Esequí nde pitaqui. Esepia, ivi nimarai vahesave ereico’ ehi chupe. ³⁴ ‘Che asepia tupri ité Egipto ve nde mu che rembiporavo paradisuse; asendu avei ipoâse têisa yuvireco yepi. Sese agüeyi ndeu nde oromondora aheve senosepa âgua’ ehi Tüpa Moisés upe aracahe.

³⁵ “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarâ ore recocuer moingatu âgua?’ ehiño yuvireco chupe, Tüpa ité rumo oyocuai güembiguai imbogüeyi tata rendigüer pâhuve imoñehe Moisés upe iporocuai âgua, ava renosepa âgua avei ivi Egipto pendar mborerecuar povri sui. ³⁶ Ipare ahe ité vinose yande ramoi eta Egipto sui, oyapo avei mbahe poromondaisa aheve ‘toicua Tüpa yuvireco’ oya, para guasu Pira vaheve avei oyapo poromondaisa iyavei ivi iporupirêhisa rupi avei cuarenta araviter rupi. ³⁷ Ahe avei aipo ehi israelita upe: ‘Tüpa vinosera pe pâhu sui ñepeí oñehe mombehusar che nungar’ ehi. ³⁸ Ahe avei acoi ivi iporupirêhisa rupi ava pâhu rupi secói. Chupe avei oñehe Tüpa rembiguai ivitri Sináí ve yande ramoi rese; ahe avei oipisi ñehesa tecovesa resendar yandeu imbou âgua.

³⁹ “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi âgua rese yuvireco. ⁴⁰ Evocoyase aipo ehi Aarón upe yuvireco: ‘Eyapomi catu ava tüpa rahanga oreu ore reroguata âgua’ ehi yuvireco chupe. ‘¿Que vo catu Moisés, ore renosesarer Egipto sui, secói? Omano tie revo’ ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovêhe vaherâ yuvireco iyavei oyemboviha pieta apo yuvireco güembiapo ucagüer rese tēi. ⁴² Sese Tüpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovêhe âgua cuarenta araviter pipe ivi iporupirêhisa rupi.

⁴³ Pe rumo che mboeteiêhisa pipe peraso tüpa rahanga Moloc rêta iyavei yasitata rahanga Refán pe ae tēi peyapo vahe pe tûpaguâ.

Sese che opovinosera pe recua sui pe mondo Babilonia cupe coi coti’ ehi Tüpa chupe aracahe.

⁴⁴ “Ivi iporupirêhisa rupi yande ramoi eta vireco Tüpa porocuaíta rêta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tüpa rêta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tüpa ambuae ava co yande recuavi sui. Êgüe ehiño vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviye ité Tüpa upe, oyapo pota setarâ ‘toime tûparoguâ yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tûparo. ⁴⁸ Tüpa rumo, seco ivate

vahe, ndasecoi vahe tũ^{paro} ava tẽi rembiapo pipe. Inungar acoi omombehu vahe Tũpa ñehe mombehusar aracahe aipo ehi:

⁴⁹ Ƴva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

⁵⁰ Che niha opacatu co mbahe aposar aico' ehi Tũpa icuachiapri pipe" ehi mborerecuar upe Esteban.

⁵¹ Ichui aipo ehi chupe: "Pe rumo ndapeyapisaca potai vahe itẽ peico. Oime tẽi pe nambi, pe piha avei, ipipe rumo ndapeicuai etẽ Tũpa. Peico Espĩritu Santo amotarẽhimbar tẽi inungar pe ramoi aracahe yuvireco.

⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cũritei ou ndaseco marai vahe cute. Pe avei evocoyase ahe yuca uca ãgua peporocuai. ⁵³ Pe pereco tẽi Tũpa porocuita acoi Tũpa rembiguai gãeru vahe yuvireco; ahe rumo ndaperoyaiño itẽ peico" ehi Esteban opacatu mborerecuar upe.

Esteban mano agũer

⁵⁴ Osendupase mborerecuar iñehe, omboasĩ iteanga yuvireco; oñeaimboterepri itẽ yamotarẽhisave yuvireco. ⁵⁵ Esteban rumo vireco itẽ Espĩritu Santo oyese. Evocoyase iva rese omahese, osepia Tũpa porañetes. Osepia avei Jesús opũha ohã Tũpa acato coti. ⁵⁶ Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihãi —ehi.

⁵⁷ Mborerecuareta rumo osapucui pĩrata, oyopiño oapisacuar yuvireco ichui. Aheve yuvinoña guasu yuvireco chupe. ⁵⁸ Viraso gãecua ivii yuvireco. Aheve osey a oyeaosa Saulo pive 'tosãro' oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tũpa upe: "Che Yar Jesús, eipisi che hã" ehi. ⁶⁰ Ipare oñenopiha, oñehe pĩrata Tũpa upe: "¡Che Yar, ndeñero co ava che amotarẽhisar angaipa upe!" ehi.

Aipo ohe pare, omano.

8

¹ Iyavei Saulo, "Peyuca itẽ" ehi catu-catu aheve ohã.

Saulo oseca Jesús seroyasar mocañipa ãgua oico

Ahe ari pipeve omboipi Jesús amotarẽhimbar seroyasar reca mara-mara tẽi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol gãeraño opita Jerusalén ve yuvireco. ² Oime ava Tũpa mboeteisar yuvirecoi vahe, ahe viraso Esteban rehögũer ñoti yuvireco. Itĩ pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sẽta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vaheceru rumo Jerusalén sui omombehuño itẽ ñehesa pĩrososa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: "Evocoi Jesús Tũpa Rembiporavo ava pĩsiro ãgua" ehi. ⁶ Aheve ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa.

⁷ Iyavei setá ava caruguar rerecosar sui omose caruguar. Osêse ava sui, sâse yuvireco. Iyavei setá ava nomii vahe, ndoguatai vahe avei ombogüera.

⁸ Evocoyase oviharete ahe tecua pîpendar yuvireco.

⁹ Aheve rumo mbia, Simón serer vahe, yîpive ipaye ai oico, ombosiquiye quíye ava Samaria pendar. “Che seco ivate vahe aico” ehi angahu ava mbopa.

¹⁰ Evocoyase opacatu ava, cuacua vahe iyavei chíhivahe catu vahe oyapísaca tupri îñehe rese, aipo ehi yuvireco: “Co niha Tûpa pîratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tûpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tûpa suindar ndayasepia vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipísise Tûpa Ñehengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipísi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñeapiramoño têi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo îharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi têi evocoi pîratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tûpa ombou vahe oreu, ererocua vaherã nde guarepochi pipe viña —ehi chupe —. ²¹ Ndeu ndiyai co nungar mbahe apo água. Esepia, nde pihañemoñetasa ndahe ihívi vahe Tûpa rovaque. ²² Sese epoi nde pihañemoñeta raisa sui, eyerure Tûpa upe. Aviyeteramo iñerora ndeu —ehi—. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pîpendar tecua rupi yuvireco. Êgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiópia pendar upe

²⁶ Ipare Tûpa rembiguai oyemboyecua Felipe upe aipo ehi chupe: “Epûha, eso irohí coti nde yepota água evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirêhi rupi oso. ²⁷ Evocoyase opûha oso peri rupi. Aheve osovaíchi ñepeí ava, ahe seco ivate vahe guarepochi apocatusar Etiópia pendar cuña mborerecuar upe nara yepi, ahe mbia oso vahe Jerusalén ve Tûpa mboetei água. ²⁸ Oyevise ocãreto pipe, oyerocu Tûpa ñehe mombehusar Isaías rembicuachiagüer rese ou.

²⁹ Evocoyase Espíritu aipo ehi Felipe upe: “Eyemboya cãretomi rese” ehi.

³⁰ Evocoyase virovise ahe ava, osendu iyeroqui Isaías rembicuachiagüer pipe oí. Ahese oporandu chupe:

—¿Eresenducua aipo Tūpa Ñehengagüer nde yeroquisa eī? —ehi chupe.

³¹ Etiopía pendar mbia omboyeví chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapí cohawe che piri” ehi Etiopía pendar chupe.

³² Ahe Isaías rembicuachía oyeroguí vahe pipe aipo ehi:

“Inungar ava viraso ovesa yuca ñgua, ñgüe ehi avei ahe mbia seraso yuca ñgua yuvireco.

Iyavei inungar ovesa nasasei eté guagüer reroquase, ñgüe ehi avei ahe mbia noñehi eté.

³³ Osecomomini yuvireco, ndipoi ava sepisar.

Ndipoi ichuindar:

Esepia, omocañi co ivi sui yuvireco” ehi Isaías rembicuachía pipe.

³⁴ Oyeroguí pare ahe Etiopía pendar oporandu chupe:

—Emombehumi cheu: ¿Ava rese pñha aipo Isaías oñehi: oyese ae pñha, ambuae ava rese tie? —ehi.

³⁵ Evocoyase co ñhesa sui omombehu ñhesa aviye vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepiá i. Aheve ahe aipo ehi chupe:

—Esepia co i tui. ¿Ndiyai vo cohawe che ñpiramomi tēi eve viña? —ehi.

³⁷ Ahese omboyeví chupe:

—Eroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tūpa Rahir secoi —ehi.

³⁸ Evocoyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo. ³⁹ Yuvinosese i sui, yande Yar Espiritu viraso ahe Etiopía pendar sui. Ahese ndosepia iri; ñgüe ehiño vorivete oso peri rupi.

⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ñgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohawe nde rer pipe” ehi, “evocoyase eremombehura cuachiar pipe Damasco pendar tūparo rerecuar upe” ehi pahi rerecuar ivate catu vahe upe. ³ Ñgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe. ⁴ Evocoyase oviapi oso ivive. Osendu iva pendar ñhesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epñha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñhesa iva suindar yuvireco. Esepia, ndosepiái eté ivate oñehi vahe yuvireco. ⁸ Ipare Saulo opñha, omahe tēi; ndoicatui rumo mbahe repia. Ichui supindar oipisi

iyíva rese seraso Damasco ve yuvireco. ⁹ Aheve mbosapí arí ndasesapísoi, ndocaruí, ndoihui avei oico.

¹⁰ Aheve mbia Jesucristo reroyasar Ananías serer vahe secói. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeví chupe.

¹¹ Evocoyase yande Yar aipo ehi chupe: “Epūha, eso calle Ihívi serer vahe rupi. Eporandu Judas rêtave Saulo, tecua Tarso pendar, rese. Ahe oyeróqui cūritei. ¹² Oquerve angahu osepia mbia Ananías serer vahe omondose opo iharíve omboesapíso irí” ehi.

¹³ Evocoyase omboyeví chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. ¹⁴ Cūritei ou rutei ahe mbia pahí rerecuar porocuaíta rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheṛā ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecua setá mbahe tēi chupe oiporara vaheṛā che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oí pípe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu perí rupi nde yuse, ahe che mbou ndeu nde mboesapíso irí āgua. Toique avei catu Espíritu Santo nde rese —ehi Saulo upe.

¹⁸ Ahese voi eté pira pírer nungar mbahe oviapipa sesa sui. Ahese voi sesapíso iri. Ichui opūha. Ipare voi Ananías oñapíramo. ¹⁹ Ipare Saulo ocaruse, ipírata catu iri. Moviro arí tēi opíta iri Jesús reroyasar píri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahír ité secói” ehi ahe pendar ava upe. ²¹ Ava opacatu osendu vahe iñehe,

—¿Mara ehi píha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar písi āgua serasopa āgua avei Jerusalén ve pahí rerecuar upe viña? —ehi yuvireco chupe.

²² Saulo rumo omombehu tuprí catu Jesús recocuer. Osecopí opacatu omu Damasco pendar. Omboyecua catu chupe Jesús Tūpa Rembiporavo ava písiro āgua secosa. Sese ndoicatui judío iñehe mboyeví yuvireco.

Saulo oñemi omu sui oamotarēhise

²³ Setá arí pare judío ahe pendar omboguai yuca āgua Saulo yuvireco viña. ²⁴ Ahe rumo oyandu omboguaisa judío osārose tecua āchisa roquendípive arí, pítu momba yuvireco yuca āgua viña. ²⁵ Jesús reroyasar rumo pítu pípe tecua tapia āchisa oyere tuprí vahe tecua rese, icupe rupi ombogüeyí iruova guasu pípe imoñemi imondo yuvireco.

Saulo Jerusalén ve secói

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osíquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tuprí tēira yandeu” ehiño oyeupe yuvireco.

²⁷ Ipare rumo Bernabé víraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar

peri rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Ari yacatu rupi apóstol rupi uguata yepi, iyavei omombehu yande Yar recocuer osiquiyeẽhisave. ²⁹ Oñehepopepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuaase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espíritu Santo oipitivií iyemboeta catu água yuvireco.

Eneas mbogüera agüer

³² Pedro uguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tẽi tui vahe ochõ araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitivií yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco.

³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, aheve omondo ñuvirío mbia seru poyava água Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivií yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava acarve. Aheve ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ. ⁴¹ Aheve oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serãcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia ombotei Tüpa opacatu guahir, güembireco reseve yepi. Iyavei omondoño ité judío pitivií água guarepochi, oyerocuavei Tüpa upe yepi. ³ Ñepei ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!”

ehi. ⁴ Omahengatuse sese, “¿Mbahe, che Yar?” ehi osiquiyepave. Tūpa rembiguai rumo omboyevī chupe: “Tūpa oipisi nde yeruresa; osepia avei nde poroparisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopitasar piri. Ahe sēta para guasu popive chini” ehi chupe.

⁷ Osose Tūpa rembiguai ichui, Cornelio oñehe ñuvirío güembiguai upe iyavei ñepe sundao Tūpa mboeteisar upe, sese acoi oyeroya vahe yepi. ⁸ Opacatu Tūpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyerogui āgua. ¹⁰ Vieporēhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbrī ipopi yacatu ou chupe. ¹² Ahe turucuar pipe, osepia opacatu mahembiar vai, mboi, vīrai vai tēi avei. ¹³ Ahese osendu ñehesa aipo ehi vahe: “Pedro, epūha, eyuca, ichui ehū” ehi chupe.

¹⁴ Pedro rumo omboyevī chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tūpa remimbocatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ēgüe ehi mbosapi oyupagüer rupi chupe. Ipare turucuar oyeve ivave oso. ¹⁷ Pedro ipihañemoñeta viteseve mbahe osepia vahecuer rese oquer nungar pipe: “¿Mbahe rese pīha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pīha?’ erei rane. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyevī ñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñvi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vahe rā sēta, ahe osendu vahe rā nde ñehesa —ehi yuvireco Pedro upe.

²³ Evocoyase omoinguepa, omombitapa oyepiri ñepe pītu. Ahere ayihive oso supi, moviro Jesús roroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sēta. Cornelio rumo osāro opacatu omu eta rese yuvireco iyavei omboriparete güembisoho reseve avei. ²⁵ Oyepotase sēta oso, Cornelio rane osē voi, osovaichi, oñenopiha sovai imboeteisa pipe. ²⁶ Pedro rumo aipo ehi chupe:

—Epūha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oi pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío procuaita aipo ehi vahe: “Peiquei rene ndahei vahe judío piri. Aní chaveira pembori evocoi ava peico” ehi acoi —ehi Cornelio rēta pipendar upe—. Tūpa rumo omombehu cheu che quer nungar pipe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe

pemondo ava che reca. Che evocoyase nacheatēhii che yu āgua pēu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rētave aicose, ndacarui eté che yerure āgua Tūpa upe. Aheseve oyemboyecua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pিরer mopítasar. Ahe sēta para guasu popive chini” ehi cheu. ³³ Sese amondo voi eté nde reca āgua. Aviye nde ereyu cohava. Cūritei co opacatu yaico cohava Tūpa rovaque. Orosendu pota opacatu nde ñehe yande Yar nde cuai vahe nde ñehe āgua oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ivi pipendar omboetēi vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñehesa tupri yeamotarēhiñehisa resendar Jesucristo rembiaporā sui, ahe opacatu ava co ivi pipendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opíratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe caruguar povrísve yuvirecoi vahe. Esepia, Tūpa secōi sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tūpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recouer rese porandu āgua oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío piha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoyase aipo ehi vupindar upe:

—¿Oime piha ndoipotai vahe co ava ñeapiramo āgua yande pāhu pendar? Esepia, co oipisi Espiritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroïro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipape opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espiritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipape aheve oroyepotase oroso, oroi que Cornelio rētave. ¹³ Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua. ¹⁴ Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—. ¹⁵ Añehe ramoseve chupe, Espiritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe. ¹⁷ Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehē, imu noñehē iri sese yuvireco. Ahe rumo, —¡Too, evocoyase Tūpa ombou avei ndahei vahe judío upe secocuer recuñaro āgua, tecovesa apirēhi vahe rereco āgua! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pīratasa vireco yuvireco. Evocoyase setá ava viroya; oseyá ité yipindar güembieroya yuvireco yande Yar reroya āgua.

²² Serācua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Tūpa sovasase.

Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

²⁵ Ipape oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepeí araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipíndar, “Cristó reroyasar” ehi yuvireco.

²⁷ Aheseve Tüpa ñehe mombehusar yugüeru Antioquía ve Jerusalén sui.

²⁸ Ñepeí ipáhu pendar, Agabo serer vahe, opüha aipo ehi Espíritu Santo píratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecurar guasu Claudio recose). ²⁹ Evocoiyase Jesús reroyasar Antioquía pendar omondo pota voi guarepochi Jesús reroyasar Judea pendar pítivii água yuvireco ocatugüer rupi. ³⁰ Égüe ehi yande Yar reroyasar rárosar Judea pendar upe porerecosa mundo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecurar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecurar guasu rembiapo, sorivete judío rerecurar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sáro água yuvireco. Mborerecurar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoiyase Pedro opita voquendasave sárombri tupri chini. Jesús reroyasar rumo oyerogui pírata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pítu pipe Pedro oque ñuvirío sundao guárosar rese. Ñapichisa ñuvirío carena pipe ou, ñuvinohambe avei sárosar soquendasa roquendipive. ⁷ Aviyeteramo tēi Tüpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epüha poyava!” ehi chupe. Ipühase, opa voi oyera carena ipo sui. ⁸ Ahese Tüpa rembiguai aipo ehi chupe: “Eyemonde, emonde nde pitaqui” ehi. Evocoiyase Pedro omonde. Ipape aipo ehi iri: “Emonde avei nde yeaosa, eyu che raquicuei” ehi chupe.

⁹ Égüe ehi oso saquicuei. Ahe rumo ndoicuai Tüpa rembiguai oyeupe égüe ehise. Ndoyavii iquerve tēi égüe ehi vahe chupe. ¹⁰ Ichui yuvinose, oñocua yipíndar guárosar yuvireco. Ipape yuviraso catumi ambuae imoñuviriosa guárosar oñocua avei. Oyepota oquenda guasu guarepochi apoprive ocarve yuvinose água yuvireco. Ahe oquenda oyemboi ahe ae ité chupe yuvireco. Ipape yuvinose yuviraso pucumi ocarusu rupi. Aviyeteramo tēi Tüpa rembiguai ndoyecua iri chupe.

¹¹ Evocoiyase Pedro aipo ehi oyeupe: “¡Too! Supi eté Tüpa ombou cheu güembiguai che renose água Herodes povri sui. Tüpa che písiro judío rerecurar che yuca rágüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyerogui yuvireco sese. ¹³ Oñehese Pedro oquenda

ocar cotindarve, cuñatai, Rode serer vahe, osẽ imboi ãgua chupe. ¹⁴ Osenduse rumo Pedro ñehe, oquenda omboi rãgüer sui, oña oi que oi pıpe vorıvetesave, omombehu: “Pe Pedro ihãı oquendıpıve” ehi oi pıpendar upe. ¹⁵ Ahe rumo, —¿Nanderocoi vo eico? —ehiño yuvıreco chupe. “ıAnı! Supı eté” ehiño Rode chupe.

—Ndahei ahe, Tüpa rembiguai mo aipo sãrosar —ehiño yuvıreco chupe.

¹⁶ Aheseve Pedro oñehe vıteño ité oquendıpıve ohã. Ichui omboise oquenda yuvıreco chupe cute, oyembosıquıye iriño tẽi sepiase yuvıreco. ¹⁷ Pedro rumo opo omopuha imonguiriri ãgua. Ichui opa omombehu yande Yar opısiro agüer voquendasa sui chupe yuvıreco. İpare aipo ehi chupe:

—Pemombehupa Santiago upe iyavei ambuae Jesús reroyasar upe —ehi. Ichui oseño, ambuaeve oso.

¹⁸ Cõhese sundao oyepıhamondıi eteanga yuvıreco. “¿Que pıha Pedro?” ehi tẽi oyeupe yuvıreco. ¹⁹ İpare Herodes omondo sundao Pedro reca. Ndoysui eté rumo yuvıreco. Evocoiyase Herodes porocuita rupı oporandu tuprı sãrosar upe: “¿Que vo secı?” ehi tẽi chupe. Sese oyocuai ambuae sundao opacatu ahe sãrosar yucapa ãgua. İpare Herodes osẽ Judea sui oso Cesarea ve oyemboerecua.

Herodes mano agüer

²⁰ Yıpındar rumo Herodes ndasoriı eté ava Tiro pendar upe, Sidón pendar upe avei. Evocoiyase ahe pendar oyoya ipıhañemoñeta yuvıraso vaheřã mborerecuar rovai. Ahe evocoiyase oyemborı Blasto rese yuvıreco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvıreco. Esepia, Herodes porocuita sui oıpısi mbahe güemihura yuvıreco. ²¹ Herodes evocoiyase omombehu ari oñehe vaheřã chupe. Osupıtise ahe ari, omonde sese iturucuar mborerecuar secosa resendar yıvirindar yuvıreco. İpare güenda imboeteıpri harıve oguapi oı. Aheve oñehe ava rehıı upe. ²² Evocoiyase ava rehıı osapucai pırata yuvıreco aipo ehi: “ıCo mbıa oñehe vahe ndahei ava tẽi, Tüpa ité!” ehi yuvıreco Herodes upe imboeteısave. ²³ Ava aipo iheseve voi, ñepeı Tüpa rembiguai oyapo mbaherası guasu chupe. Ichui mbahe rasoi ocaru yavıter rupı yuvıreco. Esepia, nomboteı eté Tüpa. Sese omano.

²⁴ Tüpa Ñhengagüer rumo imombehusa catu opacatu rupı.

²⁵ İyavei Bernabé, Saulo ocuita mboaviye pare, viroyevi Juan Marcos seraso yuvıreco.

13

Tüpa oıporavo Bernabé, Saulo oyeupe mboravıquı apo ãgua

¹ Evocoiyase Jesús reroyasar Antioquıa pendar pãhıve oıme Tüpa Ñhengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvıreco), Lucio evocoi Cirene pendar, Manaén (ahe mbıa oyoya ocuacua mborerecuar Herodes, Galilea pendar reseve) iyavei Saulo.

² Ñepeı ari opacatu Jesús reroyasar oñemonuhase yande Yar mboeteı ãgua, oyecuacu avei, ahese Espıritu Santo aipo ehi chupe: “Peıporavo Bernabé iyaveı Saulo. Evocoi mbıa aıporavo cheyeupe mboravıquı apo ãgua” ehi Espıritu Santo yuvıreco chupe.

³ Evocoiyase oyeroqui pare, omondo opo yuvıreco iporavoprı ãca harıve sovasa ãgua. İpare omondo yuvıreco ambuae tecua rupı Jesús recocuer mombehu ãgua.

Apóstol yuvirecoi Chipre rupi

⁴ Evocoyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha pāhu Chipre ve. ⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipitiviñi āgua.

⁶ Opase ité oguata caha pāhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe pirí, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoyase Saulo, Pablo serer vahe, vireco ité vahe Espiritu Santo opīha pipe, omahe tupri sese. ¹⁰ Ipape aipo ehi chupe:

—¡Nde iporombopa serai vahe ereico! ¡Ndiipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reoñrosa sui. ¹¹ Eyapisaca, cūritei yande Yar nde mombaraisura. Nande mboesapiso chira moviro ari rupi. Ichui nderecatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe. ¹² Ahe mbahe repiase, mborerecuar viroya yande Yar. Oyepihamondi porombohesa yande Yar resendar renduse.

Pablo, Bernabé reseve yuvirecoi Antioquia ve Pisidia ivi pipe

¹³ Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseyá oyevi Jerusalén ve oso. ¹⁴ Perge sui yuviraso Antioquia ve, ahe namombri Pisidia sui. Aheve, mbātuhusa ari pipe, yuviroique judío tūparove oguapi yuvino. ¹⁵ Oyeroqui pare Tūpa porocuaita resendar cuachiar pipe, Tūpa ñehe mombehisar cuachiar pipe avei, tūparo pendar rerecuar omondo oñehe Pablo upe:

—Oré mu, perecose mbahe pemombehu vaheerā co ava monguerēhi āgua, pemombehumi yandeu cūritei —ehi.

¹⁶ Evocoyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. ¹⁷ Israel iguar Tūpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipape opīratasa pipe vinosepa ahe ivi sui aracahe. ¹⁸ Ipape Tūpa oñemosañe yande ramoi reco ai upe cuarenta araviter rupi, oguatase yuvireco ivi iporupirēhisar rupi. ¹⁹ Ipape omocañi ava eta Canaán pipendar siete tupri yuvirecoi vahe serecuar reseve-seve. Ipape omondo Canaán ivi yande ramoi upe nara.

²⁰ Ëgüe ehi cuatrocientos cincuenta araviter rupi yapo yuvireco —ehi.

“Ipape Tūpa ombou ava recouer moingatusar oporocuai vaheerā. Ipa vahe ipāhu pendar serer Samuel aracahe. Ahe Tūpa ñehe mombehisar avei.

²¹ Ahese yande ramoi eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. ²² Ipape Tūpa virocua imborerecuasa ichui; omondo David upe yande ramoi cuai āgua. Ahe secocuer rese aipo ehi: ‘Co David, Isái rahir, oyapo che remimbotar

yepi. Ahe omboaviyera che porocuita' ehi Tūpa. ²³ Ahe David suindar sui, Tūpa ombou Jesús Israel iguar p̄s̄iro āgua. Aracaheve Tūpa omombehu co yande ramoi upe. ²⁴ Yande Yar yu renondeve, Juan omombehu opacatu Ísrael iguar upe: 'Pemboasi pe angaipa, peyevi Tūpa upe pe ñeapiramo āgua' ehi chupe. ²⁵ Juan omboaviye senimise ocuaita, aipo ehi ava upe imombehu: 'Pepihañemoñeta revo: co ité yande p̄s̄irora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora āgua ipi sui' ehi Juan" ehi judío tūparo pendar upe imombehu.

²⁶ "Che mu eta, pe Abraham suindar iyavei ndahei vahe Abraham suindar Tūpa mboetear, opacatu yandeu nara ombou Tūpa co ñehesa p̄s̄irosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbu secoise yuvireco. Iyavei ndosenducuai Tūpa ñehes mombehusar cuachiar pipe oyeruquise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehes mombehusar rembicuachiagüer pipendar yuvireco. ²⁸ Yepe ndoyosui mbahe sembiaporo rai yuca uca āgua yuvireco viña, ahe rumo oporandũo Pilato upe yuca uca āgua rese yuvireco" ehi. ²⁹ "Ichui omboaviyese opacatu icuachiapri pipendar yuvireco, oviroyi uca curusu sui ñoti āgua yuvireco. ³⁰ Tūpa rumo ombogüerayevi iri. ³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrítei ahe ava ité omombehu Jesús recocuer ava upe yuvireco" ehi tūparo pendar upe.

³² "Sese che mu eta, cūrítei oromombehu p̄u evocoi ñehesa aviye vahe Tūpa omondo vahe yande ramoi upe aracahe. ³³ Tūpa omboaviye ramo güemimobehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: 'Co pipe nde che Rahir ereico; che nde Ru aico' ehi Tūpa chupe.

³⁴ Tūpa omombehu avei güemimobogüerayevi sete tuyuēhi āgua icuachiapri pipe aracahe aipo ehi: 'Che niha oroovasara acoi David upe che ñehes maranehi supi tupri vahe mboaviye āgua' ehi. ³⁵ Sese omombehu avei ambuae icuachiapri pipe: 'Nde, Tūpa, ndereseyai chira nde rembiguai Ava seco maranehi vahe rete ituyupa āgua' ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvipave imu p̄ahuve yuvireco. Ahe setecuer rumo opaño ité ituyu" ehi.

³⁷ "Acoi Tūpa ombogüerayevi vahe retecuer rumo ndituyui eté" ehi tūparo pendar upe imombehu. ³⁸ "Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co ambobehumi p̄u. Moisés porocuita sui ndipoi ñeroisa angaipa rese yande reco mohivi āgua. ³⁹ Jesús recocuer sui rumo oime ñeroisa ñepeipei viroya vahe upe" ehi. ⁴⁰ "Peicua catu co mbahe sui, toviapi eme pe harive acoi Tūpa ñehes mombehusar rembicuachiagüer pipe aipo ehi vahe:

⁴¹ 'Esepia, pe seroĩrosar peico vahe. Peyepihamondii, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera p̄u che rembiaporā viña, pe rumo ndaperoyai chietera' ehi Tūpa" ehi Pablo tūparo pendar upe.

⁴² Yuvinose potase tūparo sui, omombita Pablo yuvireco: "Teremombehu irimi eremombehu vahe ñehesa ambuae mbituhusa ari pipe oreu" ehi yuvireco chupe. ⁴³ Yuvinosese ava rehi tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, "Peico tupri catu Tūpa pe rovasasa pipe" ehi ava upe yuvireco.

⁴⁴ Ambuae mbituhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua. ⁴⁵ Osepiase ava rehii, judío rereciar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco. ⁴⁶ Evocoiyase Pablo, Bernabé reseve oñehe yuvireco judío upe osiquiyeēhisave:

—Tūpa ore cuai pēu rane ore ñehe āgua. Pe rumo ndapeyapisaca potai ñehengagüer rese. Ipipe sui ndiyai peipisi tecovesa apirēhi vahe. Evocoiyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarā co ñehesa rese aracahendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe pīsirosa reroguata āgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. ⁴⁹ Evocoiyase Tūpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerēhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave. ⁵¹ Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opīratasa mbahe yavai vahe apó āgua chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yovi yuvireco: ñepe judío pihañemoñetasa rupindar; ambuae evocoiyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborrecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oī ⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. ¹⁰ Evocoiyase aipo ehi pīrata chupe:

—¡Epūha! —ehi.

Ahese opo, opūha, oguata voi. ¹¹ Osepiase ava rehii mbahe sembiapo yuvireco, osapucái pīrata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tûpa Zeus iyavei Pablo ahe tûpa Hermes viña. Esepia, Pablo oñehe vahe. ¹³ Ahese co tûpa Zeus pahi güeru tivi, mbahe potri avei. Ahe tecua tapia roquendave, ahé Zeus tûparo tecua pipe ava reiquesa rupi chini. Oyuca pota tivi Pablo, Bernabé mboetei água yuvireco viña. ¹⁴ Oicuaase rumo Bernabé, Pablo, ahese omondo oturucuar yuvinoña ava pãhuvé; oñehe pírata yuvireco:

¹⁵ —Mbia, ¿mahera éğüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe éğüe ehi tēi vahe mboeteisa sui; peroya Tûpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tûpa, “Éğüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tûpa rumo ndasesarai ava upe mbahe tupri apo água sui. Ahe ombou amar pēu mbahe miti ha aviye água yepi. Éğüe ehi mbahe tembihu imbou iyavei viharetasa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei água viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivi. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oi que iri oso tecua pipe. Ahere ayihive yuvinoſe oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yande aviye catu ité mbahe-mbahe tēi pipe yande recose Tûpa mborerecuaſave yande reique água” ehi yuvireco Jesús reroyasar upe. ²³ Ipare oiporavo ava Jesús reroyasar rãro água ñepeipei ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui água yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese. ²⁵ Omombehu Tûpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tûpa upe sovasapri yuvirecoi mboraviqui apo água. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tûpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tûpa oyocuai Moisés yande ramoi cuai água: ‘Pembocircuncida opacatu pe mu cuimbahe cheu nara’ ehi Tûpa aracahe” ehi yuvireco. “Cūritei acoi éğüe ndapeyise Jesús reroyasar upe, noñepisiroi chietera yuvireco” ehi

Antioquía pendar upe yuvireco. ² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu ãgua yuvireco.

³ Ēgüe ehi Jesús reroyasar Antioquía pendar yocuai imondo yuvireco. Oñocause Fenicia, Samaria avei yuviraso, oguatas rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tũpa rupi oguata ãgua yuvireco” ehi. Ahese opacatu Jesús reroyasar oyembovĩharete yuvireco senduse.

⁴ Yuvĩroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipĩsi tuprĩ yuvireco. Aheve omombehu Tũpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opũha voi aipo ehi yuvireco chupe:

—Anĩ —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye ãgua yuvireco —ehiño ité yuvireco.

⁶ Ahese apóstol, Jesús reroyasar rãrosar avei oñemonuha oyemomborandu ãgua aipo mbahe rese yuvireco. ⁷ Yemomborandu viteseve, Pedro opũha ipãhuve aipo ehi:

—Che mu, peicua niha aracaco Tũpa che poravo pe pãhu sui co ñehesa poropĩsirosa resendar mombehu ãgua ava ndahei vahe judío upe ‘tovĩroya yuvireco’ oyapave. ⁸ Tũpa oicua ité opacatu ava pĩhañemoñetasa. Chupe avei omondo Espĩritu Santo inungar yandeu. Ipipe sui yaicua Tũpa oipĩsi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tũpa. Esepia, opacatu oyoya pãve Tũpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoãha pota Tũpa! ¡Mahera peyocuai uca pota co Jesús reroyasar mbahe yavai rai vahe apo ãgua! Anĩ rumo. Esepia, yande ramoi ndoicatui Tũpa porocuita mboaviye ãgua yuvireco, yande avei ěgüe yahe —ehi—. ¹¹ Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondiisa Tũpa oyapo uca ava ndahei vahe judío pãhuve yuvireco chupe. ¹³ Osendupase iñehe yuvireco, ahese Santiago aipo ehi:

—Che mu, Jesús reroyasar, peyapĩsacami che ñehe rese: ¹⁴ Simón omombehu yandeu Tũpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tuprĩ Tũpa ñehe mombehusar rembicuachiagüer rese. Ñepe ipãhu pendar oicuachía aracahe aipo ehi:

¹⁶ ‘Coie catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitĩpa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehaprĩ reseve.

¹⁸ Evocoi yande Yar rembiaporã icuaprĩ aracahe suive’ ehi Tũpa ñehe mombehusar aracahe.

19 “Sese chepihañemoñeta iya ndayayocuai chira Moisés porocuita rupi oñecuñaro vaheerā ndahei vahe judío Tūpa rupi uguata āgua yuvireco” ehi. 20 “Aviye rumo yaicuachiasse chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeguasai chira, pehui rene mbahe mimba yucapri suvi renosepirēhi, mbahe ruvi avei” ehi. 21 “Esepia, opacatu tecua rupi yuvirecoi ava omombehu vahe Moisés porocuita ñepeipei mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

22 Ahese apóstol, Jesús reroyasar rārosar, ambuae Jesús reroyasar avei omondo pota opāhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri ñboetasa pāhuve yuvireco. 23 Ahe supi aipo ehi icuachía imondo yuvireco:

“Ore apóstol, Jesús reroyasar rārosar, pe mboetasa oroico vahe. Pe mboaviravesa, ndapemaraí revo pe ndahei vahe judío Antioquía pendar, Siria pendar, Cilicia pendar avei. 24 Oroyandu amove ava ore pāhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta roeva. 25 Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. 26 Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. 27 Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. 28 Aviye Espíritu Santo upe, oreu avei co porocuita güeraño oromondo vahe rese pēu. Ndade cuaisa pota iri rumo ambuae mborocuita rese. 29 Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mimba yucapri suvi renosepirēhi vahe iyavei ndapeguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

30 “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. 31 Ahe cuachiar rese oyoquise, oyemboviharete yuvireco. 32 Judas, Silas Tūpa suindar ñehesa mombehusar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe. 33 Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mboasar upe” ehi yuvireco chupe. 34 Silas rumo opita potaño ité aheve. 35 Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite āgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu āgua

36 Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

37 Ahese Bernabé viraso pota Juan Marcos oyeupi viña. 38 Nomboyoyai rumo Pablo ipihañemoñeta rese. Esepia, cuese Juan Marcos oseyaño oyeptase yuvireco Panfilia ve. “Taipitiviño iporaviquisa rese” ndehi chupe. 39 Nomoingatuise mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve. 40 Pablo rumo oiporavo Silas oyeupi icho āgua. Yuvinose āgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pipe”

ehi yuvireco imondo. ⁴¹ Ipare yuviraso Siria, Cilicia rupi Jesús reroyasar monguerëhi catu ägua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. ² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroïroëhi ägua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoiyase opacatu tecua iguatagüer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tüpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaherã Tüpa Ñehengagüer mombehu ägua. Sese oyahuva yuviraso Frigia rupi, Galacia rupi avei. ⁷ Ègüe ehi oyepota Misia popiye yuvireco. Ichui yuviraso pota tēi Bitinia ve. Jesús Espiritu rumo ndoipotai icho ägua supi. ⁸ Ahese osasaviño yuviraso Misia sui carite guasu yemboyasa Troas ve oyepota ägua yuvireco. ⁹ Oyepotase aheve, ahe pïtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pïtivii ägua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ägua. Esepia, ore oroicua ité Tüpa aheve ore mondora ñehesa pïsirosa resendar mombehu ägua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico. ¹³ Mbituhusa ari pipe orosē evocoi tecua sui iai popiye. “Aheve oñemonuhara judío oyerokuï ägua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pïsirosa resendar yuvireco chupe. ¹⁴ Ñepeï imboetasa, Lidia serer vahe, Tiatira pendar, oyapisaca ore ñehere oï. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ägua Pablo remimombehu rese. ¹⁵ Sese ñapiramosa, opacatu sēta pendar reseve. Ipare ore mombita pota güëtave.

—Che reroyase peye yande Yar reroyasar che recose, pepitara che rētave —ehi oreu.

Ègüe ehi ore monguerëhi. Sese oropita sētave ipiri.

¹⁶ Ipare ambuae ari oroso irise oroyeroqui ägua, cuñatai ore rovaïchi, ahe cuñatai caruguar pïratasa pipe mbahe mombehusar. Oicatu ava upe mbahe oime vaherã mombehu. Omombehuse mbahe, setã oipisi sepi guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tūpa ivate catu vahe upendar oporaviqui yuvireco omombehu: “Na ehira Tūpa yande pīsīro” ehi yuvireco! —ehi pucu-pucu ore mombehu ava upe.

¹⁸ Setá ari ēgüe ehi oico oreu. Omañeco tēise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esē co cuñatai sui —ehi.

Aheseve voi carugar osē ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaivu guasu tēi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña āgua —ehi yuvireco mborerecuar upe.

²² Evocoyase ava eta oyamotarēhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pīrata soquendapri rārosar yuvireco, “Esāro tupri” ehi yuvireco chupe. ²⁴ Aipo oyeupe he ramoseve, soquendapri rārosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pītu mbiter rupi rumo Pablo, Silas oyeruqui, osapucui Tūpa mboetisave yuvireco. Āmbuae ava soquendapri evocoyase osenduño tēi yuvireco isapucui. ²⁶ Ahese aviyeteramo tēi ivi orirīi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca āgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepia, opacatu oroicoveño cohave! —ehi pucu soquendapri rārosar upe.

²⁹ Evocoyase soquendapri rārosar, “Emboumi tataendi” ehi ondugüer upe. Ichui oña oique, orirīi, osiquiyepave oñenopiha Pablo, Silas rovai oso.

³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro āgua vichico? —ehi chupe.

³¹ —Eroya yande Yar Jesucristo. Ichui ahe nde pīsīrora, nde rēta pendar avei —ehi yuvireco chupe.

³² Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei. ³³ Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco. ³⁴ Viraso pare sārosar güétave, ombocaru. Ahe sēta pendar avei oviharete ité yuvireco Tūpa reroyasa rese.

³⁵ Cōhese mborerecuareta omondo sundao ava rese icuaiipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

³⁶ Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose āgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoorandu rane angai eté rumo mbahe rese oreu. Ore roquendapa voñño

tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose āgua —ehi soquendapri řárosar upe.

³⁸ Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero āgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia řetave. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tūparo. ² Secocuer rupi eté mbituhusa ari pipe Pablo oiQue judío tūparove, oñemoñeta ava eta upe mbosapi mbituhusa ari rupi Tūpa Ñehengagüer rese. ³ Omboyecua tupri imombehu Tūpa Rembiporavo ava pīsiro āgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tūpa Rembiporavo ava pīsiro āgua —ehi.

⁴ Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracusa reroyasar avei. Ipāhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoĩrombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaivu guasu uca tēi ahe ava upe opacatu güecua pipe yuvireco. Yuviraso Jasón řetave Pablo, Silas reca, vinose pota ava rehii pāhuve yuvireco viña.

⁶ Ndoyosuise rumo aheve yuvireco, virasoño Jasón, ambuae Jesús reroyasar avei güecua rerecuar rovaí yuvireco. Viroāse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrteitē oyepotapa yuvireco cohave! ⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe pītu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe. ¹¹ Berea pendar ava aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pīha Pablo ñehesa?’ oyapave yuvireco. ¹² Evocoiyase setá avei Pablo ñehe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaivu guasu tēi uca āgua ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco.

Silas iyavei Timoteo rumo opita viteño aheve yuvireco. ¹⁵ Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuviraso voi ñgua Pablo piri ahe tecuave yuvireco.

Pablo Atenas ve secoi

¹⁶ Pablo osãro viteseve Silas iyavei Timoteo Atenas ve oico, ndoyembovïhai osepiase opacatu rupi tûpa rahanga-anga tõi. ¹⁷ Sese judío tûparo pipe omombehu Jesús recocuer judío eta upe iyavei ambuae Tûpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. ¹⁸ Evocoyase amove mbia oyembohe vahe epicûreco aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroïrosave:

—¿Mbahe rese angahu pïha co mbia ñehe papa rai ava upe oico? —ehi.

Ambuae aipo ehi yuvireco:

—Ndoyavï co mbia oñehe vahe ambuae ava Tûpa rese tõi —ehi yuvireco.

Esepia, omombehu Jesús recocuer iyavei cuerayevisa resendar.

¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducia uca tupri catumira co porombohesa piasu resendar oreu viña? ²⁰ Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoyase Pablo opïha ahe ava pãhuve aipo ehi:

“Pesendu rane Atenas ñguar. Aguatase ocar rupi asepia pe tûpa eta pemboetei vahe. Ahesese asepia ñepeï tûpa upe seropovëhepri renda. Sese asepia icuachiapri aipo ehi oï: ‘Tûpa ndicuasai vahe upendar’ ehi. Evocoi Tûpa ndapeicua vitei vahe, ahe secocuer niha amombehu pëu” ehi.

²⁴ “Evocoi Tûpa oyapo vahe co ivi, opacatu mbahe ipor avei. Ahe niha ivi, ñva Yar secoi. Sese ndasecoi tûparo ava tõi rembiapo pipe. ²⁵ Ndahei ava rembiapo pipe sui tõi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pïtuhesa iyavei opacatu mbahe oime vahe ivi, ñvave” ehi.

²⁶ “Tûpa oyapo opacatu-catu tõi ava ñepeï ava sui ava yesu ñgua opacatu ivi rupi. Omondo ivi ava yemboerecua ñgua ñepeï-peï upe. Ari avei omondo co ivi pipe iyemboerecua ñgua yuvireco chupe. ²⁷ Ñgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ñgüe ehi rumo Tûpa yande resevemi eté. ²⁸ Esepia niha, Tûpa sui yaicove, ipïratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tûpa suindar’ ehi yuvireco. ²⁹ Sese yande Tûpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tûpa’ ndayahehi chira. Esepia, mbahe rahanga ava rembiapo tõi, ndahei Tûpa” ehi. ³⁰ “Pe ramoi ndoicua tuprirese yuvireco aracahe, Tûpa oñemosañ mbahe sembapose rese chupe. Cûritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer

rese porandu uca ãgua güecocuer ïvi tuprisa pipe ñepeï güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroïrosave. Ambuae rumo aipo ehi yuvireco:
—Torosendu irimi aipo ñehesa curi —ehi yuvireco.

³³ Sese Pablo osê ipãhu sui oso. ³⁴ Moviro rumo mbia oyemboya sese, viroya ité vahe ñehesa yuvireco. Ahe ipãhuve seci mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve seci

¹ Coiye catu Pablo osê Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvínose ñepeï tecua Italia rupindar Roma sui oyocuaise mborerecuar guasu Claudio: “Toyuvínose ité opacatu judío Roma sui” ehise. Pablo oso, ³ opita Aquila piri oporaviqui ãgua. Esepia, Pablo, Aquila avei ahe mbahe pírer mbovivisar pãve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: “Jesús niha Tũpa Rembiporavo ava písiro ãgua seci” ehi. ⁶ Ñeñe-ñeñe tẽi rumo seroïrosave yuvireco chupe. Sese Pablo oipipete oturucuar sovaque ‘oimera mbahe tẽi pẽu’ oya, iyavei aipo ehi chupe yuvireco:

—Pe ae niha peseca Tũpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pẽu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoiyase Pablo osê judío tũparo sui, oi que mbia Ticio Justo serer vahe rêtave, ahe Tũpa mboeteisar avei seci. Ahe sêta judío tũparo iqueve. ⁸ Crispo, ahe judío tũparo rerecuar viroya avei yande Yar, opacatu sêta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñepeï pĩtu pipe yande Yar oñeñe Pablo upe iquer nungarve: “Eresiquiyei rene, ereñeñe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pipe” ehi yande Yar chupe. ¹¹ Evocoiyase opita ñepeï araviter yemombitesa rupi Corinto ve oico. Aheve ombohe Tũpa Ñhengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarẽhisave. Ichu viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tẽi ava oTũpa mboetei ãgua. Ndahei rumo Roma pendar porocuita rupi ãgüe ehi yuvireco —ehi yuvireco seroïrosave chupe.

¹⁴ Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca āgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuita resendar rese tēi. Pemoingātu pe ae pe recocuer; ndaipotai aipo nungar mbahe moingatu āgua —ehi Galión ahe ava upe.

¹⁶ Ipare opa omboyepēpi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevī irisa Antioquía ve

¹⁸ Pablo secōi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye āgua. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oi que judío tūparo pipe Jesús resendar ñehesa mombehu āgua chupe yuvireco. ²⁰ Ahe pendar omombita pota vite tēi yuvireco viña, Pablo rumo ndopita potai aheve. ²¹ Evocoyase, “Aviye, taso rane” ehiño chupe yuvireco. “Tūpa oipotase cheu, ayevi irira vito pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo āgua Jesús reroyasar upe. Ipare oso Antioquía ve. ²³ Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu āgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandro i guar. Oñehe tupri ai vahe, oicua tupri avei Tūpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oāpiramo agüer güeraño tēi. ²⁶ Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tūpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu āgua yuvireco. ²⁸ Omboyecua opacatu rovaque judío pihañemofetasa co coti tēi vahe. Ahese opa oseco pi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava písiro āgua secōi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:

—¿Peipisi vo Espiritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoiyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoiyase aipo ehi ahe ava upe:

—Juan niha oñapiramo acoi omboasi vahe oangaipe oyevisé Tũpa upe. Ipare rumo omombehu ava upe: “Peroya ahe eté vahe ou vaheã che raquicuei” ehi. Ahe ou vaheã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tẽi oñehe ambuae ñehesa pipe iyavei omombehu Tũpa suindar ñehesa yuvireco. ⁷ Ëgüe ehi Tũpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tũpa Ñehengagüer judío upe osiquiyeeñhisave itũparo pipe ipihañemoñeta rerova ãgua Tũpa mborerecuasa resendar rerova ãgua rese. ⁹ Amove rumo judío ipihaviracua ité seroyañhi ãgua yuvireco. Ipipe iñehe-ñehe tẽiño co tecocuer ipiasu vahe mombehusa rese yuvireco ava rehii rovaque. Evocoiyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ëgüe ehi ñuvirio araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tũpa omondo güeco pĩratasa Pablo upe poromondiisa apo ãgua. ¹² Sese pañueru iyavei turucuar Pablo rese imbopyari, ahe serasosa imbaheasi vahe upe imbogüera ãgua. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose ãgua ava sui. Sese nara oiporu pota yande Yar Jesús rer yuvireco.

¹⁴ Evocoiyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pẽu” ehi. Ëgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecar seoi. ¹⁵ Carugar rumo omboyeve chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipãhuvẽ oso. Opacatu opĩratasa pipe opa ité osecopi siete mbia yuvirecoi vahe. Omomara-mara tẽi uguayieñhisa pipe imonanipa tupri imondo. ¹⁷ Co mbahe sembiapo rẽracua opa oyepota opacatu Efeso pendar upe, judío upe, ava ndahei vahe judío upe avei. Evocoiyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi ãgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri. ²⁰ Ëgüe ehi Tũpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve”

ehi. ²² Evocoyase omondo ñuvirío opitiviisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secói. Ahe oyapo Artemisa rêta rahanga guarepochi apopri guarepochi pisi âgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, avâ mboaivu guasu uca âgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tûpa ité’ ohesa pipe yande rembiapo uve. Ndahei rumo cohapeño êgüe ehi, opacatu Asia rupi êgüe ehi avei imombehu. ²⁷ Aviyeteramo mbahe têi oimera yandeu yande poraviquisa mocañi têi âgua, tûparo guasu Artemisa upendar aviyeteramo ocañi têi aveira. Opacatu Asia pendar iyavei ava opacatu ivi rupindar omboeteli acói Artemisa rahanga guasu yuvireco viña. Aviyeteramo rumo ava nomboeteli iri chira, iyavei viroïrora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoïrosa pipe virosapucaí aipo ehi yuvireco: “¡Imboetepri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu têi. Osapucaí vahe oipisi Gayo iyavei Aristar, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasave. ³⁰ Pablo oique pota têi ava rehii pâhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucaí pîrata ñepeí mbahe rese, amove osapucaí ambuae mbahe rese. Esepia, yaivu têi yuvireco. “¿Mahera vo evocoyase yañemonuha?” ehi têi setá ipâhu pendar yuvireco. ³³ Amove rumo ava rehii pâhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu âgua ava rehii rovaque yuvireco. Alejandro evocoyase omopuha têi opo ava monguiriri âgua viña. Osepi pota omu judío ava rehii rovaque viña. ³⁴ Ava rehii rumo oicuasé Alejandro judío secose yuvireco. Opacatu guasu osapucaí pîrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Êgüe ehi ahe osapucaí ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatuse ava monguiriri âgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tûparo rese yande hañecosa iyavei sahanga ìva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaheñe che remimombehu rese. Sese peyemonguiririño, peyapoi rene mbahe pe yapisacâñisave. ³⁷ Peruño têi eté co ñuvirío mbia cohove, ndoyapoi rumo mbahe têi Artemisa upe yuvireco. Nimondai mbahe rese itûparove, ndoviroïroi avei serer yuvireco. ³⁸ Sese Demetrio iyavei oporaviqui vahe supi ahe oñemoïrose que ava upe, toyuvirasu rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu âgua. ⁴⁰ Mborerecuar revo oyandura yande rembiapo co pipe, ‘¿Mahera peaivu guasu têi? ¿Che amotarêhimbave tie êgüe peye?’ ehi tiêtera yandeu.

Oporanduse yandeu, ndayaicatui chitiêtera imboyeve ãgua iñehe chupe. Esepia niha, co yañemonuha yande remimbotar tēi cohave” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aïvu guasu pare, Pablo, “Toyugüeru” ehi ava Jesús reroyasar upe. Aheve omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerêhi-rêhi avei ambuae Jesucristo reroyasar yuvirecoi vahe tecua-tecua rupi. Ipare oyeputa Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyeve iri oso Macedonia ve ivi rupi. ⁴ Yuviraso moviro mbia supi, ipãhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuviraso Pablo renondeve sãro ãgua Troas ve. ⁶ Pieta pan ndayapepoi vahe hu pare, orosê tecua Filipo sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oñemonuha pan hu ãgua. Aheve Pablo oporombohe oico pïtu mbiter rupi. Esepia, ahe osê pota ahere ayihive voi ichui. ⁸ Ahe oi ivate vahesave ñemonuhasa pipe setá tataendi. ⁹ Mbïa chihivahe, Eutico serer vahe, metanave oguapi oï. Pablo rumo oñehe pucú iteanga. Evocoyase omboopesi ahe chihivahe. Ipare oqué; aviyeteramo tēi oviapi oi ivate vahe mbosapisa sui. Aheve ava ogüeyi sehögüer rupi ivi sui yuvireco. ¹⁰ Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiqüeyi rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoyase co mbïa chihivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco ãgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. ¹⁸ Oyeputase yuvireco chupe, aipo ehi: “Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pãhuve vichico che reco asiêhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicatui ñehesa aviye vahe mombehuêhi pëu mbahe aviye ãgua yepi. Che opombohe ava rehii rovaque, opombohe avei ñepei-peï pe rêta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe

angaipa; peyevi Tüpa upe, peroya avei yande Yar Jesús' ahe" ehi. ²² "Cūrítei asora Jerusalén ve vichico. Aheve che so āgua Espiritu che cuai che pīha pipe. '¿Mara ehira pīha yuvireco peve cheu?' aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda āgua iyavei che mombaraisu āgua yuvireco yepi" ehi. ²⁴ "Ndacherecatēhi rumo cheyese che mano āgua. Che rumo amboaviye potaño ité che poraviquisa Tüpa upe, ahe yande Yar Jesucristo che cuai vahe co ñehesa icatupri vahe mombēhu āgua. Co Tüpa oporoaisusa pipe ombou ñepepe vahe Guahir ava pīsiro āgua" ehi.

²⁵ "Opa niha Tüpa mborerecuasa amombehu pēu. Che rumo aicua ndache repia iri chira peye. ²⁶ Sese tapeicua cūrítei: ndayavii eté che cuaita mboaviye āgua co tecocuer aviye vahe mombehu pipe pēu. ²⁷ Esepia, ndaicuacui eté Tüpa Ñehengagüer mombehu; che rumo amombehu ité opacatu Tüpa recocuer pēu. ²⁸ Sese peñearo tupri, pesāro avei opacatu Jesús reroyasar Espiritu Santo porocuita rupi. Inungar ovesa rārosar, ēgüe peye tuprira sāro. Ahe Tüpa remimboepi yuvirecoi. Esepia, Jesús oipiyere vuvi opacatu ava angaipa repirā. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pāhuve opacatu Jesús reroyasar mocañipa pota āgua. ³⁰ Oime aveira que ava pe pāhu pendar pe mbopa pota aveira yuvireco pe reraso āgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pītu, ari yacatu rupi avei che yasehosa pipe pe rereco" ehi.

³² "Sese, che rivireta, opoeyara Tüpa povrive iyavei ñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pāhuve. ³⁴ Peicua niha acoi che po pipe ité aporaviqui che recove āgua, che rupindar recove āgua avei. ³⁵ Ēgüe ahe amboyecua che recocuer pēu. Supi avei ēgüe peyera; yaporaviqui tupri iparaisu vahe rese hañeco āgua. Pepihañemoñeta acoi yande Yar Jesús remimombehu rese: 'Sorivete catu ava iporereco vahe, mbahe oipisi vahe sui' ehi aracahe" ehi Efeso pendar Jesús reroyasar rārosar upe.

³⁶ Oñehe pare, oñenopiha oyerure āgua opacatu omboripar reseve. ³⁷⁻³⁸ Ndoyembovihai eté, "Ndache repia iri chira peye" oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipape yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoiyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaheerā Fenicia ve, ahe ipipe oroha, oroso. ³ Orosasase para guasu oroso, orosepia caha pāhu guasu Chipre serer vahe. Ahe oroñocua yande mbahe rese pocoñehisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya āgua. ⁴ Aheve orosepia Jesús reroyasar yuvirecoi vahe. Aheve oropita siete ari ipiri. Yepe ahe Jesús reroyasar aipo ehi Pablo upe yuvireco: "Espiritu Santo oñehe oreu. Evocoiyase eresoi rene Jerusalén ve" ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru,

güembireco, guahir reseve-seve ore rupi. Aheve oroñenopihapa ore yerure ägua. ⁶ “Aviye, toroso rane” ore he pare chupe yuvireco, oro ha carite pipe. Ahe evocoyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ägua. Aheve oropita ñepe i ari. ⁸ Ahere ayihive oroso Cesarea ve. Aheve oroiqe, oropita Felipe rêta ve, ahe oguata vahe Jesús recocuer mombehu. Ahe mbia iporavopri seci aracaco ambuae seis yuvirecoi vahe pâhuve. ⁹ Evocoi Felipe vireco irungatu guayri ndomendai vahe. Tayri Tüpa ñehe mombehusar pâve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tüpa ñehe mombehusar seci. ¹¹ Ouse ore pâhuve, viroca Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar apichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tēi chupe. ¹³ Omboyevi rumo oreu:

—¡Mahera peyaseho che rese, ndache mbovihai peye! Che rumo ayemoin-gatu voi che apichi uca ägua, che mano ägua rese avei Jerusalén ve yande Yar Jesús recocuer rese —ehi oreu.

¹⁴ Ndorocatuise ipihañemoñetasa rerova ägua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ägua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe oremougue oyepiri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rárosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tüpa mbahe oyapo uca vahe ava ndahei vahe judío pâhu rupi. ²⁰ Osenduse, omboetei guasu Tüpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuaita arachendar mboaviye ägua yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “Peseya Moisés porocuaita. Pembocircuncida iri rene pe rahir. Peico iri rene yande recocuer arachendar pipe” aipo ehi tēi oico” ehi nde mombehu yuvireco —ehi Pablo upe yuvireco—.

²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuaita oromombehu vahe ndeu. Oime irungatu mbia ore pâhuve. Ahe mbia omboaviyera güemimombehu Tüpa upe yuvireco.

²⁴ Eraso co mbia ndeyeupi, eñemoatiro supi eso, emboepi avei mbahe Tüpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuaita, opacatu judío nde reroyara, oicua va ava semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuaita —ehi yuvireco chupe—. ²⁵ Ndoroyocuai rumo ava

Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri seropovēhepri vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oreyevira siete ari pipe oromobase ore ñemoatirosa. Ahese oromondo pota ndeu porerecosa Tūpa porocuita rupi icuavēhepirā” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipare ipisise, ²⁸ sāse yuvireco: “¡Ore mu, ore pītivii peye co mbia oropisi vahe rese! Esepia, oguata opacatu rupi. Oñehe tēi yande rese, Moisés porocuita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūriteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco. ³¹ Oyuca potase yuvireco, ahese yaivu rēracua oyeputa sundao rerecur guasu upe.

³² Cūriteimi serecur viraso sundao, yuvinoña yaivu vahe upe yuviraso. Osepia ava sundao rerecur guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecur guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoiyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepe mbahe rese oñehe, ambuae, ambuae mbahe rese tēi yuvireco. Evocoiyase sundao rerecur ndoicatui supi eté vahe mbahe rendu āgua yaivu guasu vahe pāhuve. Sese, “Peraso cuartelve” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecur guasu upe:

—¿Iyacatu vo yañemoñeta raimi? —ehi.

Evocoiyase, omboyevi mborerecur chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecur ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecur chupe.

³⁹ Evocoiyase,

—Che judío, tecua Tarso pendar aico. Ahe tecua Cilicia pipendar imboeteipri vahe secui. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoiyase mborerecur, “Aviye” ehi chupe. Ipare opūha yeupisa harive, omopuha opo ava eta monguiriri āgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

1 “Che mu eta, peyapisaca, che añehemira che yoepi ãgua p̄u cūritei” ehi.

2 Oñehe hebreo ñehe pipe. Sese osenduse, oyapisaca tupri catu yuvireco.

3 “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerokisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tūpa mboetei ãgua rese vichico inungar pe peico cūritei. 4 Che yipindar aseca-seca catu ava co Tecocuer Piasu rupi oguata vahe yamotarēhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. 5 Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroiyasar pisi ãgua. Ichui taruca cohove imombaraisu ãgua’ ahe viña.

Pablo omombehu oñecuñaro agüer

6 “Evocoiyase aso Damasco ve. Ahe ipiar rupi arovisé vicho mbiter arí rupi, aviyeteramo tēi osesape guasu íva sui oreu. 7 Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. 8 Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. 9 Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. 10 Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporã’ ehi cheu. 11 Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

12 “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbia aviye vahe ité’ ehi yuvireco chupe. 13 Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. 14 Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua ãgua. Oipota avei eresepia vaherã ichuindar ava seco ívi vahe, eresendu aveira ñehe’ ehi. 15 ‘Nde evocoiyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. 16 ‘Evocoiyase, cūritei ndiya iri eresãro’ ehi. ‘Epūha, toroãpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

17 “Coiye catu, aveyi irise Jerusalén ve, ayerunde tūparo guasu pipe. Ahese che quer nungarve asepia mbahe. 18 Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. 19 Che aipo ahe chupe: ‘Che Yar, opacatu che cua nde reroiyasar roquenda-quendase, ainupa-nupa ucasa avei aguatase judío tūparo yacatu rupi’ ahe. 20 Aipo ahe avei chupe: ‘Oyucase Esteban yuvireco, ahe nde recocuer mombehúsar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeaosá vihá’ ahe chupe. 21 Che Yar rumo omboyevi cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehí upe.

Pablo sundao rerecuar guasu povrive secói

²² Aipo rupi osendu iñehe yuvireco. Ahese rumo osapucaí pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. ²³ Osapuca-pucaí, osequiipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotarẽhimbave. ²⁴ Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse atĩ yamotarẽhimbave ava yuvireco chupe” ehi osundao upe. ²⁵ Oñapichise rumo inupa ãgua yuvireco, Pablo omombehu ñepeĩ sundao rerecuar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborerecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbia romano secõi —ehi.

²⁷ Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuase Pablo romano secõsa rese, osiquiye ñapichi ucasa.

Pablo oyoepi judío porandusa ivate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe: —Che mu, che rembiapo mbahe tupri Tũpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuita rupi ereĩ. Evocoyase, ¿mahera eroporocuai che yurupete ãgua mborocuita mboyeroaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehopepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tüpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sãse guasu yuvireco. Ahese oime amove opüha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tüpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pïtu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyēhisa pipe cohave Jerusalén ve, ēgüe ere aveira che mombehu Roma ve” ehi.

Omboguai Pablo yuca ãgua yuvireco

¹² Ahere ayihive setá judío oñemonuha, omboguai Pablo yuca ãgua yuvireco: “Tüpa rovaque ndayayucaise Pablo, ndayacarui chira, ndayañhui chiaveira; yayucase voi, yacarura, yaihora” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tüpa rovaque Pablo; ndorocarui chira ndoroyucaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētïrora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu.

¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chihivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chihivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chihivahe sundao rerecuar guasu upe” ehi. Co chihivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri ãgua ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tēira yuvireco ndeu —ehi—.

²¹ Ndereroyai chira ahe iporandusa yuvireco. Esepia, cuarenta sui setá catu ava oquētïro vahe rã yuvireco sese. Omboguai eté yuca ãgua yuvireco. Ndocarui, ndoiñhui chira aipo ndoyucaise yuvireco. Cūritei oyemoingatu, osãro viteño nde porocuita yuvireco —ehi mbia chihivahe chupe.

²² Ipare sundao rerecuar guasu omboyevü imondo, aipo ehi chupe: “Eremombehu rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vahe rã opi rese, ambuae setenta sundao cavayu harive iyavei doscientos tupri

toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi āgua. Ēgüe peye pesāro tuprira seraso yande rerecuar Félix upe” ehi. ²⁵ Evocoiyase sundao rerecuar guasu oicuachia Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca āgua viña. Che rumo aicua romano seco rese, ahese araso sundao sepi āgua judío eta sui ²⁸ ‘¿mbahe rese pīha ndoyambotai yuvireco?’ viya. Sese araso judío porandusa ivate catu vahe pendar upe inemonuhasave yuvireco. ²⁹ Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei. ³⁰ Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoiyase ahe pītu pipe sundao viroguata Pablo ocuita rupi yuvireco, viraso Antipatris ve yuvireco. ³² Ahere ayihive sundao yuviraso vahe opi rese oyevi yugūeru cuartelve. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoiyase oyocuai opitiviisar Pablo rāro āgua güetave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugūeru Cesarea ve. Ou avei mbia ava mbahe aposar pītiviisar oñehe vaherā Pablo amotarēhi uca āgua, ahe serer Tértulo. Ahe yugūeru Pablo recocuer mombehu āgua mborerecuar Félix upe. ² Evocoiyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” oroho ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe opiratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe oroho chupe —ehi Tértulo.

⁹ Aipo ehi tupri avei ambuae judío yugūeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesá pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tûpa mboetei âgua. ¹² Co judío oicua yuvireco ñañehengatai ava upe tûparo guasu pipe, namboaiyu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatu eté mbahe che rembiavi mombehu seroya tupri âgua yuvireco ndeu. ¹⁴ Co rumo amombehu vahe ndeu: che amboetei Tûpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuaita pipendar iyavei Tûpa ñehe mombehusar rembicuachiagüer avei —ehi—. ¹⁵ Inungar co mbia, êgüe ahe tupri avei aicua Tûpa ombogüerayevira ava omano vahecur seco aviye vahe, ndaseco pōrai vahe avei coiye. ¹⁶ Sese ayemoviracua tupri che pihañemoñetasa rereco tupri catu âgua yepi Tûpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo âgua. Ahese avei mbahe mimba ayuca uca Tûpa upe seropovêhe âgua. ¹⁸⁻¹⁹ Evocoyase moviro judío Asia pendar che repia yuvireco Jerusalén ve tûparo pipe judío porocuaita rupi che ñemoatiro pare. Ndipoi ahese ava rehii che rupi, namboaiyu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarêhisa yuvireco viña. ²⁰ Anise, aviyeteramo co oyepota vahe cohawe yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoãha âgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rāro âgua: “Eremondomira rumo que mbahe semimbotar apo âgua chupe iyavei imboripar yugüeruse, tihañecoño yuvireco sese. Êgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tûpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri âgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osê âgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta âgua sese. ²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha âgua, oseya Pablo soquendasave.

¹ Mbosapí ari oyepotare Festo osē Cesarea sui, oso Jerusalén ve. ² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohove oreu” ehi yuvireco ‘yayuca perí rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayeví piavira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara água —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyeví oso Cesarea ve. Ahere ayihive oguapí güendave ava reco moingatu água oí. Ahese oyocuai Pablo reru água. ⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatui eté rumo seroya uca água yuvireco. ⁸ Esepia, Pablo aipo ehi oyoepisave:

—Ndayemboangaipai judío porocuita rese, judío tūparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vaherā? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeví chupe:

—Cūritei aico cohove romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. ¹¹ Ayapose que mbahe naporai vahe, aviyeño che yuca uca água eve; ndayapoise rumo co judío omombehu vahe yuvireco ndeu, ndiyai che mondo água evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu água —ehi.

¹² Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo água Festo upe yuvireco. ¹⁴ Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeí mbia soquendapri oseya vahe Félix cheu —ehi—. ¹⁵ Arose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶ Ahese aipo ahe yuvireco chupe: “Ndiyai eté romano mborerecuar omondo vaherā que ava uve sese oñemoñeta vahe rese mbahe moingatuēhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohove yuvireco, aporandu voi pota secocuer rese chupe. Evocoyase ñepeí ari pare aguapí che rendave porandusave. Ahese ayocuai che pitiviisar evocoi mbia reru água —ehi—. ¹⁸ Evocoyase opūha sese oñemoñeta vahe sembiapo ai mombehu água. Asendu renondeve che pihañemoñeta: “Oyapo revo mbahe naporai vahe” ahe viña. Ndiipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

20 “¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—. ²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitiviisar Pablo reru āgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucái pīrata tēi yuvireco ‘¡tomano ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe. ²⁶ Ndarecoi rumo mbahe naporai vahe aicuachía vaherā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—. ²⁷ Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi: ² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

⁴ “Opacatu judío che cua vahe yuvireco, oicua tupri che recocuer che chíhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūrítei che reru nde rovai yuvireco che recocuer rese nde porandu āgua. Esepia, aroya Tūpa remimombehugüer ore ramoí uve omombehu vahe aracahe” ehi. ⁷ “Doce ore ramoí suindar opacatu judío yuvirecoi, osāro vite evocoi Tūpa remimombehugüer aviye vahe yuvireco. Sese yuviroique tūparove ari, pītu pipe avei Tūpa mboetei āgua yuvireco. Ore rerecuar Agripa, eyapisaca tupri che ñehe rese. Evocoi Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tūpa porombogüeraveyisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo āgua rese ava Jesús, Nazaret pendar, rer amotarēhisave. ¹⁰ Ēgüe ahe Jerusalén ve. Ombouse pahí rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ēgüe ahe aguatá opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoyase aso avei Damasco ve Jesús reroyasar mombaraisu āgua, pahí rerecuar ombouse oporocuita apo āgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei. ¹⁴ Orovíapipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. ¹⁵ Evocoyase amboyevi: ‘¿Ava vo nde ereico, mbía?’ ahe chupe. Omboyevi cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheerā chupe curi, viya ndeu’ ehi. ¹⁷ ‘Oropīsiora judío sui iyavei oromondora ava ndahei vahe judío upe. Ereguatase ipāhuve, oropīsiora aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipípe sui toyuvireco iri eme carugar povrive yuvireco; toguata catu Tūpa rupi; ēgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tūpa porrecosa oime vaheerā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoyase, che rerecuar Agripa, che quer nungarve asepia vahe íva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tūpa upe. Peicoe tupri, ipipe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coipe catumi ava ndahei vahe judío upe. ²¹ Sese tēi judío che písi tūparo pipe che yuca pota yuvireco” ehi. ²² “Tūpa che pītiviisa pipe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: ‘Tūpa Rembiporavo Poropīsiosar omano ranera’ ehi. Ahe rumo yipindar ocuer-ayeve vaheerā omano vahe pāhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepisave, Festo oñhengataño chupe aipo ehi: —¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyeve chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supí eté vahe, ndahei che aracuaēhisave —ehi Festo upe—. ²⁶Co mborerecar revo oicua tupri avei che remimombehu. Sese ndasiqiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. ²⁷Ore rerecar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

²⁸Ahese Agripa omboyeví chupe:

—Moviro tēi ñehesa ipane cheu Jesús reroya āgua —ehi chupe.

²⁹Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reso āgua. Ndahei chira rumo soquendapirā peico —ehi.

³⁰Aipo ihe pare, mborerecar guasu iyavei ambuae mborerecar Berenice reseve iyavei opacatu sendusar opūha yuvireco. ³¹Oyepēpi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³²Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña —ehi Festo upe.

27

Pablo imondosa Roma ve

¹Evocoyase mborerecar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecar seci, ahe yuvirecoi vahe rer Mborerecar upendar. ²Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. ⁴Sidón sui orosirise, oroso Chipre ivi rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pirata ivitu icoti sui. ⁵Evocoyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶Aheve sundao rerecar oyosu carite ou vahe Alejandría sui, oso vaheṛā Italia ve. Evocoyase ahe ipipe opa voi ore mboha. ⁷Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pirata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸Supi yavai rai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹Ore yepota āgua aheve, setá ari oromocañi. Ahese ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰—Mbia, naporai iri chira revo yande guata vite āgua. Yaguata vitesse, yamocañira carite, ivosiita reseve, yande avei eté aviyeteramo yacañi tēira —ehi.

11 Sundao rerecuar rumo nomboyeroyai iñehe, ahe omboyeroya catu carite reroguatasa, carite yar avei. 12 Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi ehi yepi.

Ivitu ai para guasu pipe

13 Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota āgua” ehi yuvireco viña. Ahese orosirise ore yemboyasa sui, oroso Creta ivi rupi. 14 Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. 15 Oyepotasa oreu, ndoroicatu iri eté sovañchi. Evocoyase, “Tayande rerasoño” orohe chupe. 16 Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. 17 Orosupire, ahe ocuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguatāño. 18 Ivitu rumo ombohitu iteanga para guasu. Sese ahere ayihive oporaviqui vahe omboipi carite vosiita mombo yuvireco. 19 Imombosapisa ari pipe, omombo vite mbahe carite resendar yuvireco. 20 Setá ari ndoyecuai ari, yasitata avei oreu. Ivitu ai ndopaño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

21 Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya vaira peye viña, nayasēise Creta sui, ahese ndipoi chira co mbahe yandeu cūrītei viña —ehi—. 22 Cūrītei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. 23 Ayihī pisa oyemoporēhi cheu Tūpa rembiguai semimbou, chupendar che aico, chupe avei aporaviqui. 24 Ahe aipo ehi cheu: “Pablo, eresiquiyei rene. Ereyepotaño itera Cesar cheu. Tūpa oipisiro aveira opacatu nde rupindar carite pipendar” ehi cheu. 25 Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. 26 Yande mohañira rumo imbehi coti caha pāhumi rese yande mondo —ehi.

27 Ñuvirío semana ivitu ore reroguatā pare ahe pītu mbiter pipe para guasu Adriático rupi orocose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. 28 Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. 29 Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡omocohe voi tarahu Tūpa yandeu viña!” orohe tēi. 30 Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renondar imombitasa” ehi tupri tēi yuvireco. 31 Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

32 Ahese sundao eta oyasia caritemi sā oiti ive imondo yuvireco.

33 Cōhe ramose Pablo aipo ehi opacatu upe:

—Cūrítei ñuvírío semana pemomba pecaruēhi peico ‘¿mara yahera pīha co yaico?’ pe hesa pīpe. ³⁴ Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañii chira iyavei que ñepei pe ha nocañii chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu. ³⁶ Evocoyase opacatu ava oyemonguerēhi yuvireco ocaru āgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pīpe iposiēhi āgua yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pīpe. ⁴¹ Oroguatase rumo, oroyapi ivi cuhi. Aheve carite opāha ité sese. Ndoicatuí eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña. ⁴³ Sundao rerecuar rumo ndoipotai Pablo manō āgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

28

Caha pāhu Malta ve Pablo secoi

¹ Ore ñepisiropare, ahese ramo oroicua caha pāhu rer Malta revo rahe. ² Ahe pendar ava nihapisií ore repiase yuvireco. Oquí iteanga, sōhisa avei. Ahese oyatapí guasu yuvireco, “Perio, tapeyephehemi” ehi yuvireco oreu. ³ Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomanō’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraíño ité. ⁶ Ahe pendar opacatu osāro tēi yuvireco, “Irirura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rerecuar secoi. Iivi namombriimi ichui. Ahe nihapisií ore repia güetave iyavei ihañeco tupri ai ore rese mbosapi arí rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyeroqui Tūpa upe sese, omondo opo iharive. Ēgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha āgua ambuae carite pīpe, opacatu mbahe ore guatasa rupi ipaneēhi āgua ogüeru yuvireco oreu.

Pablo oyepota Roma ve

¹¹ Co carite mbosapí yasi osáro vahe ari mbahe tēi vahe pītuhu āgua. Ipípe oroso. Ahe carite yugūeru Alejandría sui. Ahe ichī rese ñuvirío itūpa rahanga yuvireco: ñepeí rer Cástor, ambuae evocoiyase Pólux. ¹² Ahese oroso oroyepota yemboyasa Siracusa ve. Aheve oropita mbosapí ari. ¹³ Ichui orosé oroso oroyepota Regio ve. Ahere ayihive ivitu oipeyu irohí cotí sui. Sese oroyepota Puteoli ve ambuae ari pípeve. ¹⁴ Aheve orosepia ambuae Jesús reroyasar. Ore mombita gūētave yuvireco ñepeí semana. Ipípe oroso Roma ve ivi rupi. ¹⁵ Jesús reroyasar Roma pendar yípive ore andu yuvireco. Sese moviro yugūeru Foro de Apio ve, ambuae yugūeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rerecuar co coti omondo Pablo ñepeí sundao upe sáro uca āgua.

Pablo omombehu Roma ve Tūpa Ñehengagüer

¹⁷ Mbosapí ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, narioíroi avei yande ramoí recocuer viña. Che roquendasa rumo iyavei imondopri aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Oicuaese che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco. ¹⁹ Evocoi judío rumo ndoipotaiño ité chupe. Ahese ayu pota cohava Cesar upe che yoepí āgua. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepí āgua oposoho uca. Opomoñeta pota yande remiaro rese. Co Tūpa Rembiporavo ava písiro āgua resendar reroyasa rese carena pípe ñapichimbrí aico —ehi.

²¹ Ahese ahe ava omboyeví yuvireco chupe:

—Ndoroi písi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroíro pe rembieroya piasu yuvireco. Sese orosendu pota nde piñañemoñetasa —ehi yuvireco chupe.

²³ Oiporavo ari iñehe āgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuita icuachiapri pípe sui iyavei Tūpa ñehe mombehusar rembicuachía pípe avei ‘toviroya yuvireco’ oyapave. Ēgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyái eté yuvireco. ²⁵ Opiñañemoñetasa nomboyoyaise yuvireco, yuvinosopa pota. Ahese aipo ehi ahe ava upe:

—Supi eté Isaías omombehu Espírítu remimombehu pe recocuer resendar pe ramoí upe aracahe aipo ehi:

²⁶ “Eso nde mu páhuve.

Emombehu aipo ere:

‘Yepe pesendu tēira mbahe viña,
ndapesenducuai chira rumo.

Iyavei pesepia tēira mbahe viña,
ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaēhisave.

Ndoyemboapisaiño yuvireco.

Iyavei osapívi tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyeví potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pipe suive Tūpa omboyecua ucara oporopĩsirosa ava ndahei vahe judío upe. Ahe niha oyapĩsacara imombehusa rese yuvireco —ehi chupe.

²⁹ Aipo ihe pare, judío yuvĩnose iñehe rese oyecopĩ-copĩ yuvĩraso.

³⁰ Ipare Pablo opita ambuae ava rētave ñuvĩrio araviter rupi omboepĩ oque ãgua oico. Aheve nihapĩsii opacatu ava rese oyepĩri oyepotase yepi.

³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeeñhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropĩsirosa resendar mombehu água.

² Tüpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayeveise oespíritu maranehi pipe, ahesa opĩratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtivisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaherá. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico.

¹⁰ Aporanduño ité semimbotar rupi pe piri che so água rese chupe yepi.

¹¹ Esepia, che aso pota ité Espiritu suindar mbahecuasa mondo pëu pe pĩtivii água 'toyemoviracua tupri catu Cristo rese yuvireco' che yapave. ¹² Che aipota ité yande ñepeipei yañepitivii catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tẽisa pe piri yepi. Cũritei rumo ndaicutuño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipãhuve" ahe pëu, inungar opacatu ambuae ivi rupi ãgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecuva vahe upe, nimbahecuai vahe upe avei no. ¹⁵ Sese pe Roma ve peico vahe upe avei ayemongerẽhi voi eté co ñehesa pĩsirosa resendar mombehu água.

Ñehesa pĩsirosa resendar pĩratasa

¹⁶ Che nachĩ eté co ñehesa pĩsirosa resendar aviye vahe sui. Esepia, ahe Tüpa pĩratasa opacatu viroyasar pĩsiro água, judío rane yipindar, ipare opacatu ambuae ava-ava tẽi avei. ¹⁷ Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité ãgüe ehi yandeu. Esepia, icuachiapri arachendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirẽhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe

güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tūpa suindar yuvireco. Esepia, Tūpa ité niha omboyecua chupe. ²⁰ Ēgüe ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo rmo suive oime vahe rese. Sese yaicua ahe Tūpa ité secoi iyavei ipiratasā apirēhi vahe. Sese ava angai pa viyar ndiyai, “Eñemosañō tēi rane oreu” ehi vahe rā yuvireco chupe. ²¹ Esepia, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe Ēgüe ehi tēi vahe rese. Ipipe sui mbahe ndosenducua catu iri eté yuvireco. ²² Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. ²³ Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vahe rā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. ²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco rāgüer sui yuvirecoi oyese ae. ²⁷ Cuimbahe avei cuña rese güeco rāgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyaēhisa pipe yuvireco, Tūpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. ²⁹ Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipipe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroiro avei ava, oyemboivate ai, oyeecomboivate ai tēi avei oñehe pipe yepi, osecā-seca tēi mbahe naporai vahe güembiaporā, nomboyeroyai avei oyesupa yuvireco, ³¹ ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. ² Yaicua rumo Tūpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. ³ Pe opase ava recocuer pesenoi, pe avei rumo Ēgüe peye tupri peico. Pe avei eté evocoiyase ndapeñemi chietera Tūpa ñemoirosa sui. ⁴ ¿Peroiro tie Tūpa oyapo vitesese mbahe aviye vahe oñemosase, seco mbegüe tupri ai vitesese avei pēu? ‘Tosecuñaro güecocuer yuvireco’ oyapave rumo Ēgüe ehi pēu. ⁵ Pe rumo pepiharāta viteño ité

Tūpa upe pe yevi potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi āgua, anise yande pīsiro āgua curi. ⁶ Ahese opara omboepi ñepeipei yande rembiapogüer rupi yandeu. ⁷ Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. ¹⁰ Tūpa rumo opacatu seco catupri vahe upe omondora imboetei āgua 'toipisi teco ori iyavei toyuvirecoi mbahe tupri pipe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratií yande rereco. ¹² Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiye. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yependovirecoi co porocuita yuvireco viña, ahe rumo co porocuita rupi tupri oyaPOSE mbahe, ahe evocoyase inungar porocuita vireco vahe yuvireco. ¹⁵ Esepia, güembiaipo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiaivi, ichui avei oyemongerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa pīsirosa resendar amombehu vahecuer rupi tupri ēgüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyeecomboivate ai Tūpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe poravo āgua. ¹⁹ Pe, “Aicatu ité ndasapisoi vahe nungar ava ndayaracuai vahe mboaracua iyavei ava angaipa viyar pitumimbi vahe nungarsave tēi resape āgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chihvahemi nungar mbohe āgua. Esepia, areco co mborocuita vireco vahe opacatu mbahecuaasa iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahé itūparo pipe sui. ²³ Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe. ²⁴ Supi eté icuachiapri arachendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri

inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuaíta yuvireco, ahe evocoyase omombehura pe cañi água yuvireco. Esepia, yepe pereco Tüpa porocuaíta viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño égüe yahera. Iyavei circuncisión supi eté vahe ndahei yande recocuer rese güeraño tēi avei no. ²⁹ Judío ete ité rumo opihá pipe ité viroya Tüpa. Iyavei circuncisión supi eté vahe, Espiritu rembiapo yande piha pipe, ndahei porocuaíta icuachiapri rembiapo tēi. Evocoyase judío supi eté vahe oipisira omboeteisa Tüpa suindar ité, ndahei ava tēi suindar.

3

¹ Evocoyase, ¿mbahe vo co aviye judío yande reco água? ¿Yande yembocircuncidasa piha aviye? ² Supi eté. Esepia, yipindar Tüpa omondo oñhe judío eta upe imboaviye água. ³ Amove yepe ipāhu pendar nomboaviyeise ocuaíta viña, ¿Tüpa avei tie égüe ehira? ⁴ ¡Aní eté! Tüpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi:

“Supi tupri vahe Tüpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui” ehi.

⁵ Yande reco rai pipe tēi yamboyeuase Tüpa reco tupri, ¿mara yahera vo evocoyase? ¿“Tüpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esepia, Tüpa ndaheise supi tupri vahe viña, ndiyai chietera yande recocuer rese porandupa tupri água chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei cature Tüpa supi eté vahe, ¿mahera piha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime água” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tüpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepe angara viña!

¹¹ Ndipoi avei que ava Tüpa recocuer osenducua tupri vahe.

Ndipoi avei Tüpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

¹³ Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipape oñhe rai opihavíracuá iteangasa pipe yuvireco.

¹⁵ Ndayipiti oporapichi água yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri água yuvireco.

¹⁸ Ndipihañemoñetai eté Tüpa sui osiquiye água yuvireco” ehi.

¹⁹ Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi āgua yuvireco’ ohesave aipo ehi. ²⁰ Esepia, ndipoi chietera que ñepeico seco aviye vahe Tūpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tūpa yande p̄sirora

²¹⁻²² Cūrítei rumo Tūpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuaita aracahendar pipe, ñeñe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pipe, “Ereyavi mbahe che ñemoirosa pisi āgua” ndehi iri yandeu. Esepia, ahe yande p̄siro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vaheñã vuvii yande angaipa rese ñero āgua. Sese yande yeroya pipe oime ñeroisa yandeu. Ipípe omboyecua güeco ivi tuprisa. Yipisuive rumo güeco asiñehisa pipe oñemosañi aracahendar ava angaipa upe; cūrítei rumo omboyecua ité güeco ñivisa yandeu, seco ñiviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai āgua sovaque! Esepia, ndahei porocuaita mboaviye rese ēgüe ehi, ahe rumo Cristo rese yande yeroya pipe ēgüe ehi yandeu. ²⁸ Sese yaicua Tūpa, “Ereyavi mbahe che ñemoirosa pisi āgua” ndehi iri Cristo rese yande yeroyase yandeu, ndahei mborocuaita mboaviyesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño! ³⁰ ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi āgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Ēgüe ehi tēi vahe” yahe evocoi mborocuaita upe Jesucristo reroyasa pipe. Ipípe rumo yamboyecua evocoi mborocuaita ēgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi p̄iha yande ramoi Abraham recocuer aracahe? ² Acoi mbahe güembiapo pipe sui tēi oipisise güeco tupri āgua Tūpa sui, oyemboivate aira oico ipípe viña. Ndiyai eté rumo ēgüe ehi Tūpa rovaque. ³ Esepia, icuachiapri aracahendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi. ⁵ Yande rumo, yayeroyase Tūpa rese, Tūpa evocoyase yande p̄sira, ‘co seco catupri vahe’ ohesave. Esepia, ahe ēgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar aracahendar avei oñeñe ava rorivetesa rese Tūpa seco catupri vahe nungar p̄sisa rese. Ahe rumo ndahei mbahe sembiapogüer rese tēi oipisi. ⁷ Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yipive ité. ¹¹ “Toicua ava co seco catupri vahe chē rese iyeroyase yuvireco” ehi Tūpa chupe. Sese imbocircuncidapri secoi. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ēgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

Tūpa remimombehu imboaviyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ēgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroyasar güeraño oipisise co mbahe oime vaherā chupe viña, evocoiyase yande yeroyasa Tūpa rese ēgüe ehi tēi etera, Tūpa remimombehugüer evocoiyase ēgüe ehi tēi vahe aveira viña no. ¹⁵ Esepia, co mborocuita mboaviyēhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

¹⁶ Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoiyase ahe opacatu yande ramoi secoi. ¹⁷ Icuachiapri arachendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehē: “Setá oimera ava nde suindar” ehi vahe rupi tupri ité. ¹⁹ Abraham evocoiyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve ñañaroi eté guahi āgua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opīratasa opacatu oñehengagüer mboaviye āgua” ehiño ité opiha pipe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirā. Ipare Tūpa ombogüerayevi yande pisi āgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco cō Tūpa suindar porovasasa yayeroyase sese. Ipape avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave. ³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa āgua, ⁴ iyavei yañemosañose, yasē tuprira yande recoñhasa sui, ahese yaicua yaipisi vaheerā mbahe aviye vahe Tūpa suindar yepi. ⁵ Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro āgua yande recocerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepeí ava omano vaheerā ambuae ava aviye vahe upe nara; yepe que ava recocer supi eté aviye aira viña, seni rumo ndipoí eté que ava, “Che tamano sepirā” ehi vaheerā chupe. ⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano āgua yande angaipa repirā. ⁹ Ipape sui cūrtei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarēhimbar yaico vitesa, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pisiro. ¹¹ Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipou iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo vitesa Moisés porocuaíta, oime voi eté angaipa co ivi pipe. Yepe tie ndicuasa vitei angaipa porocuaíta ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ēgüe ehiño ité yuvireco Moisés recosa, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyeēhisa resendar rese viña. Ahe Adán rese omboyecua mbia ou vaheerā.

¹⁵ Tūpa porererosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporererosa poropisirosa yandeu. Ahe rumo aviye catu vahe ava eta upe nara. ¹⁶ Ahe ñepeí ava angaipa rumo ndoyoyai eté Tūpa poropisirosa ombou vahe rese yandeu. Esepia, ñepeí ava angaipa sui ou Tūpa ñemoirosa; oporererosa rumo Tūpa ombouño ité ava eta mbahe oyavi ati vahe upe nara yangaipa mocañi āgua. ¹⁷ Supi eté ñepeí ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tūpa porovasasa tuvichá vahe ité iyavei iporererosa, “Peyavi mbahe” iheēhisa resendar. Sese yareco ité tecovesa apirēhi vahe yandeyupe nara ñepeí ava sui, ahe Jesucristo.

¹⁸ Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. ¹⁹ Esepia, ñepeí ava Tūpa reroyaēhisa sui setá oime ava angaipa viyar; ēgüe ehi aveira ñepeí ava mboyeroyasa sui setá aveira ava vireco güeco catuprisa Tūpa rese yuvireco.

²⁰ Supi eté porocuita ouse aracahe, ahese angaipa yaposa catu ité. Yepe ěgüe ehi viña, Tūpa porovasasa rumo ivate catu ité ichui. ²¹ Evocoyase inungar angaipa ipīrata yandeu yande mano āgua viña, ěgüe ehi avei rumo Tūpa oporovasasa ipīrata vahe pīpe yande pīsi seco catuprī vahe nungar yande rereco ‘toipīsi tecovesa apīrēhī vahe che Rahīr Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? ² ¡Aní chietera! Esepia, yande niha senoseprī angaipa sui. Evocoyase ndiya iri eté yayapo viteño angaipa yaico. ³ ¿Ndapecuai vo pe yañeapiramose Jesucristo rer pipe, ndoyavī yamano vahe ité sese? ⁴ Yande ñeapiramose, aviye acoi ñotimbrī yaico Cristo rupive yande mbogüerayevī iri āgua iyavei yande recocuer mopiasu āgua avei, inungar acoi Cristo ocuerayevī Vu reco pīratasa pīpe.

⁵ Yande omano vahe nungar yaicose supive, ěgüe vahe aveira yande yacuerayevī supī. ⁶ Yaicua avei niha yīpīndar yande recocuerai yaticapri nungar curusu rese Cristo rupive, “Che recocuerai tocañīa che sui” yande hesa pīpe, iyavei yande angaipa pīpe mbiguai tēi nungar yande recoñī āgua. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaherā sese. ⁹ Yande niha yaicua, Cristo ñepei reseve ocuerayevī, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañī āgua; cūrītei rumo oicove Tūpa upe nara. ¹¹ ěgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pīpe” peye aveira.

¹² Sese anī peico vite angaipa pīratasavrive pe cuai āgua pe remimbotarai mboyeroyasa pīpe. ¹³ Anī peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevī iri vahe peico. Sese peyemondo tuprī ité Tūpa upe mbahe tuprī apo āgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pīpe; pe rumo Tūpa porovasasa pīpe peico.

Yembohesa mbiguai tēi recocuer sui

¹⁵ Ndayaico iri mborocuita pīpe tēi, yaico rumo Tūpa porovasasa pīpe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovrī pendar evocoyase peico. Pemboyeroyase Carugar angaipa apo āgua, ahe evocoyase pe reco mocañī tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yīpīndar mbiguai tēi nungar peico angaipa pīpe viña, cūrītei rumo pemboyeroya pe pihave ité porombohesa peipīsi vahe. ¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supī tuprī vahe apo āgua peico. ¹⁹ (Che amboyoya tecocuer mbahe co ivī pīpendar rese imombehu pēu. Esepia, yavai vite ité pēu co ñehesa renducua tuprī āgua.) Yīpīndar pe retecuer pereco mbahe tēi pīpe mbahe naporai vahe apo āgua. ěgüe peye rumo pe cūrītei pe reco mohivī āgua peico mbahe tuprī pīpe ñepei reseve Tūpa upe pe reco āgua.

²⁰ Pe peico vïtese mbiguai tēi nungar pe angaipa pipe, ahese ndapeyapo vitei mbahe supi tupri vahe; ²¹ cūrïtei rumo pechī tēi ichui, ahe niha ndape pītivii eté pe recocuer rese, iyavei pe reraso pota manosa apirēhi vahesave yepi. ²² Cūrïtei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipipe sui peicora apirēhi vaheerā. ²³ Angaipa niha ombou manosa tēi yandeu, Tūpa rumo oporerocosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vïtese co ivi pipe. ² Esepia, inungar cuña omenda vahe, imer oicove vïtese, iporocuitavrive viteño ité secoi yepi. Omanose rumo imer ichui, ahe cuña ndahe iri omer porocuitavrive secoi. ³ Acoi cuña omer recove vïtesevē, virecose ambua cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cūte.

⁴ Che rivireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico āgua. Ahe niha acoi ocuerayevi vahe. Sese yande recocuer ěgüe ndehi tēi vahe Tūpa upe. ⁵ Esepia, yande yaicove vïtese yande reco ai pipe, ahe porocuita renduse, yaipota catu mbahe tēi pipe yande reco āgua. Ipare rumo ahe mansave tēi yande reraso uca vahe. ⁶ Cūrïtei rumo yande omano vahe nungar yaico acoi porocuita pipe yaico vahecuer sui. ěgüe vahe, yasē ichui Tūpa upe mbahe apo āgua Espíritu sui yande reco piasu pipe. Ndahe iri mborocuita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuita ndipoise viña. Supi eté che ndaicuaise, “Ndapeipota rai chira ambua ava mbahe” ehi vahe mborocuita pipe, ahese ndaicuai chiaveira che mbahe pota raisa viña. ⁸ Aicuase mborocuita, ahese angaipa ipīrata catu cheu. Ahe mborocuita apo potaēhisa pipe che querēhi catu opacatu che remimbotarai tēi apo āgua. Esepia, mborocuita porēhi angaipa aviye ndipoi vahe viña. ⁹ Yipindar Tūpa porocuita ndaicua viteise, ndoyavii aviye vahe ité che reco areco viña. Porocuita aicuase rumo, aipota rai angaipa apo āgua. ¹⁰ Che evocoyase acañi tēi vaheerā aico ipipe viña. Ahe porocuita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. ¹¹ Esepia, angaipa ahe porocuita pipe che mbopa ité. Ahe ipipe avei che mocañi tēira viña.

¹² Evocoyase co porocuita ndaseco marai vahe ité, supi tupri vahe ité, aviye vahe avei. ¹³ ¿Co porocuita aviye vahe pīha che rereco che mano āgua tēi? ¡Aní eté! Angaipa tēi rumo ěgüe ehi che rereco. Evocoyase co porocuita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. ěgüe ehi avei ahe porocuita omboyecua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar; che tēi rumo imondopri aico angaipa mboyeroya āgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita aviye vahe. ¹⁷ Evocoyase ndahei cheyesui eté ěgüe ahe, angaipa tēi rumo ěgüe ehi che mbohe uca. ¹⁸⁻¹⁹ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo viteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voño ité mbahe naporai vahe cheu yepi. ²² Che piha pipe rumo Tūpa porocuaita aipotá iteanga tēi, ²³ che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraisu ité!, ndaicatu iri eté, ¿uma piha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. ěgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povri ve.

8

Yaico vaherā Tūpa Espiritu rese

¹ Cūrtei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatui Moisés porocuaita mboyeroya āgua, ahe avei evocoyase ndoicatui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. ěgüe ehi imocañi opacatu yande angaipa yande sui, yande remimbotarai avei. ⁴ Ahe ěgüe ehi yande yamboaviye vaherā mborocuaita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

⁵ Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaita mboyeroya āgua yuvireco. ⁸ ěgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. ¹¹ Acoi Tūpa Espiritu secoise pe rese, Tūpa

evocoyase omondora tecovesa piasu pe retecuer upe oEspíritu pe rese secoi vahe pīratasa pipe. Esepia niha, ipipe ité ombogüerayevi Guahír Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco água. ¹³ Esepia, pe peicoño itese pe remimbotarai pipe, aheshe pecañi tēira; pemombopase rumo Espíritu pipe peyesui, aheshe pícovera apirēhi vaheṛā.

¹⁴ Esepia, opacatu Tūpa Espíritu ombohe vahe, Tūpa rahír ité yuvirecoi. ¹⁵ Supi eté pe Espíritu peipisi vahe ndapembosiquiye uca iri pe rereco, ahe rumo pemoingo Tūpa rahír ité pe reco água. Ahe avei, “¡Che Ru!” pe mbohe uca chupe. ¹⁶ Co Espíritu avei oicua uca yande espíritu upe Tūpa rahír yande recose. ¹⁷ Evocoyase yaipisi aveira mbahe yande Ru Tūpa ombou vaheṛā yandeu; ahe oyoya Cristo reseve yaipisira, Cristo paraísu agüer pipe ité yandeu yareco vaheṛā teco porañetesa ipiri curi.

Teco porañetesa ou vaheṛā curi

¹⁸ Cūrítei rumo yande paraísusa ndoyoyai eté teco porañetesa yande rese ou vaheṛā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahír yuvirecoi vahe rese. ²⁰ Esepia, Tūpa rembiapo ndahe iri eté yipīndar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité ²¹ güeco opa tēi vaheṛā sui ñepisiro água teco porañete vahe Tūpa rahír vireco vahe rupiti água curi. ²² Yande niha yaicua aracahe suive opacatu mbahe Tūpa rembiapo oiporara mbaheasicuer yuvireco cuña imembi rasi vahe nungar. ²³ Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espíritu, ahe yipīndar vahe yaipisi vaheṛā ichui curi. Yayemombaraisu, yasāro vite yande querēhisa pipe Tūpa guahír ité yande rereco água, yande retecuer recuñaro água avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia. ²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espíritu yande pītivii ndayaicatu irise. Esepia, ndayaicuai eté mara yahera yayeroqui, co Espíritu Santo rumo oporandu ité Tūpa upe yande rese oyemopoasesa pipe. ²⁷ Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyaupe. Esepia, Espíritu oporandu chupe semimbotar rupi yande seroyasar yauco vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave. ²⁹ Esepia, yipive Tūpa yande cua, yande poravo Guahír Jesucristo nungar ité yande reco água ‘ahe che Rahír tenonde catu vahe tasecoi opacatu ambuae che rahír sui’ oya. ³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yande irira ro chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! ³² Tūpa niha ombou ité Guahír imano água opacatu yande rese. Sese yaicua ombou aveira opacatu mbahe yandeu yande pītivii água Tahír rese yande recose. ³³⁻³⁴ Sese ndiyai eté

ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pīha yande mboyepepíra Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu vitéño itera yepi yepe que yamanora, anise que mbahe oime vahe yandeu yande recove vitése. Ndayande mboyepepii chiaveira ichui que Tūpa rembiguai, que seco ivate vahe, seco pirata vahe ndayasepai vahe, que cūrítei mbahe oime vahe yandeu, anise que mbahe oime vaherā curi. ³⁹ ¡Ndayande mboyepepii chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara arácahe

¹ Che Cristo reroyasar che reco pipe supi eté añehe, ndopombopai. Tūpa Espiritu oicua ité che pihañemoñetasa supi vahe. ² Ndavihai eté che piha pipe; oime mbahe tasi vahe cheu yepi. ³ Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropisirosar avei ahe ichuindar oyesu vahe. Ahe Poropisirosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevíra curi, ahese oimera Sara membrí ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sem-bireco Rebeca imembi cōi, ahe icōi vahe yesupa rumo ñepeño ité. ¹¹⁻¹³ Ahe ndoyuviroha vitéise, ndoyapo vitéise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membrí ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaísu ité Jacob, Esaú rumo ayamotarēhi” ehi. Sese

yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tuprii vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pīpe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pīpe” ehi. ¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoiyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vaherā Tūpa remimbotar upe” ehira. ²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahe-moinda ndiyai, “¿Mahera che apo rai tēi eve?” ihe āgua oaposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

²² Tūpa rumo oñemosā pare iya ité oñemoirora, opīratasa mboyecua āgua ocañi tēi vaherā upe. ²³ Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique āgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pīpe aipo ehi:

‘Acoi ava ndahei vahe cheundar, chupe,
‘Cheundar ité’ ahera, iyavei acoi ava ndahei vahe saisupri yuvirecoi, chupe,
‘Che rembiaisu ité’ ahera’ ehi.

²⁶ “ ‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiro ra yuvireco. ²⁸ Esepia, yande Yar omboaviye voira oñehe ava viroyasarēhi mocañi āgua co ivi pīpe” ehi. ²⁹ Oyoya avei ambuae Isaías remimombehugüer yipīndar vahe rese:

“Yande Yar seco pīrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pīsirosa reendar

³⁰ ¿Mara yahera vo evocoiyase? Yaicua ava ndahei vahe judío, yepe ndahei osecā vahe güeco catupri āgua yuvireco viña, Cristo rese oyeroyasa pīpe rumo vireco ité güeco catupri Tūpa rovaque. ³¹ Judío yuvirecoi vahe rumo oipota tēi güeco tupri āgua ité Tūpa porocuita mboyeroya pīpe viña, ndoicatu eté rumo supiti yuvireco. ³² Esepia niha, ndahei oyeroyasa pīpe ité osecā oñepisiro āgua, ahe rumo co mborocuita mboyeroya sui tēi Tūpa rese yuvirecoi pota viña. Ahe evocoiyase ndoyavi oyeriapri vahe “ita yepiapisa” rese yuvireco. ³³ Aipo ehi tupri icuachiapri arachendar pīpe:

“Che amondo Sión ve ñepe i ita yepiapisa, ahe oporoieiti vahe.
Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. ² Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. ³ Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tuprisa pipe ‘tomoingatu Tūpa opiha yande pisi āgua’ ohesave yuvireco viña. Ipipe sui nomboyeroyai eté Tūpa remimbotar güeco mbocatupri āgua ité yuvireco. ⁴ Esepia, Cristo recocuer pipe imboaviyesa tupri Moisés porocuita, “Peyavi mbahe che ñemoirosa pisi āgua” ehiēhi āgua Tūpa oyese oyeroya vahe upe.

⁵ Co yande reco catupri āgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tūpa, “Peyavi mbahe che ñemoirosa pisi āgua” heēhi āgua rumo yande yeroyasa pipe, “Ava vo oyeupira ivave Tūpa Rembiporavo reroyi āgua” ndapeyei chira. ⁷ Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiveira. ⁸ ¿Mara peyera evocoiyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipisiroproi peicora. ¹⁰ Esepia, yande piha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiroproi yaicora.

¹¹ Esepia, icuachiapri arachendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri arachendar pipe aipo ehi: “Acoi opacatu osenoi vahe yande Yar rer, ipisiroproi yuvirecoira” ehi. ¹⁴ Ava rumo ndoporandui chira pisirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri arachendar pipe: “¡Aviye ai eté acoi ava güeru vahe ñehesa aviye vahe pisirosa resendar!” ehi.

¹⁶ Ndahei rumo opacatu che mu judío viroya co ñehesa pisirosa resendar yuvireco. Isaías niha aipo ehi avei aracahe: “Che Yar, ¿uma piha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa pisirosa rendusa pipe.

¹⁸ ¿Osendu piha judío co ñehesa yuvireco? ¿Osendu ité! Esepia, aipo ehi avei acoi icuachiapri arachendar pipe: “Sendusa niha opacatu ivi rupi iñehe” ehi.

¹⁹ Iyavei, ¿osenducua piha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeēhisave Tūpa ñehe aipo ehi vahe: “Acoi ava ndache recaí vahe, ahe che pisi ité yuvireco. Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

11

Moviro tēi ava Israel pendar Tūpa oiporavo oyeupe nara

¹ Evocoiyase, ¿omombo pīha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico. ² Yipisuive ité niha Tūpa, “Co ava cheundar ité” ehi ore ramoí israelita upe. Sese cūrítei ndore momboí eté oyesui. Peicua niha acoi Elías resendar icuachiapri arachendar oyeroci tēise omu israelita rese aipo ehise Tūpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tūpa rumo omboyeví chupe: “Aipeha rumo siete mil tupri ava che mboyeroyasar cheyeupe nara noñenopihaí vahe Baal rahanga rovai yuvireco” ehi. ⁵ Ēgüe ehi avei cūrítei opita viteño moviro judío, ahe niha Tūpa oiporavo oporoaisusa pīpe. ⁶ Ipīpe ité niha Ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pīpe viña.

⁷ Evocoiyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. ⁸ Icuachiapri pīpe aipo ehi aracahe: “Tūpa nomboyecua uca iri mbahe secocuer pīpe. Cūrítei Ēgüe ehiño vite ité yuvireco. Omondo tēi sesarā; ipīpe rumo ndosepia ucai mbahe chupe. Omondo tēi avei yapisaguā; ipīpe ndosenducua ucai mbahe chupe” ehi.

⁹ Iyavei David aipo ehi aracahe:

“Ipietas ivonde nungar iyavei pira mbohasa nungar tasecoi chupe.

Ipīpe sui toyuviroha mbahe tēi pīpe yuvireco, toyemombaraisu uca avei ipīpe yuvireco.

¹⁰ Toicua eme mbahe inungar ndasesapisoí vahe yuvireco.

Icuhapapri nungar ayase toyuvirecoi apirēhi vaheerā” ehi.

Ndahei vahe judío ñepisiro agüer

¹¹ Evocoiyase areco iri che porandusa pēu: ¿Apirēhi vaheerā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo Ēgüe ehi ava ndahei vahe judío pīsirosa pisi āgua yuvireco. Ipīpe sui oyemonguerēhi catura judío ipisi āgua yuvireco curi. ¹² Evocoiyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi āgua oyeupe nara yuvireco. ¹⁵ Esepia, judío mombosa pīpe sui Tūpa omoime ñerosa opacatu ava co ivi pīpendar upe. ¿Mara ehira pīha evocoiyase Tūpa ipisise? Ahese oipisira tecovesa apirēhi vahe yuvireco, evocoiyase ndoyuvireco iri chira omano vahe nungar Tūpa upe. ¹⁶ Esepia, yipindar panguā sui yapopri seropovēhesa Tūpa upe, opacatu panvi evocoiyase sovasapri avei ichui.

Iyavei inungar ivira rapo seropovēhese Tūpa upe viña, sãca avei evocoiyase opacatu ēgüe ehi aveira viña.

¹⁷ Amove che mu judío inungar Olivo rãca yasiapri. Pe evocoiyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vīracuasa pe recove āgua. ¹⁸ Aní chira rumo, “Yande aviye catu vahe yaico ivira rãca nungar yipīndar yuvirecoi vahe sui” peye pe yecomboivate aisa pipe. Esepia, ndahei pe sui judío oipisi oye-moviracua āgua yuvireco, pe rumo yipīndar ichui eté peipisi pe yemoviracua āgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vaherã” peye revo. ²⁰ Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisil eté. Pēu avei ēgüe ehira ndapemboyeroyaise. ²² Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoiyase viroyevi irira oyeupe nara. Esepia, chupe iya ité ipisi iri āgua. ²⁴ Pe ndahei vahe judío ivira caha pipendar rãca yasiapri nungar peico, Tūpa rumo pe mondo ivira aviye vahe nungar rese. ¡Evocoiyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, ²⁶ ahese ramo opacatu ava judío yuvirecoi vahe Tūpa oipisiora. Esepia, icuachiapri arachendar pipe aipo ehi:

“Oura ava Pīsirosar judío recua Sión pāhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Ēgüe ehi cūrtei judío eta ndosendu potai ñehesa pīsirosa resendar yuvireco. Sese Tūpa amotarēhisar yuvirecoi. Pēu mbahe tupri āgua rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui. ³⁰ Yipīndar niha pe ndapemboyeroyai eté Tūpa. Cūrtei rumo judío eta ndoviroyaise yuvireco, pe paraisuereco Tūpa. ³¹ Ēgüe ehi avei judío eta cūrtei ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. ³² Esepia, Tūpa ité, “Opacatu oyavi mbahe che reroyaēhisa pipe” ehi ‘oicuae mbahe güembiavi, tiquerēhi opacatu che poroparaisuerecosa pisi āgua yuvireco’ oya.

³³ ¡Mara ehi rutei Tūpa aracuasa, imbahecuaasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua. ³⁴ Ndipoi eté que ava oicua vahe yande Yar pihañemoñetasa iyavei

ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opīratasa pipe. ĩSese imboeteipri ité Tūpa tasecoi yepi! Ĕgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recoveese chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vahe rā chupe. ² Peico iri eme co ivi pipendar pihañemoñetas tēi rupi. Iyacatu rumo pesecuñaro pe pihañemoñetas. ĩPipe sui opacatu pe recocuer oñecuñarora. Ĕgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetas peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ĕgüe yahe avei yande, yepi que yande retara viña, Cristo rese yayemboyase rumo, ñepe vahe nungar yaico. Evocoiyase yande ñepe-pei opacatu upendar yaico.

⁶ Tūpa niha omboyeavirati mbahecuasa imbou oporoaisusa pipe ñepe-pei upe. Evocoiyase Tūpa ombouse oñehe mombehu āgua yandeu, yamombehura ñepe-pei iñehe sese yande yeroyagüer rupi. ⁷ Que ombouse mbahecuasa ambuae ava pītivii āgua yandeu, yaipītivii tupri aveira. Ombouse yande porombohe āgua, yaporombohe tupriño itera. ⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropītivii āgua ava mbahe ndovirecoi vahe upe, yamondoño itera mbahe chupe yande recatēhiñehisave. Acoi oporocuai vahe, toyapoño oquerēhisa pipe; iparaisu vahe pītiviiisar, toipītiviño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepe-pei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharesave mbahe iva péndar rārosa pipe; peñemosaño mbahe rasicuer peiporarase iyavei aní chira peseya pe yeruresa yepi.

¹³ Peipītivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepe-pei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecuai vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochīra pe sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mboisiquiye āgua yuvirecoi, ahe rumo yuvirecoi ava mbahe tēi aposar mboisiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoiyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahes mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoiyase aheño ité iporaviquisa yuvireco.

⁷ Yamondo ñepeipei ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita. ⁹ Aipo ehi acoi Tūpa porocuita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

¹¹ Iyavei peicua tupri co mbahe oime vahe yandeu. Cūrítei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pitumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoiyase tayaico sundao oyoepisa omonde vahe nungar. ¹³ Yande catu yaguata yande reco ïvi tuprisa pipe, inungar yagutase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande

Yar Jesucristo recocuer yande yese, aní yande pihañemoñeta mbahe-mbahe tēi apo āgua yande remimbotarai pipe.

14

Aní peroĩro ambuae Jesús reroyasar

¹ Acoi ava ndoyeroya tupri vītei vahe yande Yar rese que oiquese pe piri, peipisi tupriřa; aní peiñehopeopira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. ³ Acoi ava opacatu mbahe ohu vahe, toviroĩro eme amove ndohui vahe mbahe iyavei acoi amove ndohui vahe mbahe, toviroĩro eme acoi ohu vahe opacatu mbahe. Esepia, evocoi nungar ava Tūpa oipisi ité. ⁴ Supi eté pe ndiyai eté peroĩro vaheřā ambuae ava rembiguai. Esepia, ahe yande Yar povri pendar secói. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuaru chupe. Esepia, yande Yar opīratasa pipe osecomoingātuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeí-peí opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepeí ari ava omboetei vahe, yande Yar mboeteisa pipe rumo ēgüe ehi. Yaravei ohu vahe opacatu mbahe, Yar mboeteisave avei ēgüe ehi. Esepia, ahe güembiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ēgüe ehi, iyavei, “Aviye ndeu” ehi avei Tūpa upe.

⁷ Esepia, yande ñepeí-peí ndayaicoi yandeyeupe nara tēi, ndayamanoi avei yandeyeupe nara. ⁸ Esepia, yaicove vītese, yaico yande Yar upe nara; yamanose, yamano yande Yar upe nara avei. Ēgüe yahe yande yaicove vītese, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco āgua que omano vahe, anise que oicove vīte vahe upe avei.

¹⁰ ¿Mahera evocoiyase peroĩro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tūpa rovai. Ahe evocoiyase opara oporandu yande recocuer rese yandeu. ¹¹ Esepia, icuachiapri arachendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoiyase yande ñepeí-peí yamombehura yande recocuer Tūpa upe.

Aní pe rivireta mbahe tēi pipe pereco uca

¹³ Sese yande ndiyai yañeroiro. Iyacatu rumo ñepeí reseve pereco tupri ambuae pe rivri, angaipa pipe sereco ucaēhi āgua, iyeroyasa momaraēhi āgua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoiyase mbahe tēi, ndiyai eté ihu āgua. ¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoiyase yande poroaisusa pipe ité ēgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviñera yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tūpa upe yande carusa, yande

igua avei ipovrive yande recose. Ēgüe ehi rumo co ivate catu vahe chupe yande recocuer mohivisa, yande reco tupriisa ambuae Tūpa reroyasar pāhuve iyavei yande rorivetesā yareco vahe Espiritu Santo sui. ¹⁸ Ēgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoetē pipe yasecara yaico tupri vaheṛā yandeyeupe. Ipīpe sui yande yaicatura yañepitīvii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño itē; ndiyai etē rumo yahu que tembihu ambuae ava Cristo reroyasar pihañemoñetasa momara āgua. ²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayapaise, ambuae ava Cristo reroyasar angaipā pipe seiti uca iriēhi āgua. ²² Yande pihañemoñetasa yareco vahe rumo yarecoño itera yandeyeupe itē Tūpa rovaque. ¡Aviye ai catuño itē ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñetasa pipe! ²³ Acoi que ava, “¿Mara ehi pīha?” ehise tembihu upe. Ipāre rumo ohuse, ahe evocoyase oyemboangaipa ipīpe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitese que mbahe upe, ipāre oyapose itē, ahe angaipā.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teietē yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri itē acoi omombehu vahe: “Nde rese ñehe-ñehe tēi opa aipisi” ehi. ⁴ Supi etē co opacatu omombehu vahe aracahe opa icuachiasa yande mbohe āgua, yande yasāro vaheṛā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pitivii oyoya guasu pe reco tupri āgua ñepeipei peyese Jesucristo recocuer rupi. ⁶ Ipīpe sui pe opacatu oyoya guasu ñepeipei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pisi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pitivii Tūpa remimombehugüer mboaviye āgua judío ramoi aracahendar upe. Ēgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparisuerecosa rese yuvireco’ oyapave. Ahe ēgüe ehi icuachiapri rupi tupri itē aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ipemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rãro āgua, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasãro vaheã ahe mbahe aviye vahe Espiritu Santo pĩratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepe-i-pe peyeupe pe yemboaracua āgua. ¹⁵ Co tecocuer rese rumo aicuachía opacatu che siquiyeēhisa pipe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pipe cheu

¹⁶ Jesucristo rese che poraviqui āgua ava ndahei vahe judío recocuer aviye āgua. Evocoyase judío pahĩ nungar che cuaisa pipe amombehu co ñehesa Tūpa ombou vahe pĩsirosa resendar yuvireco chupe imoporēhi āgua Tūpa rovai nungar mbahe seropovēhepri aviye vahe Tūpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tūpa che cuaita rese. ¹⁸ Esepia, cheu ndiyai añehe vaheã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheã. Esepia, amonguerēhi Tūpa reroya āgua yuvireco che ñehe rese, che rembiapo sui avei. ¹⁹ Ēgüe ahe poromondiisa

mbahe yavai vahe apo Tūpa pĩratasa pipe. Ahe ayapo Espiritu Tūpa suindar pĩratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

²⁰ Chequerēhi avei co ñehesa pĩsirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicatui aso pe piri, yepe setá rupi aso pota tēi viña.

²³ Cūritei rumo opa amboaviye che poraviqui co ivi rupi, iyavei opa tēi setá araviter pe piri che sosa rāgüer. ²⁴ España ve che soseve, apita pucumira vicho pe piri yande yemboviha āgua. Iyavei pe sui che sē potase, che pĩtivimira peye aheve che so āgua. ²⁵ Cūritei rumo che asora Jerusalén ve. Arasora porerecosa ahe pendar yande mboetasa Jesús reroyasar pĩtivii

āgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pĩtivii āgua yuvireco. ²⁷ Ahe ēgüe ehi güemimbotar rupi yuvireco iyavei iya ité imboyevi āgua yuvireco chupe ahe mbahe tupri oyeupe apo agüer rese.

Esepia, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi āgua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri.

²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu pēu opacatu che rese peyeroqui pĩrata

vaheṛā Tūpa upe che pītīvii āgua co mboraviṛi rese. ³¹ Peporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa piṣi tupri āgua avei. ³² Ahese Tūpa oipotase, che aviharetera ayepotase pe repia, iyavei toime pituhusa yandeu che pe piri che sose. ³³ Ēgüe tehi Tūpa güeco tupriṣa piṣe tasecoi opacatu pe rese.

16

Pablo mahenduhasa ñepeipei ava upe

¹ Co yande reindri Febe serer vahe, ahe oipītīvii tecua Cencrea pendar Cristo reroyasar oico. ² Peipiṣi tupri catu yande Yar rer piṣe; ahe niha yande cuaita Cristo reroyasar yande recose, iyavei peipītiviñño que mbahe chupe ipane vahe rese. Esepia, ahe setá ité oporopītiviñ iyavei che avei eté che pītiviñno.

³ Pemombehu che mahenduha Prisca upe, Aquila upe avei, ahe niha che pītiviñ mboraviṛi Jesucristo recocuer resendar rese yuvireco. ⁴ Ahe avei niha mbahe tēi piṣe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviṛi iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa piṣe. ⁹ Pemombehu avei che mahenduha Urbano upe. Ahe niha yande ndugüer oporaviṛi vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoāhasa sui osē tupri vahe Cristo rese oyeroyasa piṣe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviṛi vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviṛi ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secói. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa piṣe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboyaho pota serai vahe sui. Oime ava ēgüe ehi vahe, oiti uca vahe ava mbahe tēi piṣe. Esepia, ahe ndahei eté co ñehesa pe yembohesa rupi yuvirecoi. Sese evocói nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe

nara oyapo mbahe yuvireco. Ëgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaheṛá pe mbahecuasa mbahe aviye vahe apo água, ndahei mbahe tēi apo água. ²⁰ Evocoyase Tūpa güeco tuprisa pipe pihaivi Caruguar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pītivī che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoñhi suive mbahe ndicuasai vahe rese. ²⁶ Cūritei rumo oyecua uca oñehe mombehusar rembicuachía pipe Tūpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tūpa güeraño imbahecuá vahe yepi, ëgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroiyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. ² Aicuachía co che ñehe pëu, pe Jesús reroiyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tüpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. ⁵ Ëgüe ehi secocuer pipe sui Tüpa ombou opacatu pe reco tupri catu água, pemombehu tupri vaheñá imbahecuasa, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tüpa Espíritu suindar ipane vahe pëu yande Yar Jesucristo yevi água pesárose. ⁸ Tüpa niha pe moviracuño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroiyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiroiro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. ¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico? ¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanos rétã pndar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo água. Ëgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai catu vahe aiporu. Esepia, nañomi potai eté que chñhi co ñehesa pĩratagüer Jesucristo curusu rese imano agüer resendar ava sui.

Cristo Tüpa pĩratasa, imbahecuasa avei

18 Esepia, acoi ava ocañi tēi vaheṛā upe co ñehesa curusu rese Cristo manosa resendar aviye ěgüe ehi tēi vahe viña. Yande ipĩsiropri yaico vaheṛā upe rumo co ñehesa vireco ité Tūpa pĩratasa, 19 inungar Isaiás rembicuachi-agüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

20 ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tūpa niha osecañaro evocoi nungar mbahecuasa ěgüe ehi tēi vahe pipe! 21 ěgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ěgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

22 Che mu judío osepia pota tēi mbahe poromondiisa ipĩratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. 23 Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ěgüe ehi tēi vahe yuvireco chupe.

24 Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pĩratasa ité, imbahecua avei. 25 Esepia niha, ava upe, Tūpa suindar mbahe aviye acoi ěgüe ehi tēi vahe viña. Co Tūpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tūpa suindar aviye nipiratai vahe ava upe viña, ahe rumo ipĩrata catu ité opacatu ava tēi pĩratasa sui.

26 Che rivireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. 27 Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipĩrata vahe Tūpa cuaparēhi mochi āgua. 28 Oiporavo avei co ivi pipe ava remieroiro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi āgua 29 ‘toyemboivate ai eme que ava che rovaque yuvireco’ oya. 30 Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipĩsiropri toyuvirecoi’ oya yandeu. 31 Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

1 Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecuasa pipe, ñehesa ivate ai vahe pipe avei. 2 Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. 3 Iyavei ndachepĩratai, aririri avei che siquiyepave pēu che sose. 4 Iyavei acoi añehese ñehesa pĩsirosa resendar rese pēu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espĩritu pĩratasa pipe añehe pēu

5 ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuasa rese.

Tūpa oEspíritu pipe oicua uca mbahe yandeu

6 Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaheṛā. 7 Oroñhe catu aracuasa Tūpa suindar ndicuasai vahe rese, ahe yipive vireco vahe ivi apoēhi vitesese, ahe co omboyecua ramo vahe yandeu yaico vaheṛā teco orī apirēhi vahesave.

8 Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña.

9 Icuachiapri aracahendar pipe aipo ehi:

“Tūpa omoingatu mbahe ava guaīsupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

10 Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatu secocuer oico.

11 Ēgüe ehi eté, inungar opacatu ava pāhve ndipoi eté que ñepeī ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espiritu güeraño ité oicua Tūpa pihañemoñetasa.

12 Yande evocoiyase ndahei co ivi pipendar tēi espíritu yaipisi, ēgüe ehi rumo Espiritu Tūpa suindar yaipisi yaicua vaheṛā iporerecosa oporoaisusa pipe ombou vahe yandeu. 13 Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

14 Acoi ava ndovirecoi vahe rumo Tūpa Espiritu opiha pipe, ndoipisii eté mbahe Tūpa Espiritu suindar yuvireco. Esepia, chupe evocoi mbahe aviye ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité. 15 Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri āgua. 16 Esepia, icuachiapri aracahendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

1 Che rivireta, ndapeguata tuprii Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pēu. Esepia, pe pītanimi nungar vite tēi pe pihañemoñetasa Cristo rese. 2 Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi. Cūrítei rumo ēgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe. 3 Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndāhoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar. 4 Esepia, aipo peyeño tēi, “Ore Pablo rupindar oroico”; ambuae evocoiyase, “Ore Apolos rupindar oroico” peye-peye tēi pe

yembohesa rese pe yeecopisa pipe. Aipo ehi vahe pe pãhuve inungar ava Tũpa ndoicuai vahe pihañemoñetasa.

⁵ Pesendu che ñehes: ¡Che Pablo iyavei Apolos Tũpa rembiguai tẽi orocol Esepia, yande Yar niha ombou ñepeipei mboraviqui yandeu chupe yayapo vaheã. Tũpa upe ore poraviquisa pipe sui niha peroya yande Yar peico: ⁶ che rane inungar añoti vahe mbahe rãhi pe piha pipe; Apolos evocoyase inungar imboihusar; Tũpa rumo inungar omboori vahe pẽu. ⁷ Evocoyase ndiyai peyeroya mbahe tisar rese tẽi, imboihusar rese tẽi avei. Peyeroya catura rumo Tũpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pẽu nara. Sese ñepeipei Tũpa omboura porerecosa pe rese ore poraviquiã rupi oreu. ⁹ Ore oroporaviqui vahe Tũpa upe. Pẽ evocoyase ivi nungar peico Tũpa poraviqui ãgua iyavei pe inungar Tũpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi viracua ãgua, ãgũe ahe imombehu Cristo resendar ñehesa pẽu seroya tupri ãgua. Ndiyai etẽ yaroya que ambuae ava tẽi, Jesucristo gũeraño itẽ yaroyara. Ambuae evocoyase inungar oi aposar omopuha vahe viracuasa harive, ãgũe ehi ahe pe monguerẽhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo ãgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tẽi, capihi, anise tacuar tẽi oiguã yuvireco. ãgũe ehi aveira pe mbohesar yuvireco. Ahe ñepeipei rumo iya oicua tupriã pe mbohe ãgua yuvireco. ¹³ Ahe iporaviqui agũer rumo ari cañesa icuasa tupriã ñepeipei yuvireco. Esepia, ahe ari pipe yande Yar oura tata reseve ñepeipei pe mbohesar poraviqui agũer cua ãgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tẽi, iporombohe agũer opa tẽi etera ocañi. Ahe gũeraño evocoyase oñepisiro sãira tata guasu sui.

¹⁶ ¿Ndapeicuai vo pe yande Jesús reroyasar Tũpa rẽta nungar yaico? ¡Espiritu niha secoi etẽ yande piha pipe. ¹⁷ Oimese que ava yande pãhuve omomara vahe Tũpa rẽta, Tũpa evocoyase omboura oñemoirosa ahe ava upe. Esepia, Tũpa rẽta nimarai vahe itẽ; yande teietẽ niha Tũpa rẽta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tẽi, toyeeecomombegũemi rane oaracua ãgua. ¹⁹ Esepia, ava tẽi aracuasa Tũpa upe ãgũe ehi tẽi vahe. Inungar icuachiapri aracahendar pipe aipo ehi: “Ava oaracua raisa pipe oyeiti va mbahe tẽi pipe Tũpa upe yuvireco” ehi. ²⁰ Iyavei aipo ehi no: “Yar rumo oicua ava tẽi yaracua rai vahe pihañemoñetasa, ahe ãgũe ehi tẽi vahe” ehi. ²¹ Sese ndapeyecomboivate ai chira que ava tẽi porombohesa rupi peico. Esepia, opacatu mbahe pẽundar itẽ: ²² ãgũe ehi etẽ che Pablo, iyavei Apolos, Pedro avei, opacatu ivi pipendar mbahe Tũpa omoime vahe yandeu, tecovesa, manosa avei, yasepia vahe, iyavei mbahe oime vaheã, ahe niha opacatu pẽu nara, ²³ pe niha Cristo upendar, Cristo evocoyase Tũpa upendar secoi.

4

Apóstol yuvirecoi vahe poraviqui agũer

¹ Iya aipo peye: “Co mbia Cristo povri pendar yuvirecoi, icuaita itẽ niha Tũpa suindar ñehesa oyecua ramo vahe rese iporombohe ãgua” peyera oreu

viña. ² Acoi vireco vahe ocuaitarã, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherã pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yeví āgua. Ahe niha omboyecuara opacatu mbahe ndoyecuai vahe, iyavei omboyecuapara ñepei-peí yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-peí yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

⁸ Ndoavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgüe peye itera tarahu viña! Ahese, ore avei mborerecuar oroicora pe pāhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua. Sese seroĩrombri oroico inungar ava imboguai pri yucapirã. Ēgüe orohé oroico opacatu ava rovaque, Tūpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pĩratái vahe oroico ava rembiepiave; aheseve avei rumo peyecomomirata tēi peico. Ore seroĩrombri tēi oroico, pe evocoyase ava pe mboetei guasu pe rereco yuvireco. ¹¹ Cūritei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité. ¹² Ore oroporaviquiño ité, oroyembogüera tēi ipipe. Ava rumo iñehe mara-mara tēi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañó ité yuvireco chupe. ¹³ Iñehe-ñehe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tēi iyavei ore rereco inungar ava Ēgüe ehi tēi vahe yuvireco. Cūritei Ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, Ēgüe ehi rumo pe mboaracua āgua tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pitiviisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa pĩsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose

opacatu Jesús reroyasar ñemonuhasa rupi yepi. ¹⁸ Amove oime pe pãhuve oyecomboivate ai vahe. “Ndou iri chietera revo cohave yande repia” ehi yuvireco cheu viña; ¹⁹ aso pihaviño itera rumo pe repia yande Yar oipotase cheu. Ahese aicua tupriã oyemboivate ai vahe reco pĩratasa yuvireco. Ndahei chira ñehe güeraño tẽi aicuara. ²⁰ Esepia, Tũpa omborerecuasave, ndahei oñehe pipe tẽi oporocuai, opĩratasa pipe rumo ěgũe ehi. ²¹ ¿Mbahe pĩha peipota peico? ¿Peipota pĩha che aso vaherã pẽu che ñehe pĩrata pe mboaracua água mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepeí Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepeí mbahe tẽi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarẽhi ité ndoyapoi evocoi nungar mbahe tẽi yuvireco. ² ¡Pe rumo peyecomboivate ai peico! ¡Iyacatu rumo ndapeyemboviãhi chira evocoi nungar mbahe tẽi repiase viña! Evocoi nungar ava iyacatu ité pemboyepẽira pe pãhu sui. ³ Yepe niha che tetetẽ ndaicoi pe pãhuve viña, pe rese che mahenduhasa pipe rumo aicove ité pe pãhuve iyavei aicua voi eté aipo oyapo vahe mbahe tẽi recocuer inungar-ra aico vahe ité pe pãhuve viña. ⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese. ⁵ Evocoiyase ahe ava timondosa Carugar povriã secocuerai mocañi água. Ipape sui iespĩritu oñepisirora yande Yar Jesucristo yevise curi.

⁶ Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi. ⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi água angaipa pipe peico vaherã inungar panguã ipiasu vahe ndovirecoi vahe omboapeposa oyese. ěgũe peye ité niha. Esepia, yande Yar Jesucristo iparaisu omano yande repirã. ěgũe ehi ahe inungar ovesa yucapri angaipa mocañi água judio pieta Pascua pipe yepi. ⁸ Sese inungar judio omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco água, ěgũe vahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

⁹⁻¹⁰ Ambuae aicuachia vahe pipe aipo ahe pẽu: “Ndapemborii chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepepi água ñepeí reseve evocoi nungar ava sui, pesẽ itera co ivi pipe sui viña. ¹¹ Che niha aipo ahe icuachia pẽu: ndapemborii chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyerocui tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava piri ñepeí yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tũpa rese recocuer rese porandu água. Tũpa ahe ava yuvirecoi vahe recocuer opara oicua coiye. Pe rumo pe cuaita ité Tũpa rese

yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacuatu rumo Tūpa reroyasareta upe perasora secocuer moingatu āgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatu pīha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co ivi pipendar tecocuer rese peyeupe yepi! ⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! ⁵ Che aipo ahe ité pēu pe chī āgua: ¿Ndipoimi eté vo pe pāhuve que ñepeí yaracua vahe oicatu vahe que mbahe tēi peyependar moingatu āgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetas mborerecuar Tūpa reroyasarēhi upe tēi mbahe moingatu āgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei pepayo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerocuí vahe, omendasa sui oyemboaguasa vahe, cuimbahe pāve oyapo vahe mbahe oyesae ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “avīye que mbahe che remimbotar ayapo vahe rā” ehi vahe. Amove rumo co mbahe ndahei avīye vahe yandeu iyavei yandeu ndiyai evocoi nungar mbahe povriye nara tēi yande reco āgua. ¹³ Supi eté niha aipo ehi vahe: “Yande rembihu yande aviter upe nara, yande aviter evocoiyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vahe rā, ahe rumo yande Yar upe nara. Yande Yar evocoiyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña güetecuer omondo-mondo

têi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoyase ñepeí vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepeí vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoyase ñepeíño ité.

¹⁸ Peyepéi voíño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoyase omomara catu güembiapo pipe sui tēi. ¹⁹ ¿Ndapeicuai vo pe retecuer Espíritu Santo upendar ité secoi, iyavei ahe Espíritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

7

Poromboaracuasa mendasa resendar

¹ Cūrítei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, avieteramo ndapeñemosai chira, ipipe sui aviyyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mēndaēhi āgua viña. Tūpa rumo ombou yande yacatu yande recorā.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosā āgua, pemendaño. Esepia, aviye catu itera pemenda poropota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuaite ité. ¹¹ Acoi oyoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavi chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyyeretamo pe recocuer sui pe mer

oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tüpa oipota mbahe tupri pipe yande reco ägua.

17 Co rumo mbahe: peicoveño yipindar pëu Tüpa ombou vahe rese seroyaëhi vitesendar pipe. Ahe aporocuai opacatu Cristo upendar ñemonuhasa rupi yepi. 18 Acoi Tüpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco ägua. 19 Esepia, ndahei chira que judío, anise que ndahei vahe judío yaicose aviye catura yaico. Co rumo Tüpa oipota catu, “Tomboaviye opacatu che porocuita amondo vahe chupe yuvireco” ehi yandeu. 20 Sese peicoveño peyacatu pe recocuer pëu Tüpa ombou vahe rese pe renoiëhi viteseve. 21 Pe mbiguai tëi peico vahe pe renoise Tüpa, pepihañemoñeta etepri eme evocoiya pe recosa sui pesë vaheerã rese. Peicatusé rumo, peyepiño itera ichui. 22 Esepia, yepe pe mbiguai tëi peico viña, peroyase rumo yande Yar, ahese inungar ndahei iri vahe mbiguai peico chupe. Iyavei pe no, ndahei vahe mbiguai tëi peico vahe, yepe ëgüe peye viña, peroyase rumo Cristo, ahese sembiguai peico. 23 Tüpa upe rumo pëpë iteanga, sese ndiyai eté ambuae ava povrive tëi peico. 24 Sese, che rivireta, peicoveño itera pe recocuer pipe inungar yipindar Tüpa pe renoise.

25 Cuñatai ndomenda vitei vahe resendar rese rumo ndarecoi Yar suindar che ñehe ägua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico. 26 Cheu aviye catuño ité ndomendai vahe ëgüe ehiño tëise yuvireco viña. Esepia niha, tecocuer yavai eteanga cüritei. 27 Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. 28 Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaheerã.

29 Che rivireta, aipo mbahe amombehu pota pëu: ndipucuvei co ari naporai vahe yepota ägua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe. 30 Acoi ndovihai vahe, toyuvirecoi eme oviharëhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. 31 Acoi ava ipihañemoñeta catu vahe co ivi pipendar mbahe poru ägua, tipihañemoñeta eme evocoi nungar mbahe tëi rese yuvireco. Esepia, co ivi pipendar mbahe yasepia vahe, ocañi tëira.

32 Che ndaipotai co ivi pipendar recocuer rese tëi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imboviha ägua; 33 omenda vahe rumo ipihañemoñeta avei co ivi pipendar recocuer rese tëi, güembireco mboviha ägua rese avei. 34 Evocoyase ndahei ñepe opihañemoñetasa vireco. Ëgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespiritu rereco tupri ägua Tüpa upe. Cuña omenda vahe rumo ipihañemoñeta co ivi pipendar recocuer rese tëi omer mboviha ägua oico.

³⁵ Che aipo ahe pëu ‘mbahe tupri pipe toyuvirecoi’ viya, ndahei mbahe yavai vahe pipe pe reco água. Che aipota ité pe reco catuprisa pipe yande Yar upeño ité mbahe peyapo vaheerã pe recoeté pipe peico.

³⁶ Acoi ava ipihañemoñeta vahe güembirecovi rese omenda água, “Aviyeteramo ayavira mbahe ichui iyavei niha osupiti ité imenda água, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbaia rumo ndovirecoise que ocuaita omenda água iyavei oicatu ité güemimbotar apo, ipihañemoñetase ñepeí reseve güembirecovi rese omendañhi água, ahe aviyeño ité. ³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepépi água omer sui imanoñhi vitesese. Omanose rumo ichui, ahese ramo ahe cuña upe aviyeño imenda iri água güemimbotar rupi. Yande Yar reroyasar rese avei rumo omen-dara. ⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tüpa Espiritu suindar.

8

Pablo oñhe tembihu mbahe rahanga upe tēi seropovēhepri rese

¹ Cūrítei ambuae mbahe amombehura pëu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tēi! Yayeaisuse rumo, ahese yañepitívii catu Cristo reroya tupri água. ² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri água yandeu. ³ Yande rumo yasaisuse Tüpa, ahese Tüpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tēi seropovēhepri mbahe mimba yucapri hu água rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepeí güeraño ité Tüpa. ⁵ Esepia, yepe ava upe setá tüpa ivave, ivive avei viña (setá iteanga niha oime tüpa angahu tēi, yar angahu tēi avei). ⁶ Yande rumo yaicua ñepeñiño ité Tüpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tüpa rahanga upe seropovēhepri” ehi viteño yuvireco oyeupe. Ipipe sui omomara uca Tüpa rese opihañemoñetasa yuvireco. ⁸ Supi eté tembihu ndayande pítívii Tüpa rese yaico vaheerã. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. ⁹ Pëu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca água chupe. ¹¹ Evocoiyase co pe mbahecuasa pipe pemocañi uca yande rivri Tüpa rese noviracua tupri vitei vahe peico. ¡Cristo rumo omano ipisiro água!

¹² Esepia, pemomarse Tūpa rese ipihañemoñetasa, ahese pe ae peyemboangaipa uca Cristo amotarēhisa pipe peico. ¹³ Sese yande mbahe roho husa pipe sui yamboangaipa ucase yandē rivrī viña, ndayahu iri chietera evocoi mbahe roho yande rivrī mboangaipa ucaēhi āgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi āgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pēu.

³ Ahe ñehesa amboyevi tupri ava che recoāha potasar upe yuvireco yepi. ⁴ Iya ité che remihura pisi, che iguarā avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ēgüe ehi yuvireco, ēgüe ehi avei Pedro, ēgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove āgua? ⁷ Esepia, sundao nombopipi sundao güeco āgua, ahe rumo oporaviquisa repri oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rārosar, ahe avei omohe ovesa cambi igua. ⁸ Che ndahei cheyesui tēi aipo ahe pēu. Esepia niha, Moisés porocuita pipe avei aipo ehi yandeu: ⁹ “Pemondo eme tivi yuru rese mbahe icaruēhisa mbahe rāhi oicambese yuvireco pēu” ehi. Supi eté co Tūpa aipo ehi vahe ndahei tivi upeño. ¹⁰ Yande reco tupri āgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rāhi, oyoya osāro mbahe oipisi vahe rā oporaviquisa sui oyeupe nara yuvireco yepi. ¹¹ Evocoyase ore avei oroñoti Tūpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi āgua oyeupe nara yuvireco pe sui. Evocoyase ore avei niha oroicatu mbahe pisi āgua pe sui ore poraviquisa pipe viña.

Ore rumo ēgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tūpa upe seropovēhepri tūparo rocarve yuvireco yepi. ¹⁴ Ēgüe ehi avei yande Yar ore cuai ‘toipisi mbahe ipane vahe co ñehesa mombhusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoi nungar mbahe rese ayembovihaño ité. ¡Yepe che yucapri tēira tieporēhi viña, ndaporandui chietera rumo mbahe rese pēu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa písirosa resendar ava upe, ndiyai ayecomboivate ai ipipe. Esepia niha, che cuaita ité yapo āgua iyavei, ¡cheparaisi itera ndamombehuse ava upe co ñehesa viña! ¹⁷ Tūpa ndache cuaise oñehe mombehu āgua viña, che rumo che querēhisa pipe amombehuse, ahese aipisira Tūpa suindar porrecosa. Ēgüe ndahei rumo. Esepia, Tūpa che cuaisa pipe niha amombehu. ¹⁸ Ndaporanduisse mbahe rese pēu amombehuse

co ñehesa p̄sirosa resendar, ipipe ayembov̄iha ahe che vihasa porerecosa nungar cheu. Yepe aicatu mbahe rese che porandu āgua viña, che rumo ēgüe ndahei eté.

¹⁹ Yepe che ndahei ava povr̄ive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya āgua’ che yapave. ²⁰ Esepia, aicose judío p̄ahuve, secocuer rupi aicoveño Yar upe imonguerēhi catu āgua yuvireco. Ēgüe ahe ité, aicose ava Moisés porocuaíta povr̄ive yuvirecoi vahe p̄ahuve, che avei eté mborocuaítav̄rive nungar aico. Ndahei rumo Moisés porocuaíta povr̄ive ité aico imboav̄iye āgua. ²¹ Iyavei ava ndoyuvirecoi vahe Moisés porocuaíta povr̄ive, ip̄ahuve aicose, inungar ahe yuvirecoi, ēgüe ahe tupri avei imonguerēhi āgua yande Yar upe vichico. Ndahei rumo Tūpa porocuaíta mboyeroyaēhisa pipe aico. Esepia, Cristo porocuaítav̄rive che recocuer. ²² Iyavei no, aicose ava yande Yar ndoviroya tupri vitei vahe p̄ahuve, secocuer nungar tupri avei aico Yar upe imonguerēhi catu āgua. Ēgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetá catu co ñehesa p̄sirosa reroyasar yuvireco’ che hesa pipe, ‘taip̄isi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oip̄isi porerecosa yepi. Evocoiyase inungar co ivava catu vahe, ēgüe peye avei pe recocuer pipe Tūpa porerecosa p̄isi āgua peico. ²⁵ Iyavei opacatu oyemoingatu vahe oguaȳi āgua oñearo tupri opacatu mbahe tēi sui oyemomaraēhi āgua yuvireco. Ahe ēgüe ehi porerecosa ndipocopi vahe p̄isi āgua tēi yuvireco. Yande rumo yayemomorarara porerecosa apirēhi vahe p̄isi āgua yaico. ²⁶ Evocoiyase che avei, ndahei ava oyahuva-huva tēi vahe nungar aico Tūpa remimbotar apo āgua iyavei che ndaicoi ava iguaȳi tēi vahe nungar. ²⁷ Che rumo mbiguai nungar che retecuer areco, amboyeroya uca p̄ihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe p̄itu Tūpa imboguata agüer rese. Iyavei para guasu P̄ira vahe avei osasa opacatu yuvireco aracahe. ² Ēgüe ehi eté opacatu oguatase mbahe p̄ituvri rupi iyavei para guasu osasase yuvireco, ndoyav̄i ñapiramombri yuvirecoi Moisés recocuer rupi oguata āgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ēgüe ehi Tūpa opacatu yande ramoi judío upe viña, setá iteanga rumo ava ip̄ahu pendar ndahei av̄iye vahe ip̄iha rupi yuvireco. Ipipe sui opa omano iv̄i iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ip̄ahu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuvirop̄uha,

oyembovihaño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ēgüe ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoãha-ãha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ēgüe ehi yuvireco. Ipipe sui Tūpa ombou güembiguai ava yucasar iva sui ahe ava yucapa āgua aracahe.

¹¹ Co opacatu yande ramo i upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu. ¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voñora pīratasa evocoi mbahe tēi sui pe sē āgua, chupe pe ñemosa āgua.

¹⁴ Sese che rīvireta, che rembiaisu, peyepēpi mbahe rahanga mboeteisa sui. ¹⁵ Ava niha peico pesenducua vahe rā mbahe, evocoyase peporandu co che remimombehugüer rese peyeupe icua tupri āgua. ¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuavēhe mbahe carugar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoyase ndaipotai eté carugar upe nara tēi ēgüe peye vahe rā peico. ²¹ Peihuse rumo yande Yar upendar igua, ndiyai peihu avei carugar upendar igua; iyavei pehuse yande Yar upendar mbahe, ndiyai avei pehu carugar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pihañemoñetasa momaraēhi āgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroysarēhi pe soho ucase oyepiri pe mbocarū āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pihañemoñetasa momaraēhi āgua. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaēhi āgua, ava

píhañemoñetasa momaraēhi āgua avei. ²⁹ Supi eté che añehe co ambuae ava píhañemoñetasa rese, ndahei pe píhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava píha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera píha che roerōrora yuvireco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pëu yepi che rese pemañenduha vitese iyavei peguataño vitese che opombohe vahe agüer rupi.

³ Che rumo aicua eva tupri pota pëu, Cristo niha seci ñepeipei cuimbahe cuaisar, cuimbahe evocoyase güembireco cuaisar seci. Ëgüe ehi avei Tūpa Guahir Cristo upe. ⁴ Acoi cuimbahe Cristo upe ñemonuhasave oāca ndiru ndosequise oyerure āgua, anise Tūpa Ñehengagüer mombehu āgua, ahe ëgüe ehi güerecuar Cristo mboeteiēhisa pipe. ⁵ Iyavei acoi cuña ndoyopiise oāca oyerogui āgua, anise Tūpa Ñehengagüer mombehu āgua, ahe ëgüe ehi omer mboyeroyaēhisa pipe. Ahe cuña evocoyase ndoyavii oñeapipa tupri vahe.

⁶ Acoi cuña ndoyopi potaise oāca, tayapecāraisa tupri. Ochñse rumo oapecārai āgua, evocoyase toyopiño oāca sereco. ⁷ Cuimbahe rumo ndoyopi chira oāca sereco. Esepia, ahe Tūpa rahanga ité seci iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oācapisa omer mboyeroyasa mboyecua āgua omahese Tūpa rembiguai eta yuvireco sese.

¹¹ Yande, yande Yar reroyasar yaico vahe co tecocuer rese, yañepitivi oyoya yaico. Evocoyase cuimbahe ndoicatui cuña porēhi; cuña avei ndoicatui cuimbahe porēhi yuvireco. ¹² Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

¹³ Evocoyase peyapisaca tupri co rese: ¿Iya píha cuña noñeacapi vahe oyerure Tūpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi āgua. ¹⁶ Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ëgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he āgua pëu. Esepia, aipo pe ñemonuhasave, mbahe tēi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei āgua pe píhañemoñetasa ndahoyoyai pipe peico. Amove ayanduse pe

rerãcua, aroya ité. ¹⁹ ¡Iya ité revo pihañemoñetas ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua! ²⁰ Peñemonuhase pe pihañemoñetas ndahoyoyai vahe pipe pe caru ãgua, ndahei yande Yar rese pe yemomahenduhasevã egũe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi tẽi yuvireco; ambuae rumo pe pãhu pendar aipo oyembosavaipoño yuvireco. ²² Percoco niha pe rãta aheve pe caru ãgua iyavei pe ihu ãgua. Pe rumo pe reco pipe opa peroĩro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese peũ!

Yande Yar rese yemomahenduhase supi ité vahe resendar

²³ Co ñehesa aipisi vahe yande Yar suindar amombehu vahe peũ: ahe pĩtu pipe acoi Jesús mboguaisar opisi ãgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi gũemimbohe eta upe: “Co che rete amondo vahe manosave mbahe tupri pe reco ãgua. Egũe peyera che rese pe mahenduhase pipe peico” ehi. ²⁵ Egũe ehi avei ocarure yuvireco, ahe oipisi igua riru aipo ehi: “Co uva ricuer omboyecua peũ Tũpa oyapora mbahe ipiasu vahe pe recorã. Che ruvi pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agũer opacatu ava upe peico. Egũe peyera iyevi rãro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tẽi vahe, yuviroihuño tẽi vahe avei Yar mboeteiẽhisave, ahe evocoiyase nombotei yuvireco yande Yar rembiapocuer omondose gũetecuer, iyavei oipiyerese vuvi. ²⁸ Sese tipihañemoñeta rane oyacatu gũecocuer rese ava co pan hu ãgua renonde, oihu ãgua renonde avei co uva ricuer yuvireco. ²⁹ Esepia, acoi pe yemomahenduhãehisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setã pemaheasi, oime setã nipirata iri vahe avei pe pãhuve, oime avei omano vahe pe pãhu pendar. ³¹ Yande pihañemoñeta tuprise rumo yande reco ãgua rese, yande Yar evocoiyase nomoime chira mbahe tẽi yandeu evocoiya yande recosa pipe. ³² Yande Yar rumo oicua yande rembiapo ai. Sese omoime mbahe tẽi yandeu. Yande reco mohivi tupri ãgua rumo egũe ehi yandeu, ndahei yande cañi ãgua opacatu ava viroyasarẽhi reseve.

³³ Sese, che rivireta, acoi peñemonuhase pe yemomahenduha ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane gũetave. Ahese yuvirasose ñemonuhasevã, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho peũ.

12

Mbahecuasa Tũpa Espĩritu suindar

¹ Che rivireta, che aicua uca pota peũ co mbahecuasa resendar ñepeipei peũ Espĩritu omdo vahe.

² Pe niha cũritei peicua tupri ité yipindar Tũpa rese peicoẽhi vitese, peyembopa uca mbahe rahanga egũe ehi tẽi, noñehi vahe upe peico. ³ Sese, che aipota peicua acoi ava iñehi mara Jesús upe ndahei Tũpa Espĩritu pĩratasa pipe

ĕgũe ehi. Iyavei ava ndoicatu chira, “¡Jesús che Yar secoi!” ohe āgua opiha pipe Espiritu Santo ndovirecoise.

⁴ Oime setā ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeño ité imondosar secoi. ⁵ Setā mbahe avei oime mbahe yayapo vahe rā yande Yar upe. Ahe yande Yar rumo ñepeño ité secoi. ⁶ Iyavei setā oime ambuae mbahe Tūpa oyapo vahe yande rese opīratasa pipe, Tūpa rumo ñepeño ité secoi. Ahe oyapo opacatu co mbahe ñepepe yande rese. ⁷ Ahe omboyecua yande Espiritu rerecosa ñepepe yandeu opacatu yande reco tupri āgua. ⁸ Espiritu pīratasa pipe Tūpa omondo ñepepe viroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe. ⁹ Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogũera āgua. ¹⁰ Ambuae oipisi pīratasa mbahe poromondiisa oyapo vahe rā yuvireco. Ahe ichui avei vireco ambuae ava omombehu vahe rā ñehesa Tūpa suindar yuvireco. Ambuae upe Tūpa omondo mbahecuasa espiritu naporai vahe iyavei Espiritu supi tupri vahe cua tupri āgua. Ambuae evocoyase ichui avei oicatu ñehesa ndicuasai vahe Tūpa suindar pipe oñehe āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe. ¹¹ Ēgũe ehi Espiritu ñepeño ité gũemimbotar rupi omondo ñepepe yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeño ité yande recocuer

¹² Inungar yande retecuer resendar setā mbahe oime viña, ahe rumo ñepeño ité; ĕgũe ehi avei Cristo. ¹³ Ēgũe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepepe vahe nungar yande reco āgua Espiritu ñepepe vahe pipe. Ahe ñepepe Espiritu avei opa yaipisi.

¹⁴ Supi eté yande rete resendar ndahei ñepepe mbahe, setā rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña. ¹⁸ Tūpa rumo ñepepe yande rese mbahe omondo senara rupi tupri gũemimbotar rupi. ¹⁹ Yande opacatu ñepepe ava rete resendar nungar pāve tēise, ndahei evocoyase opacatu tupri ava rete nungar yaico. ²⁰ Supi eté yepe setā mbahe yande rete rese, ñepeño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ĕgũe ere tēi vahe eico!”; anise que yande āca avei, “¡Nde ĕgũe ere tēi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopi vahe rā. Ēgũe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tupri

vahe imboeteipri catu secoi. ²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepepe-peyese peico. ²⁶ Evocoiyase que ñepepe yande pãhu pendar upe mbahe tasise, opacatu ambuae upe avei tasi; anise que ñepepe imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ëgüe peye ité ñepepe-pe chupendar ité peico. ²⁸ Ëgüe ehi Tũpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava pítiviisar tasecoi, ambuae ava recocuer reroguata tupri ãgua tasecoi, ambuae ava evocoiyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco, ³⁰ ndahei opacatu vireco pĩratasa oporombogüera ãgua yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatui avei oicua evocoi ñehesa renducua uca ãgua ambuae ava upe yuvireco. ³¹ Peseca ru Espĩritu suindar mbahecuaasa aviye catu vahe peyepupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pẽu.

13

¹ Yepe yande yañeheño tẽise ambuae ava ñehe ndayaicuai vahe pipe, iyavei Tũpa rembiguai ñehe pipe avei viña, ndayasaisuise rumo ava ipipe, yande evocoiyase ëgüe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, ëgüe yahe tẽi yaico. ² Iyavei yepe yamombehuño tẽise Tũpa suindar ñehesa ou vahe yandeu viña, iyavei yepe yaicuaese mbahe opacatu icuapirẽhi Tũpa suindar yaico, yarecose avei yande aracuasa opacatu yandeyese, iyavei yepe yande Tũpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoiyase ëgüe yahe tupri tẽira yaico. ³ Iyavei yande mbahe opacatu yareco vahe yamboyo-yaho tupri tẽise ava iparaisu vahe upe viña, iyavei yayoapi ucapa tupri tẽise viña, ndayasaisuise rumo ava ipipe yaico, ndayande pítivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarẽhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiẽhisa, ndahei oyeupe gũeraño mbahe oipota, niñemoiro serai vahe, ahe rumo iñero voioño ambuae ava upe. ⁶ Ndahei mbahe tẽi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosano opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tũpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiveira yande mbahecuaasa. ⁹ Esepia niha, yaicua raimi tẽi mbahe iyavei chĩhi raimi tẽi yamombehu Tũpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tẽi vahe yaiporura.

¹¹ Esepia niha, chīhivahe vīte yande recose, yañehe, yandepīhañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer. ¹² Cūrītei yande ndayasenducua tuprīi Tūpa resendar mbahe, inungar acoi yepiasa pīpe yasepia hāvomi tēi quē mbahe; oyeovai eté yaicose rumo, yasenducua tuprīi catu itera mbahe evocoiyase. Cūrītei rumo yaicua raimi tēi mbahe Tūpa suindar yaico; coīye rumo yaicua tuprīi catu itera, inungar ahe oicua tuprīi ité yande recocuer.

¹³ Co oīme mbosapi mbahe ndopai vaheerā, ahe: Tūpa rese yande yeroyasa, mbahe yande remiāro ivave oīme vahe iyavei yande yeaisusa; co imombosapīsa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu āgua

¹ Peseca catu pe yeaisu tuprīi āgua peico; aheseve avei peipotara mbahecuasa Tūpa Espīritu remimbou. Ichuindar ñehesa mombehu āgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pīpe, Tūpa upe ité evocoiyase oñehe; ndahei ava upe tēi oñehe. Esepia, ndīpoi eté ava iñehe renducuar. Ahe rumo oñehe mbahe ndicuasai vahe rese oespīritu pīpe. ³ Acoi ava omombehu vahe rumo Tūpa suindar ñehesa yasenducua vahe pīpe, ahe oipītivīi ambuae ava Tūpa rese iyeroya āgua, oporomonguerēhi catu, oporombovīha catu avei. ⁴ Acoi ava oñehe vahe rumo ñehesa ndayaicuai vahe pīpe, ahe ae tēi vīreco catu Tūpa rese opīhañemoñetas. Acoi ava omombehu vahe rumo Tūpa suindar ñehesa icuapri ité, ahe ombopīhañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe āgua ñehesa ndayaicuai vahe pīpe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tuprīi āgua, ahese aviyeño oñehe Jesús reroyasar rovaque. Ipīpe sui ipīhañemoñeta catura Tūpa rese yuvireco.

⁶ Sese, che rivireta, asose pe repia, añehese co ñehesa ndayaicuai vahe pīpe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tuprīi vahe resendar, anise que ñehesa Tūpa suindar, anise que ambuae porombohesa, ahese pesenducuarā viña.

⁷ Mbahe yande remimombehu rumo inungar acoi mbahe porasei recasar imoñehēpri viña, inungar mimbī, arpa avei. Esepia, ndoyoya tuprīise iñehēgüer yuvireco, ndayasenducuai eté evocoiyase mbahe-mbahe sapucaisa osāha yuvireco. ⁸ Anise co inungar mimbī nomoñehe tuprīise vavasave nara yuvireco viña, ndīpoi chietera que ava oyemoingatu voi vaheerā ovava āgua viña. ⁹ Ēgüe peye avei niha peico peñehese ava upe ñehesa ndayasenducuai vahe pīpe, ahe evocoiyase osenduño tēi, ndosenducuai eté rumo pe ñehe yuvireco. ¡Evocoiyase peñeheño tēi eté! ¹⁰ Supi eté, setá iteanga co ivi pīpe oīme ambuae-ae tēi ava ñehesa. Oīme avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoiyase inungar ambuae tecua pendar tēi yaico vahe chupe; yandeu avei evocoiyase ahe ava inungar ambuae tecua pendar tēi yuvirecoi vahe. ¹² Pe niha peipota ité pereco vaheerā mbahecuasa Tūpa Espīritu suindar yepi. Sese peporandu catu mbahecuasa Espīritu suindar rese opacatu Jesús reroyasar pītivīi āgua Tūpa rese yuvirecoi tuprīi catu vaheerā.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri āgua rese. ¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoiyase? Yayeroquira yande espíritu pipe, yande aracuaa pipe avei. Yasapucaira yande espíritu pipe, yande aracuaa pipe avei no. ¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoiyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, avieteramo aviñera Tūpa upe viña, ambuae ava rumo osenduse, noipitivi chietera Tūpa rese imbopihañemoñeta catu āgua senducuaēhi pipe. ¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherá moviromi tēi ñehesa yasenducua vahe ava mbohe āgua setá ñehesa ndicuasai vahe pipe che ñehe rāgüer sui.

²⁰ Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. ²¹ Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracaha. ²² Evocoiyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoiyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiques pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiques evoci nungar ava yuviras pe pāhuve, ahe ae evocoiyase, “Supi eté ayavi che recocuer Tūpa rovaque” ehira pe ñehe renduse yuvireco. ²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramosé yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucui pota vahe sapucuisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota vahe upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasaréta seroya catu āgua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirio güeraño yuvireco, anise que mbosapi ñepeí-peí rupi; ñepeí evocoiyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco

pe ñemonuhasave; oyeupeñomi evocoyase ahe oñehera ipipe yuvireco Tūpa upe. ²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pāhu pendar oyapisaca tuprira sese yuvireco ‘¿supi eté pīha?’ ohesave. ³⁰ Que ñepeí oñeha vītese Tūpa oīcua ucase mbahe ambuae ava upe, topituhuño yīpīndar oñeha vahe, ambuae evocoyase toñeha pēu. ³¹ Evocoyase ēgüe peyera peñeha ñepeí-peí opacatu ambuae osendu vahe mbohe āgua iyavei imonguerēhi catu āgua. ³² Acoi omombehu vahe ñehesa Tūpa suindar, ahe oīcātu oñeha mombituhu āgua. ³³⁻³⁴ Esepia, Tūpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñeha āgua pe ñemonuhasave. Esepia, ēgüe ehi avei opacatu ambuae Jesús reroysar ñemonuhasa rupi yuvireco. Evocoyase ndiyai eté aheve iñeha āgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuaita rupi. ³⁵ Oīcua potase que mbahe, iya omer upe oporandura güētave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa. ³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aīcua Espīritu suindar mbahe” ehi vahe, iya rumo oīcua tupri co aīcuachía vahe imondo pēu, ahe yande Yar porocuaita resendar. ³⁸ Ahe ndoyapisaca potaise rumo che ñeha rese, iñeha rese evocoyase ndapeyapīscacai chira.

³⁹ Sese, che rīvireta, peyemonguerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaīcuai vahe pīpe iñeha āgua. ⁴⁰ Peyapora rumo opacatu mbahe ñepeí-peí pe cuiata rupi mbahe tupri pīpe.

15

Cristo cueravevi agüer

¹ Che rīvireta, che aīpota peyemomahenduha acoi ñehesa pīsirosa resendar pēu mombehu vahecuer rese. Co ñehesa niha peipīsi. Ipipe sui avei niha peyemoviracua peyese. ² Seroya pīpe niha peñepīsiro peico peyemoviracuase sese. Ēgüe ndapeyēise rumo, peroya tupri tēi.

³ Acoi ñehesa aīpīsi vahe, opa uca aīcua pēu. Esepia, ahe aviye catu vahe: Cristo omano yande angaīpa repīrā Tūpa Ñehengagüer icuachiapri rupi eté ⁴ iyavei oñoti sehōgüer yuvireco. Ipare rumo, imombosapisa ari pīpe, ocueravevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe vīroyasar upe. Evocoyase oyoya guasu osepia yuvireco. Setá vīte rumo sepīasarer yuvirecove vīte cūrīteī; amove rumo ambuae opa omano yuvireco. ⁷ Coīye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aīco seroya āgua. ⁹ Esepia, che seco īvi coti catu vahe opacatu ambuae apóstol sui aīcua. Iyavei ndacheāroi eté apóstol che reco āgua viña. Esepia, che yīpīndar seroyasar aseca-seca catu vahe mara-mara tēi sereco āgua. ¹⁰ Che rumo apóstol ité aīco. Esepia, Tūpa oyapo mbahe aviye

vahe ité cheu; che rovasa oico. Evocoiyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi ěgüe ahe vichico, Tūpa rumo oporovasasa pipe secōi che rupi. ¹¹ Ndapepahañemoñetai chira rumo acōi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayeviisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoiyase ndocuerayevii chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoiyase ěgüe ehi tēi etera viña. Iyavei pe yeroyasa Cristo rese ěgüe ehi tēi aveira viña. ¹⁵ Acōi ěgüe ehise ité rumo viña, ore avei evocoiyase oroñehēño tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña. ¹⁶ ěgüe ehi eté, acōi omano vahe ndocuerayeviise yuvireco viña, Cristo avei evocoiyase ndocuerayevii chietera viña; ¹⁷ Tūpa rese pe yeroyasa evocoiyase ěgüe ehi tēi vahe itera viña; angaipā pipe viteño tēi evocoiyase pe recocuer viña. ¹⁸ Iyavei acōi ěgüe ehise ité viña, evocoiyase omano vahe Cristo reroyasar, ahe avei ocañi tēira viña. ¹⁹ Ndipoise yasāro vaherā Cristo suindar mbahe yamanose, yande evocoiyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe. ²¹ Esepia, ñepeī ava rembiapo sui oime manosa yandeu. Evocoiyase ñepeī ava rembiapo sui avei yacuerayevira. ²² Esepia, inungar acōi Adán rembiapo ai sui ava opacatu omano yuvireco, ěgüe ehi aveira Cristo rembiapo sui opacatu ava sese yuvirecōi vahe virecora tecovesa yuvireco. ²³ Ñepeī-peī yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acōi ahe oyevice curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pīrata ěgüe ehi tēi vahe. Ipare omondora opovri pendar Vu Tūpa upe. ²⁵ Ahe rane ité rumo opacatu oporocuirā oico acōi Tu opase voi eté omondo opacatu yamotarēhimbar ipovrive. ²⁶ Ahese ipa manosa opa itera. ²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secōi ipovrive. Esepia, Tu ité opacatu mbahe osecopi imondo ipovrive. ²⁸ Evocoiyase, opase mbahe imondosa ipovrive, ahe ae evocoiyase oyemondora Vu Tūpa povrive. Tu evocoiyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pīha evocoiyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayeviise yuvireco viña, ¿mahera ru evocoiyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoiyase oroyemondora mbahe tēi upe ari rupi viña? ³¹ Supi eté, che rivireta, ari yacatu aviye che amano vaherā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acōi mahembiar oñaro ai vahe rese avava vahe vichico. Acōi omano vahe ndocuerayeviise rumo yuvireco viña, evocoiyase ichui ndipoi

chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovvara pe reco tuprisa” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sori āgua. ³⁷ Yañotise mbahe, sāhii rane ité yañoti; ndahei ihi opacatu reseve yañoti. ³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā. ³⁹ Ndahoyoyai rumo que ñepe mbahe miti hi ambuae mbahe miti hi rese. Ēgüe vahe avei yande yaico vahe ambuae ité yande rete mbahe mimba sui; vīrai rete ambuae ité iyavei pira rete ambuae tēi no. ⁴⁰ Ēgüe ehi avei niha, oime i va pendar rete, i v i ve ava yuvirecoi vahe rete avei no. I va pendar rete catuprigüer rumo ndahoyoyai eté i v i p i pendar rete rese. ⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepe yasitata ambuae yasitata rese ndahoyoyai avei sendigüer yuvireco.

⁴² Ēgüe ehi aveira niha omano vahe cuerayevisa; yañotise sehögüer, ahe ituyu vahe. Ocuerayevise rumo ndituyu iri chietera; apirēhi vahe ité secoira. ⁴³ Tehögüer ñotimbrī nimomburusai vahe; coiye ocuerayevise rumo, imboetipri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co i v i p i pendar tēi setecuer. Ocuerayevise rumo, setecuer i va pendar secoira. Esepia, oime ité i v i pendar setecuer, oime avei i va pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahé sete upe ombou Tūpa secove āgua co i v i pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa i va pendar ava upe imbou āgua. ⁴⁶ Yipindar oime co i v i p i pendar tecovesa. Ipare rumo oime co tecovesa i va pendar yandeu. ⁴⁷ Ēgüe ehi yipindar ava i v i sui yapopri, i v i rese nara ité icuaita oico; coiye catu ava ou vahe evocoyase i va pendar. ⁴⁸ Inungar yipindar ava i v i suindar, ēgüe ehi avei opacatu ava i v i suindar tecovesa rereco yuvireco. Iyavei inungar Jesús i va suindar, ēgüe ehi aveira opacatu i va suindar tecovesa vireco vahe yuvireco.

⁴⁹ Iyavei inungar cūrítei Adán nungar tupri yaico; ēgüe vahe aveira yande Jesucristo i va pendar nungar tupri yaico curi.

⁵⁰ Che r i v i r e t a, co mbahe amombehu potami pēu: acoi ava upe güetecuer reseve, ndiyai eté seique āgua i v a v e Tūpa mborerecuasave. Esepia, co yande rete ocañi tēi vahe, ndoipisii chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbī moñehese voi yande resapihara inungar yande resapiqui vahe, ēgüe ehira secuñarosapa yande rete. Aheseve avei omano vahe ocuerayevipara apirēhi vahe ité yuvireco;

yande evocoyase nayamano vīteī vahe, opaño tēira yande rete secuñarosa. ⁵³Esepia, co yande rete ocañi tēi vaheṛā, ahe yande rete niha opara oñecuñaro apirēhi vaheṛā yuvireco. ⁵⁴Ēgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶Angaipa niha inungar mbahe popiar omoime vahe manosa yandeu. Moisés porocuita aracahendar evocoyase ombou pīratasa angaipa upe angaipa aposar mocañi uca āgua. ⁵⁷Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

16

Porerecosa Jesús reroyasar pītivii āgua resendar

¹Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ²Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico. ³Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. ⁴Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵Che sose, asora ivi Macedonia rupi, ipare asora pe repia Corinto ve. ⁶Aviyeteramo apita pucumira pe piri, anise aviyeteramo pe pīrive ité mbahe porañehi che mombitañora. Ipape che pītiviiñomira peye eipeve sui ambuae tecuave che so āgua rese. ⁷Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸Che rumo cūritei apitaño vitera cohava Efeso ve, asepia ranera Pentecostés pieta. ⁹Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹Tipo eme ñepepe yepe sepia potaēhisar yuvireco, iya rumo peipītivii catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

¹²Yande rivri Apolos upe, “Eso ambuae Jesús reroyasar piri Corinto ve” ahe tēi. Cūritei rumo niquerēhii oso pe repia; iyase chupe, ahese osora pe piri.

Pablo mahenduhasa ipa vahe

¹³Pemahemoha peyese; peyemoviracua avei Jesús rese pe yeroyasa pipe. Peñemosañi catu pe cuaita upe. Peicoveño itera Tūpa pīratasa pipe. ¹⁴Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güëta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri ãgua yuvireco no. ¹⁶ Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pãhu pendar Estéfanos, Fortunato iyavei Acaico cohove oyepotase che mbovîha yuvireco. Esepia, ahe oyapo ité pe ndapeicatu tuprii vahe apo yuvireco. ¹⁸ Ahe che monguerêhi catu yuvireco, êgüe ehi avei revo pëu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pëu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sêtave yuvireco, ahe avei ombou omahenduhasa yande Yar rer pipe yuvireco pëu. ²⁰ Opacatu Jesús reroyasar coha pendar avei omondo omahenduhasa yuvireco pëu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pëu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihavi voi yande Yar ou!

²³ Yande Yar Jesucristo tape rovasa ité yepi. ²⁴ Pëu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pëu.

IMONŪVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha āgua yepi. ⁴ Ahe niha yande mbovihaño opacatu yande paraिसु pipe, yande avei evocoyase yaicatura ava iparaísu vahe mboviha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ēgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha āgua ‘toñepisiro yuvireco’ ore yapave. Iyavei Tūpa ore mboviha pe mboviha āgua avei. Supi evocoyase pe peñemosañora mbegüe rupi ore paraísu agüer nungar tupri pe recose. ⁷ Ore oroyeroya ité Tūpa pe pítiviā āgua rese. Esepia, oroicua ore paraísu agüer nungar tupri peico, ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndoroi catu iri eté oroñemosā ore pīrataēhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi āgua viña, ēgüe ehi rumo oreu oroyeroya catu āgua Tūpa rese, ndahei oreyses tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pītiviise peye pe yeroqui pipe. Ahese setá, “Aviye ndeu” ehira yuvireco Tūpa oporopītiviisa ombou vahe rese oreu setá yeroquisā sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ēgüe orohe, ndahei ava co ivi pipendar mbahecuaasa pipe tēi. ¹³⁻¹⁴ Esepia, che ñehe aicuachía vahe imondo pëu, aicuachía ñepeí reseve pe yeroqui tupri āgua, pe senducua tupri āgua avei no. Iyavei ore cua revo chīhi peye cute. Acoi yande Yar Jesús yevisē curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemoñeta aso vaheṛā ñuvirio yupagüer pe repia, pe mboviha catu āgua viña. Ēgüe ahe ité, che pihañemoñeta pe piri rane che so āgua che guatasa rupi Macedonia ve. Ichui ayevi pota iri pe piri viña, ipare pe che pītiviimira peye ivi Judea rupi che so āgua rese

viña. ¹⁷ Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. ¹⁸ Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa. ¹⁹ Esepia, Tūpa Rahir Jesucristo avei ñepeí reseve vahe ité yayeroyá vahe sese. Ahe secocuer niha oromombehu orico pēu, che, Silvano, Timoteo avei. ²⁰ Esepia, opacatu Tūpa remimombehugüer imboaviyesa sese. Sese niha serer pipe, “Ēgüe tēi” yahe Tūpa upe imboetisave. ²¹ Tūpa niha opacatu yande momirata seseño ité yande reco āgua, yande poravo avei. ²² Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tūpa niha oicua acoi ndayevüise Corinto ve pe piri, Ēgüe ahe pēu mbahe aviye āgua rese. ²⁴ Ndahei opocuai pota mbahe pe rembieroyarā rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pitiñiisa pe yemboviha āgua.

2

¹⁻² Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoiyase che mboviñara viña? Pe ité niha che mboviñasar peico. ³ Sese che aicuachía ñehesa ipirata vahe pēu cuese. Esepia, ndaipotai eipeve che sose, che mboviñahēhi āgua peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoiyase opacatu peviharetera che rese. ⁴ Supi eté che aicuachiasa che ñeha pēu, che ae ayepihamboasi ité, ayaseho avei. Esepia, aicuachía vahe pēu ndahei pe mboviñahēhi āgua, che rumo aicuachía ‘toicua che guaisu etepriisa yuvireco’ che yapave pēu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharēhisa co mbahe tēi apo pipe, ndahei che güeraño ndache mboviñari, pe avei rumo seni opacatu Ēgüe peye. Che, “Seni” aipo ahe ité pēu. Esepia, ndaipotai che ñeha rasi āgua. ⁶ Co mbia upe setá mbahe peiporara uca ité, evocoi rupive iya Ēgüe peye chupe. ⁷ Co suive ité rumo peñerora chupe, peipitiñi aveira. Esepia, aviyeteramo oviharēhisa pipe oyemocañi tēira. ⁸ Sese cūritei opomonguerēhi ité pe mboyecua iri āgua pe poroaisusa chupe. ⁹ Cuese ambuae che ñeha aicuachía co che pe mbohesa resendar pēu pe recoñiha āgua, “¿Oyapo itera piha che remimombehu yuvireco?” ahe pēu. ¹⁰ Cūritei cheñero avei que ava upe peñero vahecuer upe. Esepia, oimese que mbahe rese che ñero āgua, Cristo rovaque Ēgüe ahe pe raisusave ¹¹ Carugar yande mbopañi āgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu āgua, oime ité yande Yar upe nara aheve che poraviñi āgua viña. ¹³ Nambohe catui rumo che pihañemoñetasa. Esepia, ndasepiñi eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua

vahe yasētu vahe opacatu rupi. ¹⁵ Esepia, inungar itaisi sīacua vahe opacatu rupi, ēgüe vahe avei yande Tūpa upe Cristo yande reropovēhese yaico ava ipīsīropirā upe, ava ocañi tēi vaherā upe avei. ¹⁶ Ahe ava ocañi tēi vaherā upe evocoi ñehesa yaru vahe inungar cañi tēisa resendar; ava ipīsīropirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu evocoi nungar mbahe apo. ¹⁷ Ore rumo ndahei setā ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ēgüe orohe, ore rumo ore pīhañemoñeta tuprisa pīpe oromombehu co ñehesa Tūpa rovaque Cristo rese ore recosa pīpe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyecomboivate ai pota iri viña, ēgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ēgüe peye peico ore piha pīpe. Esepia, opacatu ava pe reco tupri repiase, oicua ore poraviqui tuprisa pe pāhuve yuvireco. ³ Pe niha pemboyecua pe reco tupri pīpe ore rembiapo Cristo porocuaita pīpe pe pāhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pīpe ité icuachiapri itape rese, Espiritu Tūpa oicove vahe suindar pīpe rumo yapopri ava piha pīpe.

⁴ Oroyeroya ité co rese Tūpa rese ore yeroyasa pīpe. Cristo niha ēgüe ehi oreu. ⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo āgua. ⁶ Ahe niha ombou opīratasa oreu güemimbotar ipiasu vahe rese poraviqui āgua, ndahei Moisés rembicuachiagüer rupi oroporaviqui. Esepia, ahe imboaviyeēhisa pīpe yamano tēira viña. Ahe rumo Espiritu Tūpa suindar pīpe oroporaviqui. Esepia, ahe ombou tecovesa yandeu.

⁷ Co Moisés recosendar porocuaita icuachiasa ité itape rese, iyavei Tūpa reco porañetesu pīpe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuaita ava upe manosa tēi güeru vahe iporañete ai eté yipindar oico viña. ⁸ ¡Cūrítei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu! ⁹ Supi eté yepe iporañete ai eté Moisés porocuaita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cūríteindar porañete catu vahe rese. ¹¹ Acoi mborocuaita yipindar ndipocopiimi vahe virecose Tūpa reco porañetesu, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pīpe ité. ¹³ Ore rumo ndahei Moisés nungar oroico. Esepia, ahe oyovapi turucuar pīpe omu israelita sui güepiaēhi āgua ndogüe vitēise sendigüer ichui aracahe. ¹⁴ Ēgüe ehi ahe ndosenducua ucai eté ndoyavii

sovapisa vite vahe cūrítei, ěgüe ehi vite oyeróquise Moisés porocuaíta icuachi-apri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. ¹⁵ ěgüe ehi vite cūrítei, senducuaēhi pipe Moisés porocuaíta pipe oyeróqui viteño tēi eté yuvireco inungar sovapisa vite vahe. ¹⁶ Supi eté que ava oyevíse yande Yar upe, ahese ramo serocuasa sovapisa nungar ichui senducua tupri āgua. ¹⁷ Esepia niha, yande Yar Espírítu secoi. Ahe Espírítu ava rese secoise, ndahe iri mbiguai nungar yuvirecoi. ¹⁸ Sese opacatu yande ndahei Moisés oyeovapí vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ěgüe yahese, yareco catu-catu iri seco porañetesa yandeyese. Yande Yar rumo acói Espírítu secoi vahe ěgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poravíqui āgua co ñehesa rese. ² Ore rumo oroseyapa opacatu mbahe tēi ore chí aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. ěgüe orohe opacatu ava upe Tūpa rovai ‘Supi eté, tehi yuvireco opíha pipe’ ore yapave. ³ Yavaise co ñehesa pīsírosa resendar ore remimombehu renducua āgua, ahe ěgüe ehi ava ocañi tēi vahe rā upe. Ahe avíye oyeovapí vite vahe. ⁴ Esepia, supi eté carugar rerecar inungar nomboesapísoi vahe ahe ava yuvireco, sese ndosenducua ucai chupe ‘toviroya eme ñehesa Poropīsírosar Cristo resendar porañete vahe’ oyapave. Ahe niha Tūpa recocuér mboyecuar secoi. ⁵ Esepia, oromombehuse ñehesa pēu, ndahei oreyese tēi. Ore rumo, “Jesucristo yande Yar secoi” orohe oroico. Ore evocoiyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime tesapesa pítumimbi vahe resape āgua” ehi. Ahe avei osesape uca yande piha pipe ‘ipípe toicua che porañetesa che Rahír Cristo recocuér rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-rā que mbahe sepírusu vahe yapocatupri ivi mba-hemoindā ndipocopíi vahe pipe tēi viña. Ipípe toicua opacatu ava yuvireco co pírata Tūpa suindar, ndahei oreyesuindar tēi. ⁸ Yepe mbahe-mbahe tēi oime opacatu rupi ore viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndromocañi eté oreyesui. ⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuér ore rese” ore hesave. ¹¹ Esepia, ore recove vitesese imboguaiipri oroico ore mano āgua Jesús rese. ěgüe orohe secocuér mboyecua āgua ore retecuer ndipocopíi vahe rese. ¹² Evocoiyase co ñehesa

mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ěgüe orohē avei ore, sese oroyeroya ité, ichui oroñehe.

¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipape oyoya guasu pe reseve oyeipive yande rerecora. ¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. ¹⁷ Esepia, co mbahe oropiorara vahe co ivi pipe, ahe ěgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vahe. ¹⁸ Sese ore ndorepifañemoñeta atii chira co ivi pipendar mbahe rese; ore rumo orepifañemoñeta mbahe iva pendar ndayasepia vahe rese. Esepia, co mbahe yasepia vahe, ahe ěgüe ehi raimi tēi vahe; co mbahe rumo ndayasepia vahe, apirēhi vahe ité.

5

¹ Yaicua niha yande retecuer ndipocopii vahe, inungar oi ndipocopii vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahehi ahe ava rembiapo tēi. ² Supi eté yaicove vitesē co yande rete ndipocopii vahe rese, yande poāsesa pipe yaipota ité yande rete iva pendar. ³ Aheve yande rete ipiasu vahe yarecose, ahese ndahehi chira yande hā nani tupri vahe nungar yuvirecoira. ⁴ ěgüe ehi eté yande retecuer pipe vite yaicose, yande poāse yande viharēhisā pipe. Esepia, ndayaipotai yande hā nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vahe yande resendar tecovesa piasu, ndopai vahe rereco āgua” vahe. ⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesē yande rete rese, ndayaico vitei eté ivave yande Yar piri. ⁷ Esepia, cūrutei yande Yar rese yeroyasa pipe ité yaguata, ndahehi mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mboviha āgua yepi, que yaicove vitesē yande rete rese, anise que yasēsē ichui. ¹⁰ Esepia, yande opacatu yañecuavēhera Cristo rovai iporandusave yaipisi vahe hā ñepeí-peí mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesē.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pifañemoñeta rerova Tūpa rese ipifañemoñeta āgua yuvireco. Tūpa niha ore cua tupri, tapeicua avei ru ore recocuer. ¹² Ndorohēhei pēu ore yemboivate ai āgua tēi. Ore rumo oroñehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe yupe iñehe mboyevi āgua. Esepia, ahe ndahehi ava pifa pipendar rese oyemboviha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ěgüe orohē oroico.

Yaracua vahe nungar rumo, ore rerecose peye, pëu mbahe aviye ãgua rese ãgüe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirã, ipipe sui yaicua opacatu ava ocañi tã vahe rã yuvireco viña. ¹⁵ Cristo niha omano opacatu yande repirã. Yande yaicove vite vahe evocoyase ndahe iri yandeyeupe nara tã yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pihãñemoñetañhi iri ãgua que ava rese, ava tã pihãñemoñetasa rupi. Yepe yipindar inungar ava ivi pipendar tã ãgüe orohe ore Cristo rese ore pihãñemoñeta oroico viña, cūritei rumo ãgüe ndorohe iri ore pihãñemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tũpa oyapo yandeu, ahe niha Cristo rembiapo sui yande recocuer moingatu oyeupe nara. Ipape oreu avei ombou co ñehesa mombehu ãgua ambuae ava upe secocuer moingatu ãgua avei. ¹⁹ Aipo oyapave aipo ehi: Tũpa ombou Guahir Cristo co ivi pipe ava recocuer moingatu ãgua 'toyevi cheu' oya; ipipe sui avei ahe ava angaipaguer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu ãgua ava upe. ²⁰ Ore evocoyase Cristo porocuita rupi oroñehhe vahe oroico, inungar Tũpa ité oñehera pëu viña. Sese, "Peyevi Tũpa upe, ahe pe recocuer moingatura oyeupe nara" orohe Cristo rer pipe pëu. ²¹ Yepe Cristo ndoyapoi eté angaipa, Tũpa rumo vireco uca angaipa viyar nungar yande repirã yande reco ivi ãgua Cristo rupi yande guatase.

6

¹ Ore pe mboetasa co Tũpa upendar mboraviqui resendar ore recosa pipe: "Peicua catu, pemocañi tã rene Tũpa porovasasa peipisi vahe" orohe pëu.

² Esepia, Tũpa aipo ehi icuachiapri aracahendar pipe:

"Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivi" ehi.

¡Ahe ari oyepota cute! iyavei oime ité cūritei ñepisirosa.

³ Ore niha ndoromboyecuai ore reco ai ava pãhuve. Esepia, ndoroipotai que ava Tũpa upe ore poraviquisa rese iñehhe rai ãgua yuvireco. ⁴ Ore rumo oromboyecua ité Tũpa rembiguai ore recosa. Esepia, ore reco mbegüesa pipe oroñemosañ mbahe-mbahe tã upe yepe ipane mbahe oreu viña, iyavei mbahe yavaise; ⁵ ãgüe orohe avei ore nupa-nupase, ore roquendase avei iyavei omonguerñehise ava rehii ore amotarñhi ãgua yuvireco. Oroyapo avei mboraviqui ipirata vahe; amove ndoroquei eté, setã rupi ndoreriepoi tã avei.

⁶ Oromboyecua avei ore reco marañehisa, ore mbahecuaasa supi eté vahe, ore reco mbegüe tuprisa, yeaisusa orovireco avei no. ãgüe orohe ité niha Espiritu Santo pĩratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tũpa pĩratasa pipe avei oroico. Ore niha ore reco tupri pipe orosecopi mbahe-mbahe tã. Ipipe avei oroyopei.

⁸ Amove ava ore mboetei ai, amove rumo oñemoiro yuvireco oreu; amove avei oñehhe tupri ai ore rese yuvireco, ipape rumo iñehhe-ñehhe tã ore rese yuvireco yepi no. Iyavei amove oporombopa tã vahe nungar ore rereco yuvireco, yepe oromombehu tã mbahe supi eté vahe viña. ⁹ Amove ndicuasai vahe nungar tã ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tã, ndore yuca eté rumo ipipe yuvireco. ¹⁰ Amove ndoyavi ndorovihai

vahe yuvireco chupe, ore rumo orovihãño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tũpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pẽu iyavei pe raisu ãgua orovireco ore piha pipe tuvichá pe rese.

¹² Ndorehãpisiĩ pe rese pe raisu ãgua; pe rumo ãgũe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tũpa oicove vahe rẽta nungar ité yaico

¹⁴ Ndapeyovaichoi chira ava Tũpa ndoviroyai vahe rese. Esepia, ndoyoyai eté pe pihañemoñetasa. ãgũe ehi eté teco ñvisa ndoyoyai teco rai rese inungar tesapesa ndoyoyai pitumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tũpa reroyasar Tũpa reoyasarẽhi rese yuvireco? ¡Aní eté! ¹⁶ ¿Oyoya tie mbahe rahanga tẽi Tũpa rẽta rese? Yande niha Tũpa oicove vahe rẽta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatara ipãhu rupi yuvireco; che avei aicora iTũpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei aipo ehi yande Yar güeco pĩratasa pipe” ehi.

7

¹ Che rivireta, che rembiaisu, co Tũpa remimombehu imboaviyepirã yandeu. Sese yande yamoiñgatu tuprira yande recocuer chupe yarecoẽhi ãgua yande retecuer iyavei yande espíritu mbahe tẽi pipe. Iyavei Tũpa mboeteisa pipe yasecara yande reco catupri ãgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tẽi que ava upe, ndoromomaraĩ eté que ava recocuer, ndoroporombopai avei. ³ Ndahei pe recocuer rese che ñehesa raisave aipo ahe pẽu. Supi eté yipindar, “Che pihave ité opoaisu, pẽu nara avei aicove, amano aveira pẽu” ahe acoi pẽu cuese. ⁴ Ayeroya ité pe rese, pe rese avei aviharete. Che paraisu pãhuve ayemonguerẽhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tẽi ore sui; oime viteño ité rumo mbahe-mbahe tẽi oreu opacatu rupi: oime ore amotarẽhimbar iyavei oime ore yepihamondiisa. ⁶ Tũpa rumo, ava ndoyemonguerẽhi vahe, omonguerẽhi iri yepi. Ahe ore monguerẽhi catu iri Tĩto yepotase. ⁷ Ndahei rumo Tĩto yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharẽhi agüer cheu, pemahenduhaño ité aipo che rese pe che raisusave yepi. Aipo nungar renduse ayemboviha catu.

⁸ Yepe che ñehesa aicuachia vahecuer imondo pẽu ndapevihal viña, cheu rumo aviyeño cũritei. Yipindar rumo ayepihamboasi aicuase che ñehesa tasĩ iteanga vahe pẽu; chĩhi rupi tẽi rumo ndapevihal peyeroqui pare sese.

⁹ Cũritei che avihareté. Ndahei rumo pe viharẽhisa rese ãgũe ahe. Esepia,

co pe viharêhisa sui pemboasi pe angaipa Tûpa upe pe yevei âgua, evocoi nungar Tûpa oipota. Evocoiyase ore ñehe ndoyapoi mbahe naporai vahe pëu. ¹⁰ Esepia, co nungar viharêhisa Tûpa oipota vahe yande angaipa mboasi uca, chupe yande yevei âgua. Ipîpe sui niha yañepisiro yande pîhañemoñeta roervaêhisa pîpe. Co ivi pîpendar têi viharêhisa rumo manosa têi vîreco yandeu. ¹¹ Pe rumo peñemosañe pe viharêhisa upe; ahe aviye Tûpa upe. ¡Pesepia ru co mbahe aviye vahe pe recocuer pîpe oime vahe evocoi Tûpa remîmbou pe viharêhisa sui cute! Supi eté rumo, peyapisaca iyavei pe querêhisa pîpe peyoepi, pemboasi pe pîha pîpe ité co mbahe têi oímese pe pâhuve, iyavei peyembosiquiye peico. Ichui che repia pota ité peye, iyavei pequerêhi ité mbahe moingatu âgua. Sese pemboyepepi ité evocoi mbahe têi aposar peyesui. Che aicua cute pëu ndahei pe pîha rupi co nungar mbahe têi oímese. ¹² Cuese aicuachiasse evocoi che ñehe imondo pëu, ndahei ava mbahe têi aposar reseño, ndahei avei mbahe têi oiporara vahe reseño, che rumo aipota catu peicua pe ore raisusa pereco vahe oreu nara Tûpa rovaque. ¹³ Co rese ore oroyembovîharete.

Iyavei oroviha catu Tito yembovîhasa repiase. Esepia, pe avei niha opacatu pembovîha catu ité pe recocuer pîpe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipîpe nachi eté. Inungar oromombehu mbahe supi tupri vahe pëu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cûritei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ ¡Ayeroya ité pe rese, sese aviha ité!

8

Ava querêhisa porerecosu mondo âgua Jerusalén pendar upe

¹ Che rivireta, cûritei che amombehu potami pëu mara ehi mbahe tupri apo Tûpa ava vîroyasave upe ivi Macedonia rupi. ² Yepe ahe ava recocuer yavai eté yuvîreco chupe secoâhasa pîpe viña, ovîhareteño rumo ipîpe yuvîreco; yepe iparaisu vahe pãve têi, iporerecoño ité rumo yuvîreco. ³ Supi eté oquerêhisa pîpe omondo ité ocatugüer rupi; amove oseca iri mbahe güemîmbotar rupi yuvîreco. ⁴ Ahe, “Ore avei catu toroipîtivîi ambuae Tûpa reroyasar” ehi yuvîreco. ⁵ Ahe rumo oñocua iri ore pîhañemoñetasa yuvîreco. Yande Yar upe rane oyemondo. Ipare Tûpa remîmbotar rupi êgüe ehi avei oreu yuvîreco. ⁶ Evocoiyase ore aipo orohe Tito upe pëu: “Tomboyeapi iri co porerecosu monuha âgua ava upe” orohe. Esepia, yîpîndar ahe osose pe pâhuve, ahe pe pîtivîi imboipi âgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tûpa ñehesa, pereco ité Tûpa suindar mbahecuasa, pequerêhi ité Tûpa upe mbahe apo âgua iyavei ore raisu ité peye. Evocoiyase êgüe peye aveira co nungar poroaisusa apo.

⁸ Ndahei pe cuaisa pîpe aipo ahe pëu, che rumo ‘toicua ambuae ava rembiapo oquerêhisa pîpe oyapo vahe yuvîreco’ che yapave. Sese niha peicuara, supi eté vahe pîha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pîpe sui niha pe iva pendar mbahe pereco.

¹⁰ Pëu mbahe aviye âgua che añehe co nungar mbahe rese. Cuese ambuae aravîter pe niha yîpîndar pemboipi co mbahe apo. Ahe niha pe querêhisa pîpe peyapo. ¹¹ Cûritei pemboaviye catu pe porerecosu pe querêhisa yîpîndar

pe reco vahe pipe; pemondoñora mbahe peicatuğier rupi. ¹² Esepia, acoi que ava omondo pota vahe mbahe, Tüpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pítiviisa pipe yuvireco” ndahei rumo pëu.

¹⁴ Cüritei mbahe pe rembiereco eta pipe peipítivii catu ambuae ava ipane vahe mbahe yuvireco chupe. Virecomise mbahe, ahe avei pe pítiviira yuvireco pëu mbahe ipanese. Evocoiyase pe recocuer oyoya tupri itera.

¹⁵ Inungar Tüpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugier reseve Corinto ve

¹⁶ Aviye Tüpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa písirosa rese yuvireco. ¹⁹ Sese opacatu oiporavo yuvireco ore rupi iguata āgua ore pítivii vaherā avei co porerecosa reraso āgua. Ore ēgüe orohé oroico yande Yar mboetei āgua rese ‘toicua ore querēhisa pipe ité oroporopítivii yuvireco’ ore yapave. ²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tüpa rovaque güeraño, opacatu ava rembiēpiave avei.

²² Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cüritei iquerēhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco pëu, “Ahe oyoya Pablo rese oporaviqui vahe pe pítivii āgua” peyeñora. Acoi oporanduse avei ambuae yande rivri rese yuvireco pëu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoiyase toviroya ité che ayeroyase iyavei ayembovihase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañehe iri pëu. ² Esepia, che aicua pequerēhi ité ipítivii āgua. Evocoiyase che viharetasa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii āgua cuese ambuae araviter suive yuvireco” ahe yuvireco chupe. Evocoiyase pequerēhise ité ipítivii āgua, ahese setaño ité oyemonguerēhi yuvireco. ³ Che rumo amondo co yande rivri yuvireco pëu cüritei ‘ēgüe tehi tēi eme che ñehesa aviye vahe sesendar yuvireco’ viya pëu. Pe yemoingatu tupri āgua ité aipo ahe pëu; ⁴ aní acoi arase Macedonia pendar cheyeupi, sembiēpiave ndapeyemoingatu vitei chira peico. Ēgüe peyese ore mochi guasu uca tiētera peye. Esepia, che ayeroya ité pe rese. Pe avei evocoiyase pechüra. ⁵ Sese che pihañemoñeta yipindar añehe co mbosapi yande rivri upé yuvireco, ahe ranei ore renonde yuviraso āgua pe piri pe pítivii āgua co porerecosa aviye vahe monuha āgua

rese, acoi cuese pe remimombehugüer rupi. Evocoiyase ahe pe porerecosa pe remimonuha opara pemoingatu tupri ité pe avagüer mboyecua água, ndahei chira rumo pe recatêhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepei-peí iya opihañemoñetasa rupi omondora oporecosa Túpa upe yuvireco, ndahei chira opiha víracuasa pipe tēi iyavei ndahei chiaveira ambuae ava ocuai píratasa pipe tēi. Esepia, Túpa osaisu ava oviharetasa pipe omondo vahe oporecosa chupe. ⁸ Túpa niha oicatu opacatu mbahe aviye vahe mondo água pēu ari yacatu rupi pereco vaheerá opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropitívii água. ⁹ Inungar icuachiapri pipe aipo ehi:

“Ahe iporeco ai iparaisu vahe rese yepi. Ahe mbahe aviye vahe sembiapo nocañii chietera” ehi.

¹⁰ Túpa niha ombou mbahe ráhii ava remitira, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pítivii água. ¹¹ Túpa ombou catura opacatu mbahe pe rembierecorá ava upe imondo catu água pe avasa pipe. Ore orovirasose porerecosa pe remimbou yande rivireta upe, ahe evocoiyase, “Aviye ndeu” ehira Túpa upe yuvireco. ¹² Esepia, co pemondo vahe yande rivireta pítivii água, ndahei peipítivii mbahe ipane vahe rese güeraño, ichui avei niha, “Aviye Túpa upe” ehira yuvireco. ¹³ Ahe evocoiyase omboeteira Túpa yuvireco. Esepia, co pe poropitívii pipe pemboyecua itera pe Cristo ñehe reroyasa peico. Ahe avei omboeteira Túpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoiyase ahe oyoquirira pe rese iyavei pe raisu etepirira yuvireco. Esepia, Túpa pe pítivii eté oporovasasa pipe. ¹⁵ ¡Aviye Túpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatu vahe mombehu tupri água!

10

Pablo cuaita apóstol seco água

¹ Che Pablo añehe Cristo poroaisusa, seco asiêhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe píratá iteanga” aipo ehi tēi yuvireco cheu viña. ² Che rumo asose pe repia, ndaipotai che píratasa mboyecua água pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe píratá vaheerá. ³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Túpa píratasa mbahe tēi seco píratá vahe recopi água ava aracuasa tēi recopi água avei. ⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Túpa recocuer ava upe. Iyavei opacatu ava pihañemoñeta raisa orosecopi Cristo reroya tupri água yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi água. Pe rane rumo peroya tuprira.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa

yuvireco. ⁸ Yepe ayeecomboivate che mborerecuasa rese pëu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe pãhu pendar, “Oñehe oicuchía vahe ombou yandeu, ahe ipĩratá, yavai avei yandeu; ahe ité rumo aní angai vahe secoi yande pãhuve iyavei ñehe ãgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapĩrasai chietera ore cuaita ore yeecomboivatesa pipe. Tũpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei. ¹⁴ Ore rumo ndoroyapĩrasai ore cuaita mombehusa icuachía pëu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pëu. ¹⁵ Ndoroyapĩrasai avei ore ñehe pipe ambuae ava poraviquisa sui tēi. Ore rumo, orosãro ore oroporaviqui catu vaheerã pe pãhuve Tũpa rese pe yeroyasa rupi. Ndoroyapĩrasai avei rumo ore cuaita. ¹⁶ Iyavei orosãro ñehesa pĩsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

11

Pablo iyavei apóstol angahu tēi yuvirecoi vahe

¹ ¡Peñemos a iriñomi tēira cheu co che ñehe ndayaracuai vahe nungar pipe che ñehese! ² Esepia, che cherecatēhi ité pe rese, ahe tecatēhisa ou cheu Tũpa sui. Che aipota Cristo upe opomondo vaheerã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, avieteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui. ⁴ Esepia, peñemosãño ava oñehe vahe pëu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pĩsirosa resendar peipisi avei ndoyoyai vahe ore pëu oromombehu vahe rese. ⁵ Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. ⁶ Yepe ndayembohei che ñehe tupri ãgua ité, che rumo areco che mbahecuaasa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pĩsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgüe ahe che reco yemominisa pipe. ¿Mbahe tēi pĩha ayapo ãgüe ahese pëu? ⁸ Aipisi ambuae ava Jesús reyoyas sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgüe ahe che pepoisupave pe mañecoēhi vichico.

Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaheã co che viharetasa che sui yuvireco. ¹¹ ¿Mbahe rese pñha aipo ahe pñu? ¿Pe raisuẽhisave pñha? ¡Tũpa rumo oicua che pe raisusa!

¹² Ayapoño itera rumo co mboraviqui cheu imboepiẽhisa pipe vichico co ambuae pe pñhu pendar ava pe mbopaẽhi ãgua yuvireco. Esepia, che nungar yuvirecoi pota tẽi viña. ¹³ Ahe rumo ndahei apóstol supi tupri vahe yuvirecoi, ahe oporombopa tẽi, “Ore apóstol oroico” ehi tupri tẽi yuvireco. ¹⁴ Yaicua niha Carugar rerecar oporombopa. Esepia, oyeapo inungar Tũpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tũpa ñehe mombehusar yuvireco. ¡Ahe chupe rumo oimera Tũpa ñemoirosa mbahe sembiapocuer rupi curi!

Pablo oiporara mbahe-mbahe tẽi apóstol güecosa pipe

¹⁶ Aipo ahe iri pñu: tipo eme ava “ndayaracuai” ehi vahe cheu. Acoi, “Ëgüe ehi oico” peyese cheu, tañeheño ayase ndayaracuai vahe nungar, che avei evocoyase tayecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaẽhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tẽi oyemboivate ai güecocuer aviye angahu vahe tẽi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querẽhisa pipe ava ndayaracuai vahe. ²⁰ Pe niha pemboyoyano acoi que mbiguai tẽi nungar pe rereco vahe, que mbahe pe rembiereco sui tẽi oicove vahe, que pe mbopa tẽisar, pe reroirosar, que pe rova pete-pesar avei. ²¹ Che chisa pipe aipo ahe co imombehu, ñore reco mbegüe etepri evocoi nungar apo ãgua pñu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase egüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tẽi aico yuvireco ichui, inupambrí catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepepi rupi evocoyase che api-apisa ita pipe. Mbosapi yupagüer avei oñepivi iar ipive che guatasa rupi cheu, ñepepi pñu, ñepepi ari avei avevui tẽi para guasu aviter rupi vichico. ²⁶ Setá aguata opacatu rupi, iyavei ñai rupi mbahe-mbahe tẽi oime cheu, aico avei imonda rai vahe pñhuve; che mu judío mbahe tẽi vahe pñhuve avei aico iyavei ndahei vahe che mu pñhuve no. Aico avei tecua guasu pipe mbahe tẽisave, amombri vahesa rupi iyavei para guasu pipe, iyavei mbahe-mbahe tẽisave Jesús reroyasar angahu tẽi pñhuve aico. ²⁷ Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporẽhi iyavei husei; setá rupi ndacarui; sõhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi

que oimese oyavi uca vahe mbahe, che moñemoiro uca. ³⁰ Iyase che yeecomboivate ai água cheu, co mbahe omboyecua vahe che pĩrataẽhisa rese ayecomboivate aiño itera. ³¹ Yande Yar Jesucristo Ru Tũpa, ahe imboeteĩpri apĩrẽhi secoi vahe, ahe oicua aipo che hesa supĩ tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendiĩpive che rese osareco vaheĩ che roquenda água yuvireco viña; ³³ oime rumo ava iruova guasu pipe che mogũeyĩ vahe tecua achisa metana rupi yuvireco. Ëgũe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndipoi eté que ava mbahe oĩpisi vahe ahe ae tẽi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aĩpisi vahe ichui. ² Che aicua mbĩa Cristo reroyasar, omomba cũritei catorce araviter ahe imbosapisa ivave seraso agũer. Ndicuasai gũetecuer rese tie revo oso, anise ihã gũeraño tie revo. Tũpa rumo oicua. ³⁻⁴ Che rumo, “Ëgũe ehi tie revo oico” ahe aipo mbĩa upe, Tũpa gũeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu água yuvireco. ⁵ Evocoi nungar mbĩa rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño ãgũe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supĩ eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugũer rese avei yuvireco che querve nungar mbahe mombehu rãgũer sui’ viya. ⁷ Sese che yemboivate aiẽhi água che quer nungar mbahe che pĩhamondĩi vahe rembiepiagũer rese Tũpa ombou teco asisa cheu. Ahe aviye yu che cutu guasu vahe, ndoyavĩ avei Carugar maramara tẽi che rereco vahe. ⁸ Mbosapĩ yupagũer yande Yar upe aporandu ité teco asisa che sui serocua água rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosã água. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboviha catuño itera che reco nipiratai vahe rese. Ëgũe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara água yuvireco iyavei que mbahe yavai vahe aiporarase Cristo sui. Esepia, ayanduse che pĩrataẽhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ãgũe ahe. Iya rumo peñehe tuprĩra che rese viña. Esepia, yepe ndahei seco ivate vahe aico viña, co apóstol angahu tẽi rumo pe supĩ peguata vahe ndahei ivate catu vahe che sui yuvireco. ¹² Che ñemosã tupri pipe mboravĩqui ayapo pe pãhuve. Ayapo mbahe poromondĩisa mbahe pesepia yesapĩha rai vahe imboyecua água che supĩ eté vahe apóstol che recosa. ¹³ Co mbahe reseño pe ivĩ coti catu peico ambuae Jesús reroyasareta sui, che ndopomañecoise mbahe cheu pembou vaheĩ rese. ¿Ayavĩ tie che cuaita, ãgũe ahese pẽu? ¡Peñero sese cheu!

¹⁴ Cũritei che ayemoingatu imombosapisa rupi che so água pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe

recocuer ité rumo aipota. Esepia, iyésupa omonuha guarepochi guahir upe, ndahei tahir tēi ěgüe ehi oyésupa upe yepi. ¹⁵ Evocoyase che querēhisa pipe amondora opacatu che mbahe areco vahe pe pītīvii āgua iyavei opacatu che recocuer rese ayemondo pēu pe reco tupri āgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese pēu. Amove rumo ava, “Yande mbopa āgua tēi ěgüe ehi Pablo yandeu” ehi tēi yuvireco. ¹⁷ ¿Opombopa uca tie ava pēu che remimondo pipe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri Tūpa reroyasar amondo. ¿Pembopa tie Tito? Oyoya tupri mbahe oroyapo Tūpa upe ñepei ore pihañemoñetasa pipe.

¹⁹ Che rivireta, che rembiaisu, pe revo pepihañemoñeta ore oroicuachía co pēu, ore yoepi āgua tēi. ěgüe ndorohei eté rumo. Ore rumo Cristo rese ore reco pipe oroñehe Tūpa rovaque. Opacatu ité niha mbahe oroyapo pe recocuer moviracua catu āgua. ²⁰ Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo ěgüe peye aveira che repiase. Che asiquiye ité, oime revo pe pāhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pāhuve ava oyeupeño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe. ²¹ Asiquiye avei aso irise pe repia, omboura Tūpa pe sui che chī āgua, che mboyasēho uca tiētera peye setá pe cueseve peyemboangaipa vahe rese iyavei ndapemboasii etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuaa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūrítei amombri aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparaisuereco iri chira. ³ Esepia, pe peipota ité che recoāha āgua ‘¿Cristo ité piha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opīratasa pēu. ⁴ Supi eté niha ahe yaticasa, inungar ava nipiratai vahe. Cūrítei rumo ahe oicove Tūpa pīratasa pipe. ěgüe orohe avei ore seco pīrataēhisa sereco. Oroicose rumo sese oroico Tūpa pīratasa pipe pe rese hañeco āgua.

⁵ Pemahecia tupri catu pe recocuer rese: ¿peico ité piha pe Cristo rese yeroyasa pipe? ¿Ndapeicuai vo Jesucristo secoise pe rese, pesēse pe recoāhasa sui? ⁶ Pe revo peicuara ore ndorocañi tēi vahe oroico ore recoāhasa pipe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ěgüe orohe; co catu ‘toyapo mbahe aviye vahe yuvireco’ ore yapave, yepe pēu ndoyavii orocañi tēi vahe oroico viña. ⁸ Esepia, ndiyai mbahe supi tupri vahe amotarēhi āgua oreu; ěgüe ehi rumo sese catu ité oroñehe. ⁹ Sese oroviñaño ité norepīratase, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. ¹⁰ Aicuachía co che ñehe

imondo pẽu pe piri che so ãgua renonde. Acoi asose, namboyecua pĩratal chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerẽhi catu, oyoya guasu peico tupri avei peyese mbahe tupri pipe. Evocoiyase Tũpa oporoaisusa pipe, gũeco tuprisa pipe avei secoira pe rese. ¹² Pemombehu che mahenduhasa ñepi-pei peyeupe pe yeovaupitesa pipe. ¹³ Opatatu ambuae yande rivri, Tũpa reroyasar avei omondo omahenduhasa yuvireco pẽu.

¹⁴ Peipisi yande Yar Jesucristo porovasasa, Tũpa poroaisusa iyavei Espĩritu Santo tasecoi opacatu pe rese. Aipo rupive che ñehe pẽu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohave oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá repirã. Ēgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropisirosa resendar

⁶ Che pñamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa pīsirosa resendar. Ēgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepia, java remimbotar rupi tēi mbahe ayapo vitesé, evocoiyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropisirosa resendar amombehu vahe ava upe ndahei ava tēi pñamondii. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesé aracaco. Che pñatasa pipe tēi aseca opacatu Tūpa rembiporavo Jesús reroyasar momara água. ¹⁴ Ēgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramo eta yembohe agüer rupi eté vichico. ¹⁵ Tūpa rumo yipive che ha viteñiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ēgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi. ¹⁹ Ndasepiai eté rumo ambuae apóstol. Yande Yar rivri Santiago güeraño asepia. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūritei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecur reseño rane oroñemonuha. Esepia, ndaipotai che rembiapo opitara ēgüe ehi tēi vaheṛā. Evocoyase amombehu co ñehesa poropīsirosa resendar chupe yuvireco acoi amombehu vahe ava eta ndahei vahe judío pāhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore roreyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa pīsirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecur, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.)

⁷ Ahe rumo oicua yuvireco Tūpa che cuai oñehengagüer poropīsirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropīsirosa resendar mombehu āgua judío upe. ⁸ Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vaheṛā ava ndahei vahe judío pāhuve oroico, inungar ahe oporaviqui judío pāhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pītivii āgua rese” ehi. Yipive ité rumo che ēgüe ahe pota vichico yepi.

Pablo oñehe pīrata Pedro upe sembiavi rese Antioquía ve

¹¹ Iyavei orose Pedro tecua Antioquía ve. Aheve oyavi güecocuer. Evocoyase añehe pīrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío piri viña. Ipare rumo, oyepotasa ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocar upe iri ipiri. Esepia, ahe Jesús reroyasar judío yugüeru vahe “judío recocuer rupi yagatara yande ñepisiro āgua” ehi vahe ité yuvireco viña. ¹³ Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. ¹⁴ Che asepiase

rumo, ndahoyoyai secocuer yuvireco co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cũritei rumo erembohe tẽi nde rembiapo pipe evocoi ava ndahei vahe judío Jesús reroyasar judío rereco uca ãgua” ahe chupe.

Judío, ndahei vahe judío oyoya oñepĩsiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cũritei rumo yaicua, ndipoi eté que ava seco catupri vahe Tũpa rovaque Moisés porocuaita mboaviyesa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tũpa he ãgua yandeu. Êgũe ehi eté seroya pipe, ndahei acoi porocuaita tẽi reroyasa pipe. Esepia, ndipoi chietera que ñepeí ava seco catupri vahe Tũpa rovaque evocoi porocuaita tẽi aposa pipe.

¹⁷ Yasecase yande reco catupri ãgua Cristo rese yande yeroyasa pipe, ipipe yaicuase angaipa viyar yande reco, ¿Cristo pĩha evocoyase yande mboangaipa? ¡Aní eté! ¹⁸ Che amocañise mbahe, ipare rumo amopuha irise, che evocoyase ayemboangaipa ipipe. ¹⁹ Esepia, ndaicatuise Moisés porocuaita reroya tupri che ñepĩsiro ãgua, ahese ocañi tẽi vahe aico ipipe. Ichui rumo Jesucristo reroyasa pipe asupiti Tũpa upe nara che recove ãgua. Esepia, che aviye yaticapri aico Cristo rese. ²⁰ Sese ndahe iri che ité aicove; Tũpa Rahir Cristo rumo che rese secoi. Sese ité ayeroya che retecuer pipe che recove ãgua. Ahe niha oyemondo omano ãgua che raisupave. ²¹ Naroíroi eté co Tũpa porovasasa. Esepia, ava seco catupri Tũpa rovaque porocuaita tẽi reroya pipe viña, evocoyase Cristo mano agüer êgũe ehi tẽi etera viña.

3

Porocuaita iyavei yeroyasa

¹ ¡Ndapembahecuai eté pe Galicia pendar! Pe ndoyavii ipaye vahe remimbopa peico. Oromombhu tupri niha pe rovai eté acoi Jesucristo curusu rese yatica agüer pẽu. ² ¡Pemboyecua co che porandusa cheu! ¿Moisés porocuaita mboyeroya pipe pĩha peipisi Espiritu Tũpa suindar, co ñehesa pesendu vahecuer reroya pipe tie? ³ ¡Ndapembahecuai eté! Yipindar Espiritu pipe pemboipi Cristo rupi pe guata ãgua. ¿Êgũe peye aveira pĩha pe pĩratasa pipe tẽi pe guata tupri ãgua Cristo rupi cũritei? ⁴ ¿Ndape pĩtívimi eté vo acoi opacatu pe paradisusa Cristo recocuer rese? ¡Pe pĩtívimira tarahu viña! ⁵ Tũpa niha omondo oEspiritu pe rese iyavei oyapo poromondiisa pe pãhuve. ¿Mahera pĩha oyapo? Esepia, co ñehesa pesendu vahe peroya ité, sese êgũe ehi pẽu ndahei Moisés porocuaita tẽi reroya pipe.

⁶ Esepia, aracahe Abraham oyeroya ité Tũpa rese, ipipe sui Tũpa oipisi seco catupri vahe nungar oyeupe nara. ⁷ Sese iya ité peicuara opacatu acoi oyeroya vahe Tũpa rese yuvireco, ahe Abraham suindar supi tupri vahe. ⁸ Iyavei Tũpa Ñehengagüer icuachiapri pipe omombehu ité senondeve Tũpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri yuvireco nde sui” ehi. ⁹ Evocoyase Tũpa osovasara cũriteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tūpa ñemoirosavrive tēi yuvirecoira. Esepia, icuachiapri aracahendar pipe aipo ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe ñemoirosavrive tēi yuvirecoira” ehi. ¹¹ Sese, co omboyeca tupri yandeu ndahei Moisés porocuaita reroyasa pipe tēi Tūpa, “Co seco catupri vahe” ehi ava upe. Esepia, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove água” ehi.

¹³ Moisés porocuaita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirā. Esepia, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipípe sui yande opacatu yaipisi Espíritu imombehupri yayeroyase Cristo rese cūritei.

Porocuaita iyavei Tūpa güemimombehugüer omboaviye vaherā

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiase güemimbotar omombehu vahe, ahese ndipoi que ambuae ava omboyeho vaherā iyavei ndipoi que ambuae ava omboyepi iri vaherā. ¹⁶ Ēgüe ehi avei Tūpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ēgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pēu: evocoi porocuaita Tūpa ombou vahecuer cuatrocientos treinta araviter pare, ndoicatuí chietera Tūpa ñepeí reseve Abraham upe omombehu vahecuer iyavei oñehe omboaviye vaherā mboyeho água. ¹⁸ Supi eté acoi Tūpa suindar ou vaherā porerecosá Moisés porocuaita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepeí reseve Tūpa remimombehugüer rupi Abraham upendar porerecosá.

¹⁹ ¿Mahera pīha evocoiyase aviye Moisés porocuaita? Esepia, ava poreroyaēhisa cua água Tūpa ombou oporocuaita Moisés upe aracahe. Co porocuaítavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembiguai iva pendar oporocuaita mombehu água Moisés upe aracahe ‘tomombehu evocoiyase Moisés che porocuaita opacatu ava upe’ oyapave. ²⁰ Ñepeí ava rese oñemoñetase, ndipotasai ambuae imoingatu água. Tūpa niha ñepeí vahe secoi.

Mbahe sui Tūpa ombou oporocuaita

²¹ “Moisés porocuaita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuaita ombou vaherā tecovesa apirēhi ava upe imboaviyesa pipe, evocoiyase porocuaita reroya pipe yande reco catupri Tūpa rovaque viña. ²² Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vaherā ichui mbahe imombehupri písi água.

²³ Yipindar rumo mbiguai nungar yaico Tūpa nomboyecua vîteise Guahir rese yande yeroya āgua. ²⁴ Inungar chīhivahemi tēi, ēgüe yahe porocuitavrive yaico yipindar. Ahe porocuita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu. ²⁵ Cūrítei rumo oime Jesucristo rese yeroya āgua cute. Evocoyase ndahe iri ahe porocuitavrive yaico. ²⁶ Pe niha opacatu Tūpa rahir peico Jesucristo rese yeroya pipe. ²⁷ Opacatu pe ñapiramombri peico vahe Jesucristo rupi pe guata āgua, secouer avei pereco. ²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepepe vahe nungar ité yaico Cristo rese. ²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

4

¹ Amboyoapi vitera co che ñehesa pēu: inungar que ava omanose, oseya ombahe eta guahir upe chīhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povrive secoi imboyeroya āgua. Ocuacuase voi eté, opoira tu remimombehugüer rupi ichui. ³ Ēgüe ehi avei yandeu. Yande chīhivahemise, evocoyase mbiguai nungar yipindar vahe co ivi pipendar porocuitavrive yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi. ⁵ Ēgüe ehi ou opacatu yande renose āgua evocoi mborocuitavri sui Tūpa rahir ité yande reco āgua. ⁶ Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe. ⁷ Sese yande Tūpa rahir ité yaico, ndahe iri cūrítei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe. ⁹ Cūrítei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pīha oyevi iri mborocuita tēi pipe mbiguai tēi güeco iri āgua yuvireco?” ahe pēu. ¹⁰ Esepia, pemboetei vite ari, yasi, araviter pieta eta tēi peico. ¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu. ¹⁴ Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no. ¹⁵ ¡Mahera ru cūrítei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. ¹⁶ ¡Evocoyase cūrítei che amotarēhi tie peye acoi pēu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua tēi ore sui yuvireco pe querēhi āgua supi. ¹⁸ Aviye ité niha yande querēhise mbahe apo ambuae ava

upe, mbahe aviye vahe apo ãgua rumo. Ndahei chira pe pãhuve che recoseño pereco pe querêhisa. Iyacatu rumo pequerêhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasi vahe; êgüe aheño itera ayemombaraisu vichico ‘toico rane ité Cristo sese yuvireco’ che yapave pëu. ²⁰ Cûritei rãgüer opoepiara viña añehe tupri catu ãgua pe rese. Esepia, “¿Mara ahera revo sereco yuvireco?” ahe pëu.

Agar, Sara recocuer resendar yembohesa

²¹ Pe peroya pota vahe Moisés porocuaita pe reco catupri ãgua, pemombehumi cheu: ¿Ndapesenducuai tie co mborocuaita aipo ehi vahe? ²² Esepia, aipo ehi: Abraham aipo vireco ñuvirío guahir, ñepeí tahir aipo sembiguai Agar membri, ambuae tahir evocoyase sembireco Sara membri. ²³ Evocoi sembiguai membri oha que ava tēi yesu nungar; sembireco membri rumo oha Tüpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tüpa remimbotar rese. Yipindar sembiguai Agar omboyecua evocoi porocuaita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuaítavri ve yuvirecoi. Êgüe ehi avei opacatu Moisés porocuaita pipendar, yuviroha mbiguai nungar güeco ãgua, opacatu ichuindar êgüe ehi vite yuvireco. ²⁶ Yande rumo inungar-ra que Jerusalén íva pendar suindar yaico viña êgüe yahe yaico mbiguaiêhi. ²⁷ Esepia, icuachiapri arachendar pipe aipo ehi:

“Eyembovihareté, cuña nimembii vahe; esapucai nde rorivetesá pipe, nde ndereiporarai vahe nde membri rasicuer. Esepia, acoi cuña seyapri imembii ati catura cuña omer vireco vahe sui” ehi.

²⁸ Che rivireta, inungar Sara membri Isaac, êgüe yahe avei tahir ité yaico Tüpa remimombehugüer rupi. ²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espiritu pĩratasa pipe sui oha vahe; cûritei êgüe ehi tupri avei. ³⁰ ¿Mara ehi icuachiapri arachendar pipe? “Pemboyepipi pe rēta sui cuña mbiguai tēi imembri reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisí ãgua yuvireco” ehi. ³¹ Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuaita pipe pe recoêhi ãgua

¹ Jesucristo niha ombou yandeu mbiguai tēi nungar sui yande sē ãgua. Sese peyemoviracua mbiguai tēi pe reco iriêhi ãgua.

² Pesendu che ñehe. Che, Pablo, aipo ahe pëu: acoi peyembocircuncida ucasa, ahese êgüe ehi tēi vahe Cristo pereco. ³ Che amombehu pota irimi pëu, que ava oyembocircuncida uca vahe, vireco niha ocuaíta opacatu Moisés porocuaita mboyeroya ãgua. ⁴ Pe pereco catupri pota tēi vahe Tüpa rovaque evocoi porocuaíta tēi roroya pipe, peyepipi ité Cristo sui. Evocoyase Tüpa porovasasa avei pemocañi tēi peyesui. ⁵ Yande rumo yande querêhisa pipe yayeroya yande reco catupri ãgua rese. Êgüe yahe Espiritu yande pĩtíviasa pipe iyavei Jesús rese yeroyasa pipe avei. ⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pĩtívii eté yande reco catupri ãgua Tüpa rovaque. Co güeraño

rumo yande pítivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipíndar viña. ¡Ava ru ndoviroya uca iri mbahe supi tupri vahe pëu! ⁸ Ndahei eté rumo pe poravosar Tüpa êgüe ehi pëu. ⁹ ¿Ndapeicuai vo acoi aipo ehi vahe: “Chîhimi pan mboapeposa oso panguâ rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pihañemoñeta âgua che pihañemoñetasa rupi. Tüpa rumo omboura oñemoirosa que ava pe mbopihañemoñeta yoavirati uca vahe upe.

¹¹ Che rumo, che rivireta, “Iya yayembocircuncida yande reco catupri âgua” ahe vitesé Jesús reroyasar upe viña, ahese revo ndipoi chira che amotarêhisar judío pâhuvé, ahese avei ndipoi chira ñehesa curusu rese Jesús manosa resendar amotarêhimbar ipâhuvé viña. ¹² Evocoi ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeí reseve yuvireco!

¹³ Esepia, pe ore rivireta, Tüpa niha pe renoi mbiguai tēi nungar pe recosa sui pe renose âgua. Ndahei chira rumo pe remimbotarai tēi apo âgua, iyacatu rumo peñepitívira pe yeaisusa pipe. ¹⁴ Esepia, opacatu evocoi mborocuaita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseño tetei rene catu; peicua catu, aviyeteramo êgüe peyese, pe recocuer pemomarapa tiêtera.

Yagutara Espíritu remimbotar rupi, ndahei yande remimbotar tēi rupi

¹⁶ Pesendu che ñehe: Espíritu pīratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tüpa Espíritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe. ¹⁸ Acoi Espíritu ité pe reroquatase, ahese ndahe iri chiaveira Moisés porocuitavrive peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaêhisa, ²¹ iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tüpa mborerecuasave yuvireco curi.

²² Yayapose rumo Espíritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyecuara yande cuaita mboaviyesa, ²³ yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuaita pipe yande yeamotarêhi âgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no. ²⁵ Yande yaicose Espíritu pīratasa rese, ahese Espíritu rupi eté yagutara.

²⁶ Ndayayemboivate ai chira. Esepia, ipipe sui yayeamotarêhi, yaipota rai avei yande mboetasa recocuer nungar yande reco âgua.

6

1 Che rivireta, acoi que Jesús reroyasar pe pãhu pendar oyavise güecocuer, pe peico vahe Espíritu rese, peipítivií secocuer moingatu água pe recocuer mbegüemisa pipe. Peicua catura rumo, aviýeteramo oyoya voi peyemboangaipa uca tiêtera. 2 Peñepítivi-tívii catu que mbahe yavai rai vahe rese. Êgüe peyese, Jesucristo porocuaíta pemboaviyera.

3 Amove ava, “Che ivate catu vahe aico” ehi têi. Êgüe ehi rumo ahe ae oyembopa aipo ohesa pipe oico. 4 Sese niha ñepei-peí eté yaicua tuprira yande recocuer. Aviýese, evocoyase sese yaviharetera. Ndahei acoi ambuae ava recocuer rese têi yambooyara yande recocuer. 5 Esepia, ñepei-peí eté yande yacatu yareco yande cuaita imboaviye água.

6 Acoi oyembohe vahe Tüpa ñehe písirosa resendar rese, tomondo ombohesar upe mbahe güembiereco ipítivií água.

7 Peyembopa eme catu pe ae. Ndipoi chietera que ava viroiro vahe Tüpa ñemoirosa písihisa pipe. Êgüe ehi eté: yañotise mbahe, ichui avei mbahe yaipisira. 8 Acoi ava rumo oyapo vahe mbahe güemimbotarai pipe, ahe oipisira cañisa apirêhi vahe. Acoi oyapo vahe mbahe Espíritu remimbotar rupi, ahe oipisira tecovesa apirêhi vahe yuvireco. 9 Evocoyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. 10 Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

11 ¡Pesepia co ñehesa ipa vahe che pove ité aicuachía tuvicha vahe pëu!

12 Acoi judío Jesús reroyasar pe mbocircuncida uca potaño têi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe têi êgüe ehi yuvireco viña. Esepia, ndoipotai evocoi judío oamotarêhi co ñehesa Cristo atica agüer mombehu pipe yuvireco. 13 Acoi oyembocircuncida uca têi vahe avei rumo nomboaviyei eté opacatu mborocuaíta yuvireco. Oipota rumo pe mbocircuncida ucara oyemboivate ai água pe cuaise evocoi nungar apo yuvireco. 14 Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. 15 Yepe que yayembocircuncidase revo, anise que ndayayembocircuncidaise viña, ndayande pítivií eté Cristo rese yaico tupri água. Co rumo aviye vahe ité yandeu: Tüpa yande recocuer mbopiasuse. 16 Opacatu yuvirecoi vahe co ñehesa che remimombehugüer rupi iyavei opacatu Tüpa upendar supi eté vahe toipisi Tüpa suindar teco tuprisa iyavei iporoparisuerecosa yuvireco.

17 Aviye, co pipe suive ndaipota iri que ava che mañeco têi vaherã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

18 Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PNDAR UPE EFESIOS

Pablo mahenduhasa Jesús reroyasar Efeso pndar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pndar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisi guahirguā Jesucristo yande pīsirosa pipe güemimbotar rupi. ⁶ Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pīsiro Guahir ruvi piyeresasa pipe yande angaipa rese ñero āgua. ⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaiporā mboaviye āgua. ¹⁰ Oyepotase ahe ari imboaviye āgua, Tūpa opacatu mbahe iva pndar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pīsirosa resendar, Cristo peroya pe piha pipe sese peico vaherā. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya. ¹⁴ Ipišisa pipe niha yaicua yande yaipisi vaheerā yandeundar mbahe imoingatupri, acoi Tūpa opase oipīsiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. ¹⁸ Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pndar iporañete vahe Tūpa upendar yuvirecoi vahe upe. ¹⁹⁻²⁰ Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pndar, ivi pndar seco ivate vahe mborerecuarecuar tēi pīratasa sui iyavei

opacatu cūrteindar sui, que oime vaherā sui avei. ²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pīsīro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñetasa rupi tēi peico iyavei ivate rupindar caruguar rerecuar porocuita tēi avei peroya, ahe Jesús reroyasarēhi ombohe vahe. ³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pīsīro. ⁶ Yande mbogüerayevi iri avei niha sese. Ipape seseve yande moingue oyepiri ivave ⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya. ⁸ Esepia, oporovasasa pipe pe pīsīro Jesús rese peyeroyase. Ndahei rumo pe recocuer sui tēi peñepīsīro, ahe rumo ombou porerecosa pēu. ⁹ Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe. ¹⁰ Tūpa niha yande recocuer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yipisuive Tūpa omoime yande rembiaporā.

Cristo ombou yande reco tupri āgua

¹¹ Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipitiviā āgua; ndaperecoi Tūpa iyavei ndaperecoi sārosa pe ñepīsīro āgua co ivi pipe viña. ¹³ Esepia, ahese amombri Tūpa sui peico. Cūrteite rumo Jesucristo rese peico. Esepia, ahe vuvi pipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepepe vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondosa pipe. ¹⁵ Cristo omomba opacatu Moisés porocuita. Ahe oipota ñepepe ava nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua. ¹⁶ Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepepe ava nungar Tūpa rupi yande reco āgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombrii vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaherā Tūpa rese Espiritu ñepepe vahe pipe. ¹⁹ Sese pe ambuae ivi pendar peico vahe, ndahe iri

amombri Tūpa sui peico cute. Cūrítei rumo Tūpa upendar ité peico opacatu ambuae seroyasar reseve. Yande evocoyase ñepei reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirā hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguā, ěgüe yahe ipehapri yaico yande Yar upe nara sese ité yande reco āgua. ²² Sese niha, Cristo rese peicose, pe ambuae viroyasar rese avei sētarā nungar peico. Ipipe Tūpa, oEspíritu pipe, secoira.

3

Pablo cuaita ñehesa pīsirosa resendar mombehu āgua ava ndahei vahe judío upe

¹ Sese, che Pablo, soquendapri aico cohawe Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ěgüe ahe. ² Peicua tupri revo co che poraviquisa Tūpa ombou vahe cheu oporovasasa mombehu āgua pēu nara. ³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cūrítei rumo Tūpa oEspíritu pipe omboyecua güembipeha yuvirecoi vahe upe. Ahe sembipeha apóstol, ñehe mombehusar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropīsirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer ararahendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opīratasa pipe ñehesa pīsirosa resendar mombehu āgua. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu āgua ava ndahei vahe judío upe nara cheu. ⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pihañemoñetasa yipindar ndicuasai vahe. ¹⁰ ěgüe ehi cūrítei oyesuindar aracuasa cua uca āgua viroyasareta recocuer rese opacatu mborerecuar guasu, seco pīrata vahe iva pendar upe. ¹¹ ěgüe ehi, Tūpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya āgua Tūpa rese yande siquiyēhisa pipe. ¹³ Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa pereco pe yemboviha āgua.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pāve vireco yuvireco, opacatu seroyasareta iva pendar, ivi pendar avei ñepei oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opīratasa yuvireco chupe oEspíritu pipe imoviracua āgua’ viya pēu. ¹⁷ ěgüe ahe ayeoqui pe rese pe piha pipe Cristo rereco āgua sese pe yeroyasa pipe. Iyavei

pe poroaisusa pipe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yepē ndayaicatui icuapa tupri āgua yaico viña). Ipīpe sui Tūpa tasecoi pe rese.

²⁰ Cūrīte iyamboetei yande Ru Tūpa. Esepia niha, ahe opīratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opīratasa pipe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. ² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe. ³ Peyapo opacatu pe recocuer pipe peico tupri vite āgua peyepāhuve Espiritu Santo pe pītivīsa pipe, pe reco tuprisa pipe avei. ⁴ Yaico ñepe nungar Cristo rese iyavei yareco ñepe Espiritu. Ēgüe ehi avei Tūpa yande poravo ñepe guārosa rereco āgua. ⁵ Oime ñepe yande Yar, ñepe yande yeroyasa, oime avei ñepe poroāpiramosa. ⁶ Oime ñepe Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepe-pe mbahecuasa ombou. ⁸ Sese aipo ehi icuachiapri aracahendar pipe: “Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipīndar ogüeyi co ivi pipe. ¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya. ¹¹ Ahe niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pīsīrosa mombehu āgua, ombou avei ambuae upe viroyasar rāro āgua iyavei iporombohe āgua. ¹² Ēgüe ehi ava viroyasar mbohe oyeupe mboraviqui apo ambuae viroyasar moviracua tupri catu āgua. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoyase ndahe iri chira chīhivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, ēgüe ehi ahe yande mboyemboya oyese ñepe vahe nungar. Ñepe-pe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe,

¹⁸ ndoicatui mbahe renducua tupri ãgua iyavei ndovirecoi tecovesa Tũpa suindar oyese yuvireco. Esepia, ndoicuai Tũpa ñehe opihañemoñetaẽhisa pipe yuvireco. ¹⁹ Ndoyuvinochi iri mbahe tẽi apo ãgua iyavei oyemondo itẽ mbahe tẽi pipe. Ndosiquiyei etẽ opacatu gãemimbotarai apo ãgua yuvireco. ²⁰ Pe rumo ndapeyembohei etẽ evocoi nungar mbahe rese Cristo rese peicose, ²¹ supi etẽ pesenduse porombohesa supi tupri vahe Jesucristo resendar iyavei peyembohesa secocuer rese. ²² Ahe yande mbohe yande recocuerai yipĩndar vahe reya ãgua. Esepia, ahe naporai vahe yande mbopa tẽi yande pihañemoñeta rai apo ãgua. ²³ Pesecuñaro catu pe yapisacasa. ²⁴ Peicoño itẽ avei pe recocuer piasu pipe. Sese niha Tũpa yande apo yande reco ñvi tupri ãgua yande reco maranehi vaherã supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepe-peĩ mbahe supi tupri vahe rese peyeupe. Esepia niha, yande opacatu ñepeĩ ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo ãgua.

²⁸ Acoi imonda rai vahe, timonda iri eme; toporaviquiño ava iparaisu vahe pitĩvĩ ãgua.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerẽhi catu ãgua yuvireco yande Yar rese. ³⁰ Peyapoi rene mbahe Espĩritu Santo mbovihaẽhi ãgua. Ahe niha Tũpa ombou yandeu 'toicua ava co cheundar oipisira ari ipa vahe pipe poropĩsirosa ñepeĩ reseve vahe yuvireco' oya.

³¹ Peyepẽpi co nungar mbahe sui: pihã vĩracuasa, mbahe mboasi pĩratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tẽi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tũpa iñero Guahir Cristo rese pẽu.

5

Mara ehira ava Tũpa rahĩr yuvireco

¹ Pe niha Tũpa rahĩr sembiãisu peico. Sese peyemonguerẽhi catu secocuer moña ãgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovẽhepri Tũpa uve. Ahe aviye itẽ inungar mbahe sãacua vahe chupe.

³ Pe niha Tũpa upendar itẽ peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que egũe ehi tẽi vahe rese, anise que co coti-coti tẽi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tũpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tũpa povrive iyavei Tahĩr Cristo povrive. ⁶ Ndapeyembopa ucai chira evocoi nungar ñehesa tecocuer egũe ehi tẽi vahe upe. Esepia, evocoi nungar mbahe apo pipe sui ou Tũpa ñemoirosa ava seroyasarẽhi upe. ⁷ Sese ndapeyemboyai chira evocoi nungar ava rese.

⁸ Peicua niha yipĩndar peico pitumimbisa nungar mbahe-mbahe tẽi pipe. Cũritei rumo peico tesapesa nungar pipe yande Yar rese. Sese peico tupriño itẽ Tũpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ñvi tuprisave, mbahe supi

tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepēpi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca voirea co nungar mbahe. ¹² Esepia, ahe sembiapo yemochisa ñomipri tēi vireco yuvireco. ¹³ Acoi yamboyecua ucace rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi: “Peyemopoāse pe oque vahe nungar, peyepēpi omano vahe nungar pāhu sui. Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepeipei ari yande Yar upe nara pe recovesave. Esepia, cūrítei tecocuer co ivi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua. ¹⁸ Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe. ¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

²¹ Peyemboyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco.

²³ Esepia, imer güembireco cuai āgua secói, ēgüe ehi avei niha Cristo viroyasar cuai āgua oico. Viroyasar Piširosar avei secói, inungar güetecuer ité sereco. ²⁴ Evocoiyase inungar seroyasar omboyeroya Cristo yuvireco, cuña avei niha ēgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ Ēgüe ehi yande recocuer moatiro yande angaipa sui i pipe Tūpa Ñehengagüer reroyasave. ²⁷ Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ Ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. Ēgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava oseyara vu, osi güembireco rese güeco āgua; ñuvirio yuvirecoira ñepeí ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ Ēgüe ehi eté ñepeipei pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chihivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. ² Co porocuaíta yipindar omombehu vahe porovasasa piši āgua imboaviyesa pipe aipo ehi: “Pemboeteira pe ru, pe si avei. ³ Ēgüe peyese, pe rorivetera iyavei pe reco pāhumbucu catura co ivi pipe” ehi.

⁴ Iyavei pe iyésupa, pemofñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña. ⁶⁻⁷ Pepraviqui tupri catu chupe nara, ndahei chira rumo pe repiaseño imboviha água tēi; pepraviquira rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri água. ⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicoise. Ahe niha ndayande raisu yoaviratií yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipĩratasa rese avei. ¹¹ Peñearo tupri catu Tūpa pĩratasa pipe pe yemoviracua água Carugar pe mbopa tēiēhi água. ¹² Esepia, yande ndahei ava ité amotarēhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Carugar ipĩrata vahe pĩtumimbisa pendar reroyaēhi água. ¹³ Sese peipisi catu opacatu mbahe Tūpa ombou vahe pēu pe yoepi água. Evocoyase yepé oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tupriisa pipe. ¹⁵ Peyemoingatu voi Tūpa Ñehengagüer ñeroisa resendar mombehu água yepi. ¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ātoisa sui. ¹⁷ Poropĩsirosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu pĩratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi. ¹⁹ Peyeroqui avei che rese. Evocoyase Tūpa tombou che ñehe água cheu che siquiyēhisa pipe ñehesa ñepiñeroisa icuapi ramo vahe cua uca água ava eta upe. ²⁰ Tūpa niha che cuai co ñehesa mombehu água. Ichui tēi cūritei soquendapri aico. Peyeroqui catu che rese che siquiyēhisa pipe co ñehesa mombehu água.

Ñehesa ipa vahe

²¹ Yande rivri Tíquico, yande rembiaisu, che pĩtivĩsar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu. ²² Sese amondo eipeve pēu ore recocuer mombehu água 'ipipe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri água, iporoaisu água, oyese yeroya água avei. ²⁴ Tūpa tosovasa opacatu yande Yar Jesucristo raisupar saisusa ñepeí reseve vahe pipe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipino pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñeha pëu, pe Tüpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei. ² Yande Ru Tüpa, yande Yar Jesucristo tape rovasa pe reco tupri ãgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tüpa upe yepi. ⁴ Iyavei che ayeruresa, ari rupi ayeroqui opacatu pe rese Tüpa upe che viharetesa pipe yepi. ⁵ Esepia, oyoya yañepitivií Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave añ, anise que co coti rupi aico mborerecuar rovai co ñehesa pãsirosa resendar repi ãgua iyavei amboyecua vaherã ahe ñehesa supi tupri vahe yuvireco chupe. ⁸ Tüpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pëu. ¹⁰ Ipipe sui peicuara mbahe aviye catu vahe poravo ãgua yepi; ëgüe peye aveira pe recocuer moatiro ãgua peico. Evocoyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye vahe ité Jesucristo ombou vahe pëu Tüpa mboetei ãgua.

Cristo Pablo recovesa ité secoi

¹² Che rivireta, aipota peicuara co mbahe tõi co oyapo vahe yuvireco cheu, ahe ichui setã catu ava osendura Jesucristo resendar ñehesa yuvireco. ¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasã Jesucristo rupi che guata sui tõi yuvireco. ¹⁴ Iyavei setã etepri yande rivri che repiase soquendapri che recose yuvireco, oyemonguerëhi catu Tüpa Ñehengagüer mombehu ãgua osiquiyehisa pipe. Yande Yar rese evocoyase oyeroyã catu yuvireco.

¹⁵ Supi eté oime ava oñeha angahu tõi vahe Jesucristo rese che roerõrosa pipe tõi. Oime rumo amove ava oñeha tupri Jesucristo rese opihañemoñeta tuprisa pipe. ¹⁶ Evocoi ava oñeha tupri oporoaisusa pipe, ahe oicua cohava che roquendasave yuvireco, “Co ñehesa Tüpa ñeha pãsirosa resendar, ahe supi eté vahe, ndahei temira tõi” ahese. ¹⁷ Evocoi ambuae ava Cristo rese oñeha angahu tõi vahe oyeupe nara tõi oipota mbahe. Ahe che reco momara pota catu co che roquendasave che rõi viteseve. ¹⁸ Mara etemo che areco aipo mbahe-mbahe tõi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tõi sui añepisirora pe yeruresa pipe iyavei che pãtiviira Jesucristo Espiritu. ²⁰ Che aipota ité, asãro avei opacatu che recocuer sui che chĩehi ãgua añeha vaherã opacatu che siquiyehisa pipe. Evocoyase yepe amanora, anise aicovera,

tomboetei catu ava Cristo che recocuer repiase yuvireco. ²¹ Esepia, Cristo che recovesa ité secói; amanose rumo, aviyeño itera cheu. ²² Aicove vitesse co ivi pipe, aicatura aporaviqui tupri yande Yar recocuer rese. Evocoiyase ndaicuai uma revo aviýera cheu. ²³ Ndaicatu co ñuvirío che pihañemoñetasa rereco: amove amano pota che so água ivave Cristo píri. Ahe aviye catura cheu viña. ²⁴ Pëu nara rumo aviye catu aicove vitesse co ivi pipe. ²⁵ Sese che aicua aicove vite vaherã pe pítivii vite água, pe guata tupri vite catu água iyavei pe viharete catu água pe Jesús reroyasa pipe. ²⁶ Evocoiyase che rereco vitera peye pe píri. Ahesse pe viharetasa pipe, “Imboeteipri Jesucristo tasecoi” aipo peýera che repiase.

²⁷ Co catu toýoya tupri pe recocuer co ñehesa aviye vahe Jesucristo resendar rese. Evocoiyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui píratasa resendar pe poreroyasave co ñehesa poropísirosa resendar rese. ²⁸ Iyavei ndapeyembosiquiei chira pe amotarëhimbar sui. Evocoiyase ahe oicuara yuvireco chupe ité Tüpa omondora imocañi água; pe rumo Tüpa pe písirora curi. ²⁹ Supi eté ndahei Jesucristo recocuer reroya água güeraño Tüpa oipota pëu, sese pe yemombaraisu água avei oipota. ³⁰ Esepia, pe, che avei oyoya tupri yaporaviqui pírata yande amotarëhimbar pãhuve yaico. Iyavei acoi pesepia yipindar che aporaviqui pírata che amotarëhimbar pãhuve vichico, iyavei cüritei peyandu mara ahe aporaviqui pírata vite ipãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerëhi, pe mboviha oporoaisusa pipe oico, Espíritu avei secói pe rese. Peyeaisu tupri iyavei pe yeaisusa pipe peñepitívii. ² Sese che mboviha catu peye: perecora pihañemoñetasa ñepeí reseve, oyoya guasu avei peyeaisura, oyoya aveira pe pihañemoñetasa, ñepeí reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri água.

⁵ Inungar Cristo pihañemoñeta, ëgüe peye tupri aveira.

⁶ Yepe ahe Tüpa recocuer vireco, “Taseya eme Tüpa recocuer areco vahe ivive che so água” ndehi.

⁷ Opa ité rumo oseyá, oyemboava inungar mbiguai tēi ou.

⁸ Ëgüe ehi oyemomini.

Vu porocuaíta reroyasa pipe ou iyavei omano poromochisa pipe curusu rese.

⁹ Sese Tüpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse ‘toñenopiha opacatu íva pendar, ivi pipendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tüpa mboetei água yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora písirosa pipeño ité Tüpa mboeteisave ichui pe siquiyesa pipe.

¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehē-ñehē tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evo-coiyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pītumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherā. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayemboviñaora opacatu pe rese. Pe avei, pevihanora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pīhaivi vaherā Timoteo pe repia. Ahe omboyevisē ñehesa pe recocuer resendar, ahesē che aviharetera. ²⁰ Iyavei ndipoi eté ambuae ava Timoteo nungar che pīhañemoñetas rupi tupri imahenduha vahe pe rese pe reco tupri āgua. ²¹ Esepia, opacatu osea güemimbotar tēi apo āgua, ndosecai eté Jesucristo remimbotar yuvireco. ²² Pe niha peicua Timoteo reco tupriisa opacatu upe. Iyavei che pītivii Tūpa Ñehengagüer mombehu āgua, inungar chīhivahe oipītivii oyesupa, ēgüe ehi che pītivii oico. ²³ Sese che aipota imondo āgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pīhaivi vaherā che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che pītivii āgua mbahe cheu ipane vahe rese. Ahe che ndugüer oporaviqui pīrata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi. ²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipītivii, che avei che paraisuereco co viharēhisa yeapi-apiñoēhi āgua cheu. ²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei. ²⁹ Peipisi tupri pēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pītivii pipe. Esepia, pe ité ndapeicatu che pītivii peye.

3

Oicoete ai vahe ité

¹ Iyavei, che rivireta, peyemboviñaño yande Yar rese peicose. Ndachecuerai eté ñehesa aicuachía vahecuer cuachía iri āgua pēu. Iyavei aviye catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín

suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuasa judío porocuaita resendar rese vichico. ⁶ Ipípe sui tēi eté aseca-seca catu ayapo vaheṛā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ěgüe ehi tēi vahe nungar areco. ⁸ Iyavei opacatu que ambuae mbahe aviyeṛa cheu viña, areco rumo inungar ití che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe ití nungar tēi ⁹ ‘taico sese’ che yapave. Ndahei porocuaita mboaviyasa rese tēi aseca che reco catupri āgua, che rumo aseca Jesucristo rese che yeroyasa pipe sui ěgüe ahe vaheṛā. ěgüe ehi eté Tūpa che pisi seco catupri vahe nungar Cristo rese che yeroyasa pipe. ¹⁰ Che aipota ité Cristo cua tupri catu āgua. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ěgüe ahe pota avei. ¹¹ ěgüe tahe avei che cuerayevi āgua omano vahe pāhu sui, ahe co che asāro vichico.

Pablo osupiti pota ité güeco maranehi āgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorā. Esepia, Jesucristo che pisi ité oyeupe nara. ¹³ Che rivireta, “Che ae tēi co tecocuer ihívi vahe opa ité ayapo vichico” ndahei chirā pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovasa rese aguata tenondeño ité. ¹⁴ Esepia, Tūpa che renoi ivave che so āgua aipisi vaheṛā iporerecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pīhañemoñetara opacatu yande yaracua tupri vahe. Que revo yande pīhañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pēu, cūritei amboyeve iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirā yuvirecoira curi. Oyemongerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipīhañemoñeta yuvireco. ²⁰ Yande rumo ivave nara ité yaico. Iyavei yasāro ité yaico iva sui ou vaheṛā yande Pīsirosar, ahe yande Yar Jesucristo. ²¹ Ahe opīratasa pipe virecora opacatu mbahe opovrive. Ahe opīratasa pipe avei osecuñaropara yande retecuer ěgüe ehi tēi vahe, ahese inungar ahe setecuer sendi yai, nimarai vahe, ěgüe yahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. ³ Nde niha che pítivii tupri vahecuer che poraviquisa rese eve. Eipítivii evocoi cuña. Esepia, ahe niha oyembopihaviracua ité che pítiviise Tüpa Ñehengagüer písirosa resendar mombehu água yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tüpa cuachiar tecovesa apiréhi vahe resendar pipe.

⁴ Peyemboviaharete ari yacatu rupi yande Yar rese yepi, “¡Peyemboviahño ité!” ahe aipo pëu. ⁵ Pemboyecua catu opacatu ava upe pe reco mbegüesa. Esepia, cõimi yande Yar yevi iri água yandeu.

⁶ “¿Mara ahera pïha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tüpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoiyase Tüpa omondora güeco tuprisa pëu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipípe sui Tüpa osárora pe piha, pe pihañemoñetasa avei pëu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, poromboetei água rese, mbahe ihívi vahe rese, mbahe maranehi rese, mbahe yande mbovïha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Tüpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou água cheu. “Sesarai yuvireco che sui” ndahei chira pëu. Pe rumo yipïndar ndapeicatui eté che pítivii água peye. ¹¹ “Ipane mbahe cheu” ndahei chira pëu. Esepia, ayembohe che viharete água mbahe che rembiereco rese. ¹² Aicua mara yahe yande paradisusa pipe yaico, aicua avei mara yahe mbahe rereco ati água. Ayembohe avei che viha água opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua água. Esepia, Cristo ombou che pïrata água. ¹⁴ Pe rumo peyapo mbahe aviye vahe cheu che pítivii etepriyave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yipïndar peipisise písirosa resendar Tüpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pítivii água. ¹⁶ Iyavei aicose Tesalónica ve, pembou pe porerecosa cheu ñuvirio yupagüer che pítivii água. ¹⁷ Ndachepihañemoñetai mbahe arocuaño tēi vaherā pe sui. Che rumo aipota Tüpa omboyevira pëu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoiyase oimeño ité iyavei sumbire vite cheu. Ahe pembou vahe cheu aviye ité, inungar itaisi siacua vahe, iyavei inungar mbahe seropovēhepri aviye vahe Tüpa upe. ¹⁹ Evocoiyase yande Ru Tüpa, ombahe eta porañete vahe sui omondora

opacatu mbahe ipane vahe pëu Jesucristo rese oime vahe. ²⁰ ¡Ëgüe tehi timboeteisa yande Ru Tüpa! ¡Ahe apirëhi vahe secoi yepi!

Ñehesa ipa vahe

²¹ Avíye, pemombehu che mahenduhasa opacatu Tüpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pëu.

²² Iyavei opacatu ambuae yuvirecoi vahe cohave Jesús reroyasar iyavei acoi mborerecuar guasu rëtave yuvirecoi vahe, ahe ité avei omondo omahenduhasa yuvireco pëu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivi Timoteo reseve. ² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, fombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipīpe sui peyeroya ivave pe reique āgua Tūpa porerecosa pīsi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa inombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipīpe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramoseve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tupri pipe avei yuvireco’ ore yapave pēu. ¹⁰ Ipīpe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipīpe sui avei tapeicua tupri catu Tūpa recocuer pipe. ¹¹ Iyavei tombou catu pe momirata āgua güecocuer pīratasa pipe sui. Evocoiyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetesa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande pīsiro Carugar povri sui. Ēgüe ehi yande reraso Guahir güembiaisu povri. ¹⁴ Ahe Tahir yande pīsiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipīpe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipīpe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeēhi viteseve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoiyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu

mbahe cheyeupe ivi pipendar, iva pendar avei' oya. Ēgüe ehi Jesús oipiyere vuvu curusu rese Tüpa upe opacatu mbahe moingatu āgua.

²¹ Yipindar pe pihañemoñeta raisa pipe sui tēi amombri Tüpa sui peico yamotarēhisa pipe mbahe pe rembiapo ai rese. ²² Cūrítei rumo Tüpa iñero pēu pe roreyeví oyeupe Cristo manó pipe. Ahe niha ěgüe ehi Vu rovai ipehapri pe rereco oyeupe nara, pe reco maranehi āgua mbahe aviēhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepēpi chiaveira mbahe oime vaheṛā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuaipri, aico co ñehesa mombehu āgua.

Pablo icuaita Jesús roreyasar rese hañeco āgua

²⁴ Cūrítei aviha pe rese che yemomborarsa pipe. Ēgüe ahe iporara che rete rese cohava vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús roreyasar pítivii āgua niha Tüpa che cuai. Sese amombehu opacatu iñehengagüer pēu pe reco tupri āgua rese. ²⁶ Ahe ñehesa aracahe suive ndicuasai vahe ité. Cūrítei rumo Tüpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaheṛā teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe 'toyuvirecoi tupri ité Cristo rese Tüpa rovai' ore hesa pipe. ²⁹ Co rese niha che aporaviqui etepri opacatu Cristo piratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei ² 'toyemonguerēhi catu, toyemboyoya guasu oyeaisusa pipe yuvireco' viya. Iyavei 'senducua tupriṣa pipe toyuvirecoi mbahe tupri pipe' viya opacatu pēu. Esepia, ichui avei peicua tupriṣa co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua āgua, mbahe renducua tupri āgua avei. ⁴ Aipo mbahe amombehu pēu ava oñehe tupri aisa pipe tēi pe mbopaēhi āgua. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ivisa pipe, ndapeyepēpiṣe co coti rupi Jesucristo roreyasa sui. Sese che mbovihareteño ité peye.

Jesús suindar tecocuer piasu

⁶ Evocoiyase inungar acoi peipisi Jesucristo pe Yarā, ěgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, "Aviye ndeu" peye itera Tüpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe ěgüe ehi tēi vahé, ava suindar tēi yembohesa, ivi pipendar ava seco iviate catu vahe pihañemoñetas tēi. Ndahei Cristo suindar porombohesa.

⁹ Esepia, Cristo vireco opacatu Vu Tüpa reco oyese. ¹⁰ Evocoiyase pe pereco Tüpa reco Cristo rese peicose. Ahe opacatu mborerecuar ivi pipendar iyavei iva pendar rerecuar secoi. ¹¹ Iyavei sese peicose, ahese inungar

imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocua pe recocuerai pe sui. ¹² Pe āpiramosa pipe ndoyavii pe recocuerai ñotimbrī Cristo reseve. Ēgüe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogüerayevi vahe Guahir omano vahe pāhu sui. ¹³ Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu. ¹⁴ Ahe yande cañi rāgüer rumo opa omboepi. Esepia, yande iporocuaite pipe yaico imboavīye āgua viña, evocoyase imocañipri tēi yaico ipovrive viña; ombou rumo Guahir curusu rese yatica āgua yande cañi rāgüer sui yande renose āgua. ¹⁵ Ēgüe ehi ahe omano pipe curusu rese carugar, ipovri pendar mborerecureta reseve secopi. Ēgüe ehi seco reroyi, inungar vavasa pendar ipisipri serasota opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembiu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipendar vahe, “Ēgüe ehira Cristo ou” hesa tēi yandeu. Co rumo Cristo itē cute. ¹⁸ Peyapisacai rene acoi ava “ndapeipisii chira porerocosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepe i vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihañemoñetasavrive peico. ¿Mahera evocoyase peroya vite co ivi pipendar porocuaite ēgüe ehi tēi vahe, ²¹ inungar “pepocoi rene co mbahe rese, pehui rene evocoi nungar mbahe” ehi tēi vahe? ²² Opacatu co nungar porocuaite ocañi tēi vahe. Esepia, ahe ava remimbotar tēi yembohesa, iporocuaite tēi avei. ²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pītivii eté yande yepēpi āgua yande remimbotarai sui.

3

¹ Cūrīte i rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oī güeco mborererecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esepia, cūrīte omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña. ⁴ Cristo niha yande recovesa itē secoi. Sese ahe oyeve i irise curi, ēgüe peye aveira perecora ipiri seco ori porañetes.

Yande recocuer yipendar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi

pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco. ⁷ Ēgüe peye avei yipindar pe recocuerai pipe peico. ⁸ Cūrtei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamongbehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipípe peyembohe arí yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ēgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ēgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rebireco. Perecoi rene pihaviracuasa pipe.

²⁰ Pe avei no chñivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niqerēhi iri chira ocuaise pēu.

²² Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei. ²³ Opacatu mbahe peyapo vahe, peyapo pe quērēhisave yande Yar mboviha āgua. Ndahei chira ava mboviha āgua tēi. ²⁴ Esepia, peicua tupri co: yande Yar omboura oporerocosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai repri. Tūpa niha nomboyoaviratí yande raisu.

4

1 Pe avei serecuar: peyapo mbahe ihívi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

2 Iyavei no opacatu peyeroqui catu ari rupi pe mahemohasa pipe. “Aviye ndeu” peye Tūpa upe. 3 Peyeroqui avei ore rese. Tore pītivii Tūpa oñhengagüer mombehu vite água. Toroñehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendasa. 4 Evocoiyase peyeroqui che rese, tamombehu tupri catu co ñehesa opacatu upe senducua tupri catu água. Ēgüe tahe che cuaita mboaviye.

5 Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. 6 Pe reco aviye tuprisa pipe peñehera yepi. Iyavei peicua tupriña ñehesa mboyeve água ñepepe-pei ava uve.

Ñehesa ipa vahe

7 Co yande rivri, yande rembiaisu, Tíquico, che pītivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pēu. 8 Sese co amondo pēu ore recocuer cua tupri água, pe monguerēhi catu água avei. 9 Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirio mbia omombehura pēu opacatu mbahe oime vahe cohava.

10 Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuaño Marcos so água eipeve; olose pe piri, peipisi tupriñora. 11 Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pāhuve judío oporaviqui vahe che rupi yuvireco Tūpa mborerecuasave nara. Ahe niha che mboviha yuvireco yepi. 12 Epafra avei omondo omahenduhasa pēu. Ahe pe recua pendar ité, Jesucristo rembiguai. Ahe oyerocui vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave. 13 Che aicua ité secocuer. Ahe oyemboacui oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. 14 Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

15 Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. 16 Peyeroquire, pemondo co cuachiar Laodicea pendar Jesús reroyasar upe iyeroqui água. Iyavei Laodicea pendar cuachiar rese peyeroqui avei. 17 Iyavei emombehu Arquipo upe aipo ere: “Emboaviye tupri Tūpa nde cuaisa” ere.

18 Che Pablo aico. Che ité aicuachía co che mahenduhasa pēu. Tapemahenduha vite che roquendasave che rese. Aviye pēu. Yande Aposar tape pītivii. Aipo rupive.

PABLO REMBICUACHIA YIPINDAR VAHE TESALÓNICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano reseve iyavei Timoteo, aikuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pndar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañ mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai. ⁴ Ore rivireta, Tüpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa pīsīrosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orošana avei pe reco tupri água.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu. ⁷ Evocoya pe reco pipe pemboycua catu pe reco catuprisa Tüpa reroyasar Macedonia pndar upe, Acaya pndar upe avei. ⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. ¹⁰ Omombehu avei pesāro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pāhu sui. Ahe niha yande pīsīrora Tüpa ñemoirosa ipīrata vahe ou vaherā sui.

2

Tesalónica pndar yeroyasa mboycuasa

¹ Ore rivireta, pe niha peicua ore so agüer pe piri ndahei egüe ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tüpa rumo ore pītivii oñehengagüer pīsīrosa resendar mombehu água opacatu ore siquiyeēhisa pipe ore amotarēhimbar pāhuve. ³ Esepia, ndoroyavii eté ore ñehe iyavei ndoroñehei ore pīhañemoñeta raisa tēi pipe pëu, ndahei avei ore porombopa água oroñehe. ⁴ Tüpa rumo ore recoña, ichui ore cuai oñehengagüer pīsīrosa resendar mombehu água; egüe ehi ore ñehe, ndahei ava tēi mboviha água. Tüpa yande pīhañemoñetasa oicua vahe rumo oromboviha. ⁵ Peicua niha ore ndoroñehei ñehesa icatupri catu vahe tēi rese pe mbopa água, iyavei ndahei guarepochi potasave tēi oroñehe tupri. Tüpa niha oicua. ⁶ Ore ndorosecai eté ava ore mboetei catu água pe, que

ambuae ava eta avei no. ⁷ Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe pãhuve inungar acoi cuña osãro tupri vahe omembri imboacua. ⁸ Ēgüe orohe avei ore pe raisu. Sese ndahei Tũpa Ñehengagũer aňo oromondo pota pëu, ore recocuer avei no. Esepia, opoaisũ ité. ⁹ Ore rivireta, peyemomahenduha acoi ore paraĩsu agũer rese, ore poravĩqui agũer rese avei ari, pĩtu reseve. Ndahei que ñepeĩ maňeco tẽĩ ģgua mbahe rese oromombehu Tũpa Ñehengagũer oroico pëu.

¹⁰ Pe niha ore repia peye Tũpa avei oicua, ore reco tupria, ore rembiapo supi eté vahe, ihĩvi vahe pe Jesús reroyasar pãhuve. ¹¹⁻¹² Peicua niha, inungar mbia guahĩr upe, Ēgüe orohe pe monguerẽhi, pe mbovĩhasa avei ñepeĩ-peĩ opacatu. Iyavei oromondo pe cuaitarã pe reco tupri ģgua Tũpa remimbotar rupi. Ahe niha oňhehe pëu peico vaheřã sese imborerecuasa poraňetesave.

¹³ Co rese, “Aviye ndeu” orohe Tũpa upe ari yacatu rupi. Esepia, Tũpa Ñehengagũer, oromombehu vahe pëu, peipisi ité, “Co Tũpa ñehe, ndahei ava tẽĩ ñehe” aipo peye ité pe chupe. Supi eté Tũpa ñehe. Ahe niha osecaňaro ité pe recocuer peroyare. ¹⁴ Ore rivireta, acoi cuese peiporara mbahe-mbahe tẽĩ pe mu eta pãhuve peicose; Ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarẽhisave yuvireco. ¹⁵ Ahe niha oyuca yande Yar Jesús yuvireco. Ahe avei oyucapa Tũpa ñehe mombehushar yuvireco aracahe. Ore avei opa ore mombõ yuvireco. Ndoviroyai Tũpa yuvireco iyavei opacatu ava amotarẽhimbar tẽĩ yuvirecoi. ¹⁶ Esepia, acoi oroňhehe potase ava ndahei vahe judío upe iňepisiro ģgua rese, ahe rumo ndoipotai yuvireco oreu. Ipipe sui oyemboangaipa catu yuvireco. Cũritei rumo Tũpa ñemoirosa ipĩrata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, “Ahé” oroheňo ité pëu. Iyavei orequerẽhiňo ité yepi oroso iri vaheřã pe repia. ¹⁸ Orosãha tẽĩ ore so ģgua pe repia yepi; che Pablo tietet setã yupagũer tẽĩ aso pota. Caruguar rumo ndoipotai. ¹⁹ ¿Ava sui piha orosãro mbahe aviye vahe? ¿Uma ore viňasa? ¿Uma ore mbovĩharete catura? ¡Peňo itera acoi yande Yar Jesucristo yevise curi! ²⁰ Pe ité niha ore mbovĩhara peye, iyavei oroviha catura pe rese no.

3

¹⁻² Evocoyase che naňemosã irise pe repiaẽhi rese, chepihaňemoňeta yande rivri Timoteo mondo ģgua pe repia; “Che gũeraňo tapita Atenas ve” ahe. Esepia niha, ahe oporavĩqui vahe Tũpa upe ore rupi, omombehu vahe co ñehesa piĩsirosa resendar Cristo suindar ou vahe. Ahe amondo pëu pe moviracua catu ģgua, pe monguerẽhi catu ģgua avei peyeroya catu vaheřã Cristo rese. ³ Evocoyase tipo eme oyembosiquiye vahe co mbahe tẽĩ pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico viťese pe piri, “Yande paraĩsu rane itera mbahe yavai vahe” orohe voi eté acoi pëu. Ahe niha cũritei peicua. ⁵ Evocoyase che naňemosã irise, amondo Timoteo ‘¿yuvirecoiňo ité piha Tũpa rese?’ che yapave. Che asiquiye, “Aviyeteramo Caruguar omondora mbahe tẽĩ pipe yuvireco” ahe ‘ore poravĩqui agũer evocoyase ocaňi tẽira’ che hesave.

⁶ Cũritei rumo Timoteo oyevi Tesalónica sui, gũeru ñehesa aviye vahe pe resendar oreu pe Tũpa reroyasa, iyavei pe poroaisusa resendar avei. Iyavei

aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei. ⁷ Sese, ore rīvireta, ore paraisusa pāhuve ore mboviharete peye, co oroicuase pe reco tupri Tūpa reroyasa pipe. ⁸ Cūrīteī ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera pīha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yemboviha catusa rese avei no ¹⁰ pītu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vīte vahe mboaviye tupri āgua pēu.

¹¹ Iyavei ore oroipota ore pītiviira yande Ru Tūpa, yande Yar Jesucristo avei ore so āgua pe piri. ¹² Evocoiyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. ¹³ Ipipe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgüe tehi pēu.

4

Teco tupri Tūpa oipota

¹ Ore rīvireta, cūrīteī oroñehe pota pēu pe cuaitarā rese yande Yar Jesús rer pipe: inungar cūrīteī pe recocuer pereco, ēgüe peyeño ité catu peico ore pe mbohe agüer rupi Tūpa mboetei āgua.

² Pe niha, peicua acoi ore pe mbohe agüer yande Yar Jesús rer pipe. ³ Esepia, Tūpa oipota pe reco maranehi āgua oyeupe. “Tipo eme que ñepi oyemboaguasa tēi vahe” ehi. ⁴ Iyavei peico tupri pe rembireco rese pe reco ivisa pipe Tūpa remimbotar rupi, iyavei pemboetei tuprira sereco yepi. ⁵ Peicoi rene ava Tūpa ndoicuai vahe reco pipe pe remimbotar tēi apo āgua. ⁶ Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipirata vahe evocoi nungar ava upe. Evocoi niha yipisuive oromombehu vahe pēu. ⁷ Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi. ⁸ Sese acoi ndosendu potai vahe co yembohesa, ndahei eté ava tēi viroiro, ahe rumo Tūpa ité viroiro yuvireco acoi ombou vahe oEspíritu Santo pēu.

⁹ Iyavei co peyepāhuve pe yeaisusa rese, ndaicuachía iri chira pēu. Esepia, Tūpa ité niha pe mbohe pe yeaisu āgua opacatu. ¹⁰ Ēgüe peye niha opacatu yande rīvireta co Macedonia rupindar raisu peico. Co catu peyapo che rīvireta: pe mbouvicha vīte catu pe poroaisusa. ¹¹ “Peico tupriño avei pe reco mbegüesa pipe; mbahe pe rembiapo reseño tupri pēhaneço; peporaviqui pe po pipe ité” aipo orohe acoi pēu cuese. ¹² Evocoiyase pe mboyeroyara ava ndahei vahe Jesús reroyasar yuvireco; iyavei ēgüe peyera mbahe pēu ipaneēhi āgua avei no.

Oyevira yande Yar co ivi pipe

¹³ Ore rīvireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoiyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pēu, ahe niha yande Yar porombohesa: yande yaicove vīte vahe co ivi pipe, acoi oyevise yande Yar; ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité

ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tüpa remimbi moñehe pīratasa. Ahese seroyasar omano vahecuer rane opūhara yuvireco. ¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovaichi āgua ivitu rupi. Ēgüe yahera yande Yar piri yaico vaherā apirēhi. ¹⁸ Sese peyemonguerēhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu. ² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pītu pipe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembīrasi aviyeteramo tēi, ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. ⁴ Pe rumo, ore rivireta, ndahei pītumimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tüpa poroesapesa pipe, ndahe iri yande pītumimbi pendar yaico. ⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pītu pipe; iyavei acoi osavaipo vahe, osavaipo avei pītu pipe yuvireco. ⁸ Yande rumo yaico vahe Tüpa poroesapesa pipe. Evocoiyase yareco tupri yande pihañemoñetasa yande reco tupri āgua yepi. Iyavei yayoepera yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiaro yande ñepisiro āgua. ⁹ Esepia niha, Tüpa yande poravo ndahei yaico vaherā iñemoirosa pipe nara; ahe rumo yande poravo yasupiti vaherā ñepisirosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco āgua opacatu yande recove vītese, yamanose avei. ¹¹ Sese peyemonguerēhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pemboyeroa acoi oporaviqui vahe yuvireco pe pāhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. ¹³ Pemboyeroa iyavei pesaisu tupri iporaviquisa rese. Peico tupri avei peyepāhuve.

¹⁴ Iyavei ore rivireta, pe cuiasa: pemboaracua acoi ndoporaviqui potai vahe imbohe catu āgua. Iyavei pemonguerēhi acoi niquerēhi iri vahe. Peipitivi avei acoi ndoyemoviracuai vahe Tüpa rese güeco āgua. Iyavei peñemosañō opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyemovihañōra ari yacatu peico. ¹⁷ Iyavei peyeroquira ari yacatu rupi no. ¹⁸ “Aviye ndeu” peyera Tüpa upe opacatu mbahe rese. Esepia, ahe niha Tüpa oipota yandeu Cristo rese yaico vahe.

¹⁹ Iyavei ndapemombituhii chira mbahe Espiritu Santo oyapo pota vahe pe rese. ²⁰ Ndapeyamotarēhi chira Tüpa ñehe imombehupri. ²¹ Pesāhapa rane opacatu mbahe. Ichui peipisira mbahe aviye vahe peyeupe. ²² Peyepipi opacatu mbahe naporai vahe sui.

²³ Tũpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espíritu, pe hã, pe rete avei pe reco maranehi água co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rivireta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroqui co cuachiar opacatu yande rivireta upe.

²⁸ Yande Yar Jesucristo tape rovasa tupriño pe rereco. Aipo rupive.

PABLO REMBICUACHIA IMOÑUVIRIOSA TESALÓNICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

1 Che, Pablo, Silvano, Timoteo reseve, aicuachía co ore ñehe pëu, ore rívireta, peñemonuha vahe Tüpa uve tecua Tesalónica ve, yande Ru Tüpa, yande Yar Jesucristo rese peico vahe. 2 Tombou pëu oporovasasa pe reco tupri ägua yande Ru Tüpa, yande Yar Jesucristo avei.

Tüpa omombaraisura viroyasarëhi Jesucristo yevisé curi

3 Ore rívireta, “Aviye ndeu” orohé itera Tüpa upe pe recocuer rese yepi. Esepia, Tüpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. 4 Evocoiyase, ore oroñehe pe rese ore vihasa pipe Tüpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañó chupe pe Cristo rese pe yeroyasa pipe. 5 Co niha omboyecua Tüpa reco ñvisa ava upe. Esepia, ipipe pe rereco omborerecuasave pe reique ägua. Sese niha, peparaisu vite tēi peico.

6 Tüpa omombaraisura acoi pe mombaraisusarer. Iya ité ëgüe ehi vaherã chupe. 7 Pe rumo imombaraisupri peico vahe, Tüpa omondora pe pituhu ägua, ore pituhu ägua avei, acoi yande Yar Jesús oyevisé tata rendigüer pãhuve iva sui opacatu güembiguaí seco pírata catu vahe reseve. 8 Ahe oura opacatu Vu Tüpa reroyasarëhi mombaraisu ägua iyavei oyesuindar ñehesa poropisirosa resendar rendu tēisar mombaraisu avei. 9 Evocoi iparaisura yuvireco, imocañipri yuvirecoira apirëhi. Iyavei imboyepepisara amombri yande Yar reco pírataa porañetesa sui. 10 Acoi ouse ahe ari pipe, yande Yar imboeteiprira opacatu seroyasar pãhuve; ipãhuve pe peicora. Esepia, peroya ité oromombehu vahe pëu.

11 Co rese oroyeroqui pe rese yepi: oroporandu yande Ru Tüpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pírataa pipe opacatu ñepeí-peí mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. 12 Evocoiyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tüpa, yande Yar Jesucristo pe raisusave.

2

Yande Yar Jesús yevisa resendar mombehu tuprisa

1 Iyavei, ore rívireta, ore oromombehu potami pëu opacatu acoi yande Yar Jesucristo yevisa resendar yande monuha vaherã oyese. 2 Peicua catu, tapepihañemoñeta rerova eme iyavei peyembosiquiyei rene que ava “che añehe Espíritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. 3 Peicua catu peyembopa ucai rene ñepeí yepé ava upe. Esepia, yipíndar ari Jesucristo yu ägua renonde, yugüerura mbahe-mbahe tēi aposar. Ahe Tüpa amotarëhisar yuvirecoi vahe. Ahesé oyemboyecua ara yangaipa guasu vahe. Ahe ocañi tēi vaherã. 4 Oyemboivate aira opacatu Tüpa rer rerecosar amotarëhisave iyavei ndoipotai chira ambuae mboetei. Oique

aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñhengagüer rese pe pāhuve aico vitesese cuese? ⁶ Co imombítasar peicua cūritei. Ihari oyepotase voi, oyemboyecua. ⁷ Co porocuaíta amotarēhisar ndoyemboyecua vitei vahe rembiapo oime cūritei. Co güeraño ipane imombítasar renose āgua ipāhu sui, ⁸ ahese voi oyemboyecua acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyeveise curi. ⁹ Yucasa renonde rumo, acoi ava yangaipa guasu vahe oura Carugar pīratasa pipe; güerura güeco pīratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa āgua oico ava ocañi tēi vaherā upe. Esepia, evocoi ava ndosendu potai porombohesa supi eté vahe oñepisiro āgua yuvireco. ¹¹ Sese Tūpa oseyara co porombopasa reroya āgua yuvireco ¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ipīsiropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuipe pe pīsiro āgua pe reco maranehi āgua rese Espiritu pipe iyavei porombohesa supi eté vahe reroya āgua. ¹⁴ Sese niha, Tūpa oñehe yandeu yande piha pipe co ñehesa pīsirosa resendar pipe, ore oromombehu vahe pēu ‘tovireco che Rahir Jesucristo reco porañetesas’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu. ¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro āgua, ¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñhengagüer opacatu rupi; tipisisa tupri imboeteisa pipe inungar oyepota pe pāhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ñvi vahe. Ahe pe recocuer moviracuara iyavei pe rārora mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer. ⁵ Yande Yar tape pītivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pāhuve, peyepipiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña āgua peico. Ore oroicose pe pāhuve, ndoroico tēi, ⁸ ndorohu tēi avei ambuae tembihu imboepipirēhi. Ore rumo que ñepe mañeco tēiēhi āgua rese oroporaviqui ore cuerai rane ité ari, pītu reseve. ⁹ Iya ité niha mbahe rese ore porandu āgua pēu ore pītivii āgua rese viña; ore rumo

oroporaviqui pe ore recocuer rupi pe guata ãgua rese. ¹⁰ Acoi oroico vïtese pe pãhuve, oromondo pe cuaitarã: acoi ndoporaviqui potai vahe, ahe tocaru eme. ¹¹ Oroyandu amove aipo pe pãhu pendar yuvirecoiño tẽi ndoporaviqui vahe. Evocoi omañeco tẽi ambuae ava recocuer. ¹² Ore oromondo acoi ava upe mborocuaita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochĩ ahe. ¹⁵ Pereco eme catu yamotarẽhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri ãgua pẽu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe itẽ pẽu. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachia che ñehe ndeu, Timoteo. Nde niha che rahir Tüpa roroyasa pipe ereico. Che niha Jesucristo apóstol aico, yande Pisirosar Tüpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tüpa, yande Yar Jesucristo oporovasasa, oporoparisuerecosa ndeu nde reco tupri água.

Pablo, “Eicua catu prombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so água Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar égüe ehi tēi vahe rese avei. Ahe ichui osē yeacasa naporai vahe yepi; ndayande pitivi rumo Tüpa remimbotar reroya tupri água rese.

⁵ Sese co amondo porocuita ndeu yande yeaisu água yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehe-ñehe tēisa pipe yuvireco. ⁷ Oporombohe pota tēi Tüpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tüpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua água, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tüpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe poropisirosa resendar rese. Tüpa sovasapri secói, ahe che cuai vahe sese.

Pablo oparaisuerecosa rese, “Aviye ndeu” ehi Tüpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe água. Esepia, ahe oyeroya che rese. Sese che mondo oñehengagüer mombehu água. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēimbave che yemboivate aisa pipe, Tüpa rumo, che paraisuerecoño. Esepia, che ahese, ndahe vitei Cristo roroyasar aico; ndaicua vitei mbahe ayapo vahe. ¹⁴ Égüe ehi yande Yar ombou catu oporovasasa che rese iyavei ombou che oyese yeroya água iyavei che poroaisu água Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe pisiro água.

Che rumo acoi ivate catu vahe yipindar aico ipãhuve. ¹⁶ Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recouer upe ambuae ava seroya āgua. Ipipe sui osupitira tecovesa apirēhi vahe yuvireco. ¹⁷ Sese yamondo imboeteisa apirēhi yande Rerecar ndopai vahe upe! ¡Ahe nomanoi vahe, ndayasepiai vahe, ahe ñepeí vahe Tūpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua āgua mbahe tēi recopi āgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure āgua, peporandu, pemondo avei “aviye” pe hesa Tūpa upe opacatu ava recouer rese. ² Iyavei peyerure opacatú mborerecar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei. ³ Co aviye ité; ahe niha yande Písirosar Tūpa remimbotar. ⁴ Supi eté ahe oipota opacatu ava ñepisiro iyavei co porombohesa supi eté vahe cua tupri āgua. ⁵ Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo. ⁶ Esepia, Jesucristo omano opacatu ava yangaipa vahe repirã ipisiro āgua. Ahe imombehusa chupendar ari iporavopri rupi. ⁷ Sese che supi eté apóstol, icuaipri aico Tūpa Ñehengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisá pipe, oyeacaēhisá pipe avei. ⁹ Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. ¹⁰ Iyacatu rumo yuvirecoi tuprira gümbiapo aviye vahe pipe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehü pãhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui oviapi angaipa pipe. ¹⁵ Oñepisirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisá pipe avei.

3

Tūpa reroyasar rãrosar cuaita

¹ Iyavei co supi eté: acoi amove oico pota vahe Tūpa reroyasar rãro āgua, ahe oipota mboraviqui aviye catu vahe. ² Sese acoi vireco vahe ocuaita Tūpa reroyasar rãro āgua, ahe secoi tuprira mbahe aviye vahe pipe yepi. Ipipe ava noñehei chira yamotarēhisave. Iyavei omendara ñepeí cuña reseño ité.

Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri ägua. ³ Iyavei ndahei chira caguar tēi. Ndosecai chiaveira ovava ägua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tuprira güeta pipendar rāro ägua. Ombohe aveira guahir iporeroya ägua, iporomboetei ägua avei. ⁵ Esepia, acoi ndoicuai vahe güeta pipendar rāro, çmara ehira evocoiyase Tüpa reroyasar rāro? ⁶ Tüpa reroyasar rārosar rumo ndahei chira oipisi ramo vahe Tüpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tüpa reroyasarēhi pāhuve. Ahe ndipoī chira imboeteiēhisa iyavei ndoviapi chira Carugar povrive.

Tüpa reroyasar rese ihañeco vahe cuaita

⁸ Iyavei Tüpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. ¹⁰ Iyavei secoāhasa ranera. Acoi osē tuprise, ahe se toyuvirecoi Tüpa reroyasar rese ihañeco vahe rā. ¹¹ Iyavei sembireco yuvirecoi aveira oporomboeteisa pipe, nimahechiroi chira, osāro tuprira güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tüpa reroyasar rese hañecosar ñepeño itera sembireco, oicua aveira guahir rāro tupri ägua, güeta pipendar rāro ägua avei. ¹³ Esepia, Tüpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyēhisave avei secoira Jesucristo reroyasa pipe.

Tüpa reco oyecua ramo vahe reroya tuprisa

¹⁴ Che aso pihaiivi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ägua ava Tüpa rese yuvirecoi vahe pāhuve; ahe acoi Tüpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ägua. ¹⁶ Supi eté tuvichá etepri Tüpa reco oyecua ramo vahe reroya tuprisa: Cristo oyemoporēhi yande reco nungar pipe yandeu. Ipare Espiritu pipe imboyecuasa secocuer supi tupri vahe. Iyavei Tüpa rembiguai rembiepiave secoi. Ichui imombehusa opacatu ivi rupi; opacatu rupi avei seroyasa. Iyavei ipisipri secoi ivave nara.

4

Oimera ava oyepipi vahe Tüpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepipira Tüpa rese oyeroyasa sui yuvireco. Omboyeroyara espiritu oporombopa tēi vahe, porombohesa Carugar suindar avei. ² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ēgüe ehira opihañemoñetasa mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tüpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tüpa upe yuvireco. ⁴ Esepia, opacatu mbahe Tüpa rembiapo, aviye ité. Ahe ndiyai chira yaroïro yaipisise, “Aviye ndeu” yande

hesa pipe chupe. ⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua.

⁸ Esepia, yepe aviyeño chīhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pītivira yande recove āgua cūrītei iyavei curi yande recove āgua. ⁹ Co supi eté vahe, evocoyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pīsīrosar, iyavei viroyasar Pīsīrosar catu ité secói.

¹¹ Co porombohesa eremombehura ava pāhuve, erembohe aveira sese.

¹² Tipo eme ava nde roeroiro vahe chīhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe.

¹³ Che yepota renondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira.

¹⁴ Nderepoi chira Tūpa ndeu mbahecuaasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsīropri ereicora; nde ñehe rese oyapisaca vahe avei ipīsīropri yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chīhivahe upe ereñehe tuprira secocuerā rese inungar nde rivri upe. ² Cuña otīaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco tuprisa pipe.

³ Acoi imer mano vahecuer ité ereipītivira que mbahe ipane vahe rese.

⁴ Que oimese imembri, anise que semiariro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae secói vahe, ahe oyeroya ité Tūpa rese, iyavei oyeriquiño ité ari, pītu yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndogua iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeño ité omer vireco vahecuer.

¹⁰ Icuaprira secocuer icatuprisa rese, omboacua tuprise chihivahe oyesuindar, omoinguese ava güeta pipe, ihañecose ava Tüpa reroyasar rese ipi sei ägua, oipitiviise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe. ¹² Ipipe oimera Tüpa poronupasa chupe. Esepia, yipindar oyemondo Tüpa upeño ité oyecuachiasē. Ipare rumo nomboaviyei eté oñehe. ¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñehēpora tēi vireco yuvireco. ¹⁵ Esepia, oime ité amove oyepepi vahe güemimbotar pipe Carugar rupi güeco ägua.

¹⁶ Acoi oimese que cuña Tüpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoiyase tüparo pendar nhañeco chira. Ahese oicatura supi eté imu ndipoi vahe rese hañeco ägua yuvireco.

¹⁷ Iyavei acoi Tüpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tüpa Ñehengagüer mombehu ägua, ava mbohe ägua avei, ahe co poropitiviisa oipisi catura.

¹⁸ Esepia, aracahendar icuachiapri pipe aipo ehi: “Erei yuru äpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

¹⁹ Iyavei nde, ndereroyai chira mbahe omombehu vahe Tüpa reroyasar osāro vahe yamotarēhisave yuvireco. Oimese que ñuvirio sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoiyase ambuae osiquiyera angaipa apoēhi ägua yuvireco.

²¹ Iyavei che orocuai Tüpa rovaque, Jesucristo rovaque iyavei opacatu Tüpa rembiguai iva pendar rovaque avei: ereyapo tuprira co mborocuaita, nderemomahuatii chira ava imboaracua nde remimbotar rupi tēi. ²² Ndahei chira pihaiivi ereseno mbia mborocuaita rese ihañeco vaheñe. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chihimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu ägua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi ägua Tüpa rer rese, yande porombohesa rese avei no. ² Acoi co mbiguai virecose güerecuar Tüpa vroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tüpa rese yande pihañemoñetasā sepirusu vahe nungar

Eporombohe, emombehu co mbahe: ³ oimese oporombohe vahe oye-suindar pihañemoñetasa co coti tēi vahe rese, ndoyoyai vahe yande Yar Jesucristo porombohesa avīye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisā ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña. ⁶ Yayembovihañose mbahe yande rembiereco rese, ahesē Tūpa rese yande pihañemoñetasa inungar mbahe sepīrusu vahe yandeu. ⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovihañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setā mbahe pota raisave, ipipe oyeecomomara. Ipare oyemofañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepēpi opacatu co nungar mbahe naporai vahe sui. Eico nde reco ñvisa pipe, ndemahenduhāño ité Tūpa rese. Eroya, esaisu, eñemosa avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderēpoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase ari imbohetupri curi, ahesē Tūpa moyevira Guahri. Ahe niha ñepei vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar. ¹⁶ Aheño ité teco apirēhi vahe, tesapesa secōi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā. ¹⁸ Eyocuai avei evocōi ava: toyuvirecoi mbahe yar nungar mbahe avīye vahe aposa pipe. Iyavei toyemoingatuño acoi mbahe vireco vahe mboyaño āgua ambuae ava upe yuvireco. ¹⁹ Evocoiyase virecora mbahe avīye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

1-2 Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tüpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tüpa iyavei yande Yar Jesucristo tombou oporovasasa, oporoparaisuerecosa nde reco tupri ägua ndeu.

Pablo oyocuai Timoteo Cristo recocuer mombehu ägua

3 Che yeroqui pähuve, chemahenduha nde rese pítu, ari yacatu rupi. “Aviye ndeu” ahe Tüpa upe nde recocuer rese. Che aporaviqui tupri ité Tüpa rese che pihañemoñeta tuprisa pipe yepi inungar che ramoi eta oyapo yuvireco aracahe. 4 Ndacheresaraí eté acoi nde yaseho agüer sui. Iyavei oroepia pota tēi che yemboviharete ägua. 5 Supi eté chemahenduhaño ité nde Tüpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar egüe ehi yuvireco. Evocoyase ayeroyaño ité nde rese, nde avei egüe erese.

6 Sese che oromonguerēhi embouvicha catu co Tüpa ombou vahe ndeu acoi amondose che po nde harive; ahe ereco catu ndeyeupe. 7 Esepia, Tüpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri ägua. 8 Evocoyase eresiquiye eme catu yande Yar recocuer mombehu. Nderechī chiveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tüpa pīratasa pipe. Ahe oura ndeu ñehesa pīsīrosa resendar mombehusa sui. 9 Tüpa niha yande pīsīro iyavei yande renoi yande reco tupri ägua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tüpa ité yande raisu yipisuive ivi apo viteēhiseve. 10 Cūrítei rumo ahe omboyecua oporoaisusa yande Pīsīrosar Jesucristo ouse, acoi ou vahe co ivi pipe manosa pīratasa recopi ägua. Iyavei ñehesa pīsīrosa pipe avei oicua uca tecovesa ndopai vahe.

11 Tüpa niha che cuai co ñehesa mombehu ägua. Che cuai avei apóstol che reco ägua iyavei che porombohe ägua. 12 Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañēhi ägua acoi Jesús yevi ägua rupi eté.

13 Erecoveño ité porombohesa aviye vahe che suindar, iyavei eicoño ité Tüpa rese nde yeroyasa pipe iyavei poroaisusa yareco vahe pipe Cristo rese yaicose. 14 Esāro avei co ñehesa aviye vahe Tüpa ombou vahe ndeu Espīritu Santo reco pīratasa pipe yareco vahe yandeyese.

15 Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe reser: Figelo, Hermógenes. 16 Yande Yar tomondo paraisuerecosa Onesíforo mu upe. Esepia, Onesíforo setá yupagüer che mboviha. Iyavei nochi eté ava rovaque che roquendasa sui.

17 Ouse rumo Roma ve, ndopituhui eté che reca. 18 Yande Yar tomondo oporoparaisuerecosa chupe ahe arí pipe curi. Iyavei nde ereicua tupri ité ahe mbia yande pítivii vahe Efeso ve.

2

Jesucristo sundao oyemoviracua vahe

1 Iyavei nde no, che rahir, eyemoviracua mbahecuasa Jesucristo ombou vahe pipe ndeu. 2 Acoi che porombohesa eresendu vahe ava rehii rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

3 Nde eyemoviracuaño teco así upe Jesucristo uve nara inungar sundao oyemoviracua vahe ité. 4 Ñepe yepe sundao ndosirii eté ocuaita sui. Esepia, ahe oyemoingatu voi eté ocuai água güerecuar upe. 5 Iyavei iguayí rai vahe, ndoipisii chira porerecosa uguayí tupriêhi pipe. 6 Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. 7 Eyapisaca tupri co che ñehe rese. Yande Yar niha osenducua uca tuprira opacatu co mbahe ndeu.

8 Iyavei no ndemahenduha Jesucristo rese. Ahe niha ocuerayevi vahe. Iyavei arachendar mborerecuar David suindar seci. Co niha ñehesa ñepisirosa resendar amobehu vahe vichico. 9 Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco. 10 Sese che añemosañño opacatu mbahe-mbahe tēi upe opacatu Tūpa rembiporavo recouer aviye água rese ‘tovireco catu písirosa porañete, apirēhi vahe Jesucristo rese yuvireco’ che yapave.

11 Co niha supi tupri vahe:
Yamanose Cristo rese, ahese yaicove aveira sese.

12 Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,
“Ndopocuai vahe” ehiñora yandeu.

13 Yepe co coti tēi yarovara yande recouer seroyaēhisave, ahe rumo ndovirovai chietera güeco ñvisa.
Esepia, ndoicatu, “Ndahei che ahe aico” ehi vaherā.

Ava osē tupri vahe güecoñhasa Tūpa upe nara

14 Emamahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco. 15 Eyapo tupri mbahe opacatu nde catugüer rupi nde recouer mboyecua água Tūpa rovai inungar oporaviqui tupri vahe, nochi vahe. Ēgüe ere, eporombohe tupri ñehesa supi eté vahe rese. 16 Eyepipi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. 17 Iyavei iporombohesa rai oyembouvicha inungar caracha vai ndocuera catui vahe, oyembouvicha-vichañño yepi. Ēgüe ehi Himeneo, Fileto 18 oyaví porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipípe Jesús reroyasar oipihaññoñeta rerova yuvireco. 19 Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rerovireco vahe, toyepipi mbahe naporai vahe sui yuvireco yepi” ehi.

²⁰ Oĩ guasu pĩpe, ndahei guarepochi, oro apopri güeraño oime, oime avei ivirape, ñaihu apopri avei no. Ñepei iporupirã ari imboeteisa pĩpe nara, ambuae rumo ari rupi iporupirã. ²¹ Acoi ava oñemoatiro vahe co tecocueraí sui Tũpa upe nara, ahe ipehasa inungar vaso oro apopri poromboeteisa pĩpe iporupirã; ahe ava oyemoingatu voi eté oico mbahe icatupri vahe apo ãgua Tũpa upe.

²² Eyepepi mbĩa chĩhivahe pihañemoñeta rai tẽisa sui. Emohĩvi tupriño ité nde recocuer sereco. Eyeroyaño ité Tũpa rese. Esaisu catu avei ava, eico avei nde reco tupri pĩpe, inungar Jesucristo reroyasar oyapo opihañemoñeta tuprisa pĩpe yuvireco. ²³ Eremboyeroyai rene ñehesa porandu-randu tẽisa, ěgũe ehi tẽi vahe. Ereicua niha ichui tẽi oime yeamotarẽhisa yepi. ²⁴ Iyavei yande Yar rese oporaviqui vahe, ndiyai oyeecopi oñehe pĩpe yuvireco. Iyacatu rumo, aviyera secocuer opacatu upe, oporombohe tupri, oñemosañora ombahe mboasiẽhisa pĩpe oico. ²⁵ Iyavei omboaracuara güeco asiẽhisa pĩpe acoi ava ndiporeroyai vahe. Esepia, aviyeteramo Tũpa osecuñarora ipihañemoñeta raisa oyeupe yevi iri ãgua: ipĩpe sui porombohesa supi eté vahe oicua yuvireco. ²⁶ Ipĩpe sui avei toyemopoase, toyuvĩnose Carugar povri sui semimbotar apo iriẽhi ãgua.

3

Mara ehira ava ari ipa vahe pĩpe curi

¹ Iyavei tereicua ari ipa vahe yepotasa, ahesa oimera tecocuer yavai catu vahe. ² Ahesa ava ahe ae tẽi oyeaisura yuvireco, guarepochi tẽi oipota raira, oyemboivate aira, oyemboetei ai tẽi aveira. Oñeha raira Tũpa rese yamotarẽhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tũpa rese pihañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tẽi apo ãgua yuvireco. Güeco asi pĩpe avei yuvirecoira. Iyavei opacatu mbahe aviye vahe oyamotarẽhira yuvireco. ⁴ Iyavei omondora ava yamotarẽhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tẽi oyemboviha ãgua yuvireco. Ipĩpe rumo Tũpa ndosaisui chira yuvireco. ⁵ Ahe inungar-ra Tũpa rese ité yuvirecoi vahe viña. Tũpa pĩratasa rumo nomboyecuai chietera güembiapo pĩpe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pãhuve oime yuviroiqueño tẽi vahe oĩ rupi cuña ndoicatui vahe angaipa rerecosar mbopa ãgua. Esepia, ahe cuña opihañemoñeta raisa pĩpe yuvirecoi vahe. ⁷ Yepe oyapisaca tupri tẽira ñehesa rese yuvireco viña, ndosupiti eté rumo co porombohesa supi eté vahe renducua ãgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarẽhi yuvireco, ěgũe ehi avei evocoi ava porombohesa supi eté vahe amotarẽhisar yuvireco. Ahe oyemomara vahe opihañemoñeta rai pĩpe yuvireco. Ndoviroyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicua yuvireco imbahecuaẽhi rese, inungar co ñuviño mbĩa Moisés amotarẽhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tẽi porarasa

rese. Nde niha ereicua opacatu mbahe tēi oime vahe cheu co tecua guasu, Antioquia ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pīsiro opacatu evocoi mbahe-mbahe tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pīpe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵ Iyavei eyemomahenduha co rese: nde chihivahe suive ité niha ereicua Tūpa ñehe icuachiapri eico. Ahe niha nde mombahecu vahe nde pīsiro āgua Jesucristo seroyasa pīpe. ¹⁶ Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehe tupri āgua secocuer mohivi āgua yepi. ¹⁷ Ichui, ava Tūpa rese yuvirecoi vahe oyemoingatu voira opacatu tecocuer tupri apo āgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaherā omborerecuasa reseve oicove vahe, omano vahe recocuer rese porandu āgua. ² Emombehu Tūpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiñehisa pīpe. ³ Esepia, coiyé ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco. ⁴ Iyavei oyepepīra co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tuprisa. Eñemosañō mbahe naporai vahe upe. Ndehañeco catu ñehesa pīsirosa resendar mombehu āgua. Emboaviye tupri avei opacatu nde poraviquisa.

⁶ Virovi ari che retecuer mondo āgua manosave inungar mbahe seropovēhepri yande Yar upe. ⁷ Ayapopa che recoeté pīpe che poraviquisa aviye vahe che amotarēhimbar pāhuve. Amboaviye che cuaita. Ndayepēpi eté che yeroyasa sui. ⁸ Cūrītei che rāro ivave co porerecosa che poraviqui aviye vahe resendar. Yande Yar mborerecuar seco ivi vahe niha omboura cheu ahe ari pīpe. Ndahei chira cheu güeraño. Ombou aveira opacatu Cristo raisusa pīpe iyevisa osāro vahe upe yuvireco.

Pablo, “Eyu rane che repia” ehi Timoteo upe

⁹ Ndepyava catu eyu che repia. ¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che piri. Eseca Marcos, tou nde rupi che pītivii āgua mboraviqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyohasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuaara sembiapogüer rese chupe. ¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi ãgua mborerecuareta rovai, ndipoi eté que che p̄t̄iv̄iisar; opacatuño ité che reya yuvireco. Tũpa tiñero sese yuvireco chupe. ¹⁷ Yande Yar Jesucristo rumo che p̄t̄iv̄i. Che momirata co ñehesa p̄s̄irosa resendar mombehu tupri ãgua opacatu ava ndahei vahe judío upe. Ëgũe ehi avei che renose mbahe t̄ei sui. ¹⁸ Ahe che pehara opacatu mbahe mbahe t̄ei sui iyavei che p̄s̄irora oyep̄iri ivave che so ãgua. ¡Ëgũe tehi timboeteisa catu yande Yar apir̄ehi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo r̄eta pendar upe avei. ²⁰ Erasto opita Corinto ve, Tróximo rumo imbaheasi, evocoyase aseya Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upé iyavei Tūpa rese pīhañemoñetasa supi tupri vahe cua uca tupri āgua. ² Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. ³ Ichui cūrītei ari oyepota yandeu iñehengagüer cua āgua. Sese Tūpa, yande Pīsīrosar, che cui oñehengagüer mombehu. ⁴ Tito, co che ñehe aicuachia ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeī-pei tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeīño güembireco virecora yuvireco; tahir evocoiyase Jesucristo reoyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pipe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tupri yuvireco. Iyavei toico eme oporeroyaēhisa pipe, toñemoiro eme avei, ndahei chiveira caguar tēi; ndivava serai chiveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tupriira güecocuer. Iyavei taseco ivi güeco catupri pipe Tūpa upe. Tosāro tupri avei opīhañemoñetasa yuvireco. ⁹ Iya oyemboya catu oyembohesa supi tupri vahe rese yuvireco. Ipīpe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co cōti tēi vahe rese guarepochi rereco āgua tēi yuvireco.

¹² Ñepeī mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pīrata ité. Evocoiyase toviroya tupri Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuaita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndi-poreroyai vahe, ipīhañemoñeta rai tēi vahe upe rumo, ndipoi eté mbahe nimarai vahe. Esepia, ipīhañemoñeta, yaracuasa avei naporai eté. ¹⁶ Iyavei,

“Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

2

Porombohesa nimarai vahe

1 Nde ñehe toyoya tupri co porombohesa nimarai vahe rese yepi. 2 Evocoyase mbia otiaro catu vahe Tūpa reroyasar toñearo tupri, imboyeroy-apri toyuvirecoi, tosāro tupri güecocuer, tovíreco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. 3 Ēgüe tehi avei cuña otiaro vahe Tūpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuara güecocuer aviye vahe, 4 ombohera cuñatai imer raisu āgua, imembri raisu āgua avei. 5 Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoyase noñehe-ñehe tēi chira ava Tūpa Ñhengagüer rese yuvireco.

6 Ēgüe ere avei emonguerēhi mbia chñivahe secocuer rese iñearo tupri āgua. 7 Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. 8 Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

9 Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroya imboeteisave, toñehepoepi eme avei yuvireco. 10 Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande Písirosar Tūpa recocuer resendar yembohesa yuvireco.

11 Tūpa niha omboyecua oporoaisusa yandeu. Ahe güeru písirosa opacatu ava upe. 12 Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ivi āgua iyavei Tūpa mboetei āgua. 13 Iyavei yasāro yande viharetasa pipe Tūpa omboaviye vaheerā güemimombehu, ahe Jesucristo yande Tūpa seco ivaté vahe, yande Písirosar yevi irisa oporañetesa pipe. 14 Ahe oyemondo oyeyuca uca yande rese yande písiro āgua opacatu mbahe-mbahe tēi sui yande reco moatiro tupri āgua. Evocoyase yande yaico chupe nara güeraño ité yande querēhisave opacatu mbahe aviye vahe apo āgua.

15 Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde rerōirosar.

3

Jesús reroyasar cuaita

1 Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarmi porocuita avei. Iyavei toyemoingatu tupri opacatu mbahe aviye vahe apo āgua yuvireco. 2 Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecuai yaico iyavei nda-yaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha āgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrī yaico iyavei yandeyeupe ae-ae yayeamotarēhi.

⁴ Ipare rumo Tūpa, yande Pīsīrosar, omboyecua güeco tuprisa, oporoaisusa opacatu ava upe. ⁵ Yande pīsīro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espīritu Santo pipe yande recocuer recuñaro tecove piasu rereco āgua. ⁶ Iyavei yande Pīsīrosar Jesucristo rembiapo sui Tūpa ombou catu oEspīritu Santo yandeu, ⁷ ipipe yande reco ai sui yande renose yande reco īvi tupri āgua oporoaisusa pipe 'toipisi co tecovesa apirēhi güemiario yuvireco' oya.

⁸ Aipo ñehesa supi eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherā yuvireco. ⁹ Ereyepēpīra rumo opacatu co nungar mbahe sui: yipindar ñehesa yepoepi tēisa sui, ipare aracadendar ava recocuer rese ñehesa sui. Ereyepēpi aveira iporomoñemoiro serai vahe sui, Moisés porocuaite resendar sui tēi ñehepoepi-episa sui avei. Esepia, evocoi nungar mbahe ēgüe ehi tēi vahe.

¹⁰ Acoi ava omoimese yemboyahosa Tūpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaivi che repia tecua Nicópolis ve. Esepia, aheve apita pota sōhisa vahe pituhu rāro. ¹³ Eipitīvii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo āgua iyavei ava mbahe chupe ipane vahe pītīvii āgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo água ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. ³ Yande Ru Tūpa, yande Yar Jesucristo tambou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che pītivii água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepipi pucu raimi nde sui oyevi iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rivri niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. Ēgüe ere tupri aveira co mbia pisi. ¹⁸ Acoi oyapose mbahe ndeu, anise vircuase que mbahe nde sui, cheu emombehu. Che evocoiyase amboepira ndeu. ¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tūpa che renose

vaherã che roquendasa sui pe yeruresa pipe che so ãgua eipeve pe repia. Sese emoingatumi avei che pituhu ãgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohave yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tũpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe. ² Cūrítei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yandé moatiro pare oso, oguapi Vu acato coti oī ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoiyase che rahir secoira” ndehi avei chupe.

⁶ Ichui rumo ombouse Guahir ñepe vahe co ivi pipe aipo ehi:

“Tomboetei opacatu che rembiguai yuvireco”

ehi. ⁷ Evocoiyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui va-herā” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherā ité.

Ereporocuai nde reco ivi tupri sa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesā ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherā tēi,

inungar turucuar cuacua oyearo vahe opa.

Nde rumo apirēhi vaherā ité ereico.

¹² Ipare ereyapara inungar turucuar yapapri iyavei ereseçuñarora inungar oturucuar oseçuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherā ité” ehi.

¹³ Ndahei que ñepe iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui ãgua, icuapri avei ava ipisiropirā pītivii ãgua.

2

Yandemahemoha tupri ra yande pisirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepepiñhi ñgua. ² Esepia, co Tüpa rembiguai remimombehugüer seroyapri ité secói, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. ³ ¿Mara yahera pñha evocoiyase yande yañemi Tüpa ñemoirosa sui viña acoi ndayan-demahemoha tupriise co yande pisirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipape sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tüpa oyapo setá mbahe yavai rai vahe poromondiisa ndayasepai vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secói

⁵ Ndahei güembiguai povrive omondo Tüpa ivi oime vaheerã, acoi oromombehu vahe pñu. ⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoiyase ava?

¿Mahera ndemahenduha ava tñi rese, iyavei eresãro no?

⁷ Ndaseta ariimi erereco ivi coti catu nde rembiguai sui.

Ipape voi rumo eremondo nde porañetesa imboetisave chupe.

⁸ Iyavei opacatu erereco uca mbahe nde rembiapo ipovrive” ehi imombehu. Ëgüe ehise Tüpa, ndoseyai eté que ñepe yepe mbahe ipo pendarñhi. Cüritei rumo ndaopacatu tupri vitei mbahe ipovrive. ⁹ Yaicua niha Jesús, ahe Tüpa güembiguai sui ndaseta araviter ivi coti catu vireco. Oporoaisusa pipe oipota imano ñgua opacatu ava repirã. Cüritei rumo iyemombaraisu pare, omondo oporañetesa imboetisave chupe.

¹⁰ Iyavei opacatu mbahe oime Tüpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco ñgua’ oya. ¹¹ Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe ñgua viroyasar upe. ¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucaí aveira sapucaisa ndeu opacatu ava ndeu oñemonuha vahe pñhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tüpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; Ëgüe ehi avei Jesús vireco voho, vuvi yande nungar; omano pipe sui omocañi vaheerã iporoyuca ai vahe pñatasa; ahe Carugar. ¹⁵ Opacatu ava manosa sui osiquiyesa pipe mbiguai tñi nungar yuvirecoi vahe güecove viteseve, evocoi nungar sui senose ñgua, Ëgüe ehi Jesús. ¹⁶ Esepia, ahe ndoui Tüpa rembiguai pñivi ñgua, ahe rumo ou Abraham suindareta pñivi ñgua. ¹⁷ Sese niha tivireta nungar tupri ité oyapo Tüpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã

ñeroisa reime āgua” ehi. ¹⁸ Esepia, ahe avei oiporara Caruguar poroātoisa. Sese cūrítei ahe oicatu ité ava Caruguar remiatoi pītívii āgua.

3

Jesús ivate catu vahe Moisés sui

¹ Evocoiyase, che rívíreta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secói yandeu apóstol iyavei pahí ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secói. ⁴ Esepia, ñepeí-peí oi víreco oaposar víña. Tūpa rumo opacatu mbahe aposar secói. ⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omómbehu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vaheṛá yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espíritu Santo icuachiapri arachendar pipe: “Co pipeve voi, pesenduse Tūpa ñehe,

⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.

⁹ Aheve avei acoi che recoāha tēi pe ramoi mbahe güembiapo pipe, yepe cuarenta aravíter rupi osepia tēi mbahe che rembiapo yuvireco víña.

¹⁰ Sese añemoiro ahe ava upe, aipo ahe:

‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoiro ahe ava upe, ‘Ñepeí reseve ndapepituhui chietera che pituhusa pipe’ ahe yuvireco chupe” ehi aracahe.

¹² Che rívíreta, peñearo catu; tipo eme que ñepeí ipihañemoñeta naporai vahe Tūpa reroyaēhisa pipe oyepepi vaheṛá ichui. ¹³ Iya rumo peyemonguerēhi catu ñepeí-peí arí yacatu rupi cūrítei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.

¹⁵ Supi niha acoi aipo ehi ñehesa:

“Co pipe voi pesenduse Tūpa ñehe,

peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. ¹⁷ ¿Ava upe pīha acoi Tūpa oñemoiro cuarenta aravíter rupi? Acoi oyemboangaipa vahe omanopa vahe yuvireco ivi iporupirēhisa rupi. ¹⁸ ¿Uma upe pīha acoi ñepeí reseve, “Ndapeiquei chietera che pituhusa pipe pe pituhu āgua” ehi Tūpa? Acoi víroyaēhisar upe aipo ehi. ¹⁹ Sese yaicua seroyaēhi pipe ndoicatu yuviroique ipipe.

4

1 Oime vite Tūpa remimombehu yande yaique vaherā ipiri yande pītuhu āgua. Sese iya ité yañearo tupri. Aní chira que ñepeí pe pāhu pendar ndoiquei chira. 2 Esepia, yandeu avei imombehusa ñehesa poropisirosa resendar inungar yande ramoí upe ivi iporupirēhi rupi yuvireco aracahe. Co ñehesa rumo ndoipitivií eté ahe ava yuvireco. Esepia, ahe osendu yuvireco seroyaēhisave tēi. 3 Yande rumo yaroya vahe, yaiquera yande pītuhu āgua, ahe chupe Tūpa aipo ehi:

“Sese añemoiro ahe ava upe; ñepeí reseve,

‘Ndoyuviroiquei chietera che pītuhusa pipe opituhu āgua yuvireco’ ahe” ehi. Tūpa rumo yipive ité opa omboaviye oporaviquisa íva, ivi. 4 Esepia, co imbosietesa ari resendar ñehesa oime icuachiapri aracahendar pipe:

“Tūpa opītuhu opacatu oporaviquisa sui imbosietesa ari pipe” ehi.

5 Iyavei aipo ehi iri icuachiapri pipe:

“Ndoyuviroiquei chietera che pītuhusa pipe opituhu āgua yuvireco” ehi.

6 Ipane vite rumo amove ava yuviroique vaherā ahe pītuhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaēhisa pipe yuvireco. 7 Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucasa aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe, peyepihamoatai rene catu chupe” ehi vahe.

8 Ehi revo Josué omondose co pītuhusa israelita upe aracahe viña, Tūpa evocoyase noñehe iri chira co ambuae ari rese viña. 9 Evocoyase oimeño itera mbituhusa iporavopri ava Tūpa upendar upe nara: 10 Acoi oique vahe evocoyase pītuhusa pipe, opituhu oporaviquisa sui inungar Tūpa opītuhu ombahe mboaviye pare aracahe. 11 Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

12 Esepia, Tūpa Ñehengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ēgüe ehi avei ñehengagüer oñatoi eté yande hā, yande espíritu avei. Iyavei omboyecua tupri ité yande pihañemoñeta.

13 Ndipoi eté niha mbahe Tūpa rembiapo ñomipri ichuí. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

14 Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. 15 Esepia, yande pahi ivate catu vahe oicuaño ité yande recocuer pīrataēhisa. Ahe avei niha yande nungar aracaco vīroparaisu opacatu mbahe-mbahe tēi güecoāhasa. Ahe rumo ndoyemboangaipai eté ipipe. 16 Sese yayemboya catura yande yeroyasa pipe yande Ru Tūpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pītivií āgua mbahe tēi oimese yandeu.

5

1 Opacatu pahi ivate catu vahe iporavopri secoi ava pāhu sui ava recocuer reropovēhe āgua Tūpa upe iyavei porerecosa mondó āgua chupe, mbahe

mimba yucapri ropovêhe âgua avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiêhisa pipe oipitivii ava ndayaracuai vahe, oyavi vahe avei. ³ Ahe rumo güeco pîrataêhisa pipe viropovêhe mbahe mimba yucapri Tûpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui têi pahi oyeapo. Tûpa itê rumo osenoira imboetei uca âgua inungar acoi Aarón upe aracahe. ⁵ Êgüe ehi avei Cristo, ahe noñeenoi pahi ivate catu vahe güeco âgua oyesui têi. Tûpa itê osenoi imboetei uca âgua acoi aipo ehise: “Nde che rahir ereico, co pipe amondo nde recove âgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirêhi vaherã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesse, oyoeroqui pîrata oyasehosa pipe Vu Tûpa upe yepi. Esepia, ahe oicatu ipîsiro âgua manosa sui. Êgüe ehi iporeroya tuprisa pipe, Tu osendu iyeroqui yepi. ⁸ Yepe Tahir itê viña, güeco paraisu pipe rumo oyembohe imboyeroya âgua; ⁹ evocoiya güeco pipe omboaviye güeco catuprisa. Ipipe sui güeru poropîsirosa ndopai vahe opacatu viroyasar upe nara. ¹⁰ Esepia, Tûpa niha osenoi pahi ivate catu vahe seco âgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe âgua pëu co mbahe tecocuer resendar rese. Yavai etepri rumo imombehu tupri âgua. Esepia, pe ndape-seducua tupri vitei eté. ¹² Aracacove peporombohera viña; peipota vite rumo pëu mbahe ndayavaimi vahe imombehu iri âgua yembohesa Tûpa suindar. Ndapeyemoviracuai rumo; peihu iri pota cambi mbahe sâta vahe hu rägüer sui. ¹³ Esepia, acoi êgüe ehi vahe pîtani osi rese ocambu vite vahe nungar têi pe recocuer. Ipipe sui ndapeyembohei eté Tûpa Ñehengagüer rese mbahe tupri pe reco âgua. ¹⁴ Co tembihu sâta vahe rumo ahe ava ocuacua vahe upe nara. Esepia, ahe oyembohe tupri catu iñehengagüer rese güeco tupri âgua yepi. Ipipe sui oicua itê mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipîndar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tûpa suindar co mbahe rese yembohe iri rägüer sui. Ahe yipîndar vahe co: yande ñecuñarosa, yande reco ai sui yande poisa, manosa apirêhi vahesave yande rerasoêhi âgua, iyavei Tûpa rese yande yeroyasa, ² yembohesa poroâpiramosa resendar, po mondosa Tûpa reroyasar harive, omano vahe cuerayevisa iyavei ava recocuer rese porandusa resendar avei. ³ Tûpa oipotase yayem-bohera ambuae mbahe yavai catu vahe rese.

⁴ Acoi ava yipîndar oseducua vahe Tûpa remimbotar, osâha vahe avei Tûpa suindar porerecosa iyavei oyandu itê Espîritu Santo güecocuer pipe, ⁵ osâha vahe avei Tûpa Ñehengagüer aviye vahe iyavei osâha chíhi ipîratasa curi oime vaherã viña, ⁶ oyepepise rumo ichui, ndayaicatu iri seco royoyevi iri âgua Tûpa upe. Esepia, yaticapri nungar iri eté vireco Tûpa Rahir iyavei ambuae ava omoñehe-ñehe têi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe

upe, evocoyase evocoi nungar ava oipisira porovasasa Tūpa suindar. ⁸ Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapipirā tēi avei yuvirecoira curi.

Yande remiario aviye vahe yande moviracua tupri vahe

⁹ Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. ¹⁰ Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. ¹¹ Ore rumo oroipotaño ité ñepeipei pe pemboyecuaño itera ari cañi rupi eté co pereco vahe pe querēhisa pe remiario aviye vahe rupiti āgua. ¹² Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaherā. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ēgüe ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ Ēgüe ehi oime ñuvirio mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese. ¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ēgüe ehi yande remiario oi que turucuar guasu tūparo asiasa cupeve oi imaranehi catu vahesave ivave. ²⁰ Aheve Jesús oi que yande raperā mboi āgua. Ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secui aracahe. Abraham oyevisé peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mondo āgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepeipei chupe. ‘Mborerecuar guasu seco ivi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secui. ³ Ahe iyepusa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secui aracahe. Yande ramoi Abraham teieté avei omondo diez sui ñepeipei mbahe porerecosa

mborerecuar guasu eta sui güembierocua chupe. ⁵ Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepeí-peí iporaviquimi rerocua água yuvireco. Abraham suindar ité niha égüe ehi yuvireco. ⁶ Yepe Melquisedec ndahei Leví suindar viña, ahe rumo oipísi ité Abraham sui evocoi porerecosa; Abraham, ahe acoi oipísi vaheṙā mbahe Tūpa remimombehu. Égüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu seci yepi. ⁸ Evocoi levita suindar oipísi ava poraviqui reprim diez sui ñepeí-peí. Ahe ava rumo omano vaheṙā tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndoyavi evocoiyase opacatu pahi eta Leví suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Leví oyesuindar vireco, evocoiyase ihaēhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipísi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catuprisa evocoi mborocuaita reroya pipe viña, evocoiyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñarose evocoi pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Leví suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehēi ahe ichuapri turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶ Ahe rumo ndahei porocuaita “uma sui osēra pahiguā” ehi vahe sui oique pahi güeco água; güecocuer pīrata ndopai vahe reseve oique. ¹⁷ Esepia, Tūpa ité aipo ehi oñehese:

“Nde pahi apirēhi vaheṙā ité ereico inungar Melquisedec” ehi.

¹⁸ Sese mborocuaita arachendar opa ité. Esepia, ahe nipiratai, ndayande pītivī eté. ¹⁹ Esepia, Moisés porocuaita ndosecocuer mbocatuprii eté ava. Yande rumo yasāro mbahe aviye catu vahe yande recocuer uvē nara. Supi niha yayemboya Tūpa rese.

²⁰ Tūpa rumo oñehese omoingatu ñepeí reseve güerer pipe. Ambuae pahi rumo ndahei ñepeí reseve senoipri yuvirecoi Tūpa rer pipe. ²¹ Yande Yar rumo Tūpa osenoi ñepeí reseve güerer pipe pahi seco água icuachiapri pipe aipo ehise chupe:

“Yar Tūpa osenoi ñepeí reseve, sese nosecuñaroi chietera:

“Nde pahi apirēhi vaheṙā ité ereico” ehi”

ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomondoi chietera pahi güecosa ambuae upe. ²⁵ Sese ahe oicatu ité ñepeí reseve viroyasar Tūpa rese oyemboya vahe písiro água apirēhi. Esepia, ahe oicove vaheṙā ité apirēhi oyerocuī vaheṙā Vu Tūpa upe sese.

²⁶ Supi eté Jesús pahi ivate catu vahe seci. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaiya viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar seci, ndoyuca ranei arī yacatu rupi mbahe mimba Tūpa upe seropovēhe água

yipindar oangaipa rese, ipare opacatu ambuae angaipa rese. Ñepeí reseve ité rumo güete viropovêhe opacatu ava angaipa repirã. ²⁸ Moisés porocuaíta rupi iporavopri pahi ivate catu vaherã ava ndahei seco tupri vahe; Tüpa rumo Moisés porocuaíta pare osenoi ñepeí reseve Guahir seco catupri vahe 'tasecoi pahi ivate catu vahe apirêhi vaherã ité' oya.

8

Jesús Tüpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oí. ² Aheve pahi secoi oporaviqui Vu rêta supi eté vahe pipe. Ahe ivave ité yande Aposar rembiapo, ndahei ava têi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovêhe vaherã Tüpa upe yuvireco. Sese Jesucristo avei vireco mbahe viropovêhe vaherã Vu Tüpa upe. ⁴ Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe viropovêhe vahe Moisés porocuaíta rupi yuvireco. ⁵ Co ivi pipendar pahi rumo ihañeco íva pendar rahanga rese têi yuvireco. Yaicua niha ahe sahanga têi. Esepia, Moisés oyapo potase tüparo, Tüpa aipo ehi chupe: "Emahecua tupri acoi ivitrive amboyecua vahe rese ndeu. Ahe inungar tupri eyapo" ehi chupe. ⁶ Yande pahi ivate catu vahe rumo, Jesús, vireco ocuaíta aviye catu vahe ambuae pahi sui. Esepia, Tüpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tüpa remimombehu aviye catu vahe avei.

⁷ Esepia, yipindar Tüpa remimbotar oicatusé yande recocuer recuñaro água viña, ndipoi chira ambuae semimbotar ipiasu vahe yandeu viña. ⁸ Tüpa rembiepiave rumo ava recocuer mbahe têi eté. Sese aipo ehi icuachiapri pipe co ava rese aracahe:

"Yande Yar aipo ehi:

'Oimera ari ayapo iri água che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuaíta yuvireco. Sese apoi íchui' ehi yande Yar Tüpa.

¹⁰ 'Co ari pare rumo na ahera che remimbotar apo Israel pendareta upe' ehi yande Yar Tüpa,

'Amondora che porocuaíta iyapisacasa pipe, aicuachía aveira ipihañemoñetasa pipe.

Evocoyase che iTüpa aicora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca água yuvireco.

Esepia niha, opacatu chíhivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe têi sembiapogüer rese yuvireco chupe; ndayemomahenduha iri chiveira yangaipagüer rese' ehi yande Yar" ehi icuachiapri pipe aracahe. ¹³ Oñehese Tüpa güemimbotar piasu rese, omombehu yipindar vahe cañi água; chíhimi têi ipane icañipa água.

9

Tūparo ivi pipendar iyavei tūparo iva pendar

¹ Evocoiyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar. ² Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve. ³ Imoñuviriosa turucuar tūparo asiãsa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tūpa porocuaita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuaita cuachiapri ita ipe vahe rese oime ipipe. ⁵ Ahe mborocuaita riru harive oime Tūpa rembiguai rahanga oyovai yuvinohai, “Tūpa oime ité cohave” he ãgua. Ahe ipepo oyopi tupri Tūpa porocuaita riru rovapisa yuvireco. Co rupive revo amombehura co mbahe pëu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo ãgua. ⁷ Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovêhe vaheñã Tūpa upe oangaipa rese, ava icuaêhi pipe angaipa oyapo vahe repirã avei. ⁸ Co rese Espiritu Santo oicua uca yandeu avaño tēi ndiãva vitei eté oique ipa vahe oi imaranehi catu vahe pipe Tūpa rovai oime vitesey yipindar oi yasiapri. ⁹ Co opacatu mbahe yandé mbohé mbahe cūríteindar rese. Esepia, co porerecosa iyavei mbahe seropovêhepri aheve Tūpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuaita. Ahe rumo êgüe ehiñomi tēi yuvireco Tūpa remimbotar ipiasu vahe yu ãgua renonde.

¹¹ Poropisirosar rumo ou cute. Iyavei ahe ité cūrítei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivate. Ndahei rumo ovesa iyavei guaca rahir ruvi seropovêhe ãgua, ahe rumo viropovêhe vuvi ité opacatu rese; êgüe ehi ahe ñepeí reseve oique apirêhi vahe ñepisirosa reime ãgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro ãgua. ¹⁴ Cristo ruvi rumo vireco catu ité pīratasa. Esepia, Cristo, Espiritu apirêhi vahe pipe, oyemondo ahe ae Tūpa upe inungar mbahe seropovêhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca ãgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru ãgua Tūpa upe omano pipe. Ipipe sui oime ñeroisa oyemboangaipa vahe yipindar mborocuaítavriye yuvirecoi vahe upe ‘toipisi che rembiporavo yuvireco oyeupendar mbahe apirêhi vahe che remimombehugüer rupi’ oya.

¹⁶ Que ava oicua ucãse güemimbotar ombahe mondo ãgua omano renondeve, icuasa tupri ranera rumo imanosa semimbotar apo ãgua renonde. ¹⁷ Esepia, ndiãva vitei eté omano vaheñã recove vitesey mbahe imondosa iyarã upe. Imanore voi rumo aviye imondosa. ¹⁸ Sese yipindar vahe Tūpa remimbotar yaposa mbahe mimba ruvi piyere pipe. ¹⁹ Esepia, Moisés omombehupase mborocuaita opacatu ava upe, oipisi ovesa ragüer pīra vahe iyavei ivira

hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuaita resendar, opacatu ava avei. ²⁰ Evocoiyase aipo ehi icuachiapri pipe: “Co mbahe ruvi oicua tupri uca co porocuaita Tūpa ombou vahe omboyeroa āgua pēu” ehi. ²¹ Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. ²² Porocuaita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. ²⁴ Esepia, Cristo ndoiquei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūritei secoi Tūpa rovai yande pītiviī āgua oyerōqui pipe. ²⁵ Judío pahi ivate catu vahe niha ñepei reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvī ité viropovēhe. Cristo rumo ndoyeeropovēhe pihī Tūpa upe. ²⁶ Ēgüe ehise rumo, yipisuive omano pihira viña. Cūritei rumo oyemboyecua co ipa arī rupi ñepei reseve, apirēhi vaherā viropovēhe āgua güete Tūpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeropovēhe ñepei reseve opacatu angaipa mocañi āgua. Ipare rumo oyevi irise ou, ndahei iri chira angaipa recocuer rese. Ahe rumo oyevira ou guārosar pīsiro āgua.

10

¹ Esepia, Moisés porocuaita mbahe aviye vahe ou vaherā rahanga tēi, ndahei ahe eté vahe ité. Sese ahe porocuaita ndoicatuī eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. ² Porocuaita oicatuse pe angaipa sui pe moatiro tupri āgua, ndapeyandu iri chira pe angaipa viña iyavei pahi ndovirovovēhe iri chiveira mbahe ruvi Tūpa upe yuvireco viña no. ³ Co seropovēhepri rumo yande momahenduha uca āgua tēi yande angaipagüer rese araviter yacatu. ⁴ Esepia, mbahe mimba ruvi tēi nomocañii eté yande angaipa yande sui.

⁵ Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retocuer evocoi nungarā.

⁶ Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

⁷ Evocoiyase che aipo ahe:

‘Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuaita rupi seropovēhesa viña. ⁹ Ipare aipo ehi: “Che ayu nde remimbotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua. ¹⁰ Tūpa evocoiyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaherā güete mondo pipe.

¹¹ Opacatu judío pahi eta ari yacatu oyapo ocuaita iyavei mbahe mimba avei-vei viropovêhe Tûpa upe yuvireco. Yepe ahe viropovêhe tēi yuvireco viña, nomocañi catui eté rumo angaipa. ¹² Jesucristo rumo oyeeropovêhe ñepi reseve angaipa repirã apirêhi vaherã. Ipare oso ivave, uguapi oï Vu acato coti. ¹³ Aheve osãro oï Vu Tûpa opase voi omondo yamotarêhimbar ipovrive. ¹⁴ Esepia, ñepi reseve oyeeropovêhe pipe osecomohivi tupri Vu Tûpa rembipeha apirêhi vaherã. ¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

¹⁶ “‘Co ari pare rumo na ahera che remimbotar apo chupe’ ehi yande Yar Tûpa, ‘Coipe amondora che porocuita ipihañemoñeta pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

¹⁸ Êgüe ehi angaipa rese oimese ñeroisa, ahese ndiya iri seropovêhesa mbahe angaipa repirã.

Yayemboya catura Tûpa rese

¹⁹ Sese che rivireta, iya ité cûritei yande reique água Tûpa rovai yande siquiyêhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tûparo pipe asiasa turucuar yande reique água Tûpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secói Vu Tûpa rêta rãrosar; ²² sese yayemboya catura Tûpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remi-aro pipe yamombehu vahe ava upe yande pihañemoñeta rerovaêhisa pipe. Esepia, Tûpa omboaviye itera mbahe güemimombehugüer yandeu. ²⁴ Iyavei yasecañora ñepi-pei yañepitivii vaherã yande yeaisu catu água iyavei mbahe tupri apo água yandeyeupe. ²⁵ Ndayamopanei chira yande ñemonuhasa Tûpa upe. Ndayaicoi chira omopane vahe nungar, iya rumo yayemonguerêhi catura ñepi-pei yandeyeupe. Esepia, virovi ari yande Yar yevi iri água.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu; ²⁷ Tûpa ñemoirosa ipirata vahe güeraño oimera yandeu iyavei tata guasu apirêhi vahe opara omocañi Tûpa amotarêhimbar yuvirecoi vahe.

²⁸ Ava Moisés porocuita ndoviroyai vahe que ñuvirio, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi. ²⁹ Peyapisaca tupri co rese: ipirata catu oimera Tûpa ñemoirosa tahir roerõrosar upe curi iyavei acoi ava vireco vahe suvi inungar mbahe êgüe ehi tēi vahe iyavei viroiro tēi vahe guaisusar Espiritu, chupe avei oimera Tûpa ñemoirosa ipirata catu vahe. Esepia, co tuvi rese niha seroyapri ité Tûpa remimbotar. Ipipe avei niha ahe ava Tûpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tûpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. ³³ Esepia, acoi amove pe pâhu pendar rese iñehe-ñehe tēi yuvireco, marama tēi avei pe rereco opacatu ava rovaque. Ambuae pe pâhu pendar

evocoiyase peipitívii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañi avei pe viharetesa pipe peico. Esepia, peicua ivave perecora mbahe aviye catu vahe iyavei apirēhi vahe. ³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombegüer oime vaherā pisi āgua curi. ³⁷ Supi eté icuachiapri pipe Tūpa aipo ehi:

“Pihavi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera. Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepiai vahe. ² Supi eté amove yande ramoi aracahendar upe, “Aviye ité” ehi Tūpa oyes yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri aracahendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar pisiro āgua. Iyavei sese oyeroya pipe omombehu ava co ivi pindar cañi āgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherā vahesave, ahe amondora ndeu” ehise, amboyeroyaño ité. Yepe ahe ivi ndoicuai viña, osēño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pিরer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco. ¹⁰ Esepia, aipo Abraham osāroño ité tecua ivave oviracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, viroyaño ité Tūpa oñehe omboaviye āgua chupe. ¹² Evocoiyase yepe Abraham ocuacuami

viña, vireco rumo guahir. Ahe ichuindar sehi eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisi eté mbahe semimombegüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu osea vite oyeupendar ivi yuvireco.

¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tüpa nochí eté, “Che Ru Tüpa” oyeupe hese. Esepia, vireco ité tecua imoingatupri chupe.

¹⁷ Tüpa rese yeroyasa pipe avei Abraham oyemoingatu voi guahir ñepepe vahe Isaac reropovēhe ägua Tüpa upe güecoãhasa pipe. Yepe Tüpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi.

¹⁹ Esepia, oicua ité Tüpa vireco pīratasa ava omano vahe mbogüeraveyi iri ägua. Evocoiyase imano rāgüer sui eté oipisi iri guahir aracahe. Ahe evocoiyase omboyecua mbahe yandeu.

²⁰ Tüpa rese oyeroya pipe avei Isaac osovasa Jacob, Esaú avei mbahe oime vaherā pisi ägua.

²¹ Iyavei Tüpa rese oyeroya pipe avei Jacob omano pota ägua, osovasa ñepepei José rahir. Ahese opococa rese tēi eté oyemoviracua oyerogui ägua Tüpa upe imboeteisa pipe.

²² Tüpa rese oyeroya pipe avei José, omano ägua renonde, aipo ehi: “Yande mu israelita opara yuvinose ivi Egipto sui curi” ehi. Ipare oyocuai omu oitacuer rerova ägua aracahe.

²³ Tüpa rese oyeroya pipe avei, ohase Moisés, iyepupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuaita yuca ägua sui.

²⁴ Tüpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he ägua. ²⁵ Ahe rumo oipota catu mara-mara tēi güereco ägua Tüpa reroyasar reseve chíhi rupive mbahe tēi rese yembovīha rāgüer sui. ²⁶ Aviye catu ité chupe Tüpa rembi-poravo upe nara mbahe tēi porara ägua Egipto pendar mbahe eta sepirusu vahe rereco rāgüer sui. Esepia, ahe oicuaño ité oyeupe nara porerecosa Tüpa ombou vaherā.

²⁷ Tüpa rese oyeroya pipe avei osē ivi Egipto sui osiquiyēhisa pipe mborerecuar guasu roriēhise. Oyemoviracuaño ité oyese mbahe apo ägua; aviye osepia vahe ité Tüpa acoi ndoyecuai vahe. ²⁸ Tüpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tüpa rembiguai oporoyuca vahe ava israelita rahir ipi yucaēhi ägua.

²⁹ Tüpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuvirasu. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

³⁰ Tüpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tüpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güētave israelita Jericó ivi repiasar.

³² ¡Setá vite ambuae ava recocuer oime amombehu vaherā pēu! Ipane ité rumo ari imombehua ägua: Gedeón, Barac, Sansón, Jefté, David, Samuel

iyavei opacatu Tūpa ñehe mombehusar recocuer. ³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rägüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarêhisar sundao osecopi yuvireco. ³⁵ Oime amove cuña ipãhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasë catu co nungar mbahe sui” ndehi eté yuvireco cuerayevisa aviye catu vahe pipe güeco ñgua. ³⁶ Ambuae iparaisu catu ava upe oñeroirosa pipe, onupasa pipe, oapichi-pichisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tēi, ovesa, cavara pির añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaheñā oyepãhuve, ahe oguata tēi ivi iporupirêhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri ñgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tupri ra yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiêhisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato cōti oī.

³ Pe avei catu, pepihañemoñeta Jesús recocuer rese; ahe oiporara ité mbahe rasiecuer ava yangaipa vahe mara-mara tēi güerecose. Sese pecuerai eme Cristo rese peico ñgua iyavei, “Ndorequerēhi iri” ndapeyei chira. ⁴ Esepia, pe ndapemano vitei eté angaipa upe pe yembopihaviracua pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voño Yar nde mombaraisusa upe nde reco mohivi tupri ñgua, iyavei, ‘Ndachequerēhi iri’ nderei chiaveira chupe ndeu oñehe pīratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco ñgua” ehi.

⁷ Peñemosaña catu pe mombaraisusa upe pe reco mohivi ñgua. Esepia, Tūpa êgüe ehise pēu guahir ité pe rereco. ¿Oime pīha que ñepeí ava

guahir upe noñehe pīratāi vahe secocuer mohīvi āgua? ⁸ Tūpa ndape recocuer mohīvise inungar oyapo ambuae guahireta upe yepi, pe evocoyase inungar-ra chīhivahe ndiyesupai vahe, ēgüe peye tēi peico chupe. ⁹ Iyavei, chīhivahe tēi vite yaicose, yande yesupa co ivi pīpendar yande nupa yande recocuer mohīvi āgua, ahese yamboetei. Sese yamboetei catura yande Ru Tūpa iva pendar tecovesa rereco āgua. ¹⁰ Yande yesupa co ivi pīpendar opīhañemoñetāgüer rupi tēi yande nupa yaicove raimi tēise co ivi pīpe; Tūpa rumo yande mombaraisu yandeu mbahe tupri āgua rese yande reco maranehi āgua inungar ahe ndaseco marai vahe. ¹¹ Supi eté yīpīndar, poronupasa yaipisi ramose, tasi yandeu. Coiye rumo yande imboyeroyasa pīpe yayapo catura mbahe ihīvi vahe. Ahe evocoyase yande recocuer rerecoa mbahe tupri pīpe.

Peicua catu Tūpa ñehe rendu potaēhi sui

¹² Sese pemopase iri pe reco pīratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihīvi vahe pe recocuer uve nara ‘toingatu che pī ndoguatai vahe’ pe yapave ‘timara catu iri eme’ pe hesa pīpe.

¹⁴ Peico catu opacatu ava upe mbahe tupri pīpe, peico avei pe reco maranehi pīpe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava pīha pīpe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirā tēi vivri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasehó iteanga viña, ndiya iri eté rumo mbahe semierecovi rāgüer mboyevi āgua chupe.

¹⁸ Peyemboyase Tūpa rese, ndahei inungar pe ramoi israelita araca-hendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pītu, pītumimbi vahe, ivitu ai avei sese. ¹⁹ Iyavei ndapesendui mimbi imoñehepri, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyemboisiquiye ité evocoi porocuita aipo ehi vahe sui: “Acoi opiro vahe ivitri rese, yepe que mbahe mimba tēi viña, ahe peyapi-yapi yuca ita pīpe, anise lanza pīpe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave ariri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei āgua yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco avīye vahe espíritu yuvirecoi vahe rese. Ahe niha Tūpa osecomohivi tupri sereco. ²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe avīye catu yandeu Abel ruvi sui.

²⁵ Sese peicua catu, “Ndoroviroyai” peye vaherā acoi pēu oñehe vahe upe. Esepia, Moisés reroyaēhisa pīpe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pīpe aracahe. Ēgüe ehise chupe

yuvireco aracahe, ěgüe ehi catu iri tiētera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboriri eté ivi aracahe; cūrítei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omi vahe omocañi güemiapo Tūpa ‘topita apirēhi mbahe nomi vahe’ oyapave” ehi. ²⁸ Tūpa mborerecuasa ombou vahe yandeu ahe nomi chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboetisave semimbotar rupi. ²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tūpa mboviha

¹ Ndapepoi chietera pe yeaisusa sui ñepei-pe oyeivri nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güetave icuaēhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ěgüe ehi aveira pēu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuara oyemboaguasa tēi vahe upe.

⁵ Ndahei guarepochi tēi peipota raira. Iya rumo peyemovihaño mbahe pereco vahe rese. Esepia, Tūpa aipo ehi: “Ndoroeyai chietera, ndapoi chietera nde sui” ehi aracahe. ⁶ Evocoyase aipo yahera Yar rese yande yeroyasa pipe:

“Che Yar che pitivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe rerogatasar rese, pēu Tūpa Ñehengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoci apirēhi vahe.

⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahí tūparo yipindar yuvirecoi vahe pendar yuvirohu. ¹¹ Supi eté judío pahí ivate catu vahe virioique mbahe ruvi tēi Tūpa rēta oi imaranehi catu vahe pipe seropovēhe ava angaipa reroqua āgua; ahe mbahe mimba rete rumo osapi tecua ivii yuvireco yepi. ¹² ěgüe ehi avei niha Jesús iparaisu, omano tecua ivii ava reco mbocatupri āgua vuví pipe. ¹³ ěgüe yahe aveira yasora Jesús upe yande paraisu āgua supi ava yande roñerosa pipe yaico.

¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vahe rā yandeu curi. ¹⁵ Sese Jesús rembiapo rese iyacatu yamboeteira apirēhi vahe rā yande Yar Tūpa. Co imboeteisa inungar mbahe seropovēhepri ari rupi chupe. ¡ěgüe yahera imboetei yande ñehe pipe!

¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo

rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihaiivi ãgua rese ité aporandu pe yeruresa rese pëu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rãrosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo ãgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ëgüe tehi imboeteipri apirëhi tasecoi Cristo yepi!

²² Che rivireta, peñemosañõ co che opomboaracua vahe rese, moviro tēi niha co ñehesa aicuachía pëu. ²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. İvi Italia rupindar avei ombou omahenduhasa yuvireco pëu.

²⁵ Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevhareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa ãgua rese peico. ⁴ Peicoño ité pe reco ñemosasa pìpe pe reco mohivi tupri catu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pìpe iyavei ombahe mboasiêhisa pìpe avei. ⁶ Iyacatu rumo evocoi ava oporandura Tūpa upe sese oyeroyá pìpe, ndahei chira opihañemoñeta rerova-rova tēisa pìpe inungar acoi ivitu i ombohitu-hitu tēi vahe. ⁷ Acoi êgüe ehi-ehi tēi vahe ava ndoipisii chira mbahe yande Yar sui yuvireco. ⁸ Esepia, ñepeí ari ipihañemoñeta ñepeí mbahe rese, ambuae ari ambuae rese. Ndoyemoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovhareteño yepi Tūpa omboeco ivate ãgua rese. ¹⁰ Iyavei mbahe yar secói vahe pe pãhuve, toyembovha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êqüe ehi raimi tēi vahe yuvireco. ¹¹ Evocoyase acoi ari osēse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovhara oico. Esepia, osasa tuprise evocoi poroãtoisa, oipisira porerecosa, ahe tecovesa apirêhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tēi apo ãgua, “Tūpa revo êgüe ehi cheu” ndehi chira. Esepia niha, Tūpa ãtoisar ndipoi eté mbahe tēi oyapo uca vaheerá chupe. Iyavei ahe noñatoi avei mbahe tēi apo ãgua ava. ¹⁴ Co rumo ava opihañemoñeta rai upe oñeatoi uca mbahe tēi apo ãgua yepi. ¹⁵ Güemimbotarai pìpe evocoyase oyapo angaipa. Ipare angaipa apo pìpe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu íva rese mbahe aposar. Ndahei rumo güembiaipo nungar secói. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pìpe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

Tūpa rese yande pihanemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehese rese: peyapisaca tupri voira ambuae ava ñehese rese, mbegüe rupi rumo peñehera

chupe iyavei ndapembahemboasi voi tēi chiaveira. ²⁰ Esepia, yambahemboasi voi tēise, ndayayapoi Tūpa remimbotar. ²¹ Evocoiyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vite Tūpa ñehe omingue vahe pe piha pipe. Ahe niha vireco pīratasa pe pīsiro āgua.

²² Pe rumo pemboaviyera co pe mbohe vahe ñehesa; ndahei acoi psenduño tēira. Esepia, psenduño tēise, pe ae peyembopara. ²³ Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe. ²⁴ Ipare rumo oyepēpise ichui, cūrīteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapīsaca tupri vahe co mborocuita maranehi mbahe-mbahe tēi sui yande reroqua vahe rese iyavei oyemoviracuaño ité vahe oyapo vaheṛā iporocuita, ahe oviharetera opacatu güemiapo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoiyase ahé ae oyembopa oico. Sembieroya evocoiyase ēgüe ehi tēi vahe. ²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaipitiviira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoaviratii chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oiquese pe ñemonuhasave viña, ahe icuā penda oro vahé, iturucuar catupri ai vahe. Sese peñañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evocoiyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pihañemoñeta raisa pipe.

⁵ Che rivireta, che rembiaisu, psendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombegüer rupi che mborerecuasa oyeupe nara’ oyapave guaisupar upe. ⁶ Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tēi seroïrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tēise rumo, ahese yayapo angaipa, yayavi mborocuita Tūpa rovai. ¹⁰ Esepia, acoi ava viroya vahe opacatu mborocuita, ipare rumo oime que ñepeñi nomboaviye tupri vahe, ahe oyavi opacatu mborocuita. ¹¹ Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucai chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. ¹² Evocoiyase peñehe tupri iyavei peico tupri aveira. Esepia, oporandura yande recocuer rese yande Yar oporocuita pipe güeru vahe yande reco tupri āgua. ¹³ Supi eté acoi ndoiparaisuercoi vahe ava, ahe chupe

ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pipe tēi yuvireco? ¹⁵ Inungar-ra oimese que yande rivri, anise yande reindri upe ipanera iturucuarā, semihura ari yacatu rupindar viña. ¹⁶ Evocoiyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña? ¹⁷ Ëgüe ehi avei, “Ayeroya yande Yar rese” yande hesa; ndayapoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pāhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoiyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoiyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepe Tūpa” ere. Supi eté aipo ere. Co rumo carugar avei oicua. Ichui osiquiyepave rumo ahe oriri eté yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa Ëgüe ehi tēi vahe? ²¹ Esepia, Tūpa oipisi yande ramoi Abraham seco tupri pipe oicuvēhese porerecosa nungar guahir Isaac chupe aracahe. ²² Indó, Abraham yeroyasa omboyecua ité güembiajo catupri reseve. Evocoiyase Ëgüe ehi ahe güembiajo tupri pipe omboaviye tupri oyeroyasa oico aracahe. ²³ Ëgüe ehi yaviye icuachiapri aipo ehi vahe: “Abraham viroya ité Tūpa, evocoiyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuvireco chupe.

²⁴ Indó, Tūpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ Ëgüe ehi tupri avei cuña ndipihai vahe Rahab upe. Esepia, ahe omoingue ñuvirio ava ivi repiasar imondopri güeta pipe, ipare oñomi imondo ambuae peri rupi yamotarēhisar sui. Ipape sui Tūpa oipisi inungar-ra seco ivi tupri vahe viña. ²⁶ Ëgüe ehi yande rembiapo catupri ndayamboycuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoiyase omano tēi eté oico.

3

Yande ñehe resendar

¹ Che rivireta, yipindar ndapeyepoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco ivi tupri vahe. Iyavei oicua tupri opacatu güeco rereco tupri āgua. ³ Inungar acoi yamondose cavayu yuru penda sese seroguata āgua. Ahese opacatu cavayu retecuer yaicatu imboyahuva āgua. ⁴ Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasa omohivi-hiviño seraso güemimbotar rupi. ⁵ Ëgüe ehi avei yande āpecu, yepe chihimi tēi viña, ipape rumo yayapo tēi mbahe tuvicha vahe ava upe. Inungar avei que tata chihimi vahe sui tēi yuvi guasu opa ocai. ⁶ Ëgüe ehi yande ñehesa tata nungar. Iyavei yande āpecu pipe opacatu mbahe-mbahe tēi yamombehu.

¡Evocoi mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tēisa carugar suindar. ⁷ Ava oicatu opacatu mbahe mimba nimasoi vahe mboaracua āgua, vīrai, mboi iyavei mbahe ipi para guasu pipendar avei no. ⁸ Ndipoi eté rumo que ava oipoepi vaheṛā oñehe. Yandeu ndiyai eté ipoepi āgua. Yande ñehesa oporoyuca vahe nungar ité yepi, mbahe tēi eté. ⁹ Co yande āpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar. ¹⁰ Ēgüe ehi eté, yande ñehe pipe yamboetei Tūpa, ipipe avei yaroīro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pīha osē ñepei i ohē vahe sui sēhe vahe, iro vahe avei viña? ¹² ¿Ihara pīha higuera ivira rese aceituna viña? ¿Iyavei oicatura pīha uva hi rese oha higo viña no? ¡Aní, ndoicatu eté! Iyavei ndoicatu ñepei i ohē vahe sui osē i, sēhe vahe sēhe asi vahe reseve.

Mbahecuasa supi eté vahe

¹³ Acoi oimese pe pāhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecuata tuprisa pipe. ¹⁴ Oimese rumo pe pihave pe poroamotarēhisa mbahe pota raisa pipe, iyavei peyeyu nara tēi mbahe peseca, ahese ndiyai peyembovīha tupri tēi ‘che yaracua vahe aico’ pe yapave. Esepia, peremira tēira supi eté vahe mbahe rese. ¹⁵ Ēgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pihañemoñeta sui tēi osē vahe iyavei carugar suindar tēi avei. ¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi. ¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranēhisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyoaviratii vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe. ¹⁸ Iyavei acoi osea vahe mbahe tupri yepi, oipisi itera opīha pipe teco ñvisa.

4

Co ivi pipendar mbahe raisusa

¹ ¿Que sui pīha ou vavasa iyavei ñehepoepi-episa pe pāhuve? Ahe ou pe mbahe pota raisa sui pereco vahe pe pihañemoñetasa pipe. ² Pe peipota rai mbahe. Ipare rumo ndapeicatu sereco āgua. Evocolyase peporoyuca pe mbahe pota raisa pipe. Ndiyai eté rumo pēu sereco āgua. Ipipe sui peyecoāha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe. ³ Acoi peporanduse rumo sese, ndapeipisii. Esepia, peporandu rai tēi, peipota pe yembovīha āgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco āgua, ahe oyeapo Tūpa amotarēhimbar. ⁵ Supi eté Tūpa Ñhengagüer aipo ehi: “Tūpa osaisu güecatēhisa pipe o Espíritu omondo vahe yande piha pipe” ehi. ⁶ Ahe rumo yande pītivii catu oporoaisusa pipe. Esepia, icuachiapri arachandarp pipe aipo ehi: “Tūpa oyamotarēhi ava oyecomboivate ai vahe. Oipītivii rumo seco mbegüe vahe saisusave” ehi. ⁷ Sese pemboyeroya catu Tūpa. Peyemoviracua carugar remimbotar apoēhi āgua. Ahese ahe oyepepīra

pe sui. ⁸ Peyemboya Tūpa rese, ahe evocoiyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡iyavei pemoatiro pe pihañemoñetasa ñuvirio pereco vahe sui! ⁹ ¡Tatasí pëu, tapeyaseho, perorivete iri eme, pemboasi pe angaipa pe yemboviharëhisave! ¹⁰ Peñenopiha Yar rovai imboyeroyasa pipe. Ahe evocoiyase pe reco mboivatera.

Peroïro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroïro vahe ambuae Jesús seroyasar, ahe oñehe rai tēi aveira mborocuita rese seroïrosave. Ëgüe peyese, evocoiyase seroyaëhisa pipe peyemboivate catura mborocuita sui viña. ¹² Oime rumo ñepeño ité ombou vahe mborocuita yandeu iyavei oporandu vahe yandé recocuer rese. Ahe güeraño avei oicatu oporopïsiro iyavei oporomocañi ñgua no. Evocoiyase pe, ¡ndiyai pe cotindar reroïro ñgua pëu!

Ndayaicuai mbahe oime vaherã yandeu ayihive

¹³ Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepeï araviter yandé poraviqui ñgua. Aheve yamogana catura guarepochi” aipo peye vahe. ¹⁴ ¡Ndapeicuai rumo mbahe oime vaherã pëu ayihive! ¿Mara ehi piha yandé recocuer? Ahe inungar ivichi oyecua raimi tēi vahe, ipare opaño ocañi. ¹⁵ Iyacatu aipo peyera viña: “Oïpotase yandé Yar yandé reco ñgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tupri apo ñgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vaherã. Esepia, pe mbahe pe reco atí vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ñgua, omboyecua vahe mbahe tēi pëu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pëu nara yuvireco, chupe ndapemboepii eté. Sese sãsé tēi yuvireco. Ahe rumo yandé Yar ipiratá vahe, ivate catu vahe oicua. ⁵ Co ivi pipe tēi pe peyecomoadiyai peico iyavei peyemboviha co ivi pipendar mbahe rese inungar guaca imonguirapri yuca ñgua. Ipipe peyemoingatu pe cañi ñgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pëu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañe yandé Yar yevi iri ñgua rese. Inungar ava omaheti vahe osãro rane güemiti poho ñgua. Esepia, ahe osãro yipindar oqui vahe iyavei ipa oqui vahe mbahe miti aviye ñgua. ⁸ Pe avei peñemosañe, peyemongerëhi catu. Esepia, cõimi eté yandé Yar yevi ñgua cute.

⁹ Iyavei che rivireta, peñemoiroi rene peyeupe. Evocoiyase Tūpa ndoporandui chira co mbahe rese pëu. Esepia, mborerecuar guasu ñva pendar oye-moingatu voi ohã yandeu porandu ñgua. ¹⁰ Che rivireta, peico catu inungar

Tūpa ñehe mombehusar aracahendar yuvirecoi vahe. Ahe oñemosañ mbahe rasicuer upe yande Yar rer pipe oñehe ãgua yuvireco. ¹¹ Yande rumbo yaicua sovasapri ava oñemosa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparisuereco vahe.

¹² Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iva rer iyavei que ambuae mbahe pe ñehe reroya uca ãgua. Iyacatu rumbo, “Supi eté” peyese, supiño itera; “Aní” peyese, aní chiño itera Tūpa poronupasa pisiēhi ãgua.

¹³ Aviyeteramo que pe pāhu pendar iparaisura oico; toveroqui. Aviyeteramo oimera que sorivete vahe oico; ahe tosapucaí Tūpa upe.

¹⁴ Aviyeteramo que ava imbaheasira oico, toñehe evocoiyase Jesús reroyasar rãrosar upe. Ahē tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyerouquise oyeroyasa pipe sese yuvireco, imbaheasi vahe evocoiyase ocuerara; yande Yar avei omopuhara. Acoi angaipa virecose, oime aveira ñerosa chupe. ¹⁶ Sese pemombehu pe angaipa peyeupe, peyeroqui avei peyese pe yembogüera tupri uca ãgua. Ava aviye vahe oyerouquise oquerēhisave opacatu güecocuer pipe, ahe iyeroquisa ipiratá ité. ¹⁷ Acoi Tūpa ñehe mombehusar Elías yande nungar avei. Ahe oporandu oyerouquisa pipe Tūpa upe, “Toqui eme” ehi. Aipo ehise, ndoqui eté ivi harive mbosapri araviter imombitesa rupi. ¹⁸ Ipare oyerouqui iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pāhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocuerai sui, oipisiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembi-poravo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água 'imoatiropri toyuvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu. ⁴ Ipipe sui avei Tüpa oipisi ucara pëu pe mombaheisa ivave yapocatupri nocañhi vaherã, ndituyui vaherã iyavei ndopai vaherã ité. ⁵ Pe peyeroya ité Tüpa rese. Sese niha ahe opíratasa pipe pe repi mbahe tēi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyemboviahareteño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pñha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañhi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatu vahe ahe imombehu. ⁹ Esepia niha, pesupiti pe remiaro poropisirosa apirēhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropisirosa resendar yuvireco ‘¿mara ehi eté pñha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. ¹¹ Cristo Espiritu senondeve oicua uca mbahe Tüpa ñehe mombehusar upe aipo ehi: “Poropisirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pñha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. ¹² Tüpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cūrítei, Espiritu Santo píratasa pipe imboupri iva pendar yandeu. ¡Tüpa rembiguai avei oicua tupri pota tēi cūrítei yuvireco viña!

Tüpa yande poravo yande reco maranehi água

¹³ Sese pe pihañemoñeta tuprisa pipe pemahemoha tuprira peyese Tüpa porovasasa pëu ombou vaherã rese pe yeroya catu água acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe

pe remimbotarai pīpe, acoi pereco vahecuer peyese Tūpa recocuer cuaēhi vīteseve. ¹⁵ Peicora rumo pe reco maranehisa pīpe ité. Esepia, Tūpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pīpe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoaviratīi chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pīpe peico vītese. ¹⁸ Esepia, Tūpa pe pīsiro aracahendar pe ramoī suindar aracuasa ēgūe ehi tēi vahe sui. Peicua tupri ité niha co poropīsīrosa repri nimboepisai eté que mbahe ocañi tēi vahe rāi pīpe inungar oro, anise guarepochira viña. ¹⁹ Imboepisa rumo Cristo ruvī maranehi pīpe. Ahe seropovēhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoēhi vīteseve ēgūe ehi vahe rā. Cūrītei rumo oyemboyecua pēu mbahe tupri āgua. ²¹ Secocuer sui niha peroya Tūpa peico, ahe ombogūerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipīpe sui peyeroya Tūpa rese iyavei pesāro co mbahe aviye vahe pīsi āgua ichui.

²² Cūrītei Tūpa Ñehengagūer supi tupri vahe mboyeroyasa pīpe imoatīrosa pe recocuer pesaisu vahe rā ambuae Jesús reroyasareta. Evocoiyase ēgūe peyera peyeaisu catu opacatu pe pīhañemoñeta tupri pīpe, iyavei opacatu pe pīratasa pīpe. ²³ Pe niha pereco tecovesa pīasu, ndaheī pe yesupa omano tēi vahe suindar. Ahe rumo Tūpa Ñehengagūer supi tupri apirēhi vahe reroya pīpe. ²⁴ Esepia, icuachiapri aracahendar pīpe aipo ehi: “Opacatu ava inungar caha, iyemboeteisa evocoiyase inungar ipotri. Ipāre ahe caha opa omano, ipotri avei opa oviapi;

²⁵ Tūpa Ñehengagūer rumo apirēhi vahe rā ité yepi” ehi. Ahe co ñehesa imombehupri poropīsīrosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pītanimi ocuacua āgua oipota cambi; ēgūe peye aveira pe querēhisa pīpe Tūpa Ñehengagūer rese pe yembohe catu iri āgua, peico tupri āgua poropīsīrosa pīpe, ³ que peicua itese yande Yar reco avīyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo ovīroīroño yuvireco. Tūpa rumo ahe ita oiporavo aviye catu vahe.

⁵ ēgūe ehira pe rereco oyeupe inungar ita ndopai vahe; ipīpe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoiyase Jesucristo rembiapo pīpe sui peyapora Espīritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pīpe aipo ehi:

“Che amondo ñepeī ita nungar ava aviye vahe tecua Sión ve imovīracua āgua. Ahe che rembiporavo iporañete vahe, imboeteipri.

Acoi oyeroyá vahe sese, ahe nochī chīetera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboavīyesa co ñehesa aipo ehi vahe:

“Oī aposar rumo vīroīroño co ita yuvireco.

Ahe ita rumo coiye v̄iracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco p̄ratasa mombehu āgua peico. Esepia, ahe pe renose p̄tumimbisa nungar pe recocuerai sui tesapesa aviye vahe pipe pe reique āgua. ¹⁰ Yipindar ndahe v̄itei eté Tūpa upendar ava peico, cūrītei rumo ahe ité peico; yipindar ndaperecoi Tūpa poroparaisuerecosa, cūrītei rumo pereco ité cute.

Peico catu Tūpa mboetei āgua

¹¹ Che r̄ivireta, che rembiaisu, peico raimi tēi vahe co ivi pipe, pepoi opacatu co ivi pipendar pe p̄ihañemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua v̄itei vahe rovaque. Yepe ava remieroiro peico inungar-ra mbahe tēi aposar viña, osepīase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar r̄ārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe r̄ivireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco p̄rai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tupri pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyev̄i eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ivi vahe oicua chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ivisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūrītei rumo peyevi Cristo upe. Ahe pe recocuer osāro cūrītei inungar ovesa r̄ārosar.

3

¿Mara ehira ava omenda vahe recocuer yuvireco?

1-2 Ëgüe peye aveira cuña, pemboyeroya itera pe mer. Esepia, amove ndoviroya vitei Tüpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehi chira chupe viña. ³ Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiëhisa pipe. Evocoi nungar aviye catu ité Tüpa rovaque. ⁵ Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tüpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyehisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tüpa omboura güeco tuprisa pipe tecovesa apirëhi vahe oyoya voi pëu. Ëgüe peyese, Tüpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeï oñemu vahe. Oyoya tupri mbahe tapeyandu. Peyeaïsu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pëu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo ägua niha Tüpa pe poravo ‘toipisi che porovasasa’ oyapave. ¹⁰ Esepia, “Peipotase pe recocuer aviye tupri ägua pe yemboviharetesa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe. Peseca teco tuprisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerëhise mbahe aviye vahe apo. ¹⁴ Preparaisuse rumo mbahe pe rembiapo aviye vahesa rese, ¡sovasapri peico! Peyemboisiquiyei rene que ava sui. ¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiario rese oporanduse pëu pe querëhisa pipe imombehu tupri ägua. ¹⁶ Ëgüe peyera rumo pe reco mbegüesa pipe imboeteisave. Peico tupriira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tüpa oipotase pe yemombaraisu, aviye catu mbahe aviye vahe apo pipe yepi mbahe tēi apo rägüer sui. ¹⁸ Esepia niha, Cristo teieté omano yande angaipä repirã ñepeï reseve. Güeco maranehi pipe ëgüe ehi ava recocuerai rese opacatu pe reraso ägua Vu Tüpa upe. Ahe omano güete rese. Ipäre rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tüpa remimbotar ava hä soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tüpa osãro güeco mbegüesa pipe secocuer moingatu ägua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. ²¹ Ahe i osãhangapo i

poroãpiramosa, ahe omboyecua yande ipĩsiprori yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tũpa upe, yande pihañemoñetasa moatiro ãgua. Ipipe sui evocoiyase yañepisiora yande Yar Jesucristo cuerayevisa pipe. ²² Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipĩrata vahe avei ipovri pendar yuvirecoi.

4

Yandehañeco yandeyese mbahecuasa Tũpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoiyase peyemoin-gatu voi ãgüe peye vaherã peico chupe nara. Esepia, acoi ava oyemombarara vahe güete pipe oseya angaipa yuvireco. ² Ipipe sui ndoyuvireco iri chira ari rupi ava tẽi pihañemoñetasa pipe. Tũpa remimbotar rupi etẽ rumo oyapo pota mbahe co ivi pipe yuvirecoi vitesẽ. ³ ãgüe peye pucu rane niha pe rembiapo ai pipe peico ava Tũpa reroyasarẽhi recocuer nungar rupi tupri. Ahese mbahe-mbahe tẽi peyapo pe pihañemoñeta raisa pipe, savaiposa, pietasave pe rãse tẽi pipe pe aracuasa pemocañi pe ihu tẽisa pipe, pemboetei avei mbahe rahanga tẽi peico. ⁴ Cũritei rumo pe mboriparer, ndoyembovĩhai tẽi pe rese, ndapeico irise supi semimbotarai apo ãgua. Ahe oñehe-ñehe tẽi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoin-gatu opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa piĩsiora resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño itẽ pe yeroya tupriisa pipe. ⁸ Co catu opacatu tupri itẽ peyeaisura pe piha pipe. Esepia, ãgüe yahera poroaisusa pipe yande ñero vaira seta ava yangaipa vahe upe. ⁹ Peipisi tupri ava yuviraso vahe pe rẽtave; “¿Mbahe rese piha co ou?” peyei rene pe pihañemoñeta pipe pe pĩri ou vahe upe. ¹⁰ Ñepeipei yande yaiporura Tũpa suindar mbahecuasa yareco vahe ambuae Jesús reroyasar rese hañeco tupri ãgua. Yaiporu tupriira co Tũpa porovasasa setã vahe yande cuaita mboaviye tupri ãgua. ¹¹ Acoi pemombehuse Tũpa suindar mbahe, pemombehura inungar iñehe itẽ; acoi peporopĩtivii potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapo ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupendar itẽ imboeteisa iyavei imborerecuasa. ãgüe tehi apirẽhi vaherã itẽ.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tẽi yande recoãhasa pẽu ‘ndoyavii, ndipoi chietera evocoi nungar mbahe cheu viña’ pe hesa pipe. ¹³ Yayembovĩhareteñora rumo ipipe. Esepia, yande rereco yande Yar yemombaraisu agũer nungar pipe yuvireco. Evocoiyase yayembovĩharete itera acoi yande Yar oyevisẽ güeco pĩratasa pipe. ¹⁴ Iñehe marase yuvireco pẽu Cristo reroyasar pe recosa rese, sovasapri peico. Esepia, Tũpa Espĩritu güeco porañetesa pipe secõi etẽ pe rese. ¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tẽi aposa rese. Ndahei chiaveira que ambuae ava mbahe rese iñemañeco tẽisa sui ãgüe ehira serecosa. ¹⁶ Co

rumo acoi peparaisuse Cristo reroyasar pe recosa pipe, ndapechī chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe. ¹⁸ Yavaise seco catupri vahe upe iñepisiro āgua, ħmara ehira pīha ava ndaseco pōrai vahe ava angaipa viyar yuvirecoi vahe upe? ¹⁹ Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, Ēgüe ahe aveira acoi yande Yar oyevise curi.

² Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. ³ Ndapeicoi chirā pe remiaro upe inungar que mborerecuar güeco ivatesa pipe oporocuai pīrata vahe. Pemboyecua rumo pe recocuer aviye vahe chupe imbohesa tupri pipe. ⁴ Evocoyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pīratasa povrive. Evocoyase pe reco mboivatara curi. ⁷ Opatatu mbahe rese pe pīhañemoñeta atisa pemombehura Tūpa upe. Esepia, ahe pe rārosar ité secoi.

⁸ Pearacua cañi rene peyesui, pemahemoha ari rupi peyese. Esepia, pe amotarēhimbar Carugar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yandē rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tupri, iyavei pe reco moviracuara, pe momirata aveira pe yepipi iriēhi āgua ichui. Ahe niha oporovasasa pipe yande poravo oyeupe nara, yande yaso vahe rā supi teco ori ndopai vahesave yande Yar rese yande recosa pipe. ¹¹ Ēgüe tehi tasecoi güeco pīratasa apirēhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pītiviisa pipe co ayapo imondo che rembicuachia ndipucuimi vahe pe mboaracua catu āgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pēu. Marcos, che rahir

nungar avei imahenduha pe rese. ¹⁴Peyeovaupite “avirave” apo pe yeaisusa pipe.
Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroysar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi. ² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroysar recocuer

³ Tüpa ombou güeco pírata pipe opacatu mbahe ipane vahe yande recove água, sese yande pihanemoñeta catu água avei yande secocuer cua tupri pipe. Ahe yande poravo güeco porañetesá pipe, güembiapo porañete vahe pipe avei. ⁴ Ipipe avei oseya oñehe imboaviyepirã yandeu; ahe ñehe ãgüe ndehi tã vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepipi água mbahe tã sui. Ahe acoi oime vahe co ñvi pipe ava remimbotar tã sui. ⁵ Sese pe peyeroya vahe Jesús rese, peyemomirata catu aveira peyapo vaheã mbahe aviye vahe. Peseca aveira Tüpa remimbotar cua tupri catu água. ⁶ Iyavei peñearo tuprira. Ipare peñemosañõ aveira mbahe tã upe. Ipipe sui peyemondo tupri catura Tüpa upe. ⁷ Ipare peyeaisura peyeivri nungar pe recosa pipe. Ipipe sui peseca catu vitera ava raisu tupri água.

⁸ Esepia, perecose evocoi nungar mbahe pe recocuer pipe, pembouvicha catuse avei, ahespe pe recocuer ãgüe ndehi tã chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua água iporavopri pe recosave. ãgüe peyese, ndapeviapi chietera mbahe tã pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhãõ itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeyõõ itera revo che recove viteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cõimi che mano água cheu. ¹⁵ Opombohera rumo opacatu che catugüer rupi co tecocuer rese che manore pe mahenduha água.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pírataresa resendar, iyevi ñri água resendar avei, ndahei oreyesui tã. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tüpa omboeteise Guahir iyavei omondose chupe seco porañete ñri água aipo ehise oñehe güeco porañetesá pipe: “Co che Rahir, che rembiaisui ité, sese niha che ayemoviharete vichico” ehise. ¹⁸ Ore ité niha aipo ñehesa orosendu iva suindar orohocose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tüpa ñehe mombehugar remimombehugüer supi tupri vahe Cristo resendar. Iya ité pëu pe yapisaca tupri água sese; inungar que tataendi pítusave osesape vahe oico acoi osëse

voi cõhe rerusar yasitata guasu ou, ãgũe ehi co ñehesa pe piha pipe sesape. ²⁰ Peicua catu co mbahe, co ñehesa aracahendar icuachiapri Tũpa suindar ité, ndahei yandeyesui tẽi yaicua imombehu ãgua. ²¹ Esepia, ndahei ñehese mombehusar oyesui tẽi omombehu yuvireco. Ahe rumo ava seco catupri vahe ité. Tũpa ité omombehu uca oñehese chupe Espĩritu Santo pĩratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tẽi vahe Israel ivi rupi. Oime aveira niha pe pãhufe co nungar oporombopa tẽi vahe yuvireco. Ahe ñemisa pipe oporombohera co coti tẽi vahe ava reco momara tẽi ãgua; evocoiya güeco pipe oicuaçuõra oyar opĩsĩrosar. Co rumo güecocuer momba pihaivi ãgua tẽi ãgũe ehira yuvireco. ² Setá ava oguatara secocuerai rupi. Ipipe sui ambuae ava oñehese rai tẽira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti tẽi vahe rese. Icañi rumo oimeño itera yuvireco chupe. Yipĩsuive ité niha ahe imocañipirã yuvirecoi.

⁴ Esepia, aracahe Tũpa niñeroi eté güembigui oyemboangaipa vahe upe. Ahe opa ité omondo mbahe tẽisave. ãgũe ehi seyapa pĩtumimbisave, inungar ñapichimbri carena pipe yapocatupri yuvireco cañisave nara. ⁵ Iyavei acoi Tũpa niñeroi avei ava aracahendar ndaseco põrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipĩsĩro. ⁶ Iyavei opa omocañi tata pipe tecua Sodoma, Gomorra avei; ãgũe ehi imbotanĩmbu tupri 'na ahe aveira niha ambuae ava che reroyaẽhisar upe curi' ohesave. ⁷ Lot güeraño rumo ahese oipĩsĩro. Ahe mbia aviye vahe secocuer; ndoyembovihai tẽi ambuae ava recocuer mbahe-mbahe tẽi yuvirecoi vahe repiase.

⁸ Co mbia aviye vahe secoise ahe ava pãhufe ari rupi, tasi tẽi ipihañemoñeta pipe osepiase, osenduse avei mbahe tẽi yuvirecoi vahe rembiapo. ⁹ Indó, yande Yar oicua viroyasar renose ãgua mbahe tẽi sui; oicua avei mbahe tẽi pipe yuvirecoi vahe rereco imombaraisu ãgua ari cañise curi. ¹⁰ Tũpa omombaraisu catu itera acoi ndopoi vahe güemimbotarai sui, viroĩro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeehisa pipe oñehese rai vahe seco ivate, ipĩrata vahe rese. ¹¹ Tũpa rembigui eta iva pendar rumo yepe ipĩrata catu vahe, omborerecuasa vireco catu vahe avei yuvireco viña, niñehese-ñehese tẽi rumo Yar rovai yuvireco sese.

¹² Co ava mbahe mĩmba nungar tẽi ndovirecoimi eté opihañemoñetasa yuvireco. Opoco voĩño tẽi mbahe rese; evocoi nungar yuviroha yucapirã tẽi eté. Ahe oñehese rai tẽi vahe mbahe güemienducuaẽhi rese. Mbahe mĩmba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tẽi, "Yayemboviha mbahe yande rembiapo ai rese" ehi tẽi eté yuvireco viña. ¡Oporomochi pipe tẽi rumo yuvirecoi, yuvirasose pe pietasave pe pĩri, güeco rai reseve oyemboviha oporombopasa tẽi pipe yuvireco!

¹⁴ Osepiase cuña, oipota voĩño tẽi; ndaporambai avei iyemboangaipasa chupe. "Yayapoño mbahe" ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca ãgua oyeupe yuvireco.

Ava ocañi tēi vaherā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuañhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara. ¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. ²⁰ Esepia, acoi oicua vahe yande Yar, yande Pīsirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña. ²² Supi tupri ité yaviye ñehesa sesendar: “Cave rumo ohu iri ogüehē. Iyavei cuchí oyasu pare, oyevi iri tuyuve oyemboavaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe.

² Peyemomahenduha arachendar Tūpa ñehe mombehusar seco catupri vahe ñhengagüer rese, yande Yar Poropīsirosar porocuaita rese avei acoi apóstol pe mbohe vahecuer yuvireco.

³ Peicua ranera co ari imombeupri ipa vahe virovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombeupri ou vaherā curi? Esepia, yande ramoi opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co arachendar rese. Esepia, Tūpa oyapo oñehe pipe ivi, ivi avei, ahe ivi osē vahe i sui, i pāhuve avei secói. ⁶ Coiye i pipe avei opa omocañi ivi, ombouse amarusu aracahe. ⁷ Cūríteindar rumo iva, ivi imoingatupri tata uve nara Tūpa porocuaita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepi ari inungar mil araviter; mil araviter evocoyase inungar ñepi arimi tēi chupe. ⁹ Esepia, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepi yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pītu pipe yepi. Ahese iva ocañi tupri tēira viapugüer ipirata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaheṛā. Sese, ¡peyemoviracuaño itera pe reco maranehisa rese Tūpa rese pe pihañemoñetasa pipe! ¹² Pesāroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tuprira curi. ¹³ Yande rumo yasāro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesāro viteseve co tecocuer, ēgüe peyera opacatu peicatugüer rupi pe reco tupri āgua pe angaipaēhi pipe, pēu Tūpa, “Peyavi mbahe” ehiēhi āgua. ¹⁵ Tapeicua co: yande Yar seco mbegüe yandeu yande piširo āgua. Ēgüe ehi avei yande rembiaisu Pablo icuachía oyeupe Tūpa ombou vahe mbahecuasa pipe pēu. ¹⁶ Opacatu ocuachiar pipe omombehu evocoi nungar mbahe pēu, yepe amove yavai senducua āgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tūpa rese pe recocuer yemoviracuasa sui pe yepepiēhi āgua. ¹⁸ Peicua tupri catura rumo yande Yar Poropisirosar Jesucristo iyavei peicoveño itera iporovasasa pipe. ¡Ēgüe tehi imboeteipri tasecoi cūritei apirēhi vaheṛā! Aipo rupive che ñehé pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive seci vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehesa tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese seci vahe oyemboyecua vahe oreu. ³ Oromombehu co orosepia vahe, orosendu vahe ñepe vahe nungar pe reco ägua ore rese inungar ore oroico yande Ru Tüpa rese, Tahir Jesucristo rese avei. ⁴ Evocoyase cüritei oroicuachia evocoi mbahe pëu yande yemboviharete catu ägua.

Tüpa tesapesa seci

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa seci; ndipoi eté pütumimbisa sese. ⁶ “Che aico tupri Tüpa rese” yahese, yaicoño rumo angaipa pipe, ahe inungar pütumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tüpa seci tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamobehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ïvi vahe. ¹⁰ Iyavei, “Che ndacheangaipai eté” yahe tupri tēise yaico, evocoyase Tüpa semirañete ai vahe nungar yareco. Ipipe ndayaroyai iñhengagüer.

2

Jesucristo yande reco moingatusar

¹ Che rahireta, co aicuachia pëu pe angaipaēhi ägua. Que revo ava oime oyemboangaipa vahe pe pãhuve, yareco rumo yande Pitiñisar yande Ru rovai. Ahe Jesucristo, seco ïvi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ägua yande sui.

³ Acoi yayapo tuprise Tüpa porocuita, ahese supi eté yaicua Tüpa. ⁴ Oime amove ava “che aicua Tüpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboaviyese iñhengagüer, ahese supi eté yasaisu Tüpa. Ipipe sui yaicua yande reco tupri Jesucristo rese. ⁶ Acoi “aico tupri Tüpa rese” ehi vahe, ahe secoira Jesucristo nungar.

Mborocuita ipiasu vahe resendar

⁷ Iyavei, che rivireta, ndaicuachiai mborocuita ambuae ipiasu vahe pëu. Aheño ité mborocuita pereco vahe yipisuive. Ahe acoi yipindar pesendu vahe. ⁸ Co aicuachia vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pütumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tūpa reroyasar. Evocoi nungar recocuer pītumimbisave tēi vite. ¹⁰ Acoi osaisu vahe ambuae omboetasa Tūpa reroyasar, ahe seci tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pītumimbisa pipe tēi seci, ndoicuai avei que rupi güecocuer virecora. Esepia, pītumimbi vahe nomboesapiso.

¹² Che rahireta, co aicuachía pēu nara. Esepia, Tūpa iñero pe angaipa rese pēu Jesucristo recocuer pipe. ¹³ Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pēu, mbia chīhivahe. Esepia, pesecopi Carugar. ¹⁴ Iyavei pe tahireta aicuachía opacatu pēu. Esepia, peicua vahe niha yande Ru Tūpa. Aicuachía avei pēu, pe iyepupa. Esepia, peicua yipisuive oicove vahe. Aicuachía avei pēu, mbia chīhivahe. Esepia, peyemoviracua etepri, peipisi avei Tūpa Ñehengagüer pe piha pipe. Ipape pesecopi Carugar.

¹⁵ Evocoiyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaherā ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūrteit setá oyemboyecua yamotarēhimbar yuvireco. Sese yaicua ari ipa vahe yepota āgua. ¹⁹ Ahe oyepipi yande pāhu sui; ndahei eté rumo yande rivri yuvireco Tūpa rese. Esepia, acoi yande rivri itese, ahese opitara yande piri yuvireco viña. Ēgüe ehi oyecua ndahei opacatu yande rivri yuvirecoi.

²⁰ Cristo omondo Espíritu Santo pēu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira. ²² Acoi “Jesús ndahei Poropisiosar imboupi” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Ēgüe peyese, ahese peico tuprira Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pēu. ²⁷ Pe pereco Espíritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espíritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherā sese yande yeroyasa. Acoi ogüeyise iva sui curi, ahese nayachī chietera sovai ichui. ²⁹ Pe niha peicua Jesucristo seco ivi vahe. Iya peicua avei opacatu oyapo vahe mbahe ihivi vahe, ahe Tūpa rahir ité yuvirecoi.

3

Tüpa rahir yuvirecoi vahe

¹ Mara ehi rutei Tüpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tüpa, ndoicatuí eté yande recocuer cua água. Esepia, ndoicuai Tüpa recocuer yuvireco. ² Che rivireta, yaico ité Tüpa rahir. Yande rumo ndayaicua tupri vitei yande reco água ipare. Cüritei rumo co mbahe yaicua: acoi oyemboyecuae Jesucristo, yaicora inungar. Esepia, yasepia itera opacatu seco reseve. ³ Iyavei opacatu osãro vahe Jesucristo yuvireco, oyepepiño ité opacatu angaipa sui güeco catupri água, inungar ahe secoi.

⁴ Opacatu ava oyemboangaipa vahe, ahe oyavi Tüpa porocuita. Esepia, angaipa Tüpa porocuita mboaviyeéhisa yepi. ⁵ Pe rumo peicua Jesucristo ou co ivi pipe yande angaipagüer mocañi água. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tüpa Rahir Carugar rembiapo mocañipa água.

⁹ Opacatu yuvirecoi vahe Tüpa rese ndoyapoi angaipa. Esepia, ahe vireco ité Tüpa recocuer oyese yuvireco. Sese ndoicatu iri angaipa apo água yuvireco. Esepia, ahe Tüpa rahir ité yuvirecoi. ¹⁰ Icuapri ité Tüpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tüpa reroyasar, ahe ndahei eté Tüpa rahir yuvirecoi.

Yayeaicura ñepi-pei yande yacatu

¹¹ Co niha ñehesa, acoi pesendu vahe yipisuive, ahe co yayeaicura ñepi-pei. ¹² Ndayaicoi chira inungar Caín, ahe Carugar remimbohe oyuca vivri. ¿Mahera pñha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tüpa ndoicuai vahe pe roeroïrose yuvireco. ¹⁴ Yande rumo yaicua aracacondar yande hã cañi tēi agüer. Cüritei rumo yasē evocoi nungar sui tecovesa apirēhi vahe pipe yande reco água. Esepia, yande niha yasaisu yande rivireta Tüpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei egüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tüpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tüpa rovai

¹⁹⁻²⁰ Egüe yahese, yande yaicua yande recocuer supi eté vahe pipe yaico. Acoi, “Ndahei revo Tüpa rahir aico” yahese, ahese Tüpa rovaque yayemomahenduhara evocoi nungar rese: “Tüpa niha tuvichá catu yande pñhañemoñetasu sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande piha pipe yande reco tupri Tüpa rese, ahese

yayeroyaño itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaíta iyavei yayapo semimbotar yaico. ²³ Co ité iporocuaíta: yaroyara Tahír Jesucristo iyavei yayeaisura ñepeí-peí Tūpa yande cuaisa rupí tuprí. ²⁴ Acoi yaroyase iporocuaíta, ahesé yaicora Tūpa rese; ahe avei secoira yande rese. Iyavei ahe ombou Espíritu yandeu. Ichui yaicua Tūpa secoi yande rese.

4

Espíritu Tūpa suindar iyavei espíritu Cristo amotarēhimbar

¹ Che rahireta, aní chira peroya opacatu “Espíritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espíritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espíritu Tūpa suindar ité. ³ Acoi aipo ndehi vahe rumo, ndovirecoi eté Espíritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherā resendar. Ahe cūrítei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espíritu secoi vahe pe rese, ahe ipírata catu Carugarar sui. ⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca ñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahír, ahe yande ñehe ndosendu potai yuvireco. Sese yande yaicuara vireco vahe Espíritu supí eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisú, yayeaisu ñepeí-peí. Esepia, yeaisusa Tūpa suindar. Opacatu osaisu vahe ava, ahe Tūpa rahír, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi. ⁹ Ēgüe ehi omboyecua oporoaisusa yandeu. Ahe niha, ombou Guahír ñepeí vahe co ivi pipe ichui yande recove āgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahír imano āgua yande angaipa repirā. Ahe niha poroaisusa supí eté vahe.

¹¹ Che rivireta, che rembiaisú, ēgüe ehi Tūpa yande raisu. Evocoyase ēgüe vahe aveira yande yayeaisu ñepeí-peí yepí. ¹² Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoyase oime ité yande rese. ¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahír ava ivi pipendar pīsiro āgua. ¹⁵ Acoi ava “Jesús niha Tūpa Rahír” ehi vahe, ahe secoi eté Tūpa rese; Tūpa evocoyase secoi sese.

¹⁶ Ēgüe vahe icua, seroya tuprí āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ēgüe vahe Tūpa poroaisusa mboaviye tuprí ichui yande siquiyēhi āgua acoi oyepotase ari cañi yandeu. Esepia, yande yaico co ivi pipe inungar Jesucristo. ¹⁸ Yasaisu tuprí itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprí eté.

19 Yipindar Tūpa yande raisu. Sese cūrítei yande avei yasaisu Tūpa.
 20 Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatuī Tūpa ndayasepiaī vahe raisu āgua. 21 Jesucristo ombou co porocuita yandeu: acoi osaisu vahe Tūpa, tosaīsu avei omboetasa seroyasar yuvireco.

5

Yande mbahe-mbahe tēi co ivi pīpendar recopisa

1 Opacatu viroya vahe Jesús Tūpa Rembiporavo Poropīsīrosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco.
 2 Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe. 3 Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua. 4 Esepia, opacatu Tūpa rahir yuvirecoi vahe osecoī mbahe-mbahe tēi ivi pīpendar Cristo rese yeroyasa pīpe yuvireco. 5 Acoi oyeroya vahe Jesucristo Tūpa Rahir secosa rese, ahe oicatu co ivi pīpendar mbahe-mbahe tēi recopī āgua yuvireco.

Tūpa rahir recocuer resendar ñehesa

6 Co Jesucristo yusa icuasa i pīpe ñapiramombrise: ndahei i reseño, suvī rese avei icuasa. Espīritu avei oseco mombehu. Esepia, ahe omombehu mbahe supī eté vahe yepī. 7 Evocoyase oīme mbosapī imboyecuar: 8 Espīritu, i, iyavei suvī. Ahe mbosapī oyoya tuprī. 9 Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. 10 Acoi viroya vahe Tūpa Rahir vireco ité ahe semimombehu opīha pīpe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. 11 Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi. 12 Acoi oipīsī vahe Tūpa Rahir opīha pīpe, ahe vireco avei co tecovesa. Acoi ndoipīsī vahe rumo, ndovirecoi eté tecovesa oyese.

Poromboaracuasa ipa vahe

13 Co aicuachía pēu, pe pereco vahe Tūpa Rahir, peicua āgua pe supī eté pereco tecovesa apirēhi.

14 Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu. 15 Evocoyase yaicua ahe osendu yandé yeruresa, yaicua avei mbahe yande porandusa ombou vahe ā yandeu.

16 Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyeroquirā sese. Evocoyase Tūpa omondora secove āgua chupe. Oīme rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. 17 Opacatu mbahe-mbahe tēi ahe angaipa. Oīme rumo angaipa ndayande rerasoi vahe manosave.

18 Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. 19 Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povrī pendar tēi yuvirecoi. 20 Iyavei yaicua Tūpa Rahir ogüeru oaracuasa yandeu Tūpa supī eté vahe cua āgua iyavei yaico co supī eté vahe rese. Ahe niha Tahir Jesucristo, ahe avei Tūpa supī eté vahe iyavei tecovesa apirēhi vahe.

²¹ Che rahireta, peñearo tupri tũpa angahu tẽi sui. Aipo rupive co che ñehesa amombehu pẽu.

IMOÑUVĪRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuairi, aicuachía co che ñehe pëu pe Tüpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. ³ Yande Ru Tüpa, yande Yar Jesucristo, Tüpa Rahir, tombou oporovasasa, oporoparaisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuier aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tüpa porocuita yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. ⁶ Co yande yeaisusa, yande guata tupri ãgua Tüpa porocuita rupi. Co Tüpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviqui repri mocañi tēiēhi ãgua. Tapeipisi catu opacatu Tüpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tüpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tüpa, Tahir avei oyese. ¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

¹³ Iyavei Tüpa rembiporavo oñemonuha vahe cohava opacatu omondo omahenduhasa yuvireco pëu. Aipo rupive co che ñehesa amondo pëu.

IMOMBOSAPI SA JUAN REMBICUACHIA SAN JUAN

Gayo recocuer aviye vahe resendar

¹ Che, icuai pri, aicuachía co che ñehe ndeu, che mboripar, che rembiaisu, Gayo. Che supí eté oroaisu yepi.

² Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo ɛme mbaherasisa ndeu. ³ Che aviharete asenduse yande rivri ñehe nde recocuer resendar yugüeruse cohawe. Ahe aipo ehi yuvireco cheu: “Evocoi Gayo oyemoviracua tupri mbahe supí eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supí eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhaseve opacatu nde poroaisusa resendar yuvireco oreu. Eyapo catu mbahe icatupri vahe; eipitivií catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitivií āgua yuvireco ava Tūpa reroyasarēhi sui. ⁸ Sese yande ēgüe yahera yaico evocoi nungar upe ñehesa supí eté vahe rese ipitivií āgua.

Diótréfes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótréfes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoiyase asose eipeve, amboaracua opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisí potai avei güetave yande rivireta oyepota vahe. Iyavei ndoipotai ambuae upe ipisí āgua sētave. Acoi oipisise, omombo voñño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supí eté aipo ehi; aipo avei ore oromombehu. Pe niha peicuaño ore oromombehu mbahe supí eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeí-peí yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rıvri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. ² Tüpa tombou catu pëu pe paraisuerecosa pe reco tupri água pe raisusa pipe.

Oporombohe vahe ava mbopa tēi água resendar

³ Che rivireta, che rembiaisu, yipindar chepihañemoñeta ité yande pīsirosa resendar cuachía água pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu água yembohesa yaroya vahe rese. Ahe yembohesa yaroya vahe ñepeı reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuvıroique mbegüe angahu pe pãhuve. Aracahe suive rumo Tüpa Ñhengagüer icuachiapri pipe omombehu evocoi nungar ava imocañisa tēira yuvıreco. Ahe ava ndaseco pōrai vahe, “Tüpa avıye ité, ndoyapoı chietera mbahe yandeu” ehi tiēte yuvıreco. Sese oyapoño mbahe tēi. Iyaveı, “Jesucristo ndahei yande Rerecuar” ehiño tēi vahe yande Yar ñepeı vahe upe yuvıreco.

⁵ Che opomomahenduha pota iri acoı peicua tupri vahe rese. Yipindar yande Yar Tüpa vinose yande ramoı eta Egipto sui. Ipare rumo opa omocañi viroyasarēhi. ⁶ Inungar aveı Tüpa rembiguai yipindar vahe yuvırecoı, nomboavıyeı vahe ocuaita. Ipipe sui Tüpa osoquenda pıtumimbi ndopai vahesave ari cañise nara.

⁷ Iyaveı ava Sodoma pendar, Gomorra pendar iyaveı ahe tecua ivirindar aveı inungar acoı Tüpa rembiguai oyemondo mbahe tēi pipe, ahe aveı oyemondo vahe oyemboaguasa-guasa tēi água yuvıreco. Iyaveı cuimbahe, cuimbahe rese; cuña, cuña rese no. Ipipe sui oıporara tata guasu apırēhi vahe yuvıreco. Ahe opıta opacatu yande yembosiquıye água.

⁸ Ēgüe ehi aveı niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyaveı ndovıroyai vahe yande Yar mborererecuasa. Ahe aveı oñehe-ñehe tēi vahe ıva pendar rese yuvıreco. ⁹ Aracahe Tüpa rembiguai ıvate vahe Miguel oyepoepı-epı Carugar rese yuvıreco Moısés retecuer rese. Yepe ahe Tüpa rembiguai rerecuar viña, ndıyai rumo chupe iñehe mara água Carugar upe. Evocoyase aıpo ehi chupe: “ıTüpa oıcuara co rese ndeu!” ehiño. ¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvıreco. Iyaveı co mbahe oıcuva vahē oyesui tēi inungar mbahe mimba ndıpihañemoñetaı vahe oyesui tēi imbahecua, ahe oıporu yuvıreco oyemocañi água tēi.

¹¹ ıparaisu yuvıreco! Caın recocuer rupı tupri aveı oyapo mbahe yuvıreco. Inungar Balaam guarepochı pota raisave tēi oyavı güeco yuvıreco. Inungar Coré omano oporeroyaēhısa pipe.

¹² Pe peñemonuhase pe yėaisusa pipe pe caru água, ahese ahe aveı yuvıroique pe pãhuve; noyuvınochı eté ocaru água pe pıri. Ndapeıcuai rumo ahe pe recocuer monguiha água tēi yuvıroique vahe pe pãhuve. Evocoi inungar ovesa rãrosar oyese tēi ihañeco vahe yuvıreco. Iyaveı ahe inungar

iva quiha ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri. ¹³ Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pītumimbisave, Ēgüe ehi aveira ava Tūpa sui oyepepi vahe pītumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. ¹⁶ Ahe mbia niha oporoviñiro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co arí cañi renonde oimera ava viroiro ai vahe Tūpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espíritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espíritu Santo pe rãrosa pipe. ²¹ Peñearo tupri Tūpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu. ²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeí yangaipa pipe pe viapiēhi ãgua.

Tūpa mboetei tupriisa

²⁴⁻²⁵ Tūpa yande Písirosar ñepeí vahe vireco pīratasa pe rãro angaipa pipe pe viapiēhi ãgua. Ahe avei pe rerecora güecocuer porañetesave pe reco angaipaēhisa pipe. Ichui peicora pe viharetesa pipe. Ahe imboeteipri tasecoi. Ēgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūrítei apirēhi vaherã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu. ² Che supi eté amombehu opacatu mbahe asepia vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvinohai vahe, ⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pīsiro yande angaipa sui vuví pipe, ⁶ iyavei yande rereco mborerecuarā, pahigua avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pipe apirēhi vahe rā!

⁷ ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase. Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. ¹⁰ Acoi yande Yar ari pipe Espíritu povrive aicose, asendu che raquicuei oñehe pīrata vahe aviye acoi mimbí ñehe ¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfía ve, ipa Laodicea ve” ehi cheu.

¹² Che evocoiyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipāhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoiyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoiyase aviye tupri ité tata rendigüer. ¹⁵ Ipi evocoiyase sendi

yai eté, aviye acoi bronce ocai vahe horno pipe, iyavei ifehe ipíratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osê quise pucu saimbe yoya vahe. Sova evocoyase aviye ari rendigüer ipíratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipíndar ité aico, ipandar avei. ¹⁸ Aicove vahe ité; yepe amano viña, cūrítei rumo aicove iri ndopai chivaheṛā ité aico. Che areco che mborerecuasa ava recocuer mocañi āgua. ¹⁹ Sese eicuachía co mbahe eresepia vahe: cūríteindar oime vahe mbahe iyavei mbahe oime vaheṛā curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rārosar upe: ‘Acoi vireco vahe oacato coti siete yasitata, ahe acoi uguata vahe siete vera hi yacatu rupi, aipo ehi imombehu. ² Che aicua opacatu mbahe pe rembiapo, pe poraviqui píratasa iyavei pe yemoviracuasa. Aicua avei ndapeipotai ava naporai vahe pe pāhuve yuvirecoi vaheṛā. Pesecoāha avei ava, ore apóstol oroico, ehi tēi vahe; ipare peicua iporombopa tēisa yuvireco. ³ Che aicua peñemosañi peyemombaraisu peico che raisupave; ndapecueraí eté ipipe. ⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipíndar. ⁵ Sese peyemomahenduha yipíndar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipíndar. Anise ayevira pēu, arocuapara pe vera hi senda sui acoi ndapeyeviise Tūpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi āgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rārosar upe: ‘Acoi yipíndar vahe, ipandar avei; ahe acoi omano vahe viña, ocuer-ayevi iri rumo. Ahe ombou co ñehesa pēu aipo ehi: ⁹ Che aicua pe yemombaraisu va, pe paraisusa avei; pe rumo mbahe yar nungar ité peico íva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Carugar reroyasar tēi evocoi yuvirecoi. ¹⁰ Ndapesiquiyei chira pe paraisu āgua sui. Esepia, Carugar osoquenda ucara amove pe pāhu pendar secoāha āgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahesa amondora porrecosa tecovesa pēu. ¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi avā oyemoviracua vahe mbahe-mbahe tēi apoēhi āgua, ahe imanore ihā ndoiporaraí chira imoñuviriosa manosa pipe, ehi’ erera icuachía chupe.

Ñehesa Pérgamo pendar upe

12 “Eicuachía avei Tüpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe guise pucu saimbe yoya vahe: 13 Che aicua pe recosa. Aheve acoi Carugar uguapi oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoi tecua Carugar recosave. 14 Che rumo aicua mbahe pe resendar: eipeve amove ava ndoyepepi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. 15 Iyavei amove ava pe pāhuve ndoyepepi potai eté nicolaíta porombohesa sui yuvireco. 16 Sese pemboasi pe recocuerai, peyevi Tüpa upe, anise che aso poyava voira pēu, ahe se avavara chupe yuvireco che yuru pipe sui osē vahe guise pucu pipe, ehi. 17 ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuar, ehi’ erera icuachía.

Ñehesa Tiatira pendar upe

18 “Eicuachía avei Tüpa rembiguai Tiatira pendar che reroyasareta rãrosar upe: ‘Tüpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: 19 Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviyē vahe. 20 Oime rumo mbahe pe rembiavi: peñemosañño evocoi cuña Jezabel pe pāhu pendar upe, ahe acoi oñhe tēi angahu vahe Tüpa rese viña. Ahe rumo ombopa tēi oporombohesa pipe che rembiguai iyemboaguasagua tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. 21 Che amondo vite tēi ari chupe, tomboasi oangaipa Tüpa upe oyevi āgua, che yapave viña. Ahe rumo ndopoi potai eté oyemboaguasa tēisa sui. 22 Evocoiyase cūritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. 23 Ipare ayucapara imembri ichui. Ēgüe ehi opacatu che reroyasar oicuar yuvireco che aicua tupri ité opacatu ava pihañemofetasa iyavei ñepeipei pe yacatu amondora pe rembiapogüer repri pēu. 24 Pe rumo opacatu Tiatira pendar ndaperoyai vahe cō porombohe raisa iyavei ndapeyembohehi vahē Carugar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuaíta. 25 Peyemoviracuañora rumo evocoi mbahe pereco vahe rese, acoi che ayevisē voi vitu curi. 26 Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi 27 inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña. 28 Iyavei amondora yasitata cōhe reruser chupe. 29 ¡Acoi ava osendu pota vahe, toyapisacaño Espiritu omombehu vahe rese opacatu che reroyasar yuvirecoi vahe upe! ehi’ erera icuachía.

3

Ñehesa Sardis pendar upe

¹ “Eicuachía avei Tüpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tüpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tüpa upe nara, ehi pëu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tüpa upe. Ndapeyemopoaseise rumo, asora pëu inungar imonda rai vahe, ěgüe ahera vicho pe resapiha. ⁴ Oime rumo amove ava pe pãhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, ěgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! ehi’ erera icuachía.

Ñehesa Filadelfia pendar upe

⁷ “Eicuachía avei Tüpa rembiguai Filadelfia pendar che reroyasareta rãrosar upe: ‘Co seco maranehi vahe, supi tupri vahe ité, vireco vahe mborerecuasa aracadendar mborerecuar guasu David nungar, acoi omboise que oquenda, ñepepe yepe que ava nomboyai chietera; iyavei acoi omboyase, ñepepe yepe que ava nombi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vahe rã che recocuer. Ahē que ñepepe yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehē iyavei ndacheñomi eté ava sui peye. ⁹ Co Caruguar reroyasar semira tēi vahe, ore Tüpa rembiporavo judío orico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaite, peyemoviracua ité evocoi mbahe tēi upe peico. Evocoiyase che opoepira acoi ari tecoãhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tüpa reroyasa pereco vahe rese. Evocoiyase ñepepe yepe que ava ndovirocui chietera Tüpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoiyase inungar-ra che Ru Tüpa rēta vīracuasa ndopai vahe yuvireco. Sese arova ucara che Ru Tüpa rer iyavei che Ru Tüpa recua rer avei no, ahe Jerusalén piasu, evocoi ou vahe rã vahe pendar che Ru Tüpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi’ erera icuachía.

Ñehesa Laodicea pendar upe

¹⁴ “Eicuachía avei Tüpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tüpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei

sacu vahe. I sacu raimi tēi vahe nungar peico pe rembiapo pipe. ¡Ñepeí reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyeviflora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico. ¹⁸ Sese opomboaracua; peseca íva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa gūesa upe nara osareco iri āgua, ēgūe peye aveira. ¹⁹ Che añehe pīrata seco mohiví āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. ²⁰ Esepia, inungar que ava oquenda omotara oquendipive ohā viña, ēgūe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco roeroyi pare, aguapi che Ru ipive vīte. ²² ¡Acoi ava osendu pota vahe, toyapisacaño Espiritu remimombehugūer rese che roroyasareta upe! ehi imombehu pēu' erera icuachía" ehi Jesús cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipīrata vahe mimbí nungar yipīndar oñehe vahe cheu, ahe asendu iri: "Eyeupi ave. Che evocoyase mbahe amboyecuaru ndeu mbahe imboaviyepirā curi" ehi.

² Ahe pipëve voi, Espiritu pīratasa pipe aico iyavei asepia tenda ivave, ahe iharive ñepeí oguapi oī. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuaiipri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco. ⁵ Evocoyase Tūpa renda sui yuvinose overa-verā vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu. ⁶ Evocoi tenda rovai oime avei ndoyavii tupri para guasu tipiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu íva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipīndar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi íva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese gūesa. Ndotuhui eté ari, pītu rupi aipo ehi yuvireco: "¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūriteindar, apirēhi vahe!" ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapi vahe oī tenda harive ndopai vahe upe. ¹⁰ Ēgüe ehise evocoiyase veinticuatro tupri icuaipri yuvirecoi vahe, ahe oñenopiha imboeteisa pipe sovai yuvireco. Ipape osequi oāca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pīratasa rese. Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

5

Ovesami upe güeraño iyacatu cuachiar imboyapri mboi āgua

¹ Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipape asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherā cuachiar pipira sepia āgua viña. ⁴ Evocoiyase che ayasehó iteanga. Esepia, ndipoi eté que ñepe iyepe oime angara aviye vahe cuachiar pipira sepia āgua viña. ⁵ Ahese icuaipri pāhu pendar ñepe aipo ehi cheu: “Ereyaseho iri eme. Esepia niha, evocoi ava yagua pīta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira āgua” ehi.

⁶ Evocoiyase, asepia Tūpa rovai iva pendar irungatu yuvirecove vahe pāhuve, icuaipri yuvirecoi vahe mbiterve, ñepe ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoiyase siete tupri Tūpa espíritu yuvirecoi opacatu ivi rupi imboguatapri. ⁷ Ipape evocoi Ovesami oso, oipisi cuachiar evocoi tenda harive oguapi vahe yacato coti sui; ⁸ ipisi pare, evocoi irungatu yuvirecove vahe, iyavei veinticuatro tupri icuaipri, ahe oñenopiha Ovesami rovai yuvireco. Oyacatu ñepe-pei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa. ⁹ Osapuca i piyasu vahe sapucaisa pipe aipo ehi yuvireco:

“Ndeu iyacatu ité cuachiar pisi āgua, imboyapri mondoro āgua avei no.

Esepia niha, nde yucapri seropovēhepri ereico.

Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepe-pei tecua yacatu rupindar, ivi rupindar avei yuvireco.

¹⁰ Iyavei eremborerecuca uca Tūpa upe nara, erembopahi uca avei no, ipape ahe oporocuirā opacatu ivi rupi yuvireco” ehi osapuca i yuvireco.

¹¹ Ipape asepia, asendu avei Tūpa rembiguai rehi ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi. ¹² Ahe aipo ehi pīratasa yuvireco no: “¡Co Ovesami yucapirer, ahe chupe iyacatu ité mborerecuasa pisi āgua, opacatu Tūpa suindar porerecosa pisi āgua, mbahecuasa, pīratasa, mboyeroyasa, poromboeteisa, iyavei sapucaisa pisi āgua avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pīpendar, ivivri rupindar iyavei para guasu pīpendar, aipo ehi yuvireco: “iToime sapucaisa, Tūpa upendar mboyeroyasa, imboeteisa, iyavei pīratasa, ahe timondosa apirēhi vaheṛā Tūpa acoi güendave oguapī vahe upe, Tahir Ovesami nungar upe avei no!” ehi.

¹⁴ Evocoi irungatu va yuvirecove vahe, “jĒgüe tehi eté!” ehi yuvireco. Iyavei icuaiṛi veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepiā acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “jEriol!” ehi cheu. ² Ahese asepiā cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco reroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “jEriol!” ehi vahe cheu. ⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pīpendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “jEriol!” ehi vahe cheu. Amahe sese, ipare asepiā cavayu sū vahe, ahe ava ihari pendar vireco opo pipe mbahe rāhasa. ⁶ Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “jEriol!” ehi cheu. ⁸ Amahe, ipare asepiā cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbahe rasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepiā mbahe seropovēhepri rendavri ve ava hā, ahe yucasa vahe yuvireco Tūpa Ñehengagüer mombhusa sui tēi iyavei Jesús seroyasa sui tēi avei no. ¹⁰ Ahe aipo ehi pīrata yuvireco: “Ore Yar Tūpa serer maranehi, supi tupri vahe, ¿mbahese vo eremobaraisura ore yucasarer yuvirecoi vahe ivi pīpendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi riri ipīratā vahe. Ari evocoyase sū, aviye acoi turucuar sū vahe mano sendar yemondesa iyavei yasi pīrā inungar tuvi, ¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco.

¹⁵ Mborerecuareta avei co ivi pīendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe oreu! ¹⁷ Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai íva pendar yuvino hai vahe irohí coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepeí yepe ivira ro angara viña no. ² Ipare asepia avei ambuae Tūpa rembiguai íva pendar ou vahe ari sēsa coti sui, ahe vireco oyese Tūpa oicove vahe rer mondose. Ahe niha osapucuí pīratá evocoi irungatu tupri Tūpa rembiguai íva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoí suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehí iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no. ¹⁰ Ipare opacatú guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe oguapi vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai íva pendar yuvirecoi vahe oyere tupri Tūpa rendá rese, icuairpi rese avei yuvino ha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyero-asa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vahe rā ité yepi!” ehi.

¹³ Ahese icuairpi ipāhu pendar aipo ehi cheu cute: “¿Ereicua vo co ava rehí iturucuar morochi vahe pāve yuvirecoi, ereicua que sui pīha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi

cheu: “Co acoi yuvínose tupri vahe ité teco asisa sui yuvireco, inungar oyosei, omomorochi vahe oturucuar, ěgüe ehi avei güecocuer imomorochi Ovesami ruvi pipe yuvireco.

¹⁵ “Sese Tüpa renda rovai yuvirecoi, chupe mbahe apo ãgua ari, pĩtu rupi avei sēta pipe.

Güendave oguapi vahe oĩ, güecocuer pipe osepira.

¹⁶ Evocoi ndiyumbiasi iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai, ahe osārora ava rehi sereco inungar ovesa rārosar. Ipare opara vīraso tecovesa resendar i ndopai vahesave imboihu ãgua. Tüpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sū tupri ivave ñepe hora yemombitesa rupive. ² Ichui asepia siete tupri Tüpa rembiguai iva pendar yuvinohei vahe Tüpa rovai, chupe opa imondosa siete tupri mimb. ³ Ipare ou ambuae Tüpa rembiguai iva pendar oro itaisi rapisa reseve, iyavei ou ohā itaisi rapisa renda rovai; ipare imondosa tuvichā itaisi chupe oicuavēhe vaherā oyoya tupri opacatu ava Tüpa upendar yeruresa rese oro mbahe reropovēhepri renda harive; ahe Tüpa renda rovai chini vahe. ⁴ Itaisi rātachi evocoiyase oso Tüpa rembiguai iva pendar po sui. Ěgüe ehi oyepota oso Tüpa recosave, oyoya tupri chupendar yeruresa rese. ⁵ Ipare evocoiyase Tüpa rembiguai iva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimb

⁶ Evocoiyase siete tupri Tüpa rembiguai iva pendar oyemoingatu voi güemimbi moñehe ãgua yuvireco.

⁷ Yipindar vahe Tüpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvī rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihī reseve avei opa yuvirocai.

⁸ Imoñuviriosa Tüpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvī. ⁹ Iyavei para guasu mombosapisa yahocuer pipendar ava omanó yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tüpa rembiguai iva pendar omoñehe güemimbi, ahese yasitata tuvichā vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no. ¹¹ Yasitata rer evocoiyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tüpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape

iri yuvireco ari mombosapisa yahocuer pipe, p̄itu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu p̄itumimbi vahe mboisa. ² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoiyase evocoi tātachi ndosesape uca iri ari upe, niporēhi iri eté mbahe. ³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco p̄irata āgua inungar acoi mbaherumbiquiāpe. ⁴ Icuaisa rumo opacatu capihi mbahe roc̄ri iyavei ivira momaraēhi āgua, Ēgüe ehi rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuita chupe ava yuca āgua. Ēgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oāca rese evocoiyase vireco ndoyavii yeguaca oro apopri, iyavei sova aviye tupri ité ava repiaca. ⁸ Iha ndoyavii cuña ha, sāi evocoiyase ndoyavii tupri yagua p̄ita rāi. ⁹ Setecuer evocoiyase oyopia tupri guarepochi apopri, iyavei ipepo riapuḡer aviye tupri ité acoi cāreto riapuḡer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiāpe popiar. Ahe niha vireco op̄ratasa poyandepo yasi rupi ava momara āgua tēi. ¹¹ Evocoi tucru guasu rerecuar, ahe icuapri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoiyase Apolión ehi.

¹² Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

¹³ Imoñepeï ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaïndar irungatu sāchi vahe p̄ahu sui. ¹⁴ Ahe aipo ehi evocoi imoñepeï ovasa Tūpa rembiguai upe: “Eyorapa evocoi irungatu Tūpa rembiguai ñapichimbr̄i iai guasu Eufraates ivirindar” ehi. ¹⁵ Evocoiyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ēgüe ehi asepia cavayu rehii che quer nungar pipe, ihar̄i pendar evocoiyase vireco opochiha rupi tupri oyoepisa guarepochi apopri yuvireco, ahe iparaḡer p̄ira vahe tata nungar, sovi vahe, iyu vahe avei no. Cavayu rehii āca evocoiyase aviye tupri yagua p̄ita āca, iyuru sui evocoiyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu p̄iratas̄a iyuru rese ch̄ini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumb̄irer rumo nomanopa vitei vahe co mbahe tēi sui yuvireco, nosecuñaroi eté güecocuerai yuvireco. Ndogoi potai eté carugar mboetei

aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmpi

¹ Ipare asepia ambuae Tūpa rembiguai iva pendar ipīratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sová sendí aviye ari, setima evocoiyase ndoyavii tata rendigüer opūha tupri vahe.

² Cuachiarmpi oyemboi vahe vireco opove. Opri oacato cotindar pipe opiro para guasu rese, ambuae opive evocoiyase opiro ivi rese. ³ Evocoiyase sáse pīratá, inungar yagua pīta rāse; sāsese, evocoiyase siete tupri osunu vahe ñehe oyendu yuvireco. ⁴ Oñehepase, ahese iñehe che aicuachiarmpa viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tūpa rembiguai asepia vahecuer, ahe acoi opiro vahe para guasu rese, ivi rese avei opo oacato cotindar omopuha iva coti. ⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarsa iri chietera; ⁷ oyepotase rumo imoñuvirio ovasa Tūpa rembiguai upe güemimbí moñehe água, ahese imboavíesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tūpa rembiguai vireco vahe evocoi opiro vahe para guasu rese ohā, ivi rese avei no” ehi. ⁹ Evocoiyase aso Tūpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sēhera eiri nungar, nde aviterve rumo irora” ehi cheu.

¹⁰ Ahese aipisi cuachiarmpi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu.

¹¹ Evocoiyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirio ava Tūpa recocuer mombehusar

¹ Ipare ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesāhai chira rumo ñachimbri pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opirora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirio ava amondora che recocuer mombehu água opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirio, ahe inungar ñuvirio ivira Olivo iyavei inungar ñuvirio vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osēra tata sapipa água; égüe ehira ava omano que che reco mombehusar reco momara potasar. ⁶ Co ñuvirio

vireco opiratasa oqui vahe mombita ãgua, acoi ari rupi che reco mombehu viteseve yuvireco; iyavei vireco pīratasa i recuñaro ãgua tuvi pipe yuvireco, imombaraisu uca ãgua avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. ⁸ Sehōgüer evocoiyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amové ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiaño tēira sehōgüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporecora oyese yuvireco. Esepia, evocoi ñuvirío ava Tūpa ñehe mombehúsar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoiyase ava opacatu osepia vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipīrata vahe íva suindar aipo ehi vahe: “¡Peyeuropa ave ívate!” ehi. Evocoiyase opa oyeupi ívave yuviraso íva quíha pāhu rupi oamotarēhisareta rembiepiave. ¹³ Aheseve voi oime ivi rirí tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoiyase ava rumbirer, osiquiyepave tēi osapucai Tūpa íva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe íva suindar aipo ehi vahe:

“Yande Yar Tūpa, Sembiporavo Poropísorosar avei vireco co ivi pipendar mborerecuasa opovrive yuvireco cute.

Ahe evocoiyase mborerecuar apirēhi vaherā itera secoi” ehi.

¹⁶ Evocoiyase veinticuatro tupri icuai pri, evocoi uguapi vahe yuvinoi Tūpa renda rovai, ahe oyeaivi omboya ité osíva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūrítei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehí pendar nde amotarēhí ité yuvireco.

Nde ñemoirosa rumo cūrítei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehúsar upe,

ndeundar seco catupri vahe upe, iyavei acoi nde rer mboeteisar upe no, que seco ívate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo íva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi orirí, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco. ² Co cuña ipuruha oico, sãsé tēi omembrî iha pota água oyesui. Esepia niha, oiporará ité tasicuer. ³ Ipare coye oyecua iva rese ambuae mbahe mboyecua tuprisa: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotirîri yasitata iva pendar imombosapisa sui ñepey yahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembrî oha ramoseve” ehi viña. ⁵ Ipare co cuña membrî oha cuimbahemi, ahe mborerecuar virecora mbococa guarepochi apopri, ipïrata catu vahe secoira opacatu ava ivi rupindar upe. Ichui serocuasa voi serasosa Tûpa rovai. ⁶ Cuña evocoyase oñemi ivi iporupirêhisave oso. Aheve omoingatu Tûpa iyemboerecua água, eipeve icaru água mil dosciento sesenta ari rupi.

⁷ Oime avei vavasa ivave; ahesé Tûpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. ⁸ Ndoicatui eté rumo Miguel recipi água yuvireco. Sese ndipoi eté ivave seco água yuvireco chupe. ⁹ Êgüe ehi imboyepepisa mbahe ipi oporomocañi vahe reco pïratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoyase asendu ñehesa ipïrata vahe ivave, aipo ehi vahe:

“Cûritei oime poropïsirosa, pïratasa iyavei yande Tûpa mborerecuasa, Poropïsirosar mborerecuasa avei no.
Esepia niha, imboyepepisa iva sui acoi oseca-seca vahe yande rivri Tûpa rero yasareta recocuer momara água pïtu, ari yacatu rupi yande Ru Tûpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyeyi eté güetecuer mocañi água yuvireco.

Ahe rumo oyemoingatu voi eté omano água.

¹² ¡Peyemboviha catu pe iva iguar peico vahe!

Pe rumo, ¡preparaisu catura ivi pipe, para guasu pipe avei peico vahe!

Esepia niha, Carugar ogüeyi pēu oñemoirosa pipe, oicuase güeco pucuehi água” ehi.

¹³ Ipare mbahe ipi oporomocañi vahe oicuase imombopri güecose ivi rese, ahesé omoña cuña imembrî cuimbahemi reseve yamotarêhisá pipe.

¹⁴ Evocoi cuña upe rumo imondosaño ñuvirío vira guasu pepo iveve água chupendar ivi imoingatupri ava porêhisave seco água, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. ¹⁶ Ivi rumo oime co cuña pïtivisa, ahe oyeca. Ipare opa omoco iai evocoi mbahe ipi oporomocañi vahe rembiapo. ¹⁷ Evocoyase, oñemoiró iteanga cuña rese, ipare oso ovava ambuae ichuindar rehî rese, ahe omboyeroya vahe ité Tûpa porocuita

yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

¹ Ipare asepia para guasu pipe sui osêse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vireco ñepeipei oyeguaca, iyavei oãca yacatu rese vireco terer Tũpa upe mbahe tẽi vahe. ² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua pĩta yuru. Mbahe ipi oporomocañi vahe evocoiyase omondo opĩratasa iyavei omborerecuasa chupe. ³ Ñepeipei mbahe ipi vai ãca oyeapicha guasu vahe ndoyavii omano vaherã itẽ viña; ahe rumo ocuera tupri iriño evocoiyase opacatu guasu ava sepia, ndoyembovĩhai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndi poi etẽ mbahe ipi vai nungar, iyavei ndi poi etẽ ava oicatu vahe ovava vaherã sese” ehi yuvireco.

⁵ Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tũpa reroĩro ãgua avei no, iyavei mborerecuar guasu seco ãgua cuarenta y dos yasi rupi. ⁶ Eẽgũe ehi iñehe mara-mara tẽi Tũpa rese, iñehe-ñehe tẽi avei serer maranehi rese, sẽta rese, iva pendar rese avei no. ⁷ Imondosa avei chupe vavasa apo uca ãgua Tũpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tẽi vahe upe, secua ambuae vahe upe, ambuae-ae tẽi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño itẽ omanora.”
Co pipe oyecua Tũpa rese yeroyasa iyavei ipĩratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui. ¹³ Iyavei oyapo setã mbahe poromondiisa mbahe mboyecua ãgua. Iva sui etẽ niha oiti uca tata ivive imbou opacatu ava rembiepiave. ¹⁴ Ombopa tẽi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. ¹⁵ Ipare imondosa pĩratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiẽhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecopri vahe upe, mbiguai tẽi upe, ahe chupe, “Toyecuachia opo oacato cotindarve yuvireco, anise osivave” ehi. ¹⁷ Ahese ava ndi poi etẽ oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ãgüe ehi siapugüer. ³ Ipare osapucaí sapucaisa ipiasu vahe yuvireco Tüpa rovai iyavei iva pendar irungatu yuvirecove vahe rovai, icuairi eta rovai avei no. Ñepeí yepe que iva pendar ndoicatui eté evocoi sapucaisa rese oyembohe vahe. ãgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pãhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovēhepri Tüpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tüpa rembiguai omombehu iñhe ava upe yuvireco

⁶ Evocoiyase asepia ambuae Tüpa rembiguai iva pendar oveve vahe iva mbiter rupi iyavei vireco Tüpa Ñhengagüer písirosa resendar ndopai vahe imombehu ãgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñhe ambuae-ae vahe upe, opacatu tecua rupindar upe avei no. ⁷ Ipare oñhe pĩrata aipo ehi: “Pesiquire Tüpa sui iyavei pesapucaí seco ivatesa rese chupe no. Esepia niha, cūritei oyepota ari chupe ava recocuer rese iporandu ãgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tüpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tüpa rembiguai iva pendar imombosapisa, saquicue moña aipo ehi pĩratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía ãgua osiva rese, que opo rese no, ¹⁰ oipisi itera Tüpa ñemoirosa ipĩrata vahe ité; ipare omombaraisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no. ¹¹ Tātachi icaigüer pendar evocoiyase oyeupira ndopai vahe, ahese ndipoi chietera pituhusa pĩtu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Ĕgüe ehira Tüpa rese ité yuvirecoi vahe yeroyasa oyecua ahe acoi iporocuaíta mboavīye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ĕgüe ehi eté —ehi Espiritu imombehu —, opituhura oporaviquisa sui yuvireco. Esepia, mbahe sembiapo rerācua osora ivave supi” ehi.

Ivi pipendar recoãhasa

¹⁴ Ahese asepia iva quiha morochí vahe; iharive ndoyavii ava uguapi vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove. ¹⁵ Ipare osẽ ambuae Tũpa rembiguai tũparo sui. Ahe osapucai pĩrata evocoi iva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoyase evocoi chini vahe oyasia güemiti ivive oico, ahese opa omonuha güembiasia.

¹⁷ Ipare osẽ ambuae Tũpa rembiguai tũparo sui, ahe avei vireco mbahe miti asiasa saimbé vahe. ¹⁸ Ipare ambuae Tũpa rembiguai osẽ mbahe reropovêhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ivi pipe! ¡Esepia niha, opa yaviye!” ehi. ¹⁹ Evocoyase co Tũpa rembiguai inungar oyasia vahe uva ha êgüe ehi opa ava ipaha ivi pipendar. Ipare opa oyapocatu Tũpa ñemoirosa rãro ãgua. ²⁰ Ipare inungar uva ha icambepri tecua cupeve, êgüe ehi co ava imombaraisu; ichui osẽ tuvi evocoi tipigüer oyeputa ité cavayu yuru penda rupi eté sese, ahe ipucucuer trescientos kilómetros tupri ité.

15*Ipa siete tupri Tũpa rembiguai güeru mbaherasi yuvireco*

¹ Ipare asepia ivave ambuae mbahe mboyecuasa tuvichá vahe poromondiisa: siete Tũpa rembiguai, siete tupri mbaherasi ipa vahe vireco vahe, ahe ipá vahe ité Tũpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinocha ati mbahe ipi vai recopisar, sahanga recopisar iyavei nomondo uca potai vahe serer cuachía ãgua yuvireco oyese. Ahe vireco Tũpa upendar arpa yuvireco. ³ Ipare osapucai Tũpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tũpa opacatu mbahe mboavaisarêhi; nde recocuer supi tupri vahe ité; seco ivi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tũpa rëta imaranehi vahe. Aheve acoi yapocatusa mborocuita resendar. ⁶ Evocoyase ichui yuvinosapa evocoi siete Tũpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco.

⁷ Ipare ñepeí evocoi irungatu iva pendar yuvirecove vahe pãhu pendar omondo siete tupri Tũpa rembiguai upe siete Tũpa ñemoirosa rĩru oro apopri, ahe oicove vahe ité, ndopai vahe. ⁸ Ipare Tũpa rëta omboapipo tãtachi, evocoi ou vahe Tũpa reco porañetesa iyavei ipĩratasa sui. Aheve ndiyai eté que ava upe seique ãgua acoi opase voi eté omomba siete tupri mbaherasi vai vireco vahecuer siete Tũpa rembiguai.

16*Siete Tũpa ñemoirosa rĩru*

¹ Evocoyase asendu ñehesa ipĩrata vahe osẽ vahe Tũpa rẽta pipe sui. Ahe aipo ehi siete Tũpa rembiguai yuvirecoi vahe upe: “Peso, tapeipiýerepa ivi hari rupi evocoi siete tupri mbahe riru pipendar Tũpa ñemoirosa” ehi.

² Yipĩndar vahe Tũpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tẽi avei, ahe chupe oime setá caracha vai tasí vahe.

³ Tũpa rembiguai imoñuviriosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tũpa rembiguai imombosapisa opa oipiyere igua riru pipendar iai pipe, i ohẽ vahe pipe avei no. Ipare opa ahe oyeapo tuví yuvireco. ⁵ Co pare asendu Tũpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembose nde ñemoirosa, che Yar Tũpa,
seco maranehi vahe.
Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehe mombehusar yuvireco.

Cũritei rumo eremboihu uca tuví pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovẽhesa renda sui aipo ehi vahe: “Supi eté, che Yar Tũpa, opacatu mbahe mboavaisarẽhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

⁸ Tũpa rembiguai imoirungatusa, opa oipiyere mbahe riru pipendar ari rese, ipare ari upe imondosa pĩratasa ava rapipa ãgua. ⁹ Ipare opacatu ité ava yuvirocaipa tupri; ndoyeví eté rumo Tũpa upe iyavei nomboteiño ité yuvireco. Ëgũe ehi rumo iñehe mara-mara tẽiño mbaherasi rerecose Tũpa upe yuvireco.

¹⁰ Tũpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tẽi serecuar ipovri pendar avei pĩtumimisave yuvirecoi. Ava evocoyase oñeapecusuhu-suhu tẽi yuvireco mbahe rasícuer pãhuve; ¹¹ ndopoiño ité rumo mbahe-mbahe tẽi aposa sui yuvireco, ahe rumo iñehe mara-mara tẽiño Tũpa ivate vahe rese oyeupe mbahe tasí vahe pãhuve yuvireco.

¹² Tũpa rembiguai imoñepei ovasa oipiyere mbahe riru pipendar iai guasu Eufrates pipe. Ahe evocoyase opa ipiru peri apo ãgua añihivei coti sui mborerecuareta yu ãgua.

¹³ Ipare asepia mbahe ipi oporomocañi vahe, mbahe ipi vai, ndahehi vahe Tũpa ñehe mombehusar supi vahe avei, ahe yuvirecoi vahe yuru rupi yuvinose mbosapi caruguar vireque nungar. ¹⁴ Co Caruguar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha ãgua vavasave nara, acoi ari cañi pipe Tũpa mbahe mboavaisarẽhi amotarẽhisave.

¹⁵ “Peyapisa tupri che ñehe rese, che aviyeteramo tẽi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiape aviyave vahe pipe. Ahese nochí chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tũpa rembiguai oipiyere iñemoirosa mbahe riru sui ivitu rupi. Ipare iva pendar Tũpa rẽta pipe sui osẽ ñehesa ipĩrata vahe evocoi ou vahe senda sui: “¡Opa ité yaposa cute!” ehi. ¹⁸ Ahese oime overa vahe,

mbahe siapu guasu vahe iyavei osunu vahe. Ipare ivi oriri ipirata catu vahe opacatu ivi riri sui ava yuvirecove viteseve ivi pipe. ¹⁹ Tecua guasu oyecayeca mbosapi rupi, opacatu tecua evocoiyase opa onduru ivi pipendar. Ipare Tupa oyemomahenduha evocoi tecua guasu Babilonia pendar rembiapo ai rese, evocoiyase omondo ofemoirosa ipirata catu vahe chupe. ²⁰ Opacatu caha pahu, ivitri avei ocañipa ite yuvireco. ²¹ Iyavei yuviroviapipa iva sui ava harive amanda guasu, ahe iposiiguer cuarenta kilos rutei. Ava rumo ñehe mara-mara teiño vite ite Tupa upe yuvireco amanda sui tei. Esepia niha, evocoi Tupa pronopasa ivaté catu vahe.

17

Cuña oyemondo-mondo tei vahe mocañisa

¹ Siete Tupa rembiguai vireco vahecuer mbahe riru yuvireco, ipahu pendar ñepeu ou aipo ehi cheu: “Erio, amboyecuara co cuña yaguasa serai vahe upe ñemoirosa ndeu, ahe evocoi oguapi i harive oi” ehi. ² “Co cuña rese yaguasaguasa tei mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai ete oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tupa rembiguai iva pendar che reraso ava porëhisave. Aheve asepia cuña mbahe ipi vai pira vahe harive chini. Evocoi mbahe ipi vai opacatu rupi oyapete tupri ñehesa vai Tupa amotarëhisa sereco oyese, iyavei vireco siete tupri oaca, diez tupri guachi. ⁴ Co cuña turucuar, suendi vahe, pira vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa teisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tei vahe si, opacatu ava ivi pipendar secocuer yavaeté vahe si avei no” ehi. ⁶ Ipare aicua evocoi cuña osavaipo vahe oi Tupa reroyasar ruvi pipe iyavei acoi Jesús recocuer mombehusa sui tei yucapri vahe ruvi pipe avei no.

Co asepiase che quer nungar pipe, ndache mbovihai ete. ⁷ Ahese ahe Tupa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oaca, diez tupri avei acoi sachi” ehi. ⁸ “Acoi mbahe ipi vai erese pia vahe ahe yipive secoi vahe, cüritei rumo ndipo iri; osëra rumo ivicuar guasu ipicucu vahe sui omano agua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoëhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecua senducua agua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapi oi iyavei ahe siete ñaca avei omoporëhi ‘siete tupri mborerecuar’ oyapave. ¹⁰ Cinco tupri mborerecuar evocoi ipahu pendar ndipo iri yuvireco, ñepeño evocoiyase oporocuai cüritei oico, ambuae rumo ndou vitei. Ouse rumo ipandar, ou raimi teira. ¹¹ Mbahe ipi vai secoi vahe yipindar, ndoicove iri cüritei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi tei vaherã secocuer” ehi.

¹² “Evocoi diez tupri vahe sachi, ahe mborerecuar diez tupri ndoyuviroique vitei vahe oporocuai vaherã yuvireco. Oyoya rumo oporocuai raimi teira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe

ipi vai upe omondo vaherã pĩratasa iporocuai ãgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secõi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata ãgua yuvireco” ehi.

¹⁵ Iyavei Tũpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tẽi vahe oguapi oĩ, ahe ‘ava rehĩ tecua yacatu rupindar’ ñehe ambuae-ae vahe iyavei opacatu ambuae tẽi vahe ivi rupindar’ oyapave. ¹⁶ Evocoi eresepia diez tupri vahe sãchi mbahe ipi vai rese, ahe ndoyambotai chira cuña yaguasa-guasa tẽi vahe; iyavei osequi tupri seya; ohupara soho, ipare opara osapi. ¹⁷ Tũpa niha omondo ipiha pipe mbahe güemimbotar apo ãgua ‘ahe toymonguerẽhi yuvireco omborerecuasa mondo ãgua mbahe ipi vai upe; tomboaviye rane ité che remimombehugüer yuvireco’ oyapave. ¹⁸ Iyavei evocoi cuña yaguasa-guasa tẽi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tũpa rembiguai cheu.

18

Babilonia viapi agüer

¹ Ipare asepia ambuae Tũpa rembiguai ipĩrata vahe ogüeyi vahe iva sui. Vireco omborerecuasa ivatẽ vahe, ahe sendigüer osesape tupri ivi rupi.

² Iyavei oñehe pĩrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vĩrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tẽi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoaẽhi ãgua.

Iyavei ñepe yepi taperupiti eme imbaherasisa.

⁵ Esepia niha, yangaipagüer oyepota ité ivave.

Tũpa evocoyase oyemomahenduha mbahe-mbahe tẽi sembiapogüer rese chupe.

⁶ Inungar ahe ambuae upe, ãgüe peye tupri avei chupe; pemboepi ñuvirio rupi mbahe sembiapogüer chupe; pemomirata catu mbahe igua ñuvirio rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tẽi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vĩte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tẽi oura mbaherasisa chupe:

paraisusa, tieporẽhi, manosa; ipare sapisara.

Esepia niha, yande Yar Tũpa mbahe mboavaisarẽhi secõi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña! Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que vīrocua vahe rā imbahe yuvireco ichui, ¹² co opacatu mbahe sepi vahe rā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape śiacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe śiacua vahe; uva ricuer, mbahe quira, trigo cuhi avīye vahe, trigo avei; iyavei mbahe mīmba ovosii vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovīhai tēi chira yuvireco no, ¹⁶ iyavei aipo ehi tēira yuvireco:

“¡Too! ¡iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

pīra vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehi ivirindar carite guasu reroguatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucai pīrata tēi yuvireco: “¡Ndi poi eté niha yipisui tecua na ehi vahe!” ehi yuvireco. ¹⁹ Ipare imboasipave omondo ivi cuhi oācave yuvireco, oyaseho iyavei ndoyembovīhai tēi, ipare osapucai tēi yuvireco aipo ehi:

“¡Too! ¡iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovīhaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe, opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirēhi vahe rā” ehi.

22 “Ndasendusa iri chietera ocar rupi arpa moñehesar, mimbî moñehesar, iyavei mimbî guasu moñehesar avei no; ndererecoi chietera ava oporaviqui vaherã, ndasendusa iri chiaveira ita mbahe mbocuhisa monarasa nde suindar.

23 Iyavei ñepeï yepe que tataendi ndosesapei chietera ndeu, ndasendusai chiaveira ava aïvu mendasa rupi, yepe niha nde ava upe mbahe mondosar seco pîrata etepri vahe opacatu rupi ereico viña.

Iyavei erembopa-mbopa tõi opacatú ambuae tecua rupindar eico nde payesa pipe” ehi
Tûpa rembiguai chupe.

24 Esepia niha, evocoi tecua guasu pipe oyecua Tûpa ñehe mombehúsar ruvi, Tûpa upendar ava ruvi, iyavei opacatu ava yucapri vahe ivi pipendar ruvi avei.

19

1 Co pare, asendu ava rehii ñehe pîrata ivave aipo ehi vahe:

“¡Imboeteipri yande Yar tasecoi!

Poropisirosa, teco porañetesa iyavei ipîratasa ahe yande Ru Tûpa suindar.

2 Esepia niha, ahe oyapo mbahe supi eté vahe,

“Tocañi ehise co cuña oyemboaguasa-guasa tõi vahe nungar tecua guasu upe evocoi niha osecó momara tõi vahe ava ivi pipendar güeco rai pipe; ichui Tûpa osepi oyeupendar” ehi.

3 Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua râtachi ndopai chietera” ehi.

4 Evocoiyase veinticuatro tupri ìva pendar icuaipti yuvirecoi vahe iyavei irungatu ìva pendar yuvirecove vahe, ahe Tûpa mboeteisa pipe oyeaivi ivi rese yuvireco. Ipare aipo ehi yuvireco no: “¡Ëgüe tehi! ¡Imboeteipri yande Yar tasecoi!” ehi. 5 Evocoiyase Tûpa renda sui tupri oyeendu ñehesa aipo ehi vahe:

“¡Pemboetei yande Ru Tûpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya ãgua!” ehi.

Pieta mendasa Ovesami resendar

6 Asendu avei ava rehii ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tûpa opacatú mbahe mboavaisarëhi omboipi oporocuai.

7 Tayayemboviha catu yaico iyavei tayamondo yande viharetesa, yande sapucaisa yande Ru Tûpa upe.

Esepia niha, cûritei oyepota mendasa ari Ovesami upendar.

Sembireco evocoiyase opa oyemoingatu oico:

8 chupe ipotasa iyemonde ãgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tûpa rese yuvirecoi vahe recocuer ihivi vahe” oyapave aipo ehi” ehi.

9 Evocoiyase Tûpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tûpa ñehesa supi tupri vahe ité” ehi.

10 Ipare añenopiha Tûpa rembiguai rovai imboetei ãgua. Ahe rumo aipo ehiño cheu: “Ëgüe erei rene. Esepia, che Tûpa rembiguai tõi aico nde nungar

iyavei nde rivireta nungar oguata vahe Jesús ñehengagüer rupi. Emboetei Tüpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tüpa ñehe mombehusar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa. ¹² Sesa evocoiyase ndayaviyei eté acoi tata rendigüer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoiyase imopirapri tuví pipe; serer evocoiyase, “Tüpa Ñehe” ehi. ¹⁴ Sundao rehi iva pendar saquicuerive yuvirecoi. Iturucuar secose vahe päve morochi vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osē quise pucu saimbe vahe opacatu ambuae-ae tecua rupindar momara ñgua. Ahe oyocuaira oamotarēhisar guarepochi apopri opo pendar pipe. Iyavei oscoãhara inungar uva opive otiamii vahe yuvireco iyavei ombohura evocoi uva ricuer paraísu catusa resendar pipe. Ahese Tüpa mbahemboavaisarēhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tüpa rembiguai opüha vahe arisave. Ahe osapucui pírata opacatu vírai mbahe rohoguar upe oveve vahe iva rese: “¡Perio! ¡Peñemonuha Tüpa suindar carusa guasusave; ¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu va roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava ñgua evocoi cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendasa, oyoya evocoi Tüpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetēi vahe sahanga yuvireco. Evocoiyase co mbahe ipi vai iyavei Tüpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoiyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoiyase opacatu vírai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tüpa rembiguai ogüeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi ñgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapí yuvinoi evocoi oipisi vahe omborerecuasa yuvireco ava upe mbahe rese porandu água. Iyavei asepia ava hã evocoi opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nombotei vahe mbahe ipi vai yuvireco; sahanga avei nombotei yuvireco no; iyavei nomondo ucai vahe avei osiva rese serer yuvireco, ope rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi! Imoñuviriosa manosa evocoyase chupe ndipo iri eté. Ēgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Carugar recopisa

⁷ Acoi osupitise rumo mil araviter cute, ahes Carugar yorasara soquendasa sui. ⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi água, ivi Magog mbopa tēi água avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ēgüe ehi yugüeri ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. ¹⁰ Carugar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pítu, ari yuvireco apirēhi vaherã.

Tūpa oguapira güendave ava recocuer rese porandu água ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapí vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahes cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda água oyemboetei tupri omevi upe. ³ Ipare asendu ñehesa pírata tenda suindar aipo ehi vahe: “Tūpa cūrítei oicove ava rehii pāhu rupi oico. Ahe oicove vaherã ité sese yuvireco yepi, ahe ava evocoyase chupé nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi

chietera; ndoyasehoi chira yuvireco; ndipoi chira viharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oi, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepi vahe pipe.

⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboetisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirío manosa” ehi.

Tecua Jerusalén piasu

⁹ Evocoyase ou ñepeí siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi.

¹⁰ Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui. ¹¹ Ahe tecua sendí iteanga Tūpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipīrerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu āchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñehe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no. ¹⁶ Tecua guasu pucucuer oyoya tupri ipigüer rese. Evocoyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no. ¹⁷ Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

¹⁸ Tecua āchisa ahe ita porañete vahe Jaspe serer vahe apopri; tecua evocoyase oro pāve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tēi iporañete vahe pāve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónice; imoñepeí ovasa, cornalina; imoñuvirío ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista. ²¹ Doce tupri vahe oquenda guasu ahe doce tupri mbohír; ñepeí-peí oquenda ñepeí mbohír sui yapopri. Calle guasu tecua

aviter rupindar evocoyase oro pāve, inungar vidrio yande porēhi tupri vahe ipipe.

²² Ndasepiai eté evocoi tecua guasu pipe ñepeí yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secói aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei avā mbahe yar mborerecuar ivi pipendar opará güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pitu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acói ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tūpa rembiguai omboyecua iai tecovesa resendar cheu, típiu, oyecua tupri, osē vahe Tūpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepeí araviter pipe. Iyavei evocoi ivira ro aviye ai ava opacatu rupindar mbogüera āgua. ³ Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembíguai eta omboeteira yuvireco. ⁴ Osepiara sova iyavei virecora serer osiva rese yuvireco. ⁵ Aheve ndipoi chietera pitu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape āgua yuvireco. Esepia niha, yande Yar Tūpa teieté osesapera. Ipare ahe ava mborerecuar apirēhi vaherā ité yuvirecoira sese.

Cōimi eté Jesucristo yevi āgua

⁶ Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acói omboyecua tupri vahe mbahe oyesuindar oñehe mombehusar upe, ahe ombou güembíguai iva pendar mbahe omboaviye poyava voi vaherā mboyecua āgua viroyasareta upe” ehi.

⁷ “¡Ayevi poyava voira curi! ¡Sorivete catura acói ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña. ⁹ Ahe rumo aipo ehiño cheu: “Ani ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, ari cōimi secói imboaviye āgua. ¹¹ Acoi ava mbahe tēi aposar, toyapoño mbahe tēi; iyavei acói ava seco rai vahe, taseco raiño ité oico; acói ava seco tupri vahe rumo, ahe toyapoño mbahe tupri oico; iyavei acói ava Tūpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevei poyavara, iyavei arura mbahe porerercosa ñepepei-pei ava rembiapogüer rupi-rupi amondo vaheerã chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirêhi vaheerã” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirêhi vahe resendar. Ipipe sui oiquera tecua guasu pipe. ¹⁵ Ava rehi ndiporeroyai vahe rumo opitapara ocarve tẽi yuvireco, iyavei ava ipaye serai vahe, oyemboaguasa-guasa tẽi vahe, oporoyuca vahe, mbahe rahanga upe tẽi oyerogui vahe, iyavei opacatu ava oipota rai vahe oporombopa-mbopa tẽi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroiyasar upe ofõemonuha vahesa rupi-rupi. Che aico mborerercuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tũpa suindar mbahe oime vaheerã resendar icuachiapri co cuachiar pipe yuvireco, ahe chupe, “Pecua catu” ahe. Amove que ava co mbahe resendar omboyeapi iri vahe, ahe chupe Tũpa omboyeapi aveira co cuachiar pipendar mbahe-mbahe tẽi imombehupri. ¹⁹ Amove que ava virocua vahe co cuachiar pipe sui ñehesa Tũpa suindar, Tũpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevei poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.